

ЎЗБЕКИСТОН РЕСПУБЛИКАСИ ОЛИЙ ВА ЎРТА МАХСУС
ТАЪЛИМ ВАЗИРЛИГИ

АЛИШЕР НАВОЙЙ НОМИДАГИ САМАРҚАНД ДАВЛАТ
УНИВЕРСИТЕТИ

ХОТАМ УМУРОВ

АДАБИЁТ НАЗАРИЯСИ

(Дарслик)

«ШАРҚ» НАШИРЁТ-МАТБАА АКЦИЯДОРЛИК
КОМПАНИЯСИ БОШ ТАҲРИРИЯТИ
ТОШКЕНТ – 2002

Республика университетларининг Ўзбек филологияси йўналиши (факультетлари)да «Адабиёт назарияси» бакалавриатнинг 4-курсида ўрганилади. Унда адабиёт, бадиий асар, ижодий жараённинг муҳим қонуниятлари, адабий тур ва жанр, ижодий метод ва услуб муаммоларининг моҳияти, сўз ва сўзшуносликнинг сехру жозибаси ҳақида зарур назарий таълимот берилади.

Ушбу дарслик Олий ўкув юртларининг филолог талаба-бакалаврлари, магистрлари, тадқиқотчилари, аспирантлари, докторантлари ва адабиётга қизиқувчи барча ижодкорларга мўлжалланган.

СЎЗ БОШИ

«Адабиёт назарияси» фани XX аср ўзбек адабиётшунослигида анча чуқур ўрганилди. Айниқса, 80-йилларнинг бошида атоқли назариётчи ва машхур драматург Иzzат Отаконович Султонов томонидан яратилган «Адабиёт назарияси» дарслиги эстетикамиз ривожига салмоқли таъсир кўрсатди. Унда адабиёт ва адабиётшунослигимиз эришган ютуқ ва тажрибалар, хуоса ҳамда сабоқлар синтез қилинди. Айни пайтда, адабиёт ҳақидаги илм-сўзшунослик табиатини изчил ва асосли ўрганишга йўналиш берди. «Адабиёт назарияси» (икки жилдлик), «Адабий тур ва жанрлар» (уч жилдлик) каби йирик тадқиқотларнинг, кўплаб «Адабиётшуносликка кириш» дарслик ва қўлланмаларнинг, минглаб назарий тадқиқотларнинг юзага келиши фикримизнинг исботидир.

Бугунга қадар бу илм ўрта мактабларда ҳам, ўрта-махсус билим (коллеж, лицей) даргоҳларида ҳам, олий ўкув юртларида ҳам ўрганилади. Турли ўқитувчилар ҳар хил савияда дарс берадилар. «Таълим тўғрисида»ги Қонун ва «Кадрларни тайёрлашнинг миллий дастури» эълон қилинганига қарамасдан, бу фанни оддийликдан мураккабликка томон изчил ўрганмасдан, кўпинча муайян адабий қонун-қоидалар бир хил қолипда такрор-такрор ўрганилаверилади.

Ҳатто олий мактабнинг филология факультетларида бу илм биринчи курсда «Адабиётшуносликка кириш» тарзида, тўртинчи курсда «Адабиёт назарияси» фани сифатида ўқитилади. Иккала дарсликлар қўёслангандা анчагина адабий қонун-қоидаларнинг таҳлил даражаси бир хил эканини яққол англайсиз; буни яна такрорлаш талабанинг қизиқишини пасайтиради ва ҳ.к.

Шу сабаб адабиёт қонун-қоидаларининг алифбоси ўрта мактабда, адабиётшуносликнинг «кириш», дастлабки илми коллеж ва лицейларда ва унинг мураккаб қисми, «математикаси» олий мактабда ўрганилишига эришиш мақсадга мувофиқдир.

Ушбу дарсликни яратишда ана шу ҳолат ҳисобга олинди. XX асрда ўзбек адабиётшунослигига сўз санъатига бағишлиган энг яхши тадқиқотларга (Хусусан, Фитратнинг «Адабиёт қоидалари»га, И. Султоннинг «Адабиёт назарияси»га, Н. Шукуров, Н. Хотамов, Ш. Холматов, М. Маҳмудовнинг «Адабиётшуносликка кириш» дарслигига, Т. Бобоев ва А. Улуғовнинг алоҳида нашр қилинган «Адабиётшуносликка ки-

риш» кўлланмаларига, Н. Хотамов, Б. Саримсоқовнинг «Адабиётшунослик терминларининг русча-ўзбекча изоҳли лугати» ва рус олимлари Г. Поспелов, Н. Гуляевнинг алоҳидаги чоп этилган «Адабиёт назарияси»га, Л. Тимофеевнинг «Адабиёт назарияси асослари»га, американлик олимлар Рене Уэллик ва Остин Уорреннинг «Адабиёт назарияси», поляк олими Генрик Маркевичнинг «Адабиёт ҳақидаги илмнинг асосий муаммолари» китобларига таянган ҳолда иш кўрдик. Улардаги сиёсий қарашлар таъсиридан қочишга, энг асосийси, сўзшунослик — «инсоншунослик» қоидасига амал қилишга, уни мустақил тушуниш ва ривожлантимиш йўлйўриқларини ўргатишга аҳд қилдик.

КИРИШ

«АДАБИЁТ НАЗАРИЯСИ» ФАНИ

Таянч сўз ва иборалар: Адабиётшунослик. «Адабиёт назарияси» предмети. Оммавийлик. Талантли шаҳе маҳсули. Бадиийлик. Мӯъжиза. «Поэтика». «Мұтасамушшуаро». «Қобусиома». «Мажолусун нафоис». «Адабиёт қоидалари». «Адабиёт назарияси». Мустақиллик мағкураси.

Адабиёт назарияси фани — адабиётшунослик фанинг адабиёт тарихи, адабиёт методологияси, адабий танқид каби асосий соҳаларидан бири. Адабиётшунослик фанинг предмети — адабий маҳсулот ва тарихий шароит диалектикасини, бадиий асарнинг қонуниятлари ва яратилиш жараёнини ўрганишдир. Адабиёт назарияси ҳам шу муаммоларни тадқиқ ва таҳлил этади. Айни пайтда, бошқа соҳалардан сўзшунослик ҳақидаги назарий таълимотларни умумлаштириши, ривожланиш қонуниятларини очиши, ўзига хос хусусиятларини ўрганиши; бадиий асарни таҳлил қилиш ва баҳо мөъёрини белгилаши билан фарқланади.

«Адабиёт назарияси бадиий сўз асарларининг ижтимоий ҳаётда ўйнаган роли, бадиий адабиётнинг ўзига хос хусусиятлари ҳақида, бадиий ижоднинг турлари, бадиий асарнинг тузилиши ва ижод жараёнининг қонуниятлари ҳақидаги таълимотдир. Адабиёт назарияси ўтмиш ва ҳозирги замон тарихий-адабий жараёнининг қонуниятларини ўрганади, адабиётни түғри тушуниш ва ривожлантириш учун керакли хulosаларни чиқаради. Адабиёт назарияси адабиётшунослик соҳаларининг ютуқлари асосида юзага келиши билан бирга, ўз илмий хulosалари орқали адабиёт тарихини ҳам, адабиёт методологияси ва адабий танқидни ҳам бойитади»¹.

¹ И. Султон. Адабиёт назарияси (Университет ва педагогика институтларининг филология факультетлари студентлари учун дарслик), «Ўқитувчи», Тошкент, 1980 йил, 22-бет (Бундан кейин ушбу китобдан олинган иқтибосларнинг бетларинигина кўрсатамиз).

Бадий адабиётнинг энг муҳим ва умумий хусусиятлари учта бўлиб, рус танқидчиси Виссарион Белинскийнинг «Адабиёт сўзининг умумий маъноси» мақоласида аниқ кўрсатилган.

Биринчиси — «адабиёт» доимо оммавийликка суюнади, ўз тасдиғини жамият фикридан олади», у «...бу тун халқдан, энг камида — халқнинг маърифатли қисми эътиборидан мадад олади. Адабиёт бутун жамиятнинг мулкидир». Шу сабаб ҳам адабиёт бой ва камбағалга, аёл ва эркакка, ёшу қарига, демакки, ирқу наслига, оқу саригу қоралигига қарамасдан ҳаммага, бутун инсониятга бирдай хизмат қилади. Умумжаҳоний ва умуминсоний хислати билан ҳаёт ва инсонни комилликка етаклайди. Муайян бир жойда туғилган талант яратган буюк асари билан (А. Навоий ва унинг «Хамса»си, А. Қодирий ва унинг «Ўткан кунлар»и каби) жаҳонни мафтун этади, «жаҳондан жаҳон» яратиб, инсонийликни эъзозлайди, улуғлайди, уни барчага «юқтиради». Вақтдан олис масофаларга зиё тараставеради.

Иккинчиси — **адабиётнинг маълум шахслар, талант эгалари томонидан яратилишидир.** Шу нуқтаи назардан ёзма адабиёт оғзаки адабиётдан фарқ қилади. Оғзаки ижодға мансуб асар (мақол, матал...)лај нинг ижодкори халқ бўлса, ёзма адабиётни яратувчилар «айрим шахслар бўлиб, улар ўзларининг ақлий фаолиятлари билан халқ руҳининг турли томонларини акс эттирадилар». Шу сабаб ўзбек адабиёти деганимизда Алишер Навоий, Мирзо Бобур... Ҳамид Олимжон, Абдулла Орипов каби аниқ шахслар кўз ўнгимизда гавдаландилар.

Учинчиси — **адабиётнинг бадиийлигидир,** яъни унда ҳаётнинг образлар орқали тасвирланишидир. Сўз воситасида инсон қалбини кашф этиш, у орқали ҳаётни қайтадан жонли қилиб, бойитиб, таъсирли қилиб яратишдир.

Ана шу муҳим хусусиятларнинг моҳиятини ўрганиш — адабиёт назарияси фанининг **бosh вазифаси** саналади. Адабиётнинг ижтимоий аҳамияти (оммавийлиги), адабиётнинг юзага келишида шахснинг фаолияти (талант, илҳом, бадиий маҳорат, ижодкорлик...), бадиийлик (ҳаётни аниқ ҳис қиласиган тарзда қайтадан жонли қилиб сўз воситасида яратишнинг сирусиноатлари) каби қирралари шунчалар жумбок, шунчак

лар жозибага бойки, уни ечиш, умумий қонуниятларини очиш, қимматини тайин этиш қийин, лекин зарурат бизни кашфиёт томон етаклади.

«Хақиқатдан ҳам нима учун кишилик онгининг ҳамма соҳаларида эришилган ютуқлар (яъни энг яхши фаний асарлар ёки ихтиролар) доимо нисбатан кичик доираларга мансуб кишиларни қизиқтиради-ю, бадиий адабиёт асари жуда ҳам кенг муҳлислар оммасига эга? Нима учун бадиий асар миллий, ирқий, географик, диний фарқлардан «ҳатлаб ўтиб» ер юзасидаги ҳамма кишиларнинг қалбини мафтун эта олади? Ёки, нима учун баъзи кишилар бадиий асар яратишга қодирдир-у, бошқалар инсон фаолиятининг турли соҳаларида (фанда, ҳунарда) қобилиятларини намойиш қилгани ҳолда, унга қодир эмаслар? Ниҳоят, адабиёт асарининг бадиийлиги, яъни ўқувчига таъсир қилиш қувватининг сири нимада? Нима учун бир ёзувчи миллион-миллион ўқувчиларни мафтун эта олади-к иккинчи ёзувчи қаттиқ меҳнат қилганига қарамай, кенг ўқувчилар оммасининг кўнглини ололмайди? Нима учун баъзи ёзувчиларнинг бир асари катта таъсир қучига эга бўлади-ю, бошқа асари ўқувчини бефарқ қолдиради?» (И. Султон, 13-бет). Нега ёзувчнинг бўй-бастини кўрсата оладиган асар (шеър)лар ҳар куни туғилавермайди? Нега ёзувчи маҳорати асардан-асарга томон ўсиб, мукаммаллашиб боравермайди?.. Бу саволларнинг охирига етиш амримаҳол. Бирини ечсангиз, иккинчиси муаммо бўлиб тураверади. Иккинчи-сини ҳам ечсангиз учинчиси кўндаланг бўлади. Ҳаёт оқимидек, «негалар?»нинг ҳам ниҳояси йўқ. Шунинг учун ҳам адабиёт (Миср эхромлари, Бобил осма боғлари, Артемида ибодатхонаси, Галикарнасдаги даҳма, Зевс ҳайкали, Родосдаги улкан ҳайкал, Искандар минараси каби) **мўъжизадир**.

«Тасаввур қилинг: Сиз тасвирий санъат музейига кирдингиз. Полотнолардаги рангларни, одамларнинг қиёфасини кўзингиз билан қўриб, ҳаяжонга тушасиз. Тасаввур қилинг: Сиз магнитофонда қўшиқ тингляп-сиз. Чолғу оҳанглари, хонанданинг овозини қулоғингиз билан эшитиб, ҳаяжонга тушасиз... Оқ қофзда қора чизиқлар — ҳарфлардан бўлак ҳеч қанақа ранг йўқ. Ҳеч ким куй ҳам чалмайди. Аммо, асарни ўқишга киришишингиз билан кўз ўнгингизда рангин манзаралар пайдо бўлади. Қулоғингиз остида ажиб оҳанглар жаранг-

лай бошлайди. Ўзингиз билмаган ҳолда қаттиқ ҳаяжонга тушасиз...

Хеч шубҳасиз, бадий адабиёт—дунёдаги саккизинчи мўъжиза!» (Ўтқир Ҳошимов).

Шу сабаб, **мўъжиза рўй** берганда подшоҳ ҳам, гадо ҳам лол қолади, ҳайратга тушади. Жумладан, подшоҳ Ҳусайн Бойқаро буюк «Ҳамса»ни — совғани олгандан сўнг, беҳад хурсандлигидан бутун сарой аҳли қошида ҳазрат Навоийни ўзининг пири деб эълон қиласди ва буюк шоирни ўз отига миндириб, муриди сифатида отнинг жиловидан ушлаб, халқ олдидан пиёда ўтади. Подшоҳ шоирни ўзидан афзал кўради, уни Хурросон мамлакатининг йўлбошчиси деб тан олади. Подшоҳ ҳам, подшоҳнинг бу ишини кўрганлар ҳам, ҳатто буни эшитган бизлар ҳам ҳайратимизни, ҳаяжонимизни, қойил қолганимизни яшира олмаймиз. Мўъжизадан мўъжиза яралади, сўзшунослик — инсоншунослик кудрати ҳаммамизни поклайди, самимиликка чулгайди, ҳавасимизни орттиради, меҳнату машаққатга етаклайди.

Ана шу мўъжизаларнинг сир-асрорини ўрганиш инсонга нима беради? Тўқиб чиқарилган ҳаётнинг нима кераги бор?

«Кераги бор. Нега деганда, чинакам ҳаёт улкан ва мураккаб, инсон уни тўлалигича ва бутун ранго-ранглигича ўрганишга улгуролмайди. Ҳа, у кўп нарсани кўриб, бошидан кечиролмайди. Масалан, у уч юз йил орқага қайтиб Галилейга шогирд тушолмайди. 1814 йилда Парижни забт этганлар сафидан жой ололмайди ёки Москвада туриб, Акрополнинг мармар колонналарини сийпай олмайди. Ёки Рим кўчаларини кеза олмайди, Гоголь билан мусоҳаба қуролмайди... Инсон эса барча нарсани билишни, кўришни ва эшитишни, барчасини бошидан кечиришни истайди¹. Ҳаёт баҳш эта олмаган ёки этолмайдиган нарсаларни адабиёт ҳадя қиласди. Сиз эътиборсизлик қилган минглаб нарса ва ҳодисаларга диққатингизни жалб этиб, унинг гўзалигини кашфингизга айлантиради. Оламни тўла-тўқис билиш истагингизга зарурий «озик»ни беради ва шундагина сиз ўзлигингизни борлигича танийсиз. Ана шундагина комил инсонга айланасиз. Бу камми? Умрнинг

¹ К. Пустовский. «Олтин гул» (Ёзувчи меҳнати ҳақида ўйлар), Тошкент, 1967, 175-бет.

мазмуни, моҳияти комилликка эришиш эмасми? Ҳа, бу инсон бахтининг ҳаётий асоси, ҳаётни севишнинг чинакам ва таъсирчан йўли, имон-эътиқоднинг бутунлиги ва инсонийлашганидир. Демак, адабиётни, унинг назариясини ўрганиш амалий-инсоний аҳамиятга эга.

Адабиёт назариясига оид дастлабки тадқиқот буюк аллома Аристотель қаламига мансубдир. Унинг «**Поэзия санъати ҳақида**» (юнонча «**Поэтика**») асарида (милоддан аввалги 336—322 йиллар) адабий эстетик тушунчалар биринчи марта системали баён қилинади ва у минг йиллар оша поэтик ижод назариясига ҳамон хизмат қилаётган дурдона саналади.

Агар фан, Аристотель фикрича, мавжуд бўлган нарсаларни қатъий мантиқий шаклларда текширса, санъат «ҳақиқатан бўлиб ўтган воқеа ҳақида эмас, балки юз бериши мумкин бўлган воқеа ҳақида, бинобарин, юз бериши эҳтимоли ёки зарурий бўлган воқеа» ҳақида сўзлайди. У характерлар ҳаққоний (ҳаётий), изчил, ўзига хос бўлиши кераклигини асослайди, жонли тасаввурга ҳам катта эътибор беради: «Ўзи ҳаяжонлана оладиган шоир томошабинларни ҳаяжонлантира олади, ўзи ғазаблана оладиган киши томошабинларни ҳам ғазаблантира олади. Шунинг учун поэзия истеъододли ёки мажнунсифат инсоннинг қисматидир. Истеъододли одамлар руҳан жуда таъсирчан, мажнунсифатлари эса жазавага мойил бўладилар»!¹

Ушбу биргина нигоҳ «Поэтика»ни мустақил ўрганишга даъват этганидек, унда бадиий ижоднинг бошқа қонуниятлари таҳлили ҳам борлигини кўрсатадики, уни машҳур файласуф Абу Наср Форобий (873—950), Ибн Сино (980—1037) ва Ибн Рушд (1126—1198) каби машҳур олимлар ўрганишда, тўлдиришда, янгилашда давом этдилар.

Жумладан, «Муалими соний» (Аристотелдан кейинги иккинчи муаллим) Форобий «Поэтика»ни шарҳлаш асосида ўзининг «Рисола фи қавонин синоат ашшеър» («Шоирлар санъатлари қонунлари ҳақида рисола»), «Шеър санъати» китобларини ёзди. Мутафаккир шоирларни уч гуруҳга ажратади:

«Бу хил шоирлар шеър санъатидан керак бўлганича хабардор бўлишавермайди, балки улар тугма қобилиятларининг яхшилиги билангина қаноат ҳосил қила-

¹ Аристотель. «Поэтика» (шеърият санъати ҳақида). F. Фулом номидаги адабиёт ва санъат нашириёти, Тошкент, 1980, 35-бет.

дилар, уларнинг ўзлари мўлжалланган ҳозирликларига кўра иш тутадилар. Бундай шоирлар чинакам мусалжис-мулоҳазакор шоирлардан саналмайдилар. Чунки уларда шеър санъатини ўзлаштириб олиш учун камолот етишмайди ва бу санъатда турғунык бўлмайди...

Ё бўлмаса, бу хил одамлар чинакамига шоирлар санъатини эгаллаган бўлишади, ҳатто шеър ижодига хос бўлган хусусиятлардан бирортаси ҳам у қайси шеър турига алоқадор бўлмасин, барибир, бу қонун-қоидалар ундан қочиб қутуломайди. Улар... қобилиятли шоирлар дейишга сазовордиrlар.

Еки бўлажак шоирлар юқорида айтиб ўтилган аввал ги икки табақага... тақлид қилувчилар бўладилар.. Бу туғдагиларнинг ўзларида тумса шеърий табиат бўлмага ҳолда, шеърий санъат қонун-қоидаларидан хабардор бўлмай туриб, ташбиҳ-ўхшатиш ва тамсил кабилалар кетидан борадилар. Йўлдан адашадиган ва тоядиган шоирларнинг қўпчилиги худди мана шу табақа шоиэрлар ичидан чиқади¹.

Косиб-шоирлар, талантли-шоирлар ва тақлидчи-шоирлар ҳақидаги асосли бу фикрлар, умуман адабий назарий тушунчалар кейинги даврларда ҳам тадқиқ қилинади. Абу Али Ибн Синонинг «Мұътасамуш-шуаро» («Шоирларнинг паноҳгоҳи») асари IX аср адабиёт-шунослигига оид илк асарлардан бири бўлса, Кайковус «Қобуснома»сида адабиёт назариясига оид анчагина масалалар ёритилди. Жумладан «Шоирлик ҳақида» гапирав экан, «Эй фарзанд, шоир бўлишни истасанг, ҳаракат қилки, сўзинг осон ва фойдали бўлсин, англашилмайдиган, қийин сўзларни ишлатмагил, ўзинггина билиб, бошқалар унинг шарҳига муҳтоҷ бўлгуси сўзни айтмагил, чунки шеърни ҳалқ учун ёзиш керак ва ўзи учун ёзмайди» — дейди.

Шарқ классик адабиётида адабий назарий фикрларни ифодалашнинг йўллари, шакллари кўп бўлган. Улардан бири «тазкира» бўлиб, уларда шоирларнинг ҳаёти ва ижодлари ҳақида қисқача маълумот берилади, асарларидан намуналар келтирилади. Арузий Самарқандийнинг «Чаҳор мақола» (XII аср), Муҳаммад Авфийнинг «Лубобул-албоб» (XIII аср), Давлатшоҳ Самарқандийнинг «Тазкиратуш шуаро» (XV аср), Али-

¹ А б у Н а с р Ф о р о б и й. «Шеър санъати», Fafur Fulom номидаги адабиёт ва санъат нашриёти, Т., 1979, 35—36-бетлар.

шер Навоийнинг «Мажолис ун-нафоис» (XV аср) каби тазкираларини кўрсатиш мумкин.

«**Мажолис ун-нафоис**» («Нафосат аҳлининг мажлислари») 8 мажлис-бобдан иборат. Унда XIV—XV асрда яшаб, форсий ва туркийда ёзган 459 ижодкор ҳақида маълумотлар, асарларидан жуда қисқа намуналар бор. Масалан, «Мавлоно Лутфий ўз замонасининг маликул каломи эрди, форсий ва туркийда назири йўқ эрди, аммо шуҳрати туркийда кўпрак эрди.. Тўқсон тўқиз яшади ва охир умрида радифи «Офтоб» шеъри айтти-ким, замон шуароси барча татаббуъ қилдилар ва ҳеч қайси матлаъни онча айта олмадилар...»

Иккинчиси. Шеърият қонун-қоидаларига бағишиланган маҳсус назарий рисолалар ҳам яратилган. «Илми қофия», «Илми аruz», «Сўз санъатлари илми», «Илми бадеъ», «Муаммо илми» каби маҳсус соҳаларга бўлинган бўлиб, бевосита поэтика масалаларини ёритган. А. Жомийнинг «Рисолаи аruz», Алишер Навоийнинг «Мезон ул-авzon», Мирзо Бобурнинг «Мухтасар» асарларини кўрсатиш мумкин.

Умуман олганда, XX асргача адабиёт назарияси, асосан шеъриятда ишлатиладиган восита, усувлар, унсурларни таърифлашдан, уларни чукур ўрганишдан иборат бўлди.Faқатгина XX асрга келиб, «Адабиёт назарияси» фан сифатида тўлиқ шаклланди. Фитратнинг «**Адабиёт қоидалари**» (1926) дарслигидан бошлиланган бу иш И. Султоновнинг «Адабиёт назарияси» дарслиги (1980) билан дастлабки чўққини забт этди. Унда адабиётнинг ҳаётга, жамиятга муносабати масалалари, бадиийликнинг ҳаққонийлик ва халқчиллик билан алоқаси, бадиий асар унсурларининг табиати, ижодий жараённинг метод ва услуб билан муносабати ҳақида кенг ишлаган маҳсус назарий таълимот юзага келди.

Албатта, давр ва жамиятнинг ривожи адабиёт назариясини ҳам бойитиши табиийдир. Эскича қарашлар (адабиётни сиёсийлаштириш, назарий таълимотни вульгарлаштириш (сохталаштириш), бирёқлама ўрганиш ва ўргатиш)дан воз кечилиши, сўзшуносликнинг табиатини чукур идрок этилиши янги босқич бошлиланганидан хабар беради.

Мустақиллик мафкураси (1991 йилдан) адабиётнинг, адабиёт назариясининг партиявийлиги тушунчасини рад этди. Адабиёт партияга эмас, балки инсонийлик учун,

комил инсонни яратиш учун хизмат қилиши лозимлигини — бош ҳақиқатни тасдиқлади.

Адабиётни синфларга бўлиб ўрганиш ноўриналигини, адабиёт ҳаммага — бойга, ўртаҳолга, камбағалга ҳам ҳаёт дарслиги вазифасини ўташи лозимлигини тасдиқлади. Адабиётимизни диний-мистик адабиёт, сарой-феодал адабиёти, тасаввуф ёхуд сўфизм адабиёти, ўзбек жадид адабиёти каби бўлакларга бўлиб, уни регрессив характердаги йўналиш деб аташнинг нотўғрилигини исботлади. Уларнинг зарур эстетик қимматини (Сўфи Оллоҳёр, Баҳовуддин Нақшбанд, Аҳмад Яссавий... Феруз, Ҳусайн Бойқаро...) тайин этди, уларни ўрганишни йўлга қўйди. Халқ учун улар ҳам дарслик эканини исботлади...

Хуллас, адабиётни, унинг яратилиш ва тараққиёт қоюнларини, назарий уфқларини билиш — бадиий дунёдан тўла лаззатланишга, руҳан бойишга, ўзликни тоёлашга етаклайди. Энг асосийси ҳаётни севишга, ардоқлашга, асрашга, бойитишга, гўзаллаштиришга ўргатади.

«Адабиёт назарияси» фанини беш бўлимга бўлиб ўрганишни маъқул топдик. Биринчи бўлимда «Бадиий адабиёт», иккинчисида «Адабий асар», учинчисида «Шеърият» ҳақида таълимот берилади. Тўртинчи бўлимда «Адабий тур ва жанрлар», сўнгтисида «Бадиий услугуб ва ижодий метод» масалалари ёритилади.

Б и р и н ч и б ў л и м

БАДИЙ АДАБИЁТ

I. Бадий адабиётнинг объекти, предмети

Таянч сўз ва иборалар: «Бирламчи» ва «иккиламчи» табиат. Маънавият. Адабиёт. Ҳаётнинг адабиётдаги инъикоси. Фан. Санъат. Адабиёт. Адабиётнинг объекти, предмети, вазифаси.

Бадий адабиётнинг ўзига хослиги масаласи, даставвал, фалсафада ўрганилганлиги боис, биз ҳам бу вазифани ёритишни шу асосдан бошлаймиз.

«Фалсафа»да таъкидланганидек, «Бирламчи табиат» инсондан ташқарида ва унга боғлиқ бўлмаган ҳолда мавжуд бўлиб, инсон эса унинг маҳсули эканлиги, инсон усиз яшай ва фаолият кўрсата олмаслиги, ҳатто «бирламчи» табиатсиз бирон бир нарса яратади олмаслигидир. «Бирламчи» табиатни ташкил этувчи нарса ва ҳодисалар объектив реаллик сифатида, инсонга боғлиқ бўлмаган ўз қонунлари асосида ўзгаради, тараққий этади, ўз-ўзини яратади. Бу «бирламчи табиат» маконда чексиз, замонда абадийдир, у ҳамма ерда доимо мавжуд. Инсон шу «бирламчи табиат» материаллари асосида амалий фаолияти ва онги билан «иккиламчи» табиатни яратади¹.

Демак, «Бирламчи табиат» маконда чексиз, замонда абадий ва доимий борлиқ бўлса, «иккиламчи табиат» инсон мавжудлиги билан, унинг фаолияти ва онги бир бутун жамият билан боғлиқ мавжуд бўлади, у фазо ва вақтда ибтидо ва интиҳога эга.

«Бирламчи табиат» инсон унда яшаб, уни билиб бораётган битмас-туганмас чексиз дунё (олам) бўлса, «иккиламчи табиат» эса инсон табиат қонунларини билиб олиши туфайли, улар асосида яралган нарса

¹ Фалсафа. Т., «Шарқ», 1999 йил, 170-бет.

ва ҳодисалар, жараёнлар дунёсидир» (Фалсафа», 171-бет).

Оддий ва ростгүй гапирысак, ҳаётни, инсонни, қўйингчи, ҳамма нарсани яратган зот — Аллоҳдир, Аллоҳ ягонаидир. Аллоҳ доимо «Бирламчи»дир. Ҳаммамиз ҳам у яратган дунёни ўрганиш йўлида, ўзлигимизни, Аллоҳимизни билиш учун саъй-ҳаракат қиласиз, эзгулигимиз ёки ёмонлигимизни воқе қилган ҳолда, охирги ҳисобкитоб учун унинг даргоҳига қайтамиз. Шу жараёнда ҳар бир инсон аниқ (реал) фаолияти билан маънавий ва ижтимоий борлиққа таъсир кўрсатади, яъни борлиқни муттасил равишда бойитиб, ривожлантириб, поклаб комилликка томон ҳаракатлантираверади.

«Маънавийлик инсон ва инсониятнинг нодир фазилати бўлиб, у инсон руҳияти билан чамбарчас боғлиқдир. Маънавийлик — бу кўп қиррали онг ва онгсизлик жараёнларини ўз ичига олувчи инсоннинг кундалик ҳаёт тажрибалари, унинг табиат, атрофдаги кишилар ва жамият билан бўлган муносабатларида ҳосил қилган малакалари, кўникмалари, унинг шахс сифатида шаклланиши давомида эгаллаган ахлоқий, сиёсий, ҳукуқий диний, фалсафий қарашлари, шунингдек, фанларни ўрганиш асосида олган билимлари, бадиий, техник ва илмий ижодларининг йиғиндиси ҳисобланади» («Фалсафа», 174-бет).

Ижтимоий борлиқ деганда фалсафада жамиятнинг моддий ҳаёти, моддий неъматлар ишлаб чиқариши ва кишиларнинг ишлаб чиқариш жараёнидаги муносабатларини тушунамиз.

Демак, инсоният, маънавият ва ижтимоёт ўзаро алоқада, ўзаро таъсирда бўлади, бирлашган ҳолда бутун бир жамият ҳаётини воқеа қиласи, унинг мазмуни ва ҳаракатини таъминлайди. Шу асосда ўзлигини, борлиқни, Аллоҳни билиш ва ўрганишда давом этаверади.

Демак, Аллоҳ ва ҳаёт (мавжуд дунё) асос, ижтимоий онг — ҳосиладир. Инсон мияси воситасида асосни умуман била олиши, тушуна олиши мумкин. Одам онги, билимлари **асос ҳақиқати** заминида пайдо бўлади ва шу ҳақиқатни инъикос этади. Ҳар қандай ижтимоий жамият бу ҳақиқатни ўзида тўлиқ жамлай олмагани учун ҳам бизнинг онгимиз, тасаввуримиз, билимларимиз нисбий ҳақиқатдир. Яна бир мулоҳаза, **Аллоҳни билиш, Аллоҳга интилиш — бандасининг бош вазифаси.** Бу вазифани биз Аллоҳ яратган ҳаётни (борлиқни)

ўрганиш, таъсир кўрсатиш, таъсирланиш орқали бежарамиз. Шу йўлда «меҳнату машаққат» чекамиз, унга интиламиз.

Хуршид Давроннинг «Самарқанд хаёли» китобида Бибихоним ҳақида бир неча афсона келтирилади. Улардан бирида ёзилишича, Амир Темур ўзга мамлакатларда жангу жадал билан банд бўлган вақтларида Бибихоним Самарқанд салтанатини бошқарар экан.

«Оқила малика ўз паноҳидаги фуқароларнинг дилида яширин ётган сиру асрорни билмоқ, одамларнинг қувончу аламидан воқиф бўлмоқ мақсадида кечалари эркакча либос кийиб шаҳар айланар экан. У аввал бозор майдонига бориб, уйига шошилаётган бозорчилар гап-сўзини, кейин мозорга бориб ўша кун кимлар ерга топширилганини билиб олар экан, азадор оиласарга сарой хазинасидан ул-бул нарса бердириб юборар экан.

Ҳар бири чойнакдек-чойнакдек келадиган юлдузлар фалак саҳнини ёритган савр тунларининг бирида Бибихоним ўзи қурдирган мадраса талабалари юриштуришидан, аҳволидан хабар олиш учун фарқ пишган марвартак тутининг ҳиди анқиб турган мадраса ҳовлисига кирибди.

Ҳовлини айланиб юриб, ҳужраларнинг бирида суҳбатлашиб ўтирган уч муллавача суҳбатини эшишиб қолибди. Муллаваччалар китобу қаламларини бир четга қўйиб, бир-бирларига энг яширин сирларини очаётган экан. Суҳбат Бибихоним диққатини тортибди.

Талабаларнинг бири — узоқ тоғ қишлоқларидан келиб ўқиётгани ва фақир оила фарзанди эканлиги билиниб турган, ҳусни қизларнинг тушига кирадиган дарражада кўркам муллаввачча йигит бир армон ва ҳавас билан:

— Эҳ, қанийди бир марта бўлсаям Бўстонсарой дастурхонига қўйиладиган нозу неъматлардан тотиб кўрсайдим, ўлсам армоним қолмасди, — дебди.

Иккинчи талаба — келишган қоматли, ўқишдан кўра, кўпроқ ўзига эътибор беришга мойиллиги кўриниб турган, ҳушсурат муллавачча эса, завқи келганидан кўзларини юмиб айтибди:

— Э, қанийди, Бибихонимдек соҳибжамол малика менинг маъшуқам бўлиб қолсайди, дунёдан беармон ўтардим!

У шу сўзни айтиб, кўзларини очибди-да, биринчи

шериги билан унинг сиру асрорини индамай эшитиб ўтирган учинчи муллаваччага тикилиб қолибди. Учинчи талаба сабоқ олишдан кўра қилич чопишга ҳавасдорлиги кўзларида чақнаётган ўтдан сезилиб турган йигит эса дўстларига «Эҳ сенларни қара-я!» дегандек бир оз тикилиб турибди-да:

— Шуям орзу бўптими? Мен Амир Темурдек буюк соҳибқирон бўлишни орзу қиласман! — дебди. Сўнгра, дўстлари оғиз очиб қолишганини кўриб, мийифида кулибди-да:

— Ана шунда, — дебди биринчи дўстига қараб, — сен орзу қилган нозу неъматлар ҳам ва сен... — у иккинчи дўстига қарабди, — ҳа, сен орзу қилган Бибихоним ҳам менини бўларди.

У шундай дебди-ю, дўстларини қойил қолдирганини кўриб, завқ ила кулиб юборибди.

Талабалар сўзини эшитган Бибихоним бир дам ўйланниб қолибди-да, индамай мадрасадан чиқиб кетибди.

Тонг отиб, Самарқанд минораларининг зарҳал нақшларида күёш нурлари жилоланиб турган бир пайтда қовоқларидан қор ёғилиб турган уч навкар мадрасага кириб келиб, кечаси бир-бири билан сирлашган уч муллаваччани Бўстонсаройга олиб кетибди. Гап нимадалигидан бехабар уч йигит юраклари така-пука, бир-бирига «Нима гап?» дегандек ташвиш-ла қараб турганларида, уларни Бибихоним ҳузурига олиб киришибди.

Салтанат таҳтида ўтирган Бибихонимни кўрган талабалар таъзим бажо қилишибди. Сўнг «буёги нима бўларкин?» деган савол ичларини кемириб, қўлларни қовуштириб туришаверибди.

Бибихоним таҳтда ўтирганча:

— Орзуларинг бўлса менга сўйланглар, қўлимдан келса, бажо айлайман, — дебди.

Тўсатдан берилган бу саводдан бир оз талмовсираб қолган талабалар хаёлига баробар бир ўй келибди: тунги сұхбатимизни сарой хуфиялари эшитиб, маликага етказибди-да! — муллаваччалар энди тамом бўлдик, деб дағ-дағ титрашга тушишибди.

Улар жонларидан умидларини узиб турганларида малика таҳтдан тушиб келибди. Бўстонсарой дастурхони нозу неъматларини орзу қилган биринчи талабага қараб:

— Сенинг орзунгга етмоғинг мушқул эмас, бунинг учун сени сарой ошпазининг қизига уйлантириб қўяман.

Умринг охиригача сарой таомларидан баҳраманд бўлиш ҳуқуқини ҳам бераман, — дебди.

Малика оҳиста қарсак чалган экан, олдиндан тайёрлаб, рози-ризолиги олинган сарой ошпази ва унинг қизини ҳамда муллани бошлаб киришибди. Ўша заҳоти никоҳ ўқитилиби.

Сўнг малика: «Бибихонимдай соҳибжамол хотиним бўлсайди», — деб орзу қилган йигитга қараб бундай дебди:

— Мен буюк соҳибқирон Амир Темурнинг жуфти ҳалолиман. Бироқ, гўзал бир канизагим бор, ҳуснда Мовароуннаҳру Хуросондагина эмас, Шому Ироқдаям тенги йўқ. Ўша соҳибжамол сенинг ҳалолинг бўлсин.

Бибихоним оҳиста қарсак чалган экан, ҳусни кўр кўзни очишга, очиқ кўзни кўр қилишга қодир бир гўзал қиз кириб келибди. Уни кўрган йигитнинг эси оғиб қолишига оз қолибди. Мулла канизакни талаба йигитга никоҳлаб қўйибди.

— Сизларга Конигилдаги бодимни инъом қиласман,— дебди малика келин билан куёвга. — Бугун оқшом ўша боғда тўй базмини қилғаймиз.

Шундан кейин баҳтдан маст бўлиб турган дўстларига такаббурона қараб турган, Темурдек буюк Соҳибқирон бўлишни орзу қилган учинчи йигитга қараб, Бибихоним шундай дебди:

— Сенинг ишинг буларницидан осонроқ... — Малика бу сўзни айтиб бироз сукут қилибди-да, яна сўзлабди. — Балки оғирроқdir.

Бибихоним учинчи бор қарсак урган экан, хос навкарларнинг бири қилич билан совут олиб кирибди. Малика йигитга қараб:

— Амир Темурни соҳиби салтанат қилган мана шу қилич билан совут ҳамда юрагидаги олов. Мен сенга шу қилич билан совутни инъом қилурман, юрагингда ўт бўлса, у ёғи ўзингга боғлиқ, — дебди.»¹

Бу афсонанинг яратилиш тарихини аниқ тасаввур қилиш учун шартли равища уни бўлакларга ажратиш мумкин:

1. Ҳаёт (ижтимоий жамият)
2. Уни мушоҳада қилувчи ёзувчи
3. Мушоҳада ва муҳокама натижасида ёзувчи онгига туғилган фикр (Оқила подшоҳ ўз фуқароларининг ор-

¹ X. Д а в р о н. Самарқанд хаёли, Тошкент, «Камалак». 1991, 150—152-бетлар.



зуларини рүёбга чиқариши йўлида одиллик ва инсонийлик билан фаолият кўрсатиши ҳақидаги фикр)

4. Шу фикр (гоя)ни ифода этиш учун ёзувчи томонидан яратилган асар.

Бу бўлакларнинг ҳар бири ўз сиру синоатига эга (уларни кейинроқ таҳлилга торгамиз), ҳозирча улар қўйидаги ҳақиқатнинг исботига далили бўла олади, яъни ҳаёт, унинг воқеалари таассуротлар орқали ёзувчининг онгига киради, ақл иштирокида маълум маъно касб этади ва тасаввурда пишиб, етилиб, адабиёт асари афсона шаклида бизнинг кўз олдимизда намоён бўлади. Демак, бадиий асар ҳаётнинг ёзувчи онгидаги инъикоси тариқасида майдонга келади. Бу инъикос шаклан хилма-хилдир.

Жумладан, юқоридаги афсонада ёзувчи ҳаётнинг, Бибихоним, фаолиятининг бир парчасини бетараф тарзда, узоқдан кўриб тургандек тасвир этади, лекин ундан келиб чиқадиган фикр (хуласа)ни очиқ айтмайди.

«Подшоҳ ўз фуқароларининг орзуларини рүёбга чиқариш йўлида одиллигу инсонийлик билан,adolatu ҳақпарварлик билан фаолият кўрсатиши лозим» деган фикрни тушуниб олишни ўқувчининг ўзига ҳавола қиласди. Демак, афсона муайян воқеани ҳикоя, баён қилиш, объектив кўрсатиш шаклида кўз олдимизда жонланади.

Санъаткорнинг ҳаётдан олган таассуроти ёки ҳаёт фактларини муҳокама ва мушоҳада, тадқиқ ва таҳлил қилиш натижасида онгига пайдо бўлган янгиликларни ёниб, куйиб, жўшиб, оҳангдор қилиб тасвирлаши мумкин. Жумладан, шоир Асқад Мухторнинг «Умр» шеърига қулоқ тутайлик:

*Ҳамма кунлар
Бутун ҳаёт
Иш учун
Кураш учун.*

*Охирги кун —
Одамлардан
Розилик сўраш учун.*

*Ниманидир
Бошлиш керак,
Ниманидир*

*Тугаллаш.
Ниманидир
Ташлаш керак,
Ниманидир
Эгаллаш.*

*Икки қудрат:
Қүёш, идрок
Ижод этар ер узра
Шундай сұнгсиз
Коинотда
Хәёт деган мұжызыза
Уларга вақт берилмаган
Бир нафас ухлаш учун.*

*Қалб талпинар
Ойлар, үйлар,
Тұстадан тұхташ учун.
Езиш, үчириш керак,
Ниманидир тушуниш.
Кимнидир кечириш керак,
Кимдан авф, үтиниши.*

*Барига бугун улгур,
Чунки умр деганлари
Бамисли отилган ўқ.
Уни ўтдай ёндирib құй,
Дунёда қолиши учун*

*Сұнгги соат —
Одамлардан
Розилик олиши учун.*

Ушбу шеърда биз ҳаётнинг кенг манзаради воқеасининг баёнини, объектив тасвирини күрмаймиз, балки, у шоирнинг умр ҳақидаги мушоҳадаси, унинг субъектив холосасидир. Бу — шоирнинг шахсий кечинмалари шаклида, ҳаяжонли ва оқанғдор тарзда юзага чиқаяпты...

Ҳаётнинг адабиётда инъикос этилишининг бу универсал шаклларидан ташқари, унинг бошқа шакл ва усууллари ҳам бор. Масалан, санъаткор ҳаётдаги ярамас иллатларни, нұқсанларни заңарханда ва енгил күлгү билан тасвирласа — сатира ва юмор; ҳаёт манзарадини

мавжуд реалликларга, аниқ факт ва ҳужжатларга асосланиб улуғласа — очерк, танқид қылса — фельєтон каби хиллар ва жанрлар орқали инъикос эттиради ва ҳ.к.

Шундан келиб чиқиб, хулоса қилиш мумкин: Ҳаёт адабиётнинг ҳам мазмунини, ҳам шаклини тайин этади; кишиларнинг аниқ тарихий шароитдаги туйгулари кашфи орқали «иккиласмчи» ҳаётни, бўлиши мумкин бўлган ҳаётни яратади.

Ҳа, «Ҳаётни қайта тиклаб тасвирлаш — унинг мояхиятини ташкил этувчи аломатдир» (Н. Чернишевский).

Ижтимоий онгнинг барча шакллари — ҳаётни ўрганади. Ҳаммасининг асоси — ҳаёт бўлса-да, унинг мояхиятини ҳар бири ўзигагина хос бўлган воситалардан фойдаланган ҳолда ўрганади.

Агар илмий тафаккур ўзида ҳамма фанларни жамғарса, бадиий тафаккур санъат ва унинг шаклларини бирлаштиради. Иккаласининг ҳам обьекти битта—реал борлиқ, биздан ташқаридаги «Бирламчи» олам. Фан табиатнинг обьектив қонуниятларини очади. Санъаткор уларга асосланади, билимлар санъат қонига сингиб кетади, бадиий қайта ишланади.

ФАН — ижтимоий-тарихий турмуш тараққиёти жараённида табиат, жамият ва тафаккур ҳақида тўпланган билимлар йиғиндиси. Фаннинг мақсади — ҳодисаларнинг обьектив қонуниларини очиш, уларни тўғри тушунтириб беришдан иборат.

Табиий фанлар (химия, физика, математика, биология — табиат ҳодисаларини ўрганиш билан шуғулланса; ижтимоий фанлар (тарих, сиёсий иқтисод, фалсафа, археология) — жамиятнинг тараққиёт қонуниларини кашф этади.

Илмий асарнинг умумий хусусиятлари ҳам табиат ва жамиятдаги обьектив нарса ва ҳодисаларнинг умумий қонуниятларини ўрганишга қаратилганидан — мазмунидан келиб чиқади. Илмий асарлар обьектив дунёни муҳокама юритиш, юритганда ҳам мантиқий изчиллик билан илмий белгилар (иборалар, символлар, формуулар, графиклар, чизмалар, схемалар ва ш.к.)нинг зарурларидан керагича фойдаланиб фикр юритиш ва исботлаш, исботланганда ҳам аниқ, тўлиқ, қисқа, ёрқин исбот билан ишонтира олиш орқали кашф этади. Унинг кашфи муайян мутахассисга, олий маълумотли кишиларгагина тушунарли бўлиши талаб этилади. Инсон ақлининг ривожига, камолига хизмат қилади.

Ушбу фикрни (илмий тафаккурни) нафис адабиёт (бадиий тафаккурлаш)га солиштиrsак, мулоҳазаларнинг янада яқдолроқ исботини кўрамиз. Бадиий асарларнинг умумий хусусиятлари унинг мазмунидан — табиат ва жамиятдаги воқеа-ҳодисалар, инсонларни кўз ўнгимизда кўрадиган даражада жонли қилиб тасвиришдан ва шу орқали объектив борлиққа муносабати ва шу муносабат туфайли юзага келган унинг ўллари, ҳислари, фикр-мулоҳазалари ифода этилади, ифода этилганда ҳам ўта таъсирчан ва образли қилиб кашф этилади. Унинг кашфи бутун одамзотга тушунарли ва тегишли бўлади. Инсон руҳини тоблайди, руҳиятни эзгуликка буркайди, пок ва гўзал ҳаёт эгаси бўлиш орзусининг амалиёти борлигига ишончини оширади.

Масалан, соч ҳақидаги икки хил асарни кўрайлик: «Ўзбек совет энциклопедияси»даги илмий мақола: «Соч — одамнинг бош терисидан ўсадиган ипсимон шох модда. Соч майнин, қаттиқ, жингалак, ранги қора,mall, оқиш тусли бўлади. Қалин соч толалари сони 80—140 мингта келади. Баъзи аёлларнинг сочи 1,5 метргача етади. Сочнинг ранги ва ўсиши организмнинг умумий аҳволига, аввало нерв ва эндокрин система ҳолатига боғлиқ. Соғлом кишилар сочи бир ойда ўрта ҳисобда 1—1,5 см. ўсади; кексайганда соч ўсиши сусаяди ва соч покизалашиб боради. Сочда азот, фосфор, олтингугурт, натрий, калий, кальций, магнезий, темир, марганец, мис тузлари мавжуд. Улар миқдори эркаклар билан аёллар сочидаги бир хил эмас. Масалан: эркаклар сочидаги аёлларникига нисбатан олтингугурт кўпроқ бўлади. Соч жуда чўзилувчан; чўзганда ўз бўйига нисбатан 2 марта узайиши ва қўйиб юборилганда яна ўз ҳолига қайтиши мумкин.

Сочнинг тери устидаги қисми тола ва тери остида-ги қисми илдиз дейилади. Соч илдизи соч халтачасида жойлашган. Халтача атрофидаги ёф безларининг йўли очилади. Соч ўрта ҳисобда 2—4 йил туради. Кейин ўрнига янги соч чиқа бошлайди. Баъзан киши қаттиқ қайтурганда соч тўсатдан тўклилиб кетади. 35—40 ёшда сочнинг 1—2 толаси оқаради, йил сайин улар кўпайиб, 60—65 ёшда деярли ҳаммаси оқараби бўлади.

Бошни тез-тез ювиш (айниқса қаттиқ сув ва иш-

қорли сув билан) соч ўсишига заарли таъсир этади. Соч қуруқ бўлса, совунлаб ювилганда таркибидаги озгина ёғи ҳам йўқолиб, кўриниши ҳам ўзгаради. Ёғи соч дам-бадам ювилганда бош терисида кўплаб ёғ ишланиб чиқади. Шу боисдан сочни қайнатилган сув ва атир совун билан 7—10 кунда бир марта ювиш тавсия этилади. Бўяш, офтобда ё совуқда узоқ вақт бош яланг юриш ҳам сочнинг ўсишига заарли таъсир этади ва тўкилиб кетишига сабаб бўлади.

Соч жуда пишиқ ва гигроскопикдир. Шунинг учун ҳаво намлигини аниқлашда қўлланиладиган асбобларда ишлатилади. Сочни ҳар хил турмаклаш унинг чўзилувчанлик хусусиятига асосланган. Сочнинг перманент, яъни узоқ сақланадиган жингалак қилиш учун соч ишқорли суюқлик билан ҳўлланади ва иситилади, бу унинг нормал ўсишига зарар етказади. Соч қуруқ бўлганда, тўкилиб турганда, аёл юқумли касалликлардан тузалаётганда ва ҳомиладорлик охирида перманент жингалак, айниқса, заарлидир. Бир қатор касалликлар (масалан, захм, трихофития, микроспирития)да тўкилган соч ўрнига янгисининг чиқиши сусайди ёки бутунлай тўхтайди. Натижада соч сийраклашади, бора-бора киши кал бўлиб қолади¹.

Илмий асарларнинг ҳамма жанрларига хос бўлган «мантикий фикрлаш, мушоҳада юритиш, билим беришни»² ва айни пайтда, илмий мақола жанри (энциклопедик мақола кўриниши)нинг ўзига хослигини аниқлаш, у ҳақда тўлиқ ва объектив тушунчани ҳосил қилиш учун атайлаб, мақоланинг матнини тўлиқ келтирдик.

Ундан сочнинг қандай моддалиги, ранги, толалири, ўсиши, таркиби, унинг тузилиши, тўкилиши, оқариши; уни ювиш, бўяш, жингалак қилиш; унинг пишиқлиги, ишлатилиши, ўсишини таъминлаш, турли касалликларга сочнинг алоқаси, соч ҳақидаги билим ва унга таянишнинг аҳамияти очиқ баён этилган. Нерв, эндокрин, азот, фосфор, олтингугурт, натрий, гидроскопик, перманент, трихофития ва шу каби атамаларнинг кенг қўлланиши соч ҳақидаги илмга аниқлик киритган ва мақола тиббиёт мутахассисларига, шу соҳага яқин олий маълумотли кишиларга мўлжаллан-

¹ Ўзбек совет энциклопедияси, 14 томлик, 10-том, Т., 1978, 269-бет.

² М. Мурамов. Ҳозирги ўзбек адабий тилининг илмий стили, Т., «Фан», 1984, 23-бет.

ган ва тўлиқ тушунарли бўлишига асосий диққат қартилган. Матнда «соч» сўзи ўттиз мартага яқин такрорланган. Биронта сўз (ҳаттоқи бадиий ўхшатишда ишлатиладиган — «симон» кўшимчаси билан яратилган «ипсимон» сўзи ҳам) эмоционаллик хислатига эга эмас; улар соч ҳақидаги тушунчани аниқ, объектив, «қуруқ» қайд қилишга бўйсиндирилгандир.

Энди Абулҳамид Сулаймон ўғли Чўлпоннинг «Яна олдим созимни» тўпламидаги қуйидаги шеърга¹ эътиборни қаратайлик:

*Бир тутам соchlаринг менинг қўлимда,
Фижимлаб ўпайми ё тараб ечай,
Сир деб сақлаганинг менинг қўйнимда,
Сир деб сақлайнми, ё елга сочай.*

*Сочилган сочингдай сочилса сиринг,
Анор юзларингни кимга тутасан?
Ўзинг-ку «уларда вафо йўқ!» дединг,
Нимага уларни тағин кутасан?*

*Очиlgан қўйнимда тўлғанган танинг
Кўнгилдан қилча ҳам ҳид етказмаса,
Менга яқинлашма, эй, тирик бўса!
«Севдим» деганларинг ёлғондир сенинг!*

Шеърда соч ҳақида ҳеч қанақа илмий тушунча берилмаган, ҳатто у ҳақидаги умумий маълумот ҳам, шу маълумотнинг бирон аниқ, объектив белгиси ҳам йўқ, Ундаги соч шоирга яхши кўрган нозанининг муносабатини таъсирчан, ўта ҳиссиётга тўлиқ тарзда жонлантиришга баҳонаи сабаб бўлмоқда. Нозаниннинг юзаки севгисини, ташки гўзаллигини эмас, балки унинг қалбдан етилган севгисининг, ҳақиқий «тирик бўса»сining — ҳақиқий муҳаббатининг талабори ҳис-туйгуларини ифодалашга хизмат қилмоқда. Матндаги жонлантириш («Бир тутам соchlаринг менинг қўлимда, фижимлаб ўпайми, ё тараб ечай») метонимия («тирик бўса»), сифатлаш («Анор юз»), аллетрация («Сочилган сочингдек сочилса сиринг») каби воситалар ҳам, илтифот, лаффу-нашр, инверция, такрорлар ҳам лирик қаҳрамон қалbidаги туйғу ва ҳисларни бутун тўлалиги

¹ Ч ў л по н. Яна олдим созимни, Т., 1991, 509-бет.

ва аниқ нүқталари билан кўришимизга, жонли ҳис этишимизга хизмат қиласи. Шу ҳаётий манзара бутун тафсилотлари билан ҳаққоний равишда қайтадан яралгани учун ҳар биримиз ўзимизнидек қабул қиласимики, бу унинг оммавийлигидан, инсоннинг барчасига тегишли эканидан далолат беради.

Демак, мақолада соч таърифланади, Чўлпон эса тасвирлайди. Бирида исбот, иккинчисида кўрсатиш устунлик қиласи.

Санъат (бадиий адабиёт, архитектура, ҳайкалтарошлик, рассомлик, мусиқа, театр, хореография, кино ва ҳ.к.) ҳам ҳаёт жумбоқларидан сабоқ беради. Лекин у «образлар орқали фикрлашдир» (Гегель). Табиийки, бу жонлилик ва равшанлик, таъсирдорлик ва оммавийлик, нозиклик ва мукаммалик санъат турининг ҳар бирида «ўз тили» орқали рӯёбга чиқади.

Рассомлика бадиий образ яратишида чизиқлар, ранглар, ёргулик ва соя «тил» вазифасини ўтаса, хореографиянинг «тили» инсон танасининг ўзига хос ифодали ҳаракати саналади.

«Рассомлик санъати бутун инсонни, ҳатто унинг ички руҳий дунёсини ҳам ўз ичига олади; аммо рассомлик ҳам ҳодисанинг фақат бир пайтини қамраш билан чекланади. Музика эса, руҳнинг энг кўп ички дунёсини ифода этувчиdir; лекин музика ифода қилган foялар товушлардан (садолардан) айрилмайди, товушлар руҳга кўп нарса берса ҳам, ақлга ҳеч нимани аниқ ва очиқ қилиб айтмайди. Поэзия эркин инсон сўзида ифодаланади, сўз эса — ҳам товуш, ҳам картина, ҳам аниқ ва равшан айтилган тасаввурдир. Шунинг учун поэзия бошқа санъатларнинг ҳамма элементларини ўз ичига олади, бўлак санъатларнинг ҳар бирига айрим равишида берилган ҳамма воситалардан бирварақай ва тўла суратда фойдаланади»¹.

АДАБИЁТ — сўз санъатидир. Унинг афзаллиги шундаки, у шахсни, предметларни, воқеаларни яққол ва ёрқин ифодалай олади. Ташқи дунёнинг ранг-баранг ҳодисаларини ҳам, инсон қалби диалектикасининг чексиз қатламларини ҳам ичига қамраб олади — унинг тасвир ва таъсир имкониятлари бениҳоядир.

Бундан кўринадики, бадиий ижод жараёни — ҳаётни ўрганиш (унинг моҳиятини чақиш), ундан маълум

¹ В. Белинский. Танланган асарлар, Т. Ўзбекистон ССР давлат нашриёти, 1955, 133-бет.

хулоса ва сабоқлар чиқариш (хукмга келиш), ҳаётий ва жонли тушунчалардан дарс олиш («ҳаёт дарслиги»), ҳаётни қайта қуриш (орзу ва умид) жараёнидир. Демак, ҳаёт — адабиёт ва санъатнинг тасвири объектидир.

Инсон — санъат ва адабиётнинг бош предметидир. «Ўзининг интилишлари, ишларининг бутун хилма-хиллиги билан, ўзининг ўсиши ва таназзулга кетиш жарёни билан одам бадиий адабиётнинг материали бўлиб хизмат қиласди» (А. Горький).

В. Белинскийнинг уқтиришича, қадимги ҳинд поэзиясида табиат илоҳийлаштирилган, биринчи ўринда ўсимликлар, илонлар, күшлар, ҳайвонлар кўрсатилган. Одам эса табиатга тобе, ёрдамчи, иккинчи даражали куч сифатида берилган. Санъат тараққиётининг навбатдаги босқичида — Қадимги Миср мифологиясида баҳайбат ҳайвонлар ва худолар образлари орасида инсон қиёфаси ҳам кўрина бошлаган. Фақат қадимги юон санъатидан бошлаб (Аристотель ҳам «Поэтика» асарида гувоҳлик беради) инсон санъат асарининг бош предмети бўлиб хизмат қиласди. Шу сабабдан Ҳомернинг «Илиада» ва «Одессей» асарларида инсон бош қаҳрамондир.

Санъат ана шу вақтдан бошлаб Инсонни ўрганишга, уни қашф этишга бор куч-қудратини сарфлаб келмоқда. **«Инсон тасвири йўқ жойда бадиий адабиёт йўқ»** (И. Султон) хукмига амал қилмоқда. Маълумки, инсондан ташқари, уни ўраб олган табиат (пейзаж) ҳам, жамият ҳам, ҳайвонот, ўсимликлар дунёси ҳам, буюмлар, предметлар (қўйингки, ҳаётнинг ҳамма материаллари) ҳам тасвириланади. Фақатгина улар бир шарт билан тасвириланадилар, яъни **улар инсон характеристи ва руҳий ҳолатининг у ёки бу қиррасини очишга хизмат қилишлари, демакки, инсонийлашлари лозим**. Инсон ва унинг руҳияти тасвири бўлмаса, айтилган нарсалар бу тасвирни, инсоний хислатни очмаса, унинг (Буалонинг «Шеърий санъат» асари, Абу Бисхоқнинг таомларга багишлиланган fazallari каби) адабиётга дахли йўқдир.

«Алпомиш» достонида Қоражон Бойчигорга миниб пойгага қатнашади. Пойга охирига яқинлашаркан, Барчиной севгилиси Алпомишнинг тулпорига шундай муружаат қиласди:

*Куйганимдан гапни гапга улайин,
То ўлгунча сайисинг бўп юрайин.*

*Эгам раҳм айласин қонли ёшима,
Сабаб бўлиб қўшгин денги-дўшима,
Олмосдай туёғинг қордай тўшима.
Курру-ё қур, ҳайт-а, тўрамнинг оти!
Уйилмай куймасин кулбаи хонам,
Оҳ уриб йиглайди мендайнан санам,
Қалмоқда қолмасин гулдайнин танам...
Йиглатмагин Барчин гулдай бебахтди,
Курру-ё қур, ҳайт-а, тўрамнинг оти!..*

Бойчибор — Алпомишнинг оғирини енгил қиласидаган, орзу-ниятларини рӯёбга чиқарувчи вафодор, садоқатда унинг тенги йўқ дўсти рамзидир. Шу сабабдан Барчиной унга мурожаат қиласар экан, Алпомишга бўлган муҳаббатини, бу муҳаббатнинг озодлиги, барқарорлиги учун бўлаётган курашда енгиб чиқишига мададкор эканлигини илтижо қилиб, тўкиб солади. Бойчиборга (дўстга) ёлворади, севгиси туйғуларининг инжулярини сочаверади — Барчиной фикр ва ҳиссиётлари ифодаси учун Бойчибор рамзий воситага — инсоний хислатларни жамгарган образга айланади.

Инсонни анатомия, кардиология, педагогика, психология каби фанлар ҳам ўрганади. Жумладан, психология миянинг объектив воқеликни акс эттириш жараёнидаги руҳий ҳолатларини ўрганса, стоматология — инсон жағи ва тишлари билан шуғулланади. Уларнинг биронтаси инсонни яхлит ва жонли тарзда ўрганмайди. Фақат адабиётгина инсоннинг ташқи ва ички ҳаётини, моддий ва маънавий дунёсини, маънавияти ва салоҳиятини тўла ва атрофлича, энг асосийси, **яхлит ва жонли тарзда ўрганади, таҳлил қиласи, тасвирлайди.**

Адабиётнинг предмети инсон ҳаёти (онги ва руҳияти)даги кўпчиликни қизиқтирадиган ҳодисалар бўлади. Айни пайтда адабиётда тасвирланган, қайта яратилган олам инсоннинг онг-шуурига қаттиқ таъсир қиласи; унинг фикр-туйғуларини инсонийлик билан бойитади, камол топишига туртки ва дарс беради.

«Адабиёт чин маъноси ила ўлган, сўнған қаралган, ўчган, ярадор қўнгилга руҳ бермак учун, фақат вужудимизга эмас, қонларимизга қадар сингишган қора балчиқларни тозалайдурғон, ўткир юрак кирларини ювадурғон тоза маърифат суви, хиралашган ойналаримизни ёруғ ва равшан қиласидурғон, чанг ва тупроғлар тўлган

кўзларимизни артуб тозалайдурғон булоқ суви бўлгонликдан бизга фоят керакдир»¹.

Шу сабаб ҳам у — инсоншунослик (А. Горький)дир; инсон руҳиятини покловчи, тозартирувчи, ёшартирувчи, бойитувчи, турли-туман, «кир-чир»лардан устунлигини таъминловчи қиёси йўқ неъматдир, мўъжизадир.

Шу сабаб ҳам адабиёт — инсонни куйлади, эъзозлайди, улуғлайди. Ёзувчи-санъаткор халқнинг тарбиячиси, орзу-умидларининг улуғловчиси, замонасининг ҳақгўй ва фидоий гуманисти (лат. «gumanisimus» — «инсонийлик») бўлиб танилади; халқ онги ва туйғуларининг навбатдаги ривожига, тинимсиз ҳаракатига бара-ка қўшади, чунки унинг ижоди «бутун бир тарихий даврнинг маъноси ва аҳамияти билан боғланган» (В. Белинский) бўлади; Адолат, Озодлик, Эркинлик, Мустақилликнинг ҳақлигига, унга ўзликни таниш орқали эришиш мумкинлигига ишонтиради ва унга руҳан чорлайди.

Хуллас, адабиётнинг тасвир обьекти — ҳаёт, тасвир предмети — инсон, вазифаси — инсон туйғулари тарбиясидир.

II. Бадиийлик, образлилик ва образ

Таянч сўз ва иборалар: Бадиийлик. Образлилик. Образ. Умумлашмалик. Индивидуаллик. Бадиий тўқима. Тъясирдорлик. Муболагадорлик. Характер. Психологизм.

Назариётчи олим Абдурауф Фитрат ёзганидек, «адабиёт — фикр, туйғуларимиздаги тўлқунларни сўзлар, гаплар ёрдами билан тасвир қилиб, бошқаларда ҳам худди шу тўлқинларни яратмоқдир»².

Ха, «Асли, ёзувчилик айтмоқчи бўлган фикрни ҳаммага баробар англата билишда, орага англашилмовчилик солмасликдир»³. Бу айтилганларнинг яна бири («инсоншунослик» ҳақида гапирдик) — бадиийликдир (В. Белинский бадиийликни адабиётнинг муҳим ва асосий хусусиятларидан бири сифатида талқин қилгани бежиз эмас).

«Кўпинча адабиётшунослар адабиётнинг ўзига хослиги — образлилик, деб ҳисоблайдилар.

¹ Чўлпон. Адабиёт надир, Т., «Чўлпон», 1994, 37-бет.

² А. Фитрат. Адабиёт қоидалари, Т., «Ўқитувчи», 1995, 22-бет.

³ А. Қодирӣ. Ижод машақвати, Т., «Ўқитувчи», 1995, 6-бет.

Бу — тор талқиндир, чунки образлилик, умуман инсон тафаккурининг хусусиятидир (фалсафада «образ» терминидан фойдаланиш тасодифий эмас). Бадиийлик образлиликдан кенгроқ тушунчадир. Бадиийлик санъатнинг ҳамма турларининг, шу жумладан, адабиётнинг энг муҳим ўзига хос хусусиятидир. Бадиийлик тушунчасига образлилик киради, аммо бадиийлик фақат образлиликдан иборат эмас. Адабиётни бадиий қилган нарса фақат образлилик бўлмай, балки унинг вазифалари, мазмуни ва шаклига тааллуқли кўпгина хусусиятлардир¹.

Бадиийлик (арабча «бадаъа» феълидан келиб чиққан бўлиб, янгилик киритиш, ижод қилиш маъноларини беради) ҳаётни жонли ва таъсири қилиб тасвирлашнинг умумий белгиси, ўхшаш қилиб қайта яратилган оламнинг тириклигини, мўъжизакорлигини, таъсирчанлигини таъминловчи ҳодисадир. Яъни бадиийлик — бадиий ижоднинг ҳамма унсурлари (образ, характер, тип, сюжет, деталь, композиция, бадиий тил, ифода тасвир воситалари, поэтик синтаксис, жанрлар, услуб...)ни ўз ичига қамраб олади, уларнинг ҳар бирига ва айни пайтда, турли-туман тарзда бирлашиб, яхлитлашганларида жон ато этади. Демак, бадиийлик деганда ҳаётни жонли ва таъсири қилиб қайтадан яратиш санъати, ҳаёт ҳодисалари устидан чиқарган «хукми», шу «хукм» руҳида тарбиялаш тушунилади.

Шу мулоҳазага суюнсак, бадиийликнинг ўзаги образлилик экани аниқлашади, у санъатнинг «тили»дир. Санъатнинг санъат бўлишини таъминловчи руҳ (жон)дир.

Образлилик бадиийлик ичida яшаганидек, образ образлиикнинг моҳиятини ўзида ташийди. Шу сабаб образ тушунчаси (демакки, кенг маънода бадиийлик) адабиёт илмининг бош масалаларидан саналади, чунки унда образлиикнинг моҳияти борлигича намоён бўлади. Демак, ёзувчи-санъаткорнинг бутун салоҳияти (маҳорати, руҳшунослиги, кашфиёти, донишмандлиги...) у яратган образларда муҳрланади.

«Образ» атамаси «раз» («чизиқ») сўзидан олинган бўлиб, «раз» сўзидан «разить» («чизмоқ», йўнмоқ, ўймоқ) ва ундан «образить» («чишиб, йўниб, ўйиб, шакл ясамоқ») сўзи ясалган. «Образить»дан «Образ» («умуман олинган тасвир») вужудга келган. Образ на-

¹ И. Султон. Адабиёт назарияси, Т., «Ўқитувчи», 1980, 108-бет.

зарияси, даставвал, Аристотель («Поэтика») эстетик қарашларыда учраса-да, унга биринчи бор олмон файласуфи Гегель илмий таъриф берган («Санъат образлар орқали фикрлашдир»), «тиниб-тинчимайдиган» рус танқидчиси В. Белинский томонидан мукаммаллаштирилган. И. Султоннинг «Адабиёт назарияси» (1939, 1980) дарслигига, Т. Бобоевнинг «Адабиётшуносликка кириш» (1979) қўлланмасида кенг ишлатилган, бадий асар мазмуни ва шаклининг бирлигини ўзида ифода этувчи восита тарзида таҳтил қилинган.

Шуни эсдан чақармаслик муҳимки, образ фақатгина санъатга тегишили ҳодиса эмас. Буни санъат ва танқид, ёзувчи ва танқидчи ўртасидаги фарқларда ҳам яққол кўриш мумкин.

Ёзувчи ўз қарашларини, орзу-истакларини образлар воситасида қалбининг «дарди», ҳис-ҳаяжони билан ўқувчилар оммасига етказса, асосий мақсад қилиб ўқувчилар руҳий оламига, туйғуларига таъсир қилишни назарда тутса, адабий танқидчи ўз фикр-мулоҳазаларини ва қарашларини изчил мантиқ, асос ва исбот асосида аниқ баён қилиш йўли билан оммага етаказади, асосий мақсад қилиб, китобхон ақлига таъсир қилишни назарда тутади.

Ёзувчи Оскар Уайлд фикрича, мунаққид — гўзалликдан (бадий асардан) олган таассуротини янги шаклга ёки янги воситалар билан ифодалаб беришга қодир одамдир.

Тўғри, танқидчи ҳам бадий воситаларсиз, ҳис-ҳаяжон ва «дард»сиз иш кўрмаслиги керак. Чунки фалсафада исботланганидек, «киши эмоциясисиз инсоннинг ҳақиқатни қидириши бўлмаган бўлган эмас ва бўлиши ҳам мумкин эмас!»

Демак, танқидчи бадий асарни баҳолаш жараёнида шу асар туфайли қалбида туғилган ҳисларни, ҳаяжонни ифодалаши лозим, яъни танқидчи ўз илмий тафаккурига, унинг мантиқига ўз бадий тафаккурини бўйсундиргандагина, шу йўл билан уларнинг ўзаро диалектик бирлигини таъминлагандагина ўз вазифасини бажаришга қодир бўлади. Чунки, ҳис-ҳаяжон ва образлилик билан чархланган фикр совуқкон, ҳиссиз фикрга нисбатан ўқувчидаги кучли ишонч ҳосил қиласи.

Лекин, танқиднинг бу хусусиятини баъзи ёзувчи ва танқидчилар адабиётдаги образлилик тушунчасига тенглаштирадилар ёки танқидга хос бўлган бадий тафак-

курни илмий тафаккурдан устун күядилар. Масалан, ёзувчи Е. Винокуров: «Мен адабий-танқидий мақолалар түгламини роман каби ўқишини хоҳлардим»¹, — деганида, худди шу тенденцияни ёқлагандек күринади. Ёки танқидчилигимизда ўзига яраша ўринни эгаллаган истеъодли танқидчи Иброҳим Faфуронинг «Гўзалликнинг олмос қирралари» китобини, дастлабки тадқиқотларидан бирини олиб қўрайлик. Унда танқидчи бадиий асарларни куйиб-ёниб таҳдил қиласди. Шу муносабат билан танқидчи ҳаёт ва адабиёт ҳақидаги ўз қарашларини изҳор этади. Ўзининг орзу-истаклари, фикр ва қарашлари билан ўртоқлашади. Лекин, баъзи ўринларда изчил мантиқий мулоҳазалар танқидчининг ҳис-ҳаяжони, лирик чекинишлари соясида қолиб кетгандай туюлади.

Санъат ва адабиётдаги образ жонли ҳаракати, жозибадорлиги ва ёрқинлиги билан ўзида ҳодисанинг қонуниятини асосли ва чуқур мужассам қилгани ва ҳоказо хусусиятлари билан фарқ қиласди.

Демак, адабиётга ҳаётнинг ҳамма (инсон, нарса-буом, ҳайвон, ҳодиса, предмет, ўсимлик; кўчма маъно берувчи сўзлар, иборалар, лексик ресурслар, ифода воситалари каби) унсурлари кирап экан, кирганда ҳам санъаткор онги ва қалбида жилоланиб, бойиб, катталашиб, энг муҳими инсонлашиб муҳрланаркан — уларнинг барчасини образ деб юритиш қонуниятдир. Бироқ, В. Белинский таъкид этганидек, **санъатдаги энг олий предмет — инсон ҳисобланаркан, демак, «образ» атамаси инсонга (бадиий асардаги инсонга) нисбатан кўлланиши маъқулдир**.

Образ «бадиий тўқима ёрдамида яратилган, эстетик қиймат касб этган инсон ҳаётининг умумлашма ва айни чогда, аниқ манзарасидир»² деган асосли таърифга сұянсак, унинг тўртта асосий, ҳар бирини алоҳида таҳдил қилиш лозим бўлган хусусияти борлиги ва айни пайтда, «образ фикрни умумлаштиришнинг тежамли» (А. Горький) қабариқли, муболагали усули эканлиги аён бўлади.

1. Бадиий образнинг умумлашмалиғи. Асалари минглаб гулларга қўниб, унинг энг асл шарбатларини эмиб, бир ерга йифиб бол тўплаганидек, ёзувчи ҳам муайян

¹ К а р а н г: «Вопросы литературы» журнали. 1966 йил, 5-сон, 17-бет.

² Л. Т и м о ф е е в. Основы теории литературы. М., 1971, стр. 62—63.

образ (дўкондор)ни яратиш учун, кўплаб дўкондорларнинг қиёфасини белгиларни характерли хусусиятларини, одатларини, сўзлаш одобларини, маънавиятини ва ҳоказоларини ўрганади ва уларнинг энг сараларини умумлаштириб, бир образда жамлайди.

Шу сабабдан биргина образ моҳиятида юзлаб кишиларга хос хислат ва белгиларини кўриш, «таниш бўлган нотаниш» кишиларни учратиш мумкин бўлади. Яъни, образ ҳаётдаги кишилардан энг муҳим, типик хислатлар асосида умумлаштирилгани, шу асосда яхлитлаштирилгани билан фарқ қиласди. Жумладан, «Судхўрнинг ўлими»даги Қори Ишкамбада бош хусусият қилиб хасислик, очкўзлик, судхўрлик хислатлари шунчалик умумлаштирилганки, биз ҳаётда учратган ўта хасис ва судхўр кишиларни — қори ишкамбалар деб атайверамиз. Демак, ёзувчи А. Горький ҳақ:

«Бадиий адабиёт айрим фактларга бўйсингандай, чунки ундан юқоридир. Унинг фактлари ҳақиқатдан ажралмагандир... Адабий факт — бир хилдаги қатор фактлардан суғириб олинган ва типиклаштирилгандир. Ҳаёт ҳақиқатида такрорланувчи қатор воқеаларни бир воқеада ҳаққоний акс эттирилса, шу вақтдагина ҳақиқий бадиий асар бўлади»¹.

2. Бадиий образнинг аниқлиги (индивидуаллиги). Ҳаётда бир-бирига айнан ўхшайдиган одам, барг, қор учқуни бўлмаганидек, хислатлар ҳам, фазилатлар ҳам бетакрор экан, бадиий образлар олами ҳам худди ҳаёт каби турфа хилдир. Шунга биноан, образлар ранг-баранг, бой, кўп қирралидирки, бу ўз навбатида, ҳар бир образнинг характерли аниқ қиёфаси, ўзига хос оригинал қилифи, одати, ўйи, орзуси, тили, муҳокамаси, мушоҳадаси, маънавияти, маданияти... салоҳияти бўлишилигини тақозо қиласди; индивидуаллаштириш қонуниятини ишга туширади: ўзига хослик кашф этилади, таъкидлаб кўрсатилади, эсда қоладиган қилиб тасвиранади.

Ана шундагина индивидуал образ жонлилиги ва табиийлиги, ҳаётийлиги ва бетакрорлиги билан китобхон қалбидан жой олади. Чунончи, «Ўткан кунлар»даги Отабек, Кумуш, Зайнаб, Ўзбекойим, Мирзакарим қутидор, Юсуфбек ҳожи, Офтобойим, Жаннат кампип каби бир-бирига ўхшамайдиган, ранг-баранг хис-

¹ А. Горький. О литературе. М., 1933, стр. 268.

латларни ўзида жамлаган индивидуал шахслар олами кўз ўнгимиизда жонланади. Биргина далил: «Юсуф ҳожининг қизиқ бир табиати бор: хотини билангина эмас, умуман уй ичиси билан ҳар қандай масала устида бўлсин узоқ сўзлашиб ўлтурмайдир. Отабекми, онасиими, Ҳасаналими, ишқилиб уй ичидан бирортасининг сўзлари ё кенгашлари бўлса, келиб ҳожининг юзига қарамасдан сўзлай берадирлар; мақсад айтиб биткандан сўнг секингина кўтарилиб, унинг юзига қарайдирлар. Ҳожи бир неча вақт сўзлагучини ўз оғзига тикилтириб ўлтурғандан сўнг, агар маъқул тушса «хўб» дейдир, гапка тушунмаган бўлса «хўш» дейдир, номаъқул бўлса «дуруст эмас» дейдир ва жуда ҳам ўзига номаъқул гап бўлса бир илжайиб қўйиш билан кифояланиб, мундан бошқа сўз айтмайдир ва айтса ҳам уч-тўрт калимадан ошмайдир»...¹

Қўринаяптики, ёзувчи Юсуфбек ҳожининг феълини аниқ ва китобхон ишонадиган (унинг характеристига, ёшига, салоҳиятига мос) тарзда индивидуаллаштиримоқда, айни пайтда, унинг асосидаги умумлаштириш ва иккала унсурнинг ҳам ҳаётий яхлитлиги Юсуфбек ҳожи образининг жозибадорлигини таъминламоқда. Демак, умумлашмадан индивидуаллик, индивидуалликдан умумлашмалик туғилгандагина, тўғрироғи улар бир-бирларининг ичларида мужассамлангандагина — яхлитлик вужудга келгандагина образ бетакрорликка, жонлиликка, таъсирдорликка эришади. Образ туғилади.

3. Образ яратища бадиий тўқима. Образ умумлашмалик ва индивидуаллик қонуниятларининг бирлашувидан юзага келар экан, уларни, санъаткор дилидан ўтказиб, ўзлигини қўшиб тасвирларкан, албатта, унда бадиий тўқиманинг, фантазиянинг қай даражададир қурдати қўшилган бўлади.

Бадиий тўқима Уэллек (АҚШ) тушунчасида — «Бадиийликнинг асосий детерминанти², Ф. Гольянский (Польша) тасдифича поэзиянинг қалбидир³», «Зотан,

¹ А. Қодирий. Ўткан кунлар. Мехробдан чаён, Т., 1994, 131-бет

² Қаранг: Г. Маркевич. Основные проблемы науки о литературе, М., 1980, стр. 148.

³ Қаранг: Основные проблемы науки о литературе, М., 1980, стр. 138. (Детерминизм. Табиат ва жамиятдаги ҳамма ҳодисаларнинг, шу жумладан, кишиларнинг ирова ва хулиқларининг умумий объектив қонунияти борлигини ва улар бир-бирига боғлиқ бўлиб, бир-бирини тақозо этишини эътироф этувчи назария: Ўзбек тилининг изоҳли лугати, М., «Рус тили» нашриёти, 1981, 1-том, 222-бет).

бутун адабиёт бадиий тұқымалардан иборат, чунки турмуш ҳодисалари замон ва макон ичида сочилиб ётади. Масалан, бир одамни олайлик: у үзининг моҳиятини, табиатини очиб берадиган бир сүзни бутун айтса, иккинчисини бир ҳафтадан, учинчисини бир йилдан кейин айтиши, балки, ҳеч бир айтмай ўтиб кетиши ҳам мумкин. Ёзувчи ана шундай одамни кетма-кет сўзларатди. Унинг моҳияти ва табиати учун характерли сўзларнинг ҳаммасини айттиради. Бу эса турмушни бадиий тұқымалар воситасида акс эттириш бўлади. Аммо бадиий тұқымадаги ҳаёт оддий турмушдан кўра реалроқ ва тўлиқроқдир» (А. Толстой).

Биринчидан, ҳаётдаги замон нуқтаи-назаридан қарасак, «Ўткан кунлар»даги воқеалар ўн уч ярим йилда бўлиб ўтса, адабиёт қоидаларига кўра бир-икки кунда (китобхон ўқишига сарфлаган вақт ичида) бўлиб ўтади.

Иккинчидан, ижод жараёни тажрибасида (Аристотелнинг «Поэтика»сидан бошлаб) асарда иштирок этувчилик қанчалик бир-бирлари ёки қариндошлиқ ипла-ри билан bogланган бўлсалар, улар ўртасидаги симпатия ёки антипатия (сюжет воқеалари) кескинлашади. Жумладан, «Ўтган кунлар»даги Ҳомид Раҳматнинг тогаси, Зиё шоҳичининг қайниси, Зиё шоҳичи — Юсуфбек ҳожининг энг яқин ошнаси ва ш.к. Бу усул ёвузлик билан эзгуликнинг курашини кескин ва қизиқарли қылганидек, иккала ҳодиса (ёвузлик ва эзгулик)-нинг бир маконда, замонда, ҳаттоқи бир уруғда яшавши мумкинлигини — ҳаётийлигини исботлайди.

Учинчидан, бадиий тұқима ўйлаб чиқарилишидан қатъий назар, унинг асоси ҳаётийликдан маҳрум бўлмаслиги лозим. У ўқувчини ишонтириши шарт. Шунинг учун ҳам ёзувчи А. Қодирий иқорор бўлади: «Мен турмушда кўрмаган, билмаган нарсам ҳақида ҳеч нарса ёзмайман, ҳар бир асаримнинг ёзилишига турмушда учраган бирор ҳодиса сабабчи бўлади. Масалан, мен колхозларда юрганимда, ҳақиқатдан ҳам Обид кетмончининг баъзи хусусиятларига эга бўлган бир типни кўрдим». Демокшимизки, ёзувчи ҳаётни «қайта бичиб тикканида» (А. Қаҳҳор) ҳам унинг қаърида ётган ҳақиқатга бўйсимиши, фақатгина шу ҳақиқатдан бадиий ҳақиқат яратиши лозим бўлади. Худди А. Қаҳҳорнинг «Бемор» ҳикоясидаги бадиий ҳақиқат билан А. Қаҳҳор ҳаётида рўй берган факт ва ҳодисалар ўрта-

сидаги мутаносиблиқдай¹. Бу қонуниятга бўйсунмаган ёзувчи уйдирмага, ҳақиқий ёлғонга, сув юзасидаги кўпикка эътибор беради ва ҳаёт ҳақиқати ҳақида (Сайд Аҳмаднинг «Жимжитлик» романидек) сохта маълумотлар бера бошлайди, унга ҳақиқий китобхон ишонмайди. «Чиройли лоф-қоғдан хунук ҳақиқат яхшилиги» (А. Қаҳҳор) шундандир.

Бадиий образнинг эстетик таъсиридорлиги. Инсон учун энг гўзал нарса ҳаёт («Гўзаллик — ҳаёт»)дир. Ҳаёт ва инсон — адабиёт ва образнинг асосидир. Демак, адабиёт ҳам, образ ҳам ҳиссиётимизга, онг-шууримизга таъсири этади, муайян бир туйғу (севинч, ғазаб, ғурур, эъзоз, нафрат, ҳурмат каби)ни ёки тўғрироги туйғулар силсиласини уйғотади. Шу сабаб «Ўқишли китоб гўзаликдир, лекин гўзаликда ҳам гўзалик бор. Қоронғи кечада отилган мушак ҳам гўзал, қўёшга қараб хандон ташлаб турган гул ҳам гўзал. Осмонда сочилиб кетган ранг-баранг олов ва оқишизлар гўзалиги қўзни қамаштирса ҳам пуч гўзалик, шунинг учун бебақодир. Гулнинг гўзалиги эса тўқ гўзалик, чунки унинг бағрида ҳаёт бор, шунинг учун абадий гўзаликдир. Фунча гулдан ҳам гўзалроқ, чунки унинг бағрида икки ҳаёт — ўз ҳаёти ва яна гул ҳаёти бор»².

Одамлар (китобхонлар)нинг ҳисларини қўзфатиш, «туйғуларимиздаги тўлқунларни» уйғотмоқ орқали ҳаяжонлантириш — эстетик таъсиридорлик экан, бадиий образ магзи тўқ, ҳаётий, умрибоқий бўлгандагина бадиий қимматга эга бўлади; образ яратишга ўтади: ундан ҳаяжонланиб ўрнак оламиз ёки нафратланамиз, ҳис-туйғуларимизнинг яхшилари (ижобийлари)га «озиқ» берамиз, ёмонларини (салбийлари)ни етти қават чукурга кўмамиз.

Чунончи, Ипполит Тэн (1828—1893)нинг ҳикоя қилишича, америкалик оддий солдат театрга тушиб «Отелло» спектаклини томоша қиласди. Саҳнада Отелло рашк ўтида ёниб, севикли хотини, пок Дездемонани бўғиб ўлдирап экан, солдат ундан фоятда нафратланниб кетади ва Отелло — актёрни отиб ташлайди. Ёки Абдулла Қодирий қаҳрамони Кумушнинг ўлими лавҳасини тасвирлар экан, юм-юм йиғлайди. Кумушнинг из-

¹ Қаранг: Ҳ. Умуров. Бадиий ижод мўъжизалари. Самарқанд, «Зарафшон», 1992 йил, 25—29-бетлар.

² А. Қаҳҳор. Бадиий ижод ҳақида, Т., 1987, 61-бет.

тиробини, оғрифии, түйгүларини ўз бошидан кечи-раётган шахс ҳолига тушади...

Бу мисоллар образнинг эстетик-тарбиявий қийматининг фоятда аҳамиятли эканига далиллар.

Образнинг айтилган тўртта хусусиятини механик тарзда бирлаштиришдан санъат туғилмайди. «Чор дарвеш тўғрисида бундай ривоят бор. Бошқа шериклари ухлаб ётар экан, бир дарвеш ёғочдан қўғирчоқ ясади, иттифоқо тўқувчи бўлган бошқа бир дарвеш унга кийим-бош тикади. Учинчи-заргар дарвеш безаклар тайёрлади. Тўргинчи дарвеш эса қўғирчоқ тайёр бўлганини кўриб, унга жон бағишлиашни сўраб, худога ёлборади. Шундан сўнггина у баркамол асарга айланади»¹. Санъат туғилиши учун образга ёзувчи Миртемир айтилган дарвешларнинг ҳаммасининг ишини бир ўзи қилиши керак; аниқ гоявий мақсадни қўзлаб жон ато қилиши керак; ана шу моҳиятни очиб берадиган қилиб қисмларнинг ҳар бири ўзига керакли, зарур ўринни забт этиши ва асардаги бош мақсаднинг тириклигини таъминлаш йўлида (инсон танаси ва руҳияти (жони)дек) беминнат бадиий хизматини ўташи лозим. Айни чогда, бош гоя — ёзувчи айтмоқчи бўлган янги фикр қисм-хужайраларнинг жонлилигини таъминлайдиган қонни етказиб туриши талаб қилинади.

Шу ўринда адабиётнинг, образнинг яна бир қонуниятини таъкидлаш лозим. Умумлаштириш, индивидуаллаштириш, бадиий тўқима ва эстетик-таъсиридорлик адабий асарнинг ҳамма унсурларига таалуқли универсал принцип — бадиийликнинг кўрсатгичи бўлганидек, муболагасиз биронта санъат асарини яратиш ҳам мумкин эмас. Муболага санъатнинг барча компонентларига хос хусусиятдир. Масалан, «Ўткан кунлар»даги Кумуш портретини кўрайлик:

«...уйнинг тўрига солинган атлас кўрпа, пар ёстиқ қучоғида совуқдан эринибми ва ё бошқа бир сабаб биланми уйғоқ ётқан бир қизни кўрамиз. Унинг қора зулфи пар ёстиқнинг турлик томонига тартибсиз суратда тўзғиб, қуюқ жингила кипрак остидағи тимқора кўзлари бир нуқтага тикилганда, нимадир бир нарсанни кўрган каби... қопқора камон, ўтиб кетган нафис қийиқ қошлари чимирилган-да, нимадир бир нарсадан чўчиган каби... тўлган ойдек губорсиз ой юзи бир

¹ Адабиёт — руҳият мулки (алибларимизнинг ижод сирлари ҳақидаги дурдона фикрларидан) Т., 2000, 35-бет.

оз қизиллиқға айланған-да, кимдандир уялған қаби... Шу пайт құрпани қайириб ушлаган оқ нозик құллари билан латиф бурнининг ўнг томонида, табиатнинг ниҳоятда уста құли билан құндирилған қора холини қашиди ва бошини ёстиқдан олиб үлтурди. Сариқ рупоҳ атлас құйлагининг устидан (Бу сұз аслида «Остидан» бўлса керак — Ҳ. Ү.) унинг ўртача кўкраги бир оз кўтарилиб турмоқда эди. Туриб үлтургач бошини бир силкитди-да, ижирганиб қўйди. Силкиниш орқасида унинг юзини тўзғифан соч толалари ўраб олиб жонсуз¹ бир суратка киргизди. Бу қиз суратида қўринган малак қутидорнинг қизи — Кумушбиби эди» (29-бет).

Қўринадики, Кумуш портрети қуюқлаштирилган, гўзаллаштирилган тарзда ёзувчи томонидан кашф қилинган. Унинг қиёфаси тасвирида муҳим белгилари (қора зулфи, жингила кипрак, тимқора қўзлар, нағис, қийиф қошлар, оқ юз, нозик қўл, қора хол...) ҳаракатланар экан, унинг хаёлидаги кечинмаларини сирли ва жозибадор қиласи, китобхонни ўзига оҳанрабодек тортали; ўйлашга, сабабларини топишга ундаиди.

Кумуш қиёфасини фақатгина «Ўткан кунлар»да учратиш мумкин. Ҳаётдан уни излашга ҳожат йўқ, ундаи малак йўқ. Шу асоснинг ўзиёқ, портретнинг муболагали тарзда яратилганига шоҳидлик беради. Кумуш портретида юзлаб қизларимизга учрайдиган қиёфа тафси-лотлари жамлангани ва ёрқин тарзда ифодалангани (образга хос ҳамма қонуният ва хусусиятлар воқе бўлгани) учун ҳам, ҳаётда Кумуш қиёфасининг у ёки бу белгиларини яққол намоён этувчи қизларни учратиш мумкин. Бу ҳаётта ўхшаш қилиб яратилган бадиий оламнинг сиранотидир.

Демак, ёзувчи-санъаткор ҳамма вақт (асарнинг энг нозик штрихларигача) яратади. Чунки, унинг вазифаси — табиат ва одамнинг нусхасини бериш эмас, балки, ўхшаш қилиб яратилган нарсага жон ва ҳаракат ато этишда, унинг қалби, мазмуни, характерли қўриниши ҳақида таассурот уйғотишдадир.

Характер. Агар образни ёнғоққа қиёсласак, характер (юононча charakter-хусусият, белги) шу ёнғоқнинг мағзидир. Чунки мағизда ёнғоқнинг моҳияти, тириклиги, зарурийлиги, жони жамулжамдир. Шу сабаб «ха-

¹ Жонсуз — жон ўртовчи, азоб берувчи.

рактер яратылсагина бадий асар яратылади» (Н. Погодин) деган қатъий ва асосли холосани чиқариш мүмкін. **Характер яратыш бадийликнинг ўзак масаласи** деб қарашимизнинг боиси шундаки, характер бадий ижоднинг жуда күп унсурлари (сюжет, композиция, тил каби)ни ўзида жамлайди, тұғриси ўзига «ишлаш»га мажбур қиласы. Яъни характер асар мазмунига нисбатан шакл бўлса, характерга нисбатан сюжет, композиция, тил (услубнинг бутун ҳийла-найранглари) шаклдир. Иззат Султон тавсия этганидек, «асар мазмуни характер тасвири туфайли ҳаёттый аниқлик касб этади ва шу билан бирга, бизнинг ҳисларимизга таъсир этиш хосиетига эга бўлади». Тұғри гап: «Ҳар қандай муҳим ғоя ҳам инсон қисматига айланмаса қуруқ гап бўлиб қолаверади» (Ў. Ҳошимов).

Характернинг мазмунини аниқлайдиган иккита асосий хусусият бор.

Биринчиси, «бу бир шахсни иккинчи бир шахсдан ажратиб турадиган ахлоқий ва психологияк белгилар мажмуасидан иборатдир. Ҳаётда шундай кишиларни учратиши мүмкін: қилаётган бир ишига ҳамоҳанг қилиб бирор ҳаракатни одат қилиб олган бўлади; гапираётганда бурнининг учини қашиб қўяди ё ўйлаётганда бармөқлари билан сочини тарайди ва ҳоказо. Психологияк жиҳатдан эса ҳар бир шахснинг бирор хусусияти бўртган бўлади: ўжар ё тажанг, оғир ё енгил, камгап ё кўп гапирадиган ва ҳоказо. Психика хусусиятига нисбатан табиий хусусиятга яқин турадиган бундай белгилар ёзувчи учун кўпроқ образни индивидуаллаштириш учун зарур бўлади.

Иккинчиси, бу индивидуал белгиларни ҳам ўз ичига олган ҳолда маълум бир ижтимоий шароитда пайдо бўлган, ижтимоий маъно касб қилган шахс ирода йўналиши ва бу ирода йўналишининг асардаги бадий инфодасидан иборатдир. Фақат ижтимоий шароит асосида юзага чиққан шахс иродаси характернинг асарда бадий ва ғоявий негизини таъмин қиласы. Бусиз ёзувчи яратган характер бадий ва эстетик қийматга эга бўлмайди¹ (Таъкид бизники — Ҳ. У.).

Дарвоқе, Йўлчида («Қутлуғ қон») меҳнаткаш халқ вакилларига хос бўлган умумий хислатлар — конкрет

¹ М. К. ўш жон о.в. Ойбек маҳорати, Т., «Тошкент» бадий адабиёт нашриёти, 1965, 5—6-бетлар.

муҳит таъсирида вужудга келган ўз-ўзини англаш хусусияти ва шу хусусият натижасида унинг онгида юз берган олға интилишлар; шахсий хислатларини белгилайдиган белгилар — содда, ювош, уятчан, ҳушёр, софдил, меҳнатсевар, ҳалол, жасур кабилар ўзаро ўй-ғунлик касб этиб, яхлит характерни яратади.

Демак, характер — бу аниқ ирода йұналишига эга бўлган, ўз хатти-харакатлари, интилишлари, ўй-хаёллари, дунёқараши, маънавияти, маърифати, феъл-атвори билан ажралиб турадиган тұлақонли шахслар образидир. Шу сабаб бадиий асардаги ҳамма образлар характер санаlmайди. Жумладан, «**Ўгри** (А. Қаҳҳор) асаридаги **Қобил бобо характер санаlса**, қолган (Қобил бобонинг кампири, элликбоши, пристав, тилмоч, Эгамберди)лар персонажлардир.

Психологиям принциплари, шакллари. Характер ва унинг психологияси таҳлили адабиётнинг камолоти, ёзувчининг маҳорати даражасини белгиловчи бош омилдир. Дарвоқе «Адабиёт — характерлар яратиш санъати» (И. Султон) ва айни чоғда ана шу характерлар «...дилени билиш, унинг сирларини бизга очиб күрсатищ-асарларини биз мароқ билан қайта-қайта ўқыйдиган ёзувчиларнинг ҳар бирiga бериладиган тәърифдаги биринчи сўзлар шулар-ку, ахир» (Н.Чеэнишевский). Ҳозирга қадар ўзбек насрода қаҳрамон психологиясини очишнинг уч хили яққол кўзга ташланади.

Абдулла Қодирий йирик прозасида қаҳрамонлар туйгуларини бевосита таҳлил этмайди, балки ташқи қиёфа кўринишларида руҳий ҳолатларнинг аксини беради.

Биргина мисол. Отабек ошиқ. Лекин ҳали бу сир. «Отабекнинг ҳар бир сирига ўзини маҳрам ҳисоблаганликдан» унинг «маънавий бир падар»и — Ҳасанали бу сирни очмоқ мақсадида бекни синамоқда».

«Ҳасанали гиналик қиёфада қошларини чимирди ва — Мендан яшириб юрган бир сирингиз бор, — деди. — Сиздан яширган бир сирим бор? — Бор, ўғлим бор, — деди Ҳасанали, — агар даъвонгиз тўғри бўлса, менга чиндан ўз кишим деб қарасангиз, ўша сирни яширмангиз.

Отабек тўсатдан ўзгариб, бояги асабийлик ҳолатини йўқотди, шундօф бўлса ҳам ўзини йиғиб, кулган бўлди:

Ҳали шунақа сиздан яширин сирим борми?
— Бор!

— Бұлса, марҳамат қилиб кашфингизни сүзлангиз!

Ҳасанали пиёлани оғзига күтариб, чойни ҳўплади, кашфини очди:

— Марғилондан келган кунлардан бошлаб сизда қизиқ бир ҳолат бор эди. — Сиз бу ҳолатни «Марғилон ҳавоси ёқмади» деб таъбир қылсангиз ҳам, мен мундан бошқа нарсалар пайқайман...

Отабек үзига қатый тикилиб турған Ҳасаналидан юзини четта буришга мажбур бўлди. Гүё бу сеҳргар чол ҳамма сирни бетдан ўқиб олар эди. Ҳасаналини ҳамон үзига тикилиб турганини билиб манглайини қашиган бўлди:

Хўш, давом этингиз...

— Бу сирингизни мендан яширмоқчи бўласиз, — деди тамом қаноат билан Ҳасанали. — Хайр, яширмоққа ҳам балки ҳақингиз бордир. Аммо шу кўйи сир сақлаш билан бирор натижага етиш мумкинми?..

Отабек қип-қизил қизариб, гуноҳкорлардек ерга қараган эди. Ҳасаналининг юзига падарона тараҳҳум тузи кириб кексаларга хос оҳангдор бир товуш билан бекнинг устидаги оғир юкни ола бошлади:

— Айби йўқ, ўғлим, — деди, — муҳаббат жуда оз йигитларга мусассар бўладиган юрак жавҳаридир. Шунинг билан бирга кўп вақтлар кишига зарарли ҳам бўлиб чиқадилар. Шунинг учун куч сарф қилиб бўлса ҳам унутиш, кўп ўйламаслик керакдир.

Бу кейинги гап билан Отабек күтарилиб Ҳасаналига қаради ва узоқ тин олиб яна ерга бокди. Гүё бунинг ила «унутиш мумкин эмас» деган қатый сўзни айтган эди. Орага сўзсизлик кирди. Иккиси ҳам фикрга толган эди. Ҳасаналининг ортиқча берилиб ўйлаган кезда соқолини қайриб тишлайдиган бир одати бўлиб, ҳозир соқолини ямлаш билан машғул эди. Узоқ ўйлагандан сўнг ишнинг очилмай қолган қисмини ечишни бошқа вақтга қолдирмоқчи бўлди, чунки Отабек, шунинг үзига ҳам яхшигина қизариниб, бўртинган эди¹!

Келтирилган ушбу парчадан кўринадики, қалб изтироби ва кечинмаларини хатти-ҳаракатлар, юз тузилиши, кўз қарашлари орқали очади. Ҳақиқатдан ҳам биринчи бор Отабек қалбини тутғёнга солган муҳаббатнинг Ҳасанали томонидан кашф этилиши Отабекни уялишга («...Ҳасаналидан юзини четта буришга маж-

¹ А. Қодирий. Ўткан кунлар. Т., 1980, 24—25-бетлар.

бур бўлди»), гуноҳкорлардек айбига иқрор бўлишга («Отабеқ қип-қизил қизариб, гуноҳкорлардек ерга қараган эди») олиб келади ва ҳ.к.

А. Қодирий романнинг «Қаршилаш» бобида Ҳасаналининг ва «Қоронғу кунлар» бобида Отабекнинг фикр ва ҳислар оқимини («ўз-ўзини таҳдил қилиш» воситаси орқали) жуда сиқиқ формада беришга интилади, холос.

Хуллас, романда ёзувчи учун ички дунёниг—руҳнинг кечинмаларини ташқи қиёфа, ҳолат ва хатти-ҳаракатларда кўринишини тасвирлаш, яъни динамик принцип асосий мезондир.

Ўзбек романчилигида биринчи бор Абдулла Қаҳхорнинг «Сароб» романидаги психологизмнинг аналитик принципи яққол кўзга ташланади. Бу принципда «воқеалар тафсилоти»нинг тасвирига нисбатан «ҳис-туйғулар тафсилоти» тасвири биринчى ўринга чиқади. Қаҳрамоннинг руҳий жараёни, бу жараённинг бетиним ўзгарувчанлиги, фикрлар, ҳислар ва кечинмаларнинг ривожи ва окувчанлиги кенг таҳдил этилади.

Шунинг учун ҳам Абдулла Қаҳхор «Сароб» романидаги қаҳрамоннинг ўз шахсидаги қарама-қарши фикрлар жангига, ҳис-туйғулар курашига асосий дикқатни қаратади. Қаҳрамон қалби диалектикасининг очилиши-ўша қаҳрамонни туғдирган ва ўстирган муҳит кўп қиррали панорамасининг реалистик тасвирига олиб келади.

Роман Саидийнинг университет даргоҳида Мунисхон билан тасодифан учрашуви ва танишувидан бошланади. «...олдига қўйилган шартларни эшитиб «ундай бўлса ўқимайман» деган фикрга келган Саидий Мунисхонни кўргач, қизнинг ҳам университетда ўқишга хоҳиши борлигини билгач, тезда бу фикридан тонади: «Унинг эндиғи фикри қандай бўлса ҳам университетга кириш, ўқиш эди. Вужуди мӯъжиза, ҳар бир сўзи, ҳаракати ҳаётта чақириб турган шу қизга ҳамдард бўлиш учун у ҳар нарсага тайёр эди»¹.

Иккинчидан, Саидий Мунисхондан «нима умидвор эканини ўзи билмайди, аммо унинг умид қилган нарсасинигина эмас, бутун оламни бериб, ҳеч нарса талаб қилмайдиган ҳолат»га тушади. Саидий Мунисхонга шунчалик мафтунки, қизнинг лаб тишлаб бош

¹ А. Қаҳхор. Сароб, Т., 1957, 4-бет.

чайқаши ҳам, майин товуши ҳам унинг вужудини эгаллайди, қалбини титратади.

Бу ҳиссиёт динамик равиша аста-секин ривожлана боради. Ривожланган сайин Саидий қалби ўзининг борлигини намоён этади: «шу қизнинг бошига бир фалокат тушса-да, қутқарадиган киши ягона мен бўлсан...»

Бояги самимий ҳис-туйгулар ўрнини худбинлик эгаллайди. Ана шу худбинликнинг илдиз отиши, гуркираши учун тўла имконият берадиган миллатчилар муҳити Саидийни ўз домига тортади ва бора-бора уни ҳало-катта олиб келади. Ана шу худбинликни миллатчилар муҳити билан боғлашда Мунисхон «кўпrik» вазифасини ўтайди. Демак, Саидийнинг «бутун ҳаёти, ички ва ташқи олами, қисмати ана шу дастлабки ҳис ва унинг натижаси бўлган фикрнинг оқибатидир».

Демак, «Сароб»да аналитик принцип асосий, хукмрон принципидир.

Психологизмнинг динамик ва аналитик принциплари гарчи бир-бирига қарама-қаршидек туюлса-да, лекин, уларни ўзаро зид қўйиш ҳам ноўриндир. Бу принциплар баъзи романларда уйғунлашган, қўшалоқлашган ҳолда кўзга ташланади. Бундай асарларда қаҳрамонларнинг руҳий дунёси уларнинг хатти-ҳаракатлари, қиёфалари орқали ечилиши билан бирга, айни пайтда, шу қаҳрамонларнинг фикр ва ҳиссиётлари диалектикаси оқими ва ривожи ҳам берилади. Бу хил романларда психологизмнинг бу икки принципи диалектик бирлиқда таҳлил этилади. Бу психологизмнинг синтетик принципидир. Ойбекнинг «Кутлуг қон» романни бу принципда яратилган ўзбек романчилигининг тўнгич, гўзал намунасидир.

Фикримизнинг исботи учун романдаги қўйидаги лавҳага диққат қиласайлик:

«Атрофда одам тўпланди. Баъзилар ачинади, баъзилар томошабин. Мана, шу гузарнинг ўспирин баққоли ҳам етиб келди, оч итдай аланглаб қовунларни кўздан кечирди.

— Қани, деҳқон ака, савдони қиласайлик, қўлни беринг... отингизнинг думи остидан юлдуз кўриниб қолибди. Арава бўлса алмисоқдан қолган, яна синибди. Шу от, шу арава билан шаҳарга юқ олиб борармидингиз? Шаҳар қайда... ўйламабсиз-да, Неча пул берай? — баққол бидирлаб, деҳқонланган қўлини ушлади. Эс-

хүшини йўқотиб, гарангланган дәхқон дастлаб индамади. Ёш баққол вайсайверганидан сунг бир уҳ тортиб секингина деди:

— Ўн тўрт сўм берасиз...

— Э? Ўн тўрт сўм? Тушингизни сувга айтинг.

— Шаҳарда ўн саккизга «финг» демай олади. Ноиложликдан дейман-да. Қовунга қаранг. Ҳар бири туянинг калласидай. Жуда сараланган.

— Шаҳарга бора олмайсиз, — бидирлади баққол, қовунни ҳам кўрдим, ўртача. Агар яхши бўлса, халқ ёб, сизни дуо қиласди; мен ўзим емайман. Кейин, ким билади, бир палакдан ҳар хил қовун стишади. Дәхқон бўймасак ҳам, буни фаҳмлаймиз. Уч сўлкавой бераман, хўйи денг.

Саксонта қовунга-я? Уч сўм? — дәхқон тескари бурилди.

— Инсоф қилинг, баққол ака — қичқирди Йўлчи. Яна бирмунча одамлар Йўлчининг сўзини тасдиқладилар: «Тўғри инсоф қилинг-да». Баққол бу сўзларни ўшитмагандай аврайверди:

— Мен сизнинг фойдангизни ўйлайман. Арава кишиникими? Қовунни тушириб оламан шу ерда. Анов ерда уста Тошпўлат бор, биларсиз, арава ишида фаранг. Қовуннинг пулига аравани тузаттирасиз. Эгаси хафа бўлмайди. Иложи бўлса, яматганингизни айтманг, койиб-нетиб юрмасин тағин. Туя кўрдингми йўқ, вассалом...

Иложисиз қолган дәхқон баҳони секин камайтириб, етти сўмга тушди. Бошқа бир рақиб илмасин деган андиша билан баққол ҳам бир тангалаб ошаверди. Сўз билан дәхқоннинг бошини қотириб, ниҳоят, тўрт сўмга кўнишга мажбур қилди...

Йўлчи чопиқقا тушди. Куннинг иссиғида кетмон ташларкан, фикри-хаёли ҳалиги дәхқонда бўлди: «Ажаб дунё экан! Ҳар ерда дәхқоннинг иши чатоқ. Ери бўлса, улови йўқ. Улови бўлса, ери йўқ. Кўпида иккиси ҳам йўқ. Мана, мен... Ҳозир қаёққа қарасанг, менга ўхшашлар... Ҳалиги дәхқон қовун экибди. Қанча меҳнат, қанча машаққат. Ёлғиз ўзи эмас, бутун уй ичи билан ишлаган, албатта. Дастрлабки сотиш бу хилда бўлиб чиқди. У молни сотмади — сувга оқизди. Йўқ, сувга оқизгандан баттар бўлди. Лоақал ўн беш сўм турадиган қовуни тўрт ярим сўмга сотсин, буни ҳам бирорвнинг аравасини тузатишга тўласин. Фойдани тулки баққол кўрди.

Вой ҳароми, ноинсоф! Мен бундай мўлтонини сира кўрганим йўқ эди... Энди дехқон, ўз отасининг шаҳардан қайтишини тўрт кўз билан кутган болалари олдига қандай боради. Уларга нима дейди? Қип-яланғоч болалар, кийим қани деса, нимани кўрсатади? Тўй ўрнига аза...»¹.

Мана, кишидан сўраб олган араваси синган, қовуnlари арзимаган нархда баққолга кетган дехқоннинг, ёш бўлса-да, ўз манфаати йўлида қилни қирқ ёрадиган, сўзлари билан дехқонни гаранглатган ўспирин баққолнинг, буни кўриб турган, баққолни инсофга чақиравчи Йўлчининг хатти-ҳаракатлари, ҳолати тасвири.

Агар дехқоннинг қалбидаги туғён унинг уҳ тортиши, секин гапириши, тескари қараши каби хатти-ҳаракатлари орқали берилса, бу ҳаётий эпизод тасвири Йўлчи тасаввури, фикрлари оқими орқали яққол гавдалантирилади.

Романда эпик тасвири билан ҳис-туйгулар тасвири ўзига хос уйғуллашади. Асар панорамаси — қаҳрамонлар қалбидаги кечинмаларни реаллаштиргани каби кечинма ва фикрлар оқими тасвири ўз навбатида тасвирланаётган ҳаётнинг моҳиятини очади.

Ойбек тасвирида воқеа ҳам, ҳис-туйгулар тафсилоти ҳам ўз бадиий қимматини йўқотмайди, улар бирбирини бойитувчи, бир-бирининг сир-асрорини очувчи яхлит восита сифатида кўзга ташланади.

Хуллас, психологизм (унинг динамиқ, аналитик, синтетик принциплари) ҳамма реалист ёзувчилар учун умумийdir. Ҳар бир ёзувчининг бу борадаги ўзига хослиги психологизмнинг турли воситаларидан қандай ва қай даражада фойдаланишига боғлиқdir. Н.Чернишевский «Психологик тасвир турли кўринишларга эга бўлиши мумкинлиги» ҳақида гапириб, унинг қуидаги шаклларини кўрсатган эди:

- 1) бир ёзувчини характернинг қирралари кўпроқ қизиқтиради;
- 2) иккинчисини — ижтимоий муносабатлар ва майиши тўқнашувларнинг характерларга таъсири;
- 3) учинчисини — ҳислар билан фаолият орасидаги алоқа;
- 4) тўртинчисини — эҳтирослар таҳлили;

¹ О й б е к. Қутлуғ қон. Т., 1980, 39—40-бетлар.

5) бешинчисини эса «қалб диалектикаси» қизиқтиради.

Шуни таъкидлаш лозимки, муайян ёзувчининг ижодини ёки унинг маълум романини психологизмнинг конкрет бир шакли билан чеклаш мутлақо мумкин эмас. Адабиёт тажрибаси шуни кўрсатадики, ҳар бир ёзувчи ўз ижодида (ёки маълум бир романда) психологизмнинг турли шаклларидан кенг фойдаланади. Бироқ бу формалардан биронтаси етакчилик қилиши табийидир.

Чунки психологизмни юқорида айтганимиздек, санъаткорнинг шахсидан ажратиб тасаввур қилиш мумкин эмас. Ҳар қандай асаддаги психологизм тасвирида, ўша асарни яратувчи ёзувчининг ўзига хос психикаси имкониятлари намоён бўлади. «Услуб — бу одам» экан, ўз навбатида «Ёзувчи ички дунёсининг ёрқин иғодаси — унинг услуби» (Гёте)дир.

Шу нуқтаи назардан ёндашсак, Абдулла Қодирийнинг «Ўткан кунлар» романида характернинг қирраларини таҳлил этиш етакчи психологик шаклдир. Абдулла Қаҳҳорнинг «Сароб» романида эса қалб диалектикаси асосий шакл ҳисобланса, Ойбекнинг «Кутлуғ қон» романида ижтимоий муносабатлар ва майший тўқнашувларнинг характерларга таъсирини таҳлил қилиш биринчи ўринга чиқади...

Демак, характерлар оламини яратиш ёзувчининг ўзлигини танишига, руҳияти қатламларидағи сирларни билишига, уни тадқиқ ва таҳлил қила олишига ва ғоявий-бадиий ниятини очиб берадиган қилиб тасвирлаш сифатига боғлиқдир.

III. Талант. Илҳом. Бадиий маҳорат

Таянч сўз ва иборалар: Истеъдод. Талант. Бадиий ижод. Илҳом. Мўътадил илҳом. Завқу шавққа тўлиқ илҳом. Ҳис қила билиш санъати. Бадиий маҳорат: самимийлик, ҳаққонийлик, мазмун ва шакл бирлиги, бадиий тил.

Асқад Мухтор айтганидек, «Танқидчи ва адабиётшунослар асосан асар ҳақида гапирадилар. Ёзувчи ҳақида эса...

Ваҳоланки, асар ёзувчидан униб чиқади: фарзандидай унда туғилади, улғаяди, камол топади; у фарзан-

дини авайлайди; ҳимоя қилади. Асар — ёзувчининг тақдири; керак бўлганда ёзувчи қурбон бўлишга ҳам тайёр. Унинг бу гайритабиий садоқати, ёзмасдан туролмаслиги, руҳиятга, фалсафага, мушоҳадага мойиллиги, шахси, феъли, услуги, қарашлари, дарди, қийналишлари ҳеч кимни қизиқтирумайди. Ёзувчи ўз шахси ва ўзгаларнинг шахси билан бириниб кетган — асар унинг субъекти...

Бу ҳақда кўп гапириш мумкин, аммо танқидчилар...»

Дарвоқе, адабиёт назариётчилари ҳам ёзувчи шахсияти, ижодий лабораторияси ҳақида кам ёзалилар. Ҳолбуки, асар яратиш жараёнини бу унсурларсиз тўлиқ тасаввур қилиш мумкин эмас. В. Белинский адабиётнинг умум мазмунининг ўзига хослиги ҳақида гапирганд, унинг талантли шахслар томонидан яратилишига сифат масаласи маъносида қарайди; талантли санъаткоргина адабий асар яратишга қодирдир, аслида адабиёт тарихи талантли ёзувчилар тарихидир.

Ана шу асосга таяниб, ёзувчи таланти, илҳоми, бадиий маҳоратини ўрганиш фоятда долзарбди.

ИСТЕЬДОД. «Барча истеъдоллар каби шоирлик истеъоди ҳам түфма бўлади ва болаликдан ўзини намоён этади. Бу кундуздек равшан, ҳақиқатнинг ўзицек аён...

...Шоирона истеъдол — бир қараганда оламга ҳайрат кўзи билан боқиши санъати ва ўзгаларни ҳайратга солиш санъати бўлиб кўринади, яна бир қараганда эл дардига ошно бўлиш қобилияти бўлиб туюлади.

Истеъдол — бу аввало дид, яхши дид эгаси бўлиш қобилияти, дегувчилар ҳам бор. Истеъдол — бепоён тушунча. У таърифга сиқсанда эди, уни маълум хусусиятлар доирасида чегаралаш мумкин бўлганда эди, одамлар йўқ истеъодни тарбиялаб, бор қилган бўлардилар. Горький, истеъдолнинг 99 фоизи меҳнат деганини түфма истеъоди бўлмаган одам меҳнат билан чинакам шоир ёки бастакор бўлиши мумкин деб тушунмаслик керак. Ҳар қалай 99 дегани 100 эмас. Сув нормал шароитда 100 градусда қайнайди. 99 градус исиган сув қайнаган сув эмас. Форс тилида қайнашни «жўшидан» дейди, яъни жўшмоқ. Шеърият ҳам жўшмоқдир. Жўшмоқ учун эса 99 фоиздан ташқари ўша камтарин бир фоиз яъни түфма истеъдол керак.

Шу маънода «қунларнинг созини чертиб юрувчи»-ларнинг таскини биз улуф эмас, бизга шу ҳам бўлаве-

ради деб күнгилни тинчтиши адабиёт учун фалокатдир. Шоирми, адибми, бу қутлуғ даргоға қадам қўйган, англамоги керакки, бунда Низомийлар, Навоийлар, Шекспир ва Пушкинлар қалам сурган. У шу улуғ сиймолар даврасига киради. Ўз қалби, виждони олдида, бу улуғ зотлар олдида андиша қилмоғи керак.

Ким билсин, бизлар ҳам кунларнинг созини чертиб юрган нозимлардирмиз, бу масала элнинг ва фурсат деб аталған буюк ҳакамнинг ҳукмига ҳавола. Лекин мен ишонаманки, ўзи ҳар қанча камтар ва хокисор бўлмасин, шоир илҳом чоғида ўзини Пушкиндан кам сезмайди ва у тўғри қиласи, тамоман ҳақли.

Албаттa, эл-юрт муҳаббатини қозониш учун түфма истеъоднинг ўзи камлик қиласи. Шоир руҳан, фикран замон даражасида бўлмоғи, халқ ҳаёти тўлқинлари ичида кенг қулоч отмоғи керак.

Яна ўша гап, тўқсон тўққиз юз бўлмаганидек, бир ҳам юз эмас»¹.

Эркин Воҳидовнинг ушбу мулоҳазалари катта-ю кичкка тушунарли. Лекин «ҳеч бир одам мукаммал, яъни тўла шаклланган ҳолда дунёга келмайди, аммо унинг бутун ҳаёти бетиним ҳаракатдаги ўсиш ва доимий шаклланишдан» (В. Белинский) иборат экан, ўша зарур бир фоиз истеъод ҳамма кишилар билан бирга туғилади. Табиат ҳеч кимдан бу сахийлигини аямайди. Факат у «уруг» шаклида яширин намоён бўлади. Гап ана шу «уругнинг униб-ўсиши учун яхши ер, ҳаво, сув қуёш зарур бўлганидек, қобилият «уруги»нинг ҳаракати оилада, мактабда, жамиятда, таълим-тарбияда яратилган аниқ шароитга, инсоний муносабатларга боғлиқ. Унинг кузатувчанлигини, ҳавасини, қизиқишини, билимини ўстиришга, мустақил ижодий фикр юритиш кўникмасини эгаллашига, гўзалликни кўра ва ҳис қила билишига эришиш ва шу сингари муносабатларда изчил ва тинимсиз меҳр билан қилинган меҳнат орқали «уруг»ни истеъодлага, яратувчи кучга айлантириш мумкин; шундай хусусиятга эга бўлган шахс ўз қобилиятини намоён қилган соҳада ўзлигини излаб топади, буюк ишларни инсонийлик нуқтаси назаридан ва осонлик билан завқу шавққа тўлиб бажаради. Бусиз табиат берган истеъодод «уруги» ижтимоий муносабатлар ва вақтнинг бесамарлигидан «уруг» шаклида ўлиб

¹ Э. В оҳидов. Шоиру шеъру шуур, Т., «Ёш гвардия», 1987, 15—16-бет.

кетаверади. Түгма истеъдод эгаси бўлмаган кишидан шоир чиқмаганидек, меҳнатдан, ўқиш-ўрганишдан, маҳорат сирларини эгаллашдан қочган, ўзлигига, ўз авлодининг қисматига ярашадиган **СЎЗНИ** айта билмагандан ҳам **ШОИР** чиқмайди. Түгма истеъдод билан узлуксиз меҳнат ўртасидаги диалектик алоқа моҳиятини чуқур англаған ва бор ҳаётини — «халқнинг, даврнинг хотироти»ни дунёга ёйишга бағишилаган, уни ёниқ қисмат деб тушунгандан Шоир туғилади. Иккаласидан биронтаси бўлмаса ёки биронтасига амал қилинмаса, номи — шоиру, умри бўйи ҳаваскор қаламкаш бўлиб қолаверади.

«Истеъдод — бу дид» деган тушунчани ёқлаган, «Талант — ҳеч қачон янгилигини йўқотмайдиган ягона янгиликдир»¹, холосасига келган Абдулла Орипов гўё юқоридаги фикр-мулоҳазаларни давом эттириб, лўнда қилиб дейди:

«...Ҳа, адабиётда ҳамиша икки тоифа ижодкорлар давр суриб келганлар. **Улардан биринчиси**, таъбир жоиз бўлса, **косиблардир**. Косиблар кимлар? Улар шеъриятда умуман қандай мақомда намоён бўладилар? Адабиётда косиб фақатгина ўз истак ва орзуларига кўра, балки тирикчилик тақозоси туфайли ёхуд ном қозониб яашаш иштиёқида қўлига қалам олади. Баъзилари эса бу соҳага мутлақо тасодиф туфайли аралашиб қолган омадсиз меҳнаткашлар бўлиб чиқади. Нима бўлган тақдирда ҳам, қанчалик яшовчан бўлса-да, адабиётда косиблик унинг соҳибига обрў келтирган эмас. **Иккинчи тоифа** эса, қалб амри билан ижод қилувчи, ўзи ёққан алангада қоврилувчи, чексиз мاشаққатли меҳнатдан хузур ва ҳаловат оловчичи, қисқаси, **ижодни қисмат деб билгувчи шахслардир**. Уларни кўпинча түгма истеъдод эгалари деб ҳам аташади» (А. Орипов, 82-бет).

Худди шу фикрларга яқин мулоҳазаларни бошқа ижодкорларда ҳам учратамиз. Ўткир Ҳошимов «Талантнинг биринчи белгиси — чидаб бўлмас дард демакдир»², дейди. «Ижодкор одамнинг қалбида зарурат деган фалати туйфу бўлади. Бу кўнгилдаги «дард»ларни фақат ўз шахсий дарди эмас, ҳалқ дардини — эзгуликка меҳр, разолаттга қаҳрни одамларга айтиш, тўкиб солиш эҳтиёжи» (Ў. Ҳошимов, 200-бет) дея баҳолайди.

¹ А. Орипов. Эҳтиёж фарзанди, Т., «Ёш гвардия», 1988, 34-бет.

² Ў. Ҳошимов. Нотаниш орол, Т., 30 «Ёш гвардия», 1990, 196-бет.

Хуллас, ёзувчи ва шоирга Парвардигор томонидан берилган тугма талантни қандай тушуниш лозим?

Маълумки, санъаткор тўппа-тўғри ҳаётдан нусха кўчирмайди, балки, унга ҳақиқатдан ўхшаш қилиб янги бир дунё яратади, кашф этади. Бошқача айтганда, ҳаётий ҳақиқатдан бадиий ҳақиқат яратади; ҳаётий факт ва ҳодисаларни ўзининг руҳий лабораториясида «қайнатиши», ишлаши, синтезлаштириши, яъни тасаввурни, хаёли, орзуси, тажрибаси, қалби, табиати, дунё-қарashi билан бойитган ва муайян foяга хизмат қилувчи характерли ва зарурий деталларни, факт ва ҳодисаларни танлаган ҳолда тугаллик касб этган (образли) бадиий ҳаётни яратиши зарур; Яратганда ҳам бу ҳаёт китобхон кўз ўнгига жонли ва реал, ишончли ва гўзал, таъсирчан ва яхлит бўлиб гавдаланиши шарт.

Бу ҳолатни Эркин Воҳидов шундай исботлайди:

*«Қирқ центнердан олдинг ҳар гектар ердан,
Юртимиз миннатдор сендек мард эрдан.*

Н о м а ъ л у м ш о и р

*Мени мен истаган ўз суҳбатига аржуманд этмас,
Мени истар кишининг суҳбатин кўнглим писанд этмас.*

А л и ш е р Н а в о и й

Бу икки байт ўша гектаридан олинган қирқ центнердан ҳосил кўтарган мардга ўқилса, аминманки, унга кейингиси маъқул бўлади. Чунки, кейинги мисраларда чинакам бадиият бор, инсон қалбининг ҳолати бор. Уни ўқиганда ҳар ким ундан ўз ҳолатига мос туйғу топади...» (Э. Воҳидов, 144-бет).

Дарҳақиқат, биринчи байтга эътибор берсангиз, гўё шеъриятга хос ҳамма нарса бор; байт равон, бўғин, туроқлари, қофияси жойила, бугунги ҳаёт акси бор. Лекин унда ҳайрат йўқ; унда дард йўқ; унда дид йўқ; унда санъаткорнинг ўзлиги йўқ; унда янгилик йўқ; унда образлилик, бадиийлик йўқ; унда қалбга кўчувчи, қалбни ҳаракатга соловчи ҳолат тасвири йўқ. Иккинчи байтда эса ҳаёт бор; ҳайрат бор; дид бор; янгилик бор; самимият бор; поклик бор; ҳар юракнинг туйғусини уйғотувчи жонли руҳ бор.

Биринчи байт хаваскор, косиб шоирларнинг «чизмаларига» намунавий мисол бўлса, иккинчи байт тұрма истеъдодга, шеъриятни қисмат деб тушунган шоирларнинг кашфиётларига жонли далиллар.

Хуллас, истеъдодни ўстирмасдан, унга «кун сайин меҳнат билан жило бермасдан» (А. Қаҳхор), яшаща ва ижодда ички ва кучли интизомга бўйсунмасдан, илҳом билан ёзмасдан китобхон қалбини забт этиш, бадиий талант соҳиби бўлиш мумкин эман...

Майли, оила аъзолари ва ўқитувчилар шеър ва ҳикоя ёза бошлаган ўқувчиларни қўллаб-қувватласинлар, ада-биёт сирларига ошно қилсинлар. Улар кўпчиликни таш-кил этсинлар, шеърий иқтидор сеҳрини бошдан ке-чирсинлар. Ана шундагина юзлаб ҳавасмандлардан ҳақиқий санъаткор — ҳалқ мулки бўлган талант туфи-лади.

ИЛҲОМ. Илҳомнинг моҳиятини англамоқ учун, келинг даставвал, санъаткорларнинг фикрларини тинг-лайлик:

А. Орипов: «...илҳом ҳаяжондан баландроқ туради-ган ақл ва тафаккур тамғаси бўлган ҳолат ҳисобланади. Пушкин илҳомни англаб олинган кайфият, — дейди. Маълум тарихий шароитда яшаб ижод этаётган киши-ларнинг илҳоми аллақандай муаллақ, таъбир жоиз бўлса, биологик илҳом бўла олмайди. **Илҳом маълум мұхитда ва фикрлар жараёнида синтезлашган кайфиятнинг олий нуқтасидир**» (А. Орипов, 86-бет. Таъкидлар бизники — Ҳ. У.).

Ў. Ҳошимов: «Илҳом, Толстой айтганидек, энди жим туролмайман, деган туйғу билан ёзув столига ўти-риш. Бунақа пайтда, одам ҳамма нарсани унугтади, ро-ҳат қилиб ишлайди. **Ойлаб, баъзан йиллаб ҳал қилол-маган муаммоларни бир ҳафтада бемалол уddyалайди**» (Ў. Ҳошимов, 200-бет. Таъкидлар бизники — Ҳ.У.).

Э. Воҳидов: «Мен илҳом деб аталган ҳолатнинг та-биати ҳақида кўп ўйлаганман. Бу гайриоддий ноёб ҳолат. Шоир илҳом дақиқаларидағина ҳақиқий шоир бўлади. Бошқа вақтда у ўзгаларга ўхшаб фикр қилувчи оддий одам. Шоир илҳом онларида битган сатрларига кейин ўзи ҳайрон бўлиши мумкин.

*Зўр карвон йўлида етим бўтадек,
Интизор кўзларда ҳалқа-ҳалқа ёш.
Энг кичик заррадан Юпитергача,
Ўзинг мураббийсан, хабар бер, Қуёш.*

Бу сатрларни битган вақтдаFaфур Фуломнинг ву-жуви кафтдаги симобдек қалқиб турганини тасаввур

қилса бұлади. Бунақа шеърларни шунчаки үлтириб, мана энди шеър ёзаман, деб ёзіб бұлмайди. Ҳар қанча материялист бұлсам ҳам **илхом ҳолатининг сөхрли эканига ишонгим келади**. Лекин, бу ҳолат осмонга боқиб кутиб үлтириш билан келмайди. «Фауст»да айтилғанидек:

*Шеърий қайфиятни тек күтган шоир
Умр сұнгигача кутиши мумкин.*

Илхом узлуксиз изланиш, үқиши, үрганиш, меңнат қилиш натижасидир. Шу маңында у онгли жараён. Талантнинг түқсон түккіз қисми меңнат, деган сұзни мен шундай тушунаман. **Илхом түйғуларнинг шоир қалбидай тошиши, шоир хаёлида туғилған шеърий ниятнинг етилиши ва вужудни ларзага солишидир.** Фикр ва түйғулар эса изланишдан дунёга келади.

Илхомсиз асар ёзиш мумкинми? Мумкин. Лекин, бу жуда оғир меңнат — ёзиш ҳам, үқиши ҳам. **Илхомсиз ёзилған асар севгисиз олинған бұсадай совуқ бұлади** (Ә. Вөхидов, 140-бет. Тақидалар бизники — Х. У.).

Ушбу мулоҳазалардан аён бұлайтиki, илхом келганды санъаткорнинг маңавий ва жисмоний қуввати бир нұқтага йиғилади, у катта құдрат билан ишга киришади: Бу пайтда у борлықнан тамоман унугади, гүё инон-ихтиёрига бүйсунмайдыган завқу шавққа тұлади, қаттық ҳаяжонға тушади; фақат «ғойибдан келған», тұғрироги, ичдан тұлық ҳис қилиб сезилған фикр, ҳолат тасвирини ёзиб улгuriш билан банд бұлади.

Илхом келганды санъаткор, қадимги философлар айтганидек, маңавий «кайф» ҳолатида бұлади, яньи үзи қилаёттан ишни тұлық англамайди; үзлигини, үзи яшаёттан дунёни унугади; үзи яратаеттан янги оламда ва шу олам «кишилари» — қаҳрамонлари билан бирға яшай бошлайди; уларнинг фаолият ва нутқларини жуда енгиллик билан қофозға тушириб боради. Образли қилиб айтганда, «Илхом — паровознинг үтхонаси» (Л. Леонов), шу паровозни ҳаракатта келтиради. Демак, илхом ёзувчи қалбига тушган маңавий олов, у ижодий жараённи тұлық ёритади ва ҳаракатини таъминлайди.

Хүш, бундай ҳолат қақон юз беради?

«Маълумки, санъат, шу жумладан, сұз санъати — адабиёт ҳам кишиларнинг онгига ҳис орқали — юрак орқали таъсир қиласы...

Ёзувчи үзи ҳис қилмаган нарса тұғрисида ёзса, буни

ўқиган ўқувчи ҳам ҳеч нарсани ҳис қилолмайди. Ўқувчининг қалбига таъсир қилмаган нарсанинг адабиётга ҳеч тегишлилиги йўқ.

Демак, куйдириш учун қуиши, ардоқлаш учун ардоқланиш шарт. Бусиз бўлмайди. Ҳис қилинмасдан ёзилган нарса қофоздан қилинган гулга ўхшайди...

Бас, маълум бўладики, илҳом келгани ёзувчининг тўлиқ ҳис қилгани, илҳом келмагани ёзувчининг ҳали ҳис қилмагани бўлади».¹

Илҳом деган сеҳрнинг макони борми? «Тўлиқ ҳис қилмоқ»ни қандай тушунмоқ лозим? Ички ҳис орқали сезмоқ учун нималар керак?

Бунинг учун истеъдоддан ташқари улкан меҳнат — асалари меҳнати зарур. «Асалари юз грамм бол йиғиш учун миллионта гулга қўнгар экан, — дейди ёзувчи Ўткир Ҳошимов. — Шунга яраша шарбат тўплаш учун 46 минг километр масофани босиб ўтаркан. Бу Ер куррасини экватор бўйлаб айланиб учиш билан тенг. Бундан ташқари, болари ҳар бир томчи гул шарбатини хартумчасидан 200 марта тўкиб, қайта ютиб, ишлов бераркан. Аммо, бу ҳали асал тайёр бўлди, деган гап эмас. Шундан кейин болари асални маҳсус катақчага жойлаб, бир неча соат мобайнида қанот қоқиб, ҳаво юбориб, тозаларкан. Асал айнимаслиги шундан. Ҳақиқий асар дунёга келгунча, қаламкаш ҳам тахминан шунча азият чекади» (200-бет). Лекин, бу азият ҳам камлик қиласди: Ҳаётни, инсон руҳини таҳдил ва тасвир этувчи санъаткорда савия баланд, донишмандлик ва пайғамбарлик хислатларининг бўлишини ҳам тақозо қиласди.

Маълумки, Тангри таоло, барча буюк пайғамбарларнинг энг олий сифатларини Муҳаммад пайғамбарда бўлишига амр этганлар. Шу сабаб, Одам Атонинг яхши хулқ-атвори, Сифнинг илму дониши, Нуҳнинг жасорати, Иброҳимнинг шафқати, Исмоилнинг фасоҳати, Исоҳнинг камтарлиги, Лотнинг фаросати, Ёқубнинг топқирлиги, Юсуфнинг ҳусни-жамоли, Мусонинг сабр-матонати, Ионанинг ҳалимлиги, Жошуанинг устиворлиги, Довуднинг хайриҳоҳлиги, Доњиёлнинг меҳри ва юраги, Йлёснинг олижаноблиги, Ионнинг мусаффолиги, Исонинг тақводорлиги унга муяс-

¹ А. К. Қаҳҳоғ. Асарлар, 5-жилд, Т., Ф. Ғулом номидаги Адабиёт ва санъат нашриёти, 1989, 228-бет.

сар бўлади. Худди шундай фазилатлар талантда ҳам мужассам бўлиши ва у эзгулик яратиш ишига — мўъжизакорликка сарф бўлмоги лозим.

Ана шундагина ҳақиқий санъаткорлик юзага келади, китобхонни ҳам завқу шавққа, кучли эҳтиросларга дуч этади. Ёзувчидаги ҳис ўқувчига тўлиқ «кўчади»; ёзувчининг илҳоми ўқувчи илҳомини жўштиради.

Бундай меҳнат ва хислатларсиз «Илҳомнинг ўзи ҳеч қаҷон келмайди. Илҳомни ёзувчининг ўзи қидириб то-пиши керак.

Илҳом деб аталган паризод, нозанин ёрнинг макони қаерда? Илҳомнинг макони ҳалқнинг дилида — мажбурият эмас, зарурят, хоҳишга айланган меҳнатнинг шавкати, баҳтиёр одамнинг қаҳқаҳасида, жабрдийданинг кўз ёшида, ошиқ ва маъшуқаларнинг кўзлари ва сўзларида, одамда меҳр ва фазаб уйғотадиган ҳодиса ва воқеаларнинг мағзидаги... илҳом қидирган ёзувчи ҳалқнинг қалбига қўл солиши керак» (А. Қаҳҳор, 228-бет).

Демак, илҳом ҳам ҳаётни чукур ўрганишдан — шу йўлдаги тинимсиз меҳнатдан туғилади. Ҳаёт бор жойда — илҳом бор. Фақат ёзувчи уни ҳаётдек улкан оламдан ўзини эҳтиросга соглан оламни — ҳалқа айтмоқчи бўлган зарур гапни топиши, ажратиб олиши лозим. Лекин, ёзувчи тасвирламоқчи бўлган ҳар бир ҳодисани, қаҳрамонлари тақдирида содир бўлган ҳамма ҳолатларни ўз бошидан кечира олмайди-ку. «Мана шу жойда ёзувчини бир нарса қутқаради, — деб ёзади Асқад Мухтор, — ҳаётни ёзувчи кўзи билан кўриб, уни бадиий, фалсафий таҳлил қила билиш қобилияти»¹.

Ёзувчи П. Қодиров «Санъаткор ёзувчи шахсан ўзи кўрмаган воқеаларни, бошидан ўтказмаган кечинма ва ҳиссиётларни ичдан астойдил ҳис қилгунча ўрганади»², деб ёзса, Илья Эренбург «Унинг қўлида ўзгаларнинг қалбини оча оладиган калит бўлмоги керак», — деб таъкидлайди.

Бу фикрлар асосида қандай сирлар яширинган? «Ҳаётни ёзувчи кўзи билан кўриш... ичдан астойдил ҳис этиш... ўзгалар қалбини оча оладиган калит»ни қандай тушунмоқ лозим?

Л. Толстой «Тирилиш» романида шундай ёзади:

¹ К а р а н г: У. Норматов. Талант тарбияси, Т., «Ёш гвардия», 1980, 38-бет.

² П. Қодиров. Ўйлар Т., 1971, 107-бет

«Дунёда энг кўп тарқалган фикр, ҳар бир кишининг ўзига хос маълум бир хусусияти бўлади, хушфеъл, ақлли, ахмоқ, файратли, ялқов одам бўлади ва ҳакозо, деган фикрдир. Лекин, одамлар бунаقا бўлмайди. Биз одам ҳақида у кўпинча баджаҳл эмас, файратли ёки аксинча бўлади дейишимиз мумкин: лекин бир одамни агарда, у хушфеъл ёинки ақлли десанг-у, бошқа бирини жаҳлдор ёки ахмоқ десак, нотўғри гапирган бўламиз. Биз бўлсак одамларни доимо шундай ажратамиз. Бу нотўғри. Одамлар дарёдек гап: ҳаммасининг суви бир хил, ҳамма жойда ўша сув, лекин дарё гоҳ кенг бўлади, гоҳ тор, гоҳ тез оқади, гоҳ секин, суви гоҳ тиник бўлади, гоҳ лойқа, гоҳ илиқ бўлади. Одамлар ҳам шундай. **Ҳар бир одамда инсоний хусусиятларнинг куртаги бўлади. Одам шу хусусиятларнинг гоҳ бирини, гоҳ бошқасини намоён қиласди, баъзан ўша одамнинг ўзи бутунилай ўзгариб кетади. Баъзи одамларда шу ўзгаришлар жуда кескин намоён бўлади...**» (Таъкид бизники—Х.У.).

Демак, ҳар биримизда бутун одамзод шу вақтгача бошидан кечирган инсоний хусусиятларнинг куртаги яширин тарзда мавжуд. Улар ҳар бир қалбнинг чуқурида ёта беради. Лекин, улардан бирортасини уйготиш зарурати туғилса, шунга ташқи талаб, эҳтиёж бўлса, тасаввуримизда жонланиши мумкин. Худди ана шу сабабли ёзувчи хоҳлаган қиёфага, ёшга, ҳолатга кира билиши мумкин. Хоҳлаган кечинма, ҳиссиёт, руҳиятни тасаввур эта олиши мумкин. Шундай экан, ёзувчи санъаткор хасислик ва жиноятни ҳам, қўрқув ва мардликни ҳам, ўлим ва жасоратни ҳам, аёл ва йигитни ҳам, чол ва кампирни ҳам... муҳаббат ва ориятни ҳам тушунарли ва ёрқин тасвирлай олиш қудратига эгадир.

Лекин, бу қудрат самимий ва таъсирчан, ишонарли ва «юқувчан» бўлиши учун ёзувчи ўз халқининг фарзанди, Ватанининг жангчиси, қайноқ ҳаётнинг фаол иштирокчиси, илгор дунёқарашнинг эгаси сифатида катта шахсий ва ижодий тажрибага эга бўлиши лозим. Чунки ёзувчининг шахсий тажрибаси, биографияси «олтин фонд» (А. Мухтор) бўлиб, у ҳаётда, шу жумладан, асарда рўй бераётган воқеа ва ҳодисаларни тушунтирувчи қалитдир. Шу боис, Ф. Фулом: «Ёзувчи кишининг ички дунёсини тасвирлар экан, ўз тажрибасига суюнади. Шунинг учун ҳам бу тажриба қанчалик кенг бўлса, қаҳрамоннинг ички дунёси ҳам шу қадар

бой бўлади», деб ёзган эди. Дарвоқе шахсий тажриба — ўзгалар қалбини тўғри англашнинг йўлчи юлдузидир.

Гарчи, инсониятга тегишли ҳамма нарса ҳар бир шахсга ҳам тегишли бўлса-да, ҳар бир инсон ўзича ҳис қилиб, ўзича ўйлади, ўзича яшайди, ўзича ўртаниди, ўзича мулоҳаза қиласди, ўзича гапиради... Шу сабаб «Бир шоирнинг «сир»и бошқа шоир учун сира ҳам иш бермайди. Уни ҳамма қулфга тушадиган калитдек деб ўйлаш мумкин эмас.

Поэтик ижоднинг «сир»ини фақат шоирнинг ўзигина топа олиши, шунда ҳам фақат ўзидан топа олиши мумкин. Ҳар бир янги шоир бу «сир»ни ўзи учун янгидан «очиши» керак, деб айтсак тўғрироқ бўлади, деб ўйлайман.

Поэтик «сирни» билиб олиш — бу ҳаммадан олдин ижодда мустақил булиш демакдир. Бошқача қилиб айтганда, сен бир шеър ёзгинки, бу шеърнинг ёзилиши фақат ўзингга, бошқа шоирга эмас, фақат сенинг ўзингагина хос бўлсин, яъни бу шеърда ўзингга хос овозинг бўлсин, бирор темада мустақил ўзинг нима айта олсанг, фақат шуни, ўз фикрингни айт. Чунки турмушдан олган бир воқеани ўзинг кўргансан, ўйлагансан, уни ўзинг ҳис қилгансан, ўзинг англагансан ва ўзинг ундан хулоса чиқаргансан. Шунинг билан бирга бу воқеа, **фақат шоир ва маълум доирадаги одамлар учунгина аҳамиятли бўлмай, балки, энг муҳими, кенг ўкувчилар оммаси учун аҳамиятли бўлиши керак**¹.

Шоир М. Исаковскийнинг юқорида келтирган сўзларидан ҳам маълум бўляяптики, «кимки ёзувчи бўлмоқчи бўлса, албатта, ўзидан ўзлигини топиши зарур». Чунки, у тасвирламоқчи бўлган ҳаётнинг мафтункорлиги ёзувчи шахсидан қўшиладиган маънавий, поэтик «бойлик»нинг даражасига боғлиқдир. У ўзигагина тегишли ана шу «бойлик»ни — инсоний сифатларни, руҳий кучларни яратётган қаҳрамонларига «улашганда», берганда бунинг сифати қандайлигини, фикрий доираси, ички дунёсининг теран, бой ёки чекланган ва қашшоқлигини китобхон баҳолайди. Ана шу баҳосининг натижасига қараб ёзувчига, унинг асарига бўлган муносабатини белгилайди.

Демак, ёзувчининг қаҳрамонлар кечинмаларини

¹ М. Исаковский. Поэзиянинг «сир»и ҳақида: Бадиий ижод ҳақида, Т., 1960. 30-бет.

бира ҳис қилиш, уларга сингиши («вживание») истеъдоди, қаҳрамонларга субъектив муносабати катта роль ўйнайди. У ўзини тасвиrlанаётган шахс ўрнига қўя олсагина, ўша шахс қиёфасига кира билсагина характер жонланади.

Бунинг учун ёзувчи, даставвал, образни кўз ўнгидан жонли шахс қиёфасига киргунча ўрганади. Ёзувчи ўз қаҳрамонининг туғилишидан тортиб умрининг охиригача бўлган ҳәётини ва у ҳаракат қилиши лозим бўлган воқеликни — шароитни тасаввур қила билиши керак.

Агар Ойбек: «Бунинг учун, албатта, Навоийнинг барча асарлари, Навоий яшаган давр тарихи, у даврнинг социал қиёфаси, у давр фаолиятининг характеристи, урф-одатлари, хулқ-атвори билан танишишга тўғри келди. Кўп тарихий фактлар, материалларни йиғдим, уларни таҳлил этиб, мағзини чақиш учун чуқур ҳис этишга, ўйлашга бошладим. Бу ишга шу қадар гарқ бўлган эдимки, романнинг иш плани қозода йўқ эди, у менинг кўнглимда, ёдимда эди, бутун борлигимни банд этган эди. Юрсам-турсам ҳамиша Навоийни ўйлар эдим. Унинг маънодор, ақлли кўзлари, хушфесъл, раҳмдил, олижаноб қиёфаси, асл, пок, улуғ қалбини ҳис этардим, кўз ўнгимда кўрардим»¹, — деб ёзса, С. Аҳмад «Уфқ» қаҳрамонлари ҳақида: «Романдаги ҳар бир персонаж билан хаёлан гаплашганман, йиғлаганман. Улар худди қайсар, бебош болалардек мени қанча қийнашган.

Хасис, ярамас Иноят оқсоқолни қандоқ қилиб ёмон кўрай. Ахир уни яратгунча қанча азоб тортганман. Унинг эски бир сўмликларни самоварнинг қорнига ёпиштириб дазмоллашидан тортиб милиционер билан учрашувигача менга қадрли»², — деб таъкидлайди.

Ушбу икрорномалардан кўринаяптики, Ойбек қаҳрамонларини кўз ўнгидан кўргандай тасаввур қилса, Саид Аҳмад улар билан хаёлан гаплашиб, сухбатлашади. Бу хусусият, яъни ёзувчининг асарда тасвиrlанаётган оламда яшаши, шу олам кишилари билан муносабатга киришиши, уларнинг яхшисини севиши, ёмонини қоралаши ҳамма санъаткорларга хосдир. А. Толстой ёзганидек, «Тасвиrlаган нарсаларни ҳис-туйгулар ёрдами-

¹ Карапан г: Адабиётимиз автобиографияси, Т., 1973, 158—159-бет.

² Карапан г: У. Норматов. Талант тарбияси, 101—102-бет.

да кўра билиб, асар яратиш — ёзувчи учун қонундир»¹.

Илҳом бепоён ижодий жараённинг бир парчаси, бадиий асар яратиш тизимидағи санъаткорнинг муайян бир ҳолати. Лекин илҳомсиз яхши асар яратиш мумкин эмаслиги ҳам аён бўлди.

Адабиётшуносликда илҳомнинг икки даражаси борлиги қайд этилган: Биз **биринчисини** — **мұтадил илҳом** (вдохновение-скрытое, «скромное») ва **иккинчисини** — **зәвқу шавққа тўлиқ илҳом** (вдохновение -аффект) деб атадик. Биринчисиз асар ёзиш мумкин эмас, иккинчисисиз ҳарқалай мумкин. Биринчиси жуда оддий кечади, яъни санъаткор илҳом ҳаяжонини сезсада, ташқи кўринишидан ўзини жуда хотиржам тутади, ҳамма ҳолатини онгли идрок этади. Маълумки, илҳом ёзувчи фикр-мушоҳадасининг чукурликларида туғилали ва етилади. Баъзан у бирданига вулқондек отилиб чиқади: санъаткор яратаетган оламига шунчалик эҳтирос ва ҳаяжон билан бериладики, реалликни сезмайди. Унинг томирларида шиддат билан қон югурга бошлайдики, ўша тасвирилаётган қаҳрамонининг ҳолатига тушади.

Жумладан, китобхон Сурайё Хўжаева ёзувчи А. Мухтордан «Бадиий асарни ўқиётганда қаҳрамонлар ҳаётининг энг ҳаяжонли дақиқалари тасвири пайтидаги ёзувчи ҳолати масаласи мени жуда-жуда қизиқтиради. «Мен «Тугилиш» романини ўқиётганимда Луқмончанинг ўлими тасвирига келганда ўзимни қўярга жой тополмай қолган эдим.

Аскад ака, ўша ҳаяжонли дақиқалар тасвири пайтида қандай ҳолатга тушгансиз, эслай оласизми?» — деб сўраганида А. Мухтор қуйидагича жавоб беради:

«Асарнинг китобхон учун таъсири жойлари ёзувчининг ўзини ҳам шунчалик таъсирантирадими? Бу ҳақда ҳар хил афсоналар бор. Микеланжелога ўзи яратган ҳайкал тириқдай кўриниб, кўрқиб кетганмиш; Бальзак қаҳрамони ўлганда инфаркт бўлиб қолганмиш... «Ўтган кунлар»даги Кумуш ўлими тасвири пайтида Абдулла Қодирийнинг йиглагани ҳақида ҳам гаплар бор...

Булар — ижод психологияси нуқтаи назаридан ҳақиқатдан ҳам афсона.

Ижодкор бундай таъсирили тасвиirlар пайтида заҳ-

¹ Қаранг: Бадиий ижод ҳақида. Т., 1960, 100-бет.

мат чекади. Тұғри, илхом билан зақмат чекади, лекин уни құпинча ҳаяжон әмас, қаноатсизлик ҳисси қийнайды. Чунки, қофозга тушган нарса одатда ёзувчи үйіда туғилған үзига хос мұраккаб мұносабатлар оламиға нисбатан жуда кичик бұлади. Ёзувчи тасаввуридаги ажайиб дунё қофозға ҳеч вақт тұлалигича тушмайды. Тасаввур сүзлардан бой. Шунинг учун, ұша Сурайёхон айтған тасвиirlарда ҳам мени биринчи галда қаноатсизлик ҳисси қийнаган. Чарчаганман, маза қилиб ухлаганман. Назаримда, шу ҳис бұлмаса; борди-ю ёзувчи үзи ёзғанидан үзи мамнун бўлиб завқланса, асар яхши чиқмайды»¹

Демак, А. Мухторнинг асосли фикрига күра, ёзувчи қаҳрамон ҳиссиётини, кечинмаси ва изтиробларини тасвиirlаш пайтида унинг қиёфасига киради, лекин бутунлай, юз фоиз әмас, үзининг «мен»ини, яратувчи шахс, ёзувчи эканлигини унутмайды. Дарҳақиқат, Микеланжело, Бальзак, Қодирийлар бошидан кечирған юқоридаги «афсона»лар юз берганда ҳам, у — санъаткорлар яратған ёки яратилаётған образлардан устун турғанлар; үзларини асар қаҳрамони әмас, балки «үйдирмалар ижодкори» (А. Горький) эканларини унутмаганлар. Шундай экан, Ҳ. Қодирийнинг «Отам ҳақида» хотирасида қуйидагича ёзғани ёлғонми?

«Бобом вафотидан сұнг эди. Шаҳар ҳовлида яшар әдик. Бир куни уйимизда шундай воқеа рүй берди, ойим, одатимизча, әрталабки чойни бибимнинг уйига ҳозирладида, эрта туриб, ёзиб үтирган дадамни чойга чақыргани кириб кетди. Биз дастурхон теварагида унинг чиқишини кутамиз... Бир вақт ойим негадир индамай чиқди-да, үтириб бизга чой қуйиб бера бошлади:

— Абдуллани чақырдингми, Раҳбар, — дадам чиқавермагач, ойимдан сұради бибим.

— Йүқ.

— Нега?

— Үғлингиз йиғлаб үтирибдилар, — деди ойим.

Бибим бечора сакраб туриб дадамнинг уйига йүл олди. Кап-қатта кишининг йиғлашидан ҳайратга тушиб мен ҳам бибим ортида эргашдым. Кирсак, у юм-юм йиғлар, курсига тирсакланиб олиб тұхтовсиз ёзар эди. Бибим дадамнинг бу ҳолига бир оз қараб турди-да, бир нарсани тушунди шекилли, индамай, мени бош-

¹ К аранг: У. Норматов. Талант тарбияси, 37-бет.

лаб орқасига қайтди ва ўтириб чойини ича бошлади. Мен бибимдан сўрадим:

— Она, дадам нега йиғлаяптилар?...

— Даданг жинни бўлиб қолибди... — жавоб қилди бибим ва бошқа сўз айтмади.

Кейинчалик англасам, ўшанда дадам ўз севикли қаҳрамони Кумушнинг ўлими пайти тасвирини ёзаётган экан»¹.

Бу каби ҳодисалар бадиий ижод учун ёт нарса ҳам, ёзувчи А. Мухтор айтганидек, афсона ҳам эмас. Санъаткор ўзи яратган, ўйлаб чиқарган образини объективлаштирап экан, уни худди бирга яшаётган кишисилик, реал ҳаётий одам тарзида тасаввур қиласиди. Натижада, қаҳрамон қалбida содир бўлаётган кечинма, изтироб, оғриқни ўз бошидан кечираётган шахс ҳолига тушади. Қаҳрамоннинг ўзигагина тегишли оламнинг энг чуқур сирларини тўлиқ ҳис қилишга эришади.

Шу сабаб С. Аҳмад ёзади:

«Оғир юк кўтарган кишини тасвираганимда, ўзим ўша юкни кўтаргандек кучаниб, терлаб кетаман. Ўлим манзарасини тасвираганимда энг яқин кишимнинг жасади тепасида тургандек йиғлагим келади.

Хуллас, нимани тасвирасам, ўзим ўша воқеанинг иштирокчисига айланаман. Шунинг учун ҳам, ҳар бобни ёзганда қаттиқ чарчаб, толиқиб қоламан».

Агар қаҳрамон кечинмаси билан бирга азобланиш А. Қодирийни юм-юм йиғлатса, С. Аҳмадни чарчатса, толиқтирса, ёзувчи Ҳ. Фуломнинг беихтиёр кўзларидан ёш чиқиб кетишга олиб келади:

«Бошда «Бинафша атри» қаҳрамони... Нафисанинг кейинги тақдирини — боласи билан чўлга чиқиб кетиб саргардон юришини тасвиrlай туриб, кўзларимдан ёш чиқиб кетганини сезмай қолганман».

Бадиий ижод тарихида бундан ҳам оғир маънавий изтироб чеккан, азобли ҳолатларга тушган ёзувчиларнинг иқрорномаларини эслаш мумкин.

Масалан, Флобер Эмма Боварининг заҳарланиши лавҳасининг тасвирига келганда шундай дейди: Тасаввуримдаги шахслар мени ҳаяжонлантирадилар, кузатадилар, аниқроғи, мен уларга айланаман. Мен Эмма Боварининг заҳарланишини тасвиrlай бошлаганимда оғзимда ҳақиқатдан ҳам мишяқ (заҳар)нинг таъмини

¹ Ҳ. Қодирий. Отам ҳақида. Т., 1974, 118—119-бетлар.

тотдим. Заҳарланганимни сездим, икки марта жуда ёмон ахволга тушдимки, ҳатто қайт қилдим».

Бу авторларнинг гувоҳликлари шунчалик самимий ва улар ўртасида шунчалик ҳамфирлик борки, уларнинг ҳақиқат эканига ишонмасликка ҳеч қандай асосимиз йўқ. Унда буни қандай тушуниш керак? Бадиий ижод психологияси қонуниятига хилоф эмасми?

Ушбу масалага чуқур ёндошилса, А. Мухтор типидаги ёзувчиларнинг асосли тушунчаси билан А. Қодирий, С. Аҳмад, Ҳ. Фулом, Флоберга ўхшаш санъаткорларнинг юқоридаги ҳолатлари ўртасида катта фарқ йўқ. Биринчи типидаги ёзувчиларда қаҳрамон шахсидан, унинг руҳидан ажралиш, узоқлашиш жараёни тез ва осонлик билан юз беради. Иккинчи типидаги ёзувчилар қаҳрамон қиёфасига кираар, улар кечинмасини бирга тортар эканлар, бирданига бу қаҳрамон руҳидан чиқиб, унинг таъсиридан узоқлаша олмайдилар. Тасвирламоқчи бўлган қаҳрамон ёзувчининг бутун борлигини банд этади, унинг шахсий ҳаётига, юриш-туришига муҳрини босади. Шунинг учун ҳам Ойбек: «Юрсамтурсам ҳам ҳамиша Навойни үйлар эдим. Унинг маънодор, ақлли кўзлари, хушфеъл, раҳмдил, олижаноб қиёфаси, асл пок, улуғ қалбини ҳис этардим, кўз ўнгимда кўрардим», — деб ҳақ гапни айтади. Бундай ҳолат баъзи ёзувчиларда узоқ давом этиши мумкин. Асар яратилган, китоб битган, йиллар ўтган бўлса-да, барибир ўша асар руҳидан, қаҳрамонлар ҳаяжонидан, таъсиридан кутула олмайдилар. Буни С. Аҳмад ва унинг «Уфқ» романи устидаги кузатишлари ҳам исботлайди: «...китоб қаттиқ ҳаяжон, турли руҳий изланишлар, қувончлар билан ёзилганидан, у битгандан кейин ҳам, ўқувчилар кўлига тегиб, адабий танқид яхши-ёмон айтгандан кейин ҳам унинг руҳидан чиқиб кетолмадим. Бирон ҳикоя ёзсан ё шу романга кирмай қолган бобга, ё қаҳрамонга ўхшаб қолаверади»¹.

Ушбу айтганлардан шу нарса аниқлашадики, ёзучи тасаввуридаги қаҳрамонларнинг азоб ва қувончлари, ҳаяжон ва ташвиш-кечинмаларини бирга тортар экан, яратайтган, уйдирма асосига курилган лавҳасини кўз ўнгида кўрар экан, у бу ҳолатлар ва предметларни шунчалик аниқ ва жонли сезадики, натижада уни ўз қалбida, кўз олдида, ҳақиқий ҳаётда юз бераёт-

¹ К а р а н г: У. Норматов. Талант тарбияси, 82—83-бетлар.

ган кечинма ва ҳодисадек қабул қиласи. Шунинг натижаси үлароқ ижодий жараённинг баъзи «афсона»лари юзага чиқади.

Лекин, ёзувчи тасаввурида уйғонган ҳиссиёт, қанчалик кучли ва чуқур, тиниқ ва таъсирчан бўлмасин, санъаткор ўзининг «мен»ини, индивидуаллигини йўқотмайди. Қалб онг ва иродага бўйсунади. Шу сабаб воқеа бўлаётган ҳамма ҳодисаларнинг реал, объектив сабаби йўқлигини ёзувчи тушунади. Юқоридаги ёзувчиларнинг «афсона»лари гўё ҳаққоний актёрларнинг йифиси, уҳ тортиши, азобланиши, қулиши — бу ўша ўйнаётган образларнинг йифиси, уҳ тортиши, азобланиши, қулиши эканига ўхшайди. Актёр томоша тамом бўлгач, ўз ниқобини ечишни унутмайди, ўзининг илгариги фикрларига, ҳаётига қайтади. У саҳнада ўйнар экан, ўзлигини, бутунлай унутиб қўймайди, гарчи томошабин қўзига бу нарса ташланмаса ҳам, у «куйлар экан, эшитади, ҳаракат қиласа экан, кузатади» (Ф. Шаляпин).

«Аброр ака — Отелло, эгнида қизил шоҳи кўйлак. Белида қизил шоҳи белбоғ, қулоғида «тилла» сирға, қопқора чехрасида виқор, вазминлик, олижаноблик. Тишлари ярқираб саҳнага кириб келади. Кириб келди-ю саҳна ҳам, театр ҳам эсимдан чиқди. Чунки қўз олдимда Аброр Ҳидоятов эмас, ўша Шекспирни илк бор ўқиганимда тасаввур этганим — Отелло туаради!

Ўнинг ҳар бир ҳаракати, Дездемонага тикилганда кўзларида порлаган чексиз муҳаббат, овозидаги титроқ, киборлар олдида ўзини тутиши, қадрини билиши, мардлиги — ҳамма-ҳаммаси менга таниш, худди мен тасаввур этган Отеллонинг ўзгинаси эди.

Мана, Отеллонинг олижаноблигини, болаларга хос самимиyllигини, поклигини очиб берувчи дастлабки саҳналар ўтиб, қалбига рашк чўғи тушди.

Одатда, танқидчилар бу саҳналар тўғрисида гапиргандада Отеллони шерга, йўлбарсга ўхшатадилар. Лекин, рашк азобида тўлғанган Аброр Ҳидоятов шер эмас, йўлбарс ҳам эмас, саҳнада чарх урган бир чўғ, қизил шоҳи кўйлак ичида мавж урган олов, тафтига ҳеч ким бардош беролмайдиган бир алантага эди! Бу оташ, бу алантага кенг саҳнада жавлон урар, ҳаммани куйдирап, ёндирап, ўзи ҳам томошабин қўзи олдида ёниб борар эди...

Ўнинг овозида ҳам баҳор латофати, ҳам момоқалдироқ садолари, ҳам ўзбек ёзининг ҳарорати мужассам

эди. Унинг инсон юрагидаги энг нозик түйгуларни ифодалай оладиган, бир зумда юз хил оҳанг касб этадиган ажойиб овози-чи? Унинг таҳқирланган қалб фарёдларига тұла машхур «ҳимм»лари-чи! Унинг Дездемона устидан түккан күз ёшлари-чи! Йүқ, бу томошабинни йиглатиш учун моҳир актёр түккан күз ёшлар әмас, улуг фожиага учраган, улуғ инсоннинг — Отеллонинг күз ёшлари эди! Зотан, Аброр аканинг «Отелло»сида томошабин йиғламас, чунки киши күз ёшидан ҳам зүр бир түйғу чүлғаб олар, Аброр ака томошабинни ларзага солар эди»¹.

Күринаяптиki, томошабин назарида актёрнинг (Аброр аканинг) ижодий индивидуаллиги ва ўйналинаёт-ган персонаж (Отелло) шахси құшилиб, бирикиб кетади, яхлит вужуд юзага келади. Натижада, у Аброр ака актёр сифатида әмас, балки буюк фожиага учраган улуғ Инсон — Отелло бўлиб гавдаланади; Аброр ака ташқи қиёфасида — содда ва мард, самимий ва қопқора чехрали Отелло, Аброр ака кўксида — Отелло юраги, Аброр ака қалбида — Отелло руҳи яшайди. Гүё Аброр ака шахс ва актёр сифатида «улган-у», шу ҳисобга Отелло тирилгандек. Шунинг учун ҳам саҳнадаги ижод — қайта яратиш; қайта яратиш эса актёрнинг «ўлими»дир.

Ёзувчи О. Ёқубов хотирасини давом эттириб ёзади: «Спектаклдан кейин, қарийб чорак соатли қарсаклардан сўнг, Аброр ака эгнидаги Отеллонинг заррин тўни, Отелло гримида саҳнага чиқди.

Мен ҳам Ҳамза номидаги театр учун пьеса ёзган ёш драматург сифатида, артистларга қўшилиб саҳнага чиқдим ва у кишининг қўлини олгани ёнига бордим. Бордим-у ҳайратда лол бўлиб қолдим: Каршимда бояги олов, қафасдан чиққан шер ўрнига юзини чуқур ажин қоплаган, бутун кучи, юрагидаги бор эҳтиросини севимли Отеллосига бериб «тамом бўлган», ҳоргин ва ожиз бир қария тураг эди...» (О. Ёқубов, 242-бет.)

Актёр ўзи яратган образ руҳидан кутилиб, ўзлигига, аслига қайтгач, «қизил шоҳи кўйлак ичиде мавжурган олов, тафтига ҳеч ким бардош беролмайдиган аланга» ўчади. Гарчи ташқи кўриниши (гримда экан) Отеллога ўхласа-да, унда ўша қаҳрамоннинг қалб олами ўлган-у, анча ёшга кириб қолган қария — чарчаб

¹ О. Ёқубов. Излайман, Т., «Ёш гвардия», 1972, 241—242-бетлар.

толиққан Аброр аканинг ўзи (шахси) яққол күзга ташланади.

«Ахир, артистнинг барча иши ҳақиқий, реал, «ростакам» ҳаётда эмас, балки тасаввур этилган, мавжуд бўлмаган, аммо мавжуд бўлиши мумкин бўлган ҳаётда ўтади. Ана шу биз артистлар учун чинакам ҳаёт ҳисобланади»¹, — деб ёзади Станиславский.

Худди ана шу асос сабабли саҳнада гўё иккита Аброр Ҳидоятов фаолият кўрсатади. Бири ўйнайди (роль ҳаёти билан яшайди), бири назорат қиласи (хатти-ҳаракатларининг тўғри, нотўғрилигини кузатиб боради). Агар ўйнаётгандаги назорат қилувчи «мен»и, ўзлиги озгина сусайса, яъни, актёр Отелло руҳидан устунлигини йўқотса, унда юқорида таъкидлаганимиз «афсона»ларга ўхшаш ҳолатлар юзага кела беради. Айтишларича, Аброр ака Отеллонинг Дездемона (С. Эшонтураева)ни бўғиб ўлдириши эпизодини ўйнагандаги, саҳнада ўйнаётганини — мавжуд бўлиши мумкин бўлган ҳаётини ярататётганини унутар ва Сора Эшонтураевани ҳақиқий Дездемона деб тушунар ва ростакамига бўға бошлар экан. Бу фалокатга, Сора Эшонтураева (Дездемона)ни ҳалокатга олиб келиши мумкин деб тушунганлар, гўё саҳна ортидан «Аброр ака, сиз саҳнада ўйнайпиз. Бу Дездемона эмас, Сора опа!..» деб ўзлигини топишга — реал ҳаётини тушунишига ёрдамлашган эмишлар.

Бу «миш-миш»нинг қизиқ ва асосли томони шундаки, актёр (Аброр ака) ўз қаҳрамони (Отелло) руҳидан бирданига чиқиб кета олмаганида, мавжуд бўлиши мумкин бўлган ҳаётни реал ҳаётдек маълум дақиқа тушунишидадир. Тасаввуридаги қаҳрамон қалбига чуқур сингиш билан ижодий кайфият (илҳом) пайтидаги актёр ҳиссиятнинг теранлиги ўргасидаги алоқададир.

Лекин, Аброр ака (Отелло) Сора Эшонтураева (Дездемона)ни ростакамига бўғиб ўлдирмаганлиги факти, гарчи қўполроқ айтаётган бўлсак-да, Аброр аканинг юқоридаги «миш-миш»лардан ҳоли эканлигини, у Отелло ролида ўйнар экан, ҳеч вақт назорат қилиб турувчи ўзлигини — «мен»ини йўқотмаган. Демак, у яратган образи (Отелло)дан доимо устун турган.

Хуллас, юқорида таъкидлаганимиздек, ёзувчи, актёр

¹ К. Станиславский. Актёрнинг ўз устида ишлаши, Т., 1965, 216-бет.

қандай ҳолатга тушмасин, ёзгани, үйнагани билан бирикб қетмасин, ўзлигини йўқотмайди. Тўғри ва ақлга мувофиқ фикр-мулоҳаза юргизади. Шунинг учун ҳам юқоридаги «афсонавий» ҳолатлар ҳам бадиий ижод психологиясининг умумий қонуниятига бўйсунади.

Демак, ҳақиқий шеър, рубоий, туюқ, сонет, новелла ва шу каби кичик жанрлар завқу-шавққа тўлиқ илҳомнинг меваси бўлади. Лекин, бу хил илҳомнинг узлуксизлигини эпик ва драматик асарларни яратишда таъминлаш мумкин эмаслиги аён; буларни яратишда мўътадил илҳом қўл келади. Айтмоқчимизки, Илҳом санъаткор томонидан муҳайё этиларкан, уни бошқариш ҳам мумкин. Ёзувчи П. Қодиров «Ўйлар» китобида ёзганидек, «Илҳом билан меҳнат бир-бирига боғланиб кетади, гўё бир-бирига зарбланиб, ижодий ишнинг самарасини оширади. Шунинг учун француз ёзувчиси Флобер ёзади: «Бутун илҳом шундан иборатки, ҳар куни маълум бир соатда ўтириб ишлаш керак». Бодлер бу фикрга қўшилган ҳолда: «Кундалик ишда илҳом, сўзсиз зарур, дейди. — Тафаккурнинг фаолиятида қандайдир осмоний бир механика бор, бундан уялмаслик керак, балки врачлар бадан механикасини қандай эгалласалар, ёзувчи ҳам илҳом механикасини шундай эгаллаши керак...».

Хуллас, илҳом ижодий меҳнатнинг табиатидан чиқиб келади, демак, реал ҳаётий асосга эга бўлади. Буни А. С. Пушкин «Борис Годунов» трагедияси ҳақидаги «икронома»сида ҳам таъкидлайди: «Мен ёзаман ва мулоҳаза юритаман. Саҳна кўринишининг кўп қисми фақат фикрлашни талаб қилади; қачонки илҳомни талаб қилувчи саҳна кўринишига борсам, мен уни кутаман ёки саҳнани ўтказиб юбораман, ишнинг бу хили мен учун тамоман янгилик. Сезяпманки, менинг руҳий кучларим камолот чўққисида, демак, мен яратишга қодирман».

Демак, доимий равишида ва изчил олиб бориладиган меҳнат ижод жараёнидаги бошқа унсур (нарса)ларни ҳам тартибга солади, ҳамма ижодий ташвиш илҳом теварагида айланади.

Илҳомнинг бу фазилатлари бадиий маҳорат билан топишганида, улар ўртасида қил ўтмас «дўстлик» бўлгандағина, А. Қаҳҳор айтганидек, китоб ёзувчининг қалбидан қўшиқдай отилиб чиқади, китобхоннинг қалбидан акс садо янграйди; чунки маҳоратнинг ибтидоси

илҳомдир. Щундай экан, бадиий маҳоратни қандай тушумоқ лозим?

БАДИЙ МАҲОРАТ. Ёзувчи маълум ғоя асосида тўплаган алоҳида фактларни ўзининг шахсий тажрибаси билан бойитиб, қалбидан ўтказиб, кўпчиликка хос қилиб умумлаштиради. Яъни, аниқ ғояга асосланиб, ёзувчи ҳаётдаги алоҳида нарсаларни бузади, саралайди, тўқийди, умумлаштиради ва жонли, табиий ва бетакрор гўзал нарсани яратади. Яратган асари (лавҳаси) ўқувчи кўз ўнгига яққол намоён бўлади, китобхон ўйхаёлларини ўзига тамоман банд этади.

Бадиий маҳоратнинг моҳиятини тушунишда ана шу ҳақиқатни доимо эсда тутиш лозим. Унинг сиру синоатига етмоқ учун «Наво» куйи бобини эсимизга туширайлик.

Отабек қайнотасидан «Уятсизга менинг уйимдан ўрин йўқ, уятсиз билан сўзлашишга ҳам тоқатим йўқ... Борингиз, эшигим ёнида тұхтамангиз!» — деган сўзларни эшитган. Иzzат-нафси хўрланган. Кумушдан заҳарли муаммоли мактуб олган. Бу воқеаларни бир-бирига болжай олмайдиган, «гўё» иситма вақтида бўладиган тутуриқсиз, боғланишсиз алжи-билжи ҳолатда» эди. Кумушни согиниб, хўрланганининг сабабини билишга интилиб Маргилонга қатнар, Маргилонга келгач, қайнотасининг сўзлари қулоги остида жаранглар, дарбоза қаршисида жасорати сўнар ва Тошкентга қайтар эди. Бориб-келишидан натижа чиқара олмас, Кумушни эса тинимсиз қўмсарди... Иложисизлик, ҳижрон, тубсиз ўйхаёллар тузогидан қочишга уринди: йигирма кун ўтар-ўтмас Маргилондан қайтиб келгач, Оқмасжид шаҳрига (Қизил-ўрдага) савдогарчилик билан кетди.

«Беш ойлаб Оқмасжид сафарида юриб келгач, Отабек тўғри шу Чуқур қишлоқ бўзахоналаридан бирига келиб тушгандек бўлди. Уни кундуз кунлари бўзахонада учратиб бўлмаса-да, аммо бўзахонага келмаган кечаси жуда оз эди. Бўзагар Отабекнинг кимнинг боласи эканлигини яхши билгани учун ҳамма ишни унинг тилагига қараб қиласар, у келди дегунча, оддий бўзахўлар ёнига ўтқазмай ўзининг маҳсус ҳужрасига олиб кирав, бошқаларга бериладиган лойқа бўзадан бермай, бўзанинг гули билан меҳмон қиласар эди.

Хозир ҳам у шу бўзахонада эди. Энди учинчи кувачани тугатиб, тўртингини чақирган эди. Бўзагар кирди:

— Бұза берайми, бек? — деб сұради.

— Беринг, — деди, — машшоғингизни ҳам киргизинг!

Вақт ярим кечадан ҳам оққан, кундуз кунидан бери ичишиб чарчаган хұрандалар бақиришиб-чақиришиб тарқалишган, Бұзахона тинчиган эди. Құлма-құл юриб чарчаган машшоқ ҳам бұшаб, Отабекдан катта-катта әхсонлар күргани учун, вақтнинг кечлигига ҳам эътибор қылмай кирган эди. Машшоқ Отабекнинг сархуш құлдан бир пиёла бұзани ичгач, дуторини чертиб сұради:

— Қандай күйни чалай, бек ақа?

Отабек сархуш товуш билан жиддийгина қилиб жағоб берди:

— Билсангиз, ҳайдалиш күйини чалингиз, ажралиш күйини чалингиз!

Машшоқ ажабсинган эди.

— Дунёда бундай күйлар борлигини умримда биринчи маротаба әшитаман, бек ақа!

— Дунёда бундай күй йўқ деб ўйлайсизми, сиз әшитмаган бўлсангиз менинг әшитганим бор... Билмасангиз билган күйингизни чалингиз!

Машшоқ дуторини созлар экан, яна сұради:

— Бу күйлар янги чиққанми?

— Янги чиққан.

— Қаерда әшитдингиз?

Отабек кайфи тарқагандек бўлиб, машшоққа қаради:

— Бу күйларни Фарғонанинг Марғилонида әшитдим... деди.

Дуторни созлаш учун реза күйлардангина олиб турған машшоқ, Отабек кутмаган жойда «наво»дан бошлаб юборган эди. Күйнинг бошланиши билан нақ вужуди зир этиб кетгандек бўлиб, кейинги пиёласини бўшатди ва ихтиёrsиз равишда дуторнинг мунгли товушига берилди. Дутор товуши қандайдир ўзининг бир ҳасратини сўзлагандек, ҳикоя қилгандек бўлиб әшитилар эди. Йўқ, бу ҳасратни у ўз тилидан сўзламас эди — Отабек тилидан сўзлар эди... Отабекнинг кўз ўнгидан ўтган кунлари бирма-бир ўта бошладилар-да, ниҳоят «анови» хотиралари, «анови» ҳангомалари ҳам күриниш бериб ўтдилар... Йўқ, ўтмадилар... унинг кўз ўнгига келиб тўхтадилар-да, шу кўйи тура бердилар... Дутор бу кўринишни унинг кўз ўнгига келтириб тўхта-

гач, бу фожиага ўзи ҳам чидаб туролмагандек йиғлай бошлади... Дутор қуруққина йиғламас эди, балки бутун коинотни «зир» эттириб ва хаста юракларни «дир» силкитиб йиғлар эди... Отабек ортиқ чидаб туролмади-да, рўмоли билан кўзини яшириб, йиғламоққа киришди... У кўз ёшларини тўхтатмоқчи бўлар эди, бироқ ҳозирги ихтиёр ўзида эмас эди, ҳамма ихтиёр дуторнинг ҳазин «наво» куйида, тоқатсиз йиғисида эди... Дуторнинг но-зик торларидан, тилсимли юраклардан чиқсан «Наво» куйи ўз ноласига тушунгувчи Отабекдек йигитларга жуда муҳтоҷ эди. Ўз дардига тушунган бу йигитга борган сайин дардини очиб сўзлар, йиғлаб ва инграб сўзлар эди... Эшитгувчи эса дунёсини унутиб йиғлар, қўлини йиғишириб йиғлар ва ҳасрату аламини кўз ёшиси билан тўкиб йиғлар эди...

Ниҳоят, «Наво» куйи унинг бутун танидаги сувларини кўзи орқали тўқдирди-да, фалакнинг тескари ҳаракатидан шикоят этиб қўиди ва дунёда ёлғиз ҳасратгина бўлмаганлигини билдиргандек, ўзининг «Савт» куйини ер юзига шодлик ва севинч ёғдириб арз эта бошлади. «Наво»нинг сеҳрли «савти» Отабекнинг кўз ёшларини қуритди-да, бир енгиллик бағишлади. «Наво» билан ювилиб кетган унинг умид гулзорида янги чечаклар униб чиқди...

Бу ўтиришдан сўнг у бир ойлаб бўзахонага келмай кетди. Марғилондан қайтиб келгач, яна эски одатида давом эта бошлади...»¹

Ушбу келтирилган парчадаги воқеани ҳар бир китобхон кўз ўнгига юз берётган воқеадек, ўзи четдан туриб ҳамма ҳолатларни аниқ кўраётган кишидек ҳис этади. **Ҳис этадигина эмас, унинг ҳаққонийлигига, бундан бошқача бўлиши мумкин эмаслигига тўлиқ имон келтиради.** Бу, биринчидан.

Ёзувчи ўзини Отабек қиёфасида кўрсатар экан, ўша ҳолатда «Отабек бўлсан нима қилардим, нимани ўйлардим, қандай ҳаракат қилардим, қандай суҳбатлашардим», — деган масалаларга жавоб излайди. Ўзининг бор меҳрини, иқтидорини ишга солиб, қайнотаси томонидан ҳайдалган, хўрланган куёвнинг, аччиқ ва заҳарли мактуб орқали «ҳийлакор тулки, оғзи қон бўри, уятсиз йигит...» каби мартабалар билан Кумуш томонидан сийланган Отабекнинг хатти-ҳаракатларини са-

¹ А. Қодирий. Ўткан кунлар, Т., 1985, 220-бет.

мимий тасвирлайди. Отабекнинг бўзахонадан таскин излашини, «анавини» унутиш учун ўзини сархушликка (мастликка) уришини, «наво» куйидан дунёсини унутиб йиглашини, ҳасрату аламини кўз ёшиси билан тўкиб йиглашини шунчалик ишончли ва таъсирchan тасвирлайдики, у тасвирдан сиз ҳам Отабек ҳолига тушасиз: таскин излайсиз, сархушликка бериласиз, борлингизни унутиб, йиғлайсиз. Ҳа, **Самимийлик юқувчандир. Самимийлик бадиийликка ўранса, юз бора таъсирчанлиги ошади, юқувчанлиги бениҳоя кўпаяди.** Қайта яратилган бадиий дунёни унутиб, гўё реалликда яшаётгандек ҳис этасиз. Бу, иккинчидан.

Маълумки, «Ўткан кунларнинг «Наво» куйи боби энг таъсирили ёзилган саҳналаридан бири, Отабекнинг аҳвол руҳиясини ҳаққоний ва самимий очиб берувчи лавҳалардан.

Бу лавҳа асарнинг умумий фоясини ифодаси учун хизмат қиласди. Китобхон шу воқеаларгача Отабекнинг «Энг ақлли», «Худо ҳар нарсадан берган йигит», «Хон қизига лойиқ йигит», «Отасининг боласи» эканлигини билди. «Кутилмаган бир баҳт» туфайли соғ муҳаббатга эришган мард йигитлигига ишонч ҳосил қилди. «Ўғлингизнинг вужуди билан орзунгизни қондириш осон бўлса ҳам, келинингиз қаршисида мени бир жонсиз ҳайкал ўрнида тасаввур қилингиз» деб, ота-она орзусига бўйсимишга мажбур бўлди. Фаришталар кўнглидек кўнгил эгаси — Кумуш ҳам Отабек унутмаслигига ишонч билан кундошликка розилик берди... Сўнгги Марғилонга келишида «совуқ кундош совғаси» бор эди. Балким, шу сабабли уни қайнотаси ҳайдагандир...

Бу воқеалардан ва Отабек феъл-авторининг мана шу хислатларидан хабардор китобхон, энди ҳайдалган куёвнинг руҳиясини, ҳолатини, тадбирларини билишни, Кумуш муҳаббатига қанчалик содиқлигини, ҳижрон изтироблари уни қай аҳволга солиши мумкинлигини кўрмоқни истайди. «Наво» куйи боби китобхонни бир қадар шу истагини қондиради. Унда Отабек ақли ва туйғусидаги беғуборлик («Наво» куйи нола қиласар, йиглар, инграр ва Отабек ҳам «анови» хотираларини кўз ўнгига келтириб, кучини йиғиштириб йиғлар ва ҳасрату аламини кўз ёшиси билан тўкиб йигларди), олижаноблик (қайнотасининг ҳайдаши сабабини билишга андиша қилишлик, иккинчи уйланганим натижаси деб билишлик), беқарорлик (Марғилонга тинимсиз ва на-

тижасиз қатнаш), қарама-қаршилик («ҳийлагарнинг... ўзи ҳам қурсин, юзи ҳам!» ва бормай қолса кейинчалик ўзи ўкина тургандек...) билан танишади; ёзувчи шундай тасвиirlайди:

«Маргилондан натижасиз, тамоман бўшга қайтиб Тошкентга келгач, Кумушни унугтандек бўлиб, учтўрт кун у бу билан овуниб юрар, сўнгра ҳафта, ўн кундан сўнг яна Маргилон тўғрисида ўйлай бошлар, ўйлаб ўйининг тагига ета олмагач, ўзини қаёққа қўйишини билмай қолар, шундан сўнг ҳамма аламини Чукур қишлоққа ҳавола қилиб, ўн-ўн беш кун босиб ичганидан сўнг ичкилиқдан ҳам лаззатланмай қолар ва шунинг ёнида унинг кўнгли бир нарсани бўйини олгандек сезинар, гўё Маргилонга борса бир гап буладигандек, бормай қолса кейинчалик ўзи ўкина тургандек... Шундан сўнг тўсатдан Маргилон йўлига тушиб қолар, йўлда борар экан, ўзини тўрт кўз билан кутиб тургандек сезилган Маргилонга ҳар нимадир, бир соат илгарироқ етиш учун ошиқар эди. Лекин... лекин Маргилон дарбозасидан кириши ила унинг ҳоли ўзгара бошлар, юраги қинидан чиқар даражада ўйнамоққа олур, айниқса, пойафзал растасига яқинлашгач, унинг бу изтироблари шиддатланур, пойафзал растасининг яқини билан бунчалик ўзгаришда қолган Отабек растанинг ўзида қандай ҳолга тушмогини тасавурдан ожиз келур ва раста кўринди дегунча отининг бошини чапга буриб юборар ва орқасидан кимнингдир «...борингиз, эшигим ёнида тўхтамангиз... уятсиз!» товуши эшитилгандек бўлар эди...» (221-бет).

Отабекнинг бу ҳолатини — тирик қалб изтиробини, севган эшигидан қувилган қуёв изтиробини, ихтиёrsиз тарзда тинмай қатновчи содик ошиқ изтиробини, чигал тугунни қандай ечишни билмайдиган ориятли йигит изтиробини — ҳасрат, хўрлик, ҳақоратни, кучсиз умид ва ишончни «Наво» жонлантиради. «Наво» дастлаб ҳаётнинг азоб ва уқубатларини, алам ва кўз ёшларини жонлантиrsa, унинг «Савт» қисми ёргулиқдан, нурдан, севинч ва умиддан хабар қиласи. Шунга мос тарзда Отабекнинг руҳи аниқ ва равшанлик касб этади, кечинмалари ўзгарили: «Наво» куйи унинг бутун танидаги сувларини кўзи орқали тўқдирди», «Савт» Отабекнинг кўз ёшларини қуритди»... «Наво» билан ювилib кетган унинг умид гулзорида янги чечаклар униб чиқди...»

Хуллас, унинг характеридаги оромсизлик ва бесаранжомлик, алам ва умид қирралари очилади. Отабекни ҳаракатга, душманлар билан олишувга тайёрлай бошлади; ўз баҳти учун курашишга асос ҳозирлайди. Шу тарзда асарнинг қисмларини, воқеаларини занжирдек бир-бирига боғлайди, Отабекнинг характеридаги ожизликни, мардликни, беқарор ва оромсизликни, яхшиёмонни тезда ажратиб олмаслик каби хислатларини очали. Демак, мазмун ва шаклининг яхлит, бир бутунлигига, ғоявий мазмуннинг таъсирдор бўлишига хизмат қиласди. Бу — учинчидан.

«Ёзувчи маҳорати, — деб ёзади И. Султон, айтмоқчи бўлган фикр, тасвиrlанаётган предмет ва руҳий ҳолатни энг аниқ ва энг ёрқин ифода эта оладиган сўз ва ибораларни топа билишдан иборатдир». Дарҳақиқат, «ёзувчининг дилида ажойиб туйғулар мавж уриб тургани билан, уларни китобхоннинг кўнглига етказиб берадиган ҳароратли, жозибали сўзлар топилмаса, ёзувчининг тили чинакам бадиий бўлмаса, ҳар қандай ижодий рёжа ҳам ҳайф бўлиб кетади» (П. Қодиров, «Ўйлар», 128-бет).

Бадиий асардаги ҳаёт — сўз воситасида яратилган экан, бадиий тил бевосита реал фикр ва ҳиссиятнинг образли ифодасидир. «Жажжи» (микро) образ, ҳар қандай сўз контекстда (бошқа сўзлар билан алоқада) ҳаётйлигини, ўзининг хусусиятини, рангини, ҳидани, оҳангини кўрсата олади. Ёзувчи сўзнинг грамматик, лексик, стилистик маъно кўринишларидан энг зарур ва кераклигини контекстаға мувофиқ ишлатади, яъни тасвиrlаётган ҳаёт (эпизод, образ, характер)нинг моҳиятини чуқур очиб берувчи сўзларни танлайди. Танлаган ҳар қандай сўз адабий асарда, албатта, маълум юкни ташиши лозим бўлади. У тасвиrlанаётган воқеанинг ҳаққонийлиги ва тўлалигини, қаҳрамоннинг ҳистийғулари, кайфият ва кечинмаларини ўзида мужассам этишига — шу юкни қанчалик кўтарганлигига қараб унинг аҳамияти ва кучини белгилаймиз.

«Ўтган кунлар» романида тасвиrlанган — ҳамманинг эсида қолган кўринишни диққат билан ўқийлик:

« — Нега қочасиз?! Нега қарамайсиз?! — деди бек. Кумушшиби шу чоққача қарамаган ва қарашибни ҳам тиламаган эди. Мажбурият остида, ёвқарашиб билан секингина душманига қаради... Шу қарашибда бирмунча вақт қотиб қолди. Шундан кейин бир неча қадам бо-

сиб Отабек.тинг пинжига яқын келди ва эсанкираган, хаяжонланган бир товуш билан сўради:

— Сиз ўшами?

— Мен ўша! — деди бек. Иккиси ҳам бир-бирисига беихтиёр төрмулишиб қолдилар.

Кумушшиби оғир тин олиб:

— Кўзларимга ишонмайман! — деди.

— Мен ҳам! — деди.

Шу вақт икки лаб ўз-ўзидан бир-бирисига қовушди... Кичкина нозик қўллар елка устига, кучли қўллар қўлтиқ остига ёпишдилар» (62-бет). Маълумки, сўз умумийликни билдиради. У бошқа сўзлар билан алоқага киришиб, муайян ҳолатдаги қаҳрамоннинг қалбига, ҳаракатига, қилиғига мос бўлсагина — шу қалбдаги ҳис-туйгуларни, ҳарактердаги хатти-ҳаракатларни ифодалай олсагина у жонланади, ҳар бир китобхон қалбига кўчади, ўшандай ҳис-туйгуни бошқаларда ҳам уйғотади, тирилтиради.

Парчадаги бошқа сўзларни аҳамиятини пасайтиргмаган ҳолда, энг оддий туюлувчи «Сиз ўшами?» сўзига тўхттайлик.

Бу сўз — узукка кўйилган кўз, кишинч бутун диққатини ўзига ром қилувчи гавҳар. Чунки унда Кумушнинг шу пайтгача кечирган изтироблари жамулжам: «Мен Сизни фавқулодда кўрганимдан бўён севиб қолгандим. Излаб, ўйлаб ўйимнинг охирига етолмай кўз ёшлар тўккандим. Ўй-хаёлим Сиз билан эди. Ичимдаги бу орзуни айтолмасдан, қанчалар қийналдим. Сизни ўша кўрганимдан бўён қанчалик қўмсаганимни билсангиз эди...» каби туйгулар... Бу туйгуларни «Сиз ўшами?» деган жумла билан жонлантириш, унга яна «Мен Сизни севаман» маъносини ўзбекона, Кумушона қилиб сингдириш — улкан санъаткорлик белгисидир. Душманнинг ўқувчи кўз ўнгидага севимли ёрга, чимилдиққа кирган Кумушнинг кўз ёшлари ҳовлиларга эшитилган кулгусига, иккала севишган учун муҳаббатнинг — «кутилмаган бир баҳт»га айланиши каби ҳолатларни — аччиқ ва оғриқли туйгуларни ширин туйгулар қилиб жонлантириш ҳам А. Қодирий талантининг ёрқинлигидан, ҳам қаламининг мўъжизакорлигидан далолат беради, чунки бу парчадаги ҳақиқат бутун мураккаблиги ва тафсилотлари билан ўқувчи қалбига умрбод унутилмайдиган севинч бўлиб, баҳт бўлиб, гўзаллик бўлиб кўчади.

Бундай мисолларни «Наво» куйи бобидан ҳам кел-

тириш мумкин, Отабекнинг чолгучига қараб, «ҳайдалиш куйини чалингиз, ажралиш куйини чалингиз» дейишида ҳам Отабекнинг қалб уришини, унинг қалбидаги оғир ҳақоратланишини, севганидан ажралишнинг ғазобини яққол жонлантиради. Қисқа ва топиб айтилган (Отабек онги ва қалбидан пишиб етилган) рост сўзлар ила унинг ҳис-туйгуларининг мураккаблигини, нозиклигини равшан ифодалайди; бадийликни, демакки, таъсирдорликни юзага келтиради. Бу, тўртинчидан.

Хуллас, бадий маҳорат — ёзувчининг бадий таланти ўлчовидир» (Ч. Айтматов). Унинг юқорида таъкидланган тўртта белгиси ўлчовларнинг асосийлари бўлиб, улар бадий асада, яхлит, бир бутун бўлиб намоён бўлади. Бири-бирининг яратувчанлик ва таъсирчанлик хусусиятларини зўрайтиришга, табиийликни яратишга хизмат қиласи. **Бадий маҳорат**, бир томондан реал ҳаётдаги янгиликни кўра билиш ва уни адабиёт воситалари ила таҳлил қила билиш санъати бўлса, иккинчи томондан санъатнинг сирларини, техникасиги, минглаб ҳиссий-тасвирий воситаларни чукур билишга боғлиқдир. Бу икки томон диалектик алоқада бўлса, узвий бирлашган ҳолда «тасвирлашга ният қилинган қаҳрамонларнинг ҳаётини бутун тўлалиги ва аниқ иуқталари билан кўра билишга» (Ч. Айтматов) хизмат қиласа, тасвир ўқувчини ҳаяжонга сола билса, ана шундагина ҳаётнинг катта ҳақиқати ўзининг тугал ва гўзал ифодасини топади.

Маҳоратни эгаллаш узлуксиз давом этадиган, чеграсиз жараёндир. Ёзувчи ўз ижодининг маълум даврида — уста санъаткор даражасига кўтарилиши мумкин. Агар у шу билан чекланса, бадий маҳоратини ўстирмаса, ҳаётдан ва санъатдан ўрганишда давом этмаса, у орқага кетаверади, ўқувчилари сони камаяверади. Демак, ўрганиш, кашф этиш тўхтаган жойда талант кучи, таъсири сусая бошлайди. **Талант янгилик бермагач, чайналган «кашф»ларни — ясама, сунъий гулларни тақдим қила бошлайди...**

IV. Ҳаётий ҳақиқат ва бадий ҳақиқат

Таянч сўз ва иборалар: Ҳаёт. Ёзувчи. Фоявий-бадий мақсад. Ҳаётний ҳақиқат. Ҳаётний ҳақиқатнинг таҳлили. «Бемор» ва А. Қаҳҳор. «Адабиёт муаллими» ва ҳаёт. «Ўткан кунлар»даги Юсуфбек ҳожи ва Алижон домла.

Адабиёт ва санъат сирларини етарли тушунмаган китобхон реал ҳаёт билан поэтик реалликни, табиат билан санъатни, бошдан кечирилган билан тасвирланган кечинманинг фарқига бормаслиги, ҳаётни адабиёт билан бараварлаштириши мумкин.

Шунинг учун ҳам реал ҳаёт билан поэтик ижоднинг муносабатлари муаммосини текшириш бадий ижод жараёнини тўғри ва асосли тушунишга олиб келганидек, ёзувчилар ижодий лабораториясининг баъзи қирраларини ҳам таҳлил қилишга имкон беради.

Баъзи китобхонлар ўйлагандек, ёзувчилик ҳаёти-мизда, турмушимиизда рўй берувчи ҳамма нарсалар ҳақида ҳикоя қилиш билан чекланмайди. Агар шундай бўлганда, бундан осон иш бўлмасди: бир кунда юз берадиган саноқсиз воқеа-ҳодисалардан бир нечта китоб ёзиш мумкин бўларди. Ёзилганда ҳам бу китоблар турмушнинг ва одамларнинг кучсиз, ҳеч кимни қизиқтирумайдиган оддий нусхаси (копияси) бўлиб қолаверарди. Унда ҳаётнинг муҳим ва кераксиз, зарурий ва тасодифий, биринчи ва юзинчи даражали нарсалари аралаш-куралаш ҳолида бўларди, ўқимоқчи бўлган одам зерикиб «ўларди».

«Олим, — дейди И. Гончаров, — ҳеч нарсани яратмайди, балки табиатдаги тайёр ва яширин ҳақиқатни очади. Санъаткор эса ҳақиқатга ўхшаш нарсани яратади, яъни у кузатган ҳақиқат фантазиясида аксини топади ва бу аксни ўз асарига олиб ўтади... Демак, бадий ҳақиқат ва ҳаёт ҳақиқати бир хил нарса эмас. Турмуш ҳаётдан бутунисича санъат асарига олиб кирилса, у ҳаётий ҳаққонийлигини йўқотади ва бадий ҳақиқат ҳам бўлмайди...»

Санъаткор тўппа-тўғри табиат ва ҳаётдан ёзмайди, балки унга ҳақиқатан ўхшаш қилиб яратади. Ва худди ана шунда ижод жараёнининг моҳияти мужассамлашган...»¹ (Таъкидлар бизники — Ҳ.У.).

Ёзувчи ҳаёт ҳақиқатига ўхшаш нарса (бадий ҳақиқат)ни яратиш учун, ҳаётий факт ва ҳодисаларни ўзининг руҳий лабораториясида «қайнатиши», ишлаши, синтезлаштириши, яъни тасаввuri, ҳаёли, тажрибаси, қалби, дунёқарashi, табиати билан бойитган ва муайян мавзуга, гояга хизмат қилувчи энг зарур деталларни, характерли ва керакли факт ва ҳодисаларни танла-

¹ И. Гончаров. Собр соч. в восьми томах. Т. 8, М, «Художественная литература», 1980, с. 140—141.

ган ҳолда тугаллик касб этган ҳаётни яратиши лозим. Ана шундагина «санъаткор — уйдирмалар ижодкори — одамларни худо, табиат ёки тарих яратганидан кўра аълороқ, мислсиз даражада гўзал қилиб ярата олади» (А. Горький).

Демак, Абдулла Қаҳҳор айтганидек, бадий ҳақиқат «ҳаёт ҳақиқатини кўнгил призмасидан ўтказиш, уни ҳис қилиш, унга ўйлаб юрган гапларингни сингдириш, тилак ва идеалларингни қўшиб ифодалаш билан юзага келади. Бадий ҳақиқатни тугдирадиган, маҳалла комиссиясининг «бунга ишонинглар» деган мазмундаги справкасига ҳожат қолмайдиган факт ва уйдирма месъёрини топишнинг мушкуллиги ҳам худди ана шундадир».¹

Демак, реализм адабиёт ривожининг етук босқичи бўлиб, у бўлиши мумкин бўлган ҳаётни, реал ҳаётдаги одамларнинг образларини жонлантиради: асл ҳаётга нисбатан тасодифлар, икир-чикирлардан холи бўлган; тўлиқроқ, таъсирироқ, ишончлироқ қилиб қайта яратилган оламнинг тасвирини беради.

ҲАЁТИЙ ҲАҚИҚАТ ВА БАДИЙ ҲАҚИҚАТ. Бадий ҳақиқатнинг асоси ҳаётдир. Чунки, ёзувчининг кўрган-бильгандари ва шахсий тажрибаси, кечинма ва таассуротлари бадий асарни юзага келишида энг асосий омил саналади. Ёзувчи ҳамма вақт ҳаётий факт ва ҳодисалардангина турткি олиб, бадий ҳақиқат кашфи томон یўл олади.

«Кўпчилик каби мен ҳам, — деб ёзади А. Қаҳҳор, — «ёзувчилик» нималигини, шахсий тажриба, таассуротлар адабий асар учун ниҳоятда қимматли материал бўлишини тушуниб олгунимга қадар анча овора бўлганиман. Буни билиб олганимдан кейин болалик чоғимда кўрганим, одамлар, ёшлигимда содир бўлган воқеа-ҳодисалар бошқача бўлиб кўринди. Ўтмиш чукур ертўлалардаги шароб сингари хотирада тинийди, орадан қанча вақт ўтса, шароб шунча тиник ва кучли бўлганидай, ёшликда кўрган-кечиргандар энг соф ва кучли хотиралар бўлиб, умрбод эсдан чиқмайди.

Ўтмишдаги ана шу таассуротларим кейинчалик, кўпгина ҳикояларим учун асос, йирик асарларимга эпизодлар бўлиб хизмат қилди».²

¹ К а р а н г: «Адабиётимиз автобиографияси», Т., 1973, 211-бет.

² А. Қ а ҳ ҳ о р. Ҳаёт ҳодисасидан бадий тўқимага: «Адабиётимиз автобиографияси», Т., 1973, 196-бет.

Худди шунингдек, «Қутлуғ қон»нинг юзага келишида Ойбекнинг ўз кўзи билан кўрган воқеалари, хотирасида ўчмас из қолдирган ўтмиш ва буларни айтиш учун етарли тажриба тўплангани асос бўлган. Ҳамид Гулом менинг «Машъял», «Мангулик» асарларимга ўзимнинг кўрган-кечиргандарим, илк совет мактабида ўқиб юрган кезларим болалик хотирамда қолган таассуротлар асосида гавдалантирилган¹, — деяр экан, ёки Мирмуҳсин «Романда («Дегрез ўғли»— X.У.) акс этган воқеалар ичида бўлмаганимда эҳтимол шундай асар яратилмас эди...»² «Умид»даги воқеалар боя айтганимдай, китобдан таъсиrlаниш оқибати эмас, ҳаёни кузатиш самараси. Бу роман оз вақтда ёзилган бўлса ҳам, унда узоқ йиллик ҳаётий тажрибаларимни, кузатишларимни ифода этмаганман³, — деб ёзар экан, бундан кўринадики, шахсий ҳаётий тажриба ва таасуротлар санъаткор учун жуда яқиндан таниш бўлган материални белгилаб беради, бу материал эса бамисли хазина — кон. Лекин, бу шундай хазинаки, ундан исон руҳи, худди олтин заррачалари рудалар қаърида бўлганидек, ҳаёт факт ва ҳодисалари ичида аралаш-қуралашдир. Ёзувчи муайян гоявий-бадиий мақсад асосида ҳаётни қайта яратар экан, худди ана шу мақсаднинг бир бутунлигини, мафтункорлигини таъминлашга қодир бўлмаган кераксиз ва фойдасиз факт, ҳодисалардан воз кечади, энг характерли, зарурийларини танлайди, саралайди; ўзида (хотирасида, қалбиди, зеҳнида) борини қўшади. Токи асар яхлит ва тугаллик касб этмагунча бу жараён узлуксиз давом эта-веради.

«Маъдан заводларида магнит кранлар бор. Бир четда темир-терсаклар, фишт ва ёғочлар аралашиб, бетартиб уюлиб турган бўлса, магнит крани юқоридан тушиб келади-ю, ўзига керакли маъданни тортиб олиб чиқиб кетади. Маълумки, магнит фақат темирни, пўлатни ўзига тортади. Магнитга тортилмайдиган фиштлар, ёғоч ва кесаклар жойида қолаверади.

Ёзувчининг ўз олдига қўйган гоявий-бадиий мақсади мана шу магнит кранидай хизмат қиласи, — деб ёзади П. Қодиров. — Ижодкор ўз ихтиёрида бор объек-

¹ К а р а н г: У. Норматов. Талант тарбияси, Т., 1980, 68-бет.

² Шу китоб. 53-бет.

³ Шу китоб. 58-бет.

тив ва субъектив имкониятлардан тұлиқ ва самарали фойдалана олмаса, ижодий ихтиро қилолмайды¹.

Күринағиди, бадий ҳақиқатнинг заминида ҳамма вақт ҳаёттің тажриба, реал фактлар, реал кечинмалар ётади. Лекин, унинг бадий тұқима билан уйғунылығи қай даражада бўлиши керак?

Абдулла Қаҳдор ёзади:

«Бемор» деган ҳикоямда тағсирланган воқеага ўхшаш ҳодиса ўз бошимдан ўтган. Үн учинчи йиллар бўлса керак, беш яшар бола эдим. Қўқонга яқин Яйпан қишлоғида туардик. Онамнинг ой-куни яқинлашиб, уни дард тутарди чоги, қоронғи кулбамиз ичидә кўрпатўшак қилиб ётар, ичкаридан унинг бўғиқ инграши, жонини қўярга жой тополмай қичқириши эшитиларди. Яйпан катта қишлоқ эди, бироқ у ерда врач йўқ, тиббий ёрдам нима эканлигини хаёлимизга ҳам келтиролмасдик. Бундай ҳолларда қўни-қўшниларникига югурилар, кексароқ хотинларни айтиб чиқилар, унинг дояликни улдалай олиш-олмаслиги билан ҳеч кимнинг иши бўлмас, кекса бўлса, бу соҳада кўзи пишган бўлса бас, ҳар қандай кампир бу ишга ярайверарди.

Биз Яйпанга яқинда кўчиб келган, у ерда қариндош-уруғларимиз йўқ эди, шу сабабли отам қўшни хотинни чақириб чиқди. Хотин келиб, аям ётган уйга кириб кетди. Кеч кирди. Мени уйқу боса бошлади.

Ёнимда ўтирган отам бирдан ўрнидан турди. Кўзимни очдим, тепамда ҳалиги қўшни хотин туарди. «Тинчликми?» — ҳовлиқиб сўради отам. «Тинчлик, лекин қийналаяпти, бечора...» Кампир жим бўлиб қолди, кейин менга ишора қилди. «Болага айтинг, худодан сўрасин, боланинг гуноҳи йўқ, унинг дуоси тез ижобат бўлиб, худойим йўл берса, шўрлик омон-эсон қутулса ажаб эмас...» Отам менга томон энгашди: «Э худо, аямга нажот бер» дегин, деди. Отам қўркув ва жаҳл аралаш мени қистарди: «Бўл тез, нега имиллайсан». Дуо қила бошладим, бу орада бир-икки йиглаб ҳам олдим, кейин ухлаб қолибман. Эрта билан уйғонсам аямнинг кўзи ёрибди.

Ҳикояда бирмунча бошқачароқ ҳаёт тасвиrlenган. Бир хотин оғир дард билан узоқ вақт ётиб қолади-ю, эри уни докторга боқизишга қурби етмайди ва арzon-гаровроқ ҳақ оладиган мулла, табиб, кинначига бори-

¹ К а р а н г: Адабиёт назарияси, 11-том. Т., 1979, 109—110-бетлар.

шига, кейин эса, энг сүнгги чора сифатида, құшни кампирнинг «бегуноқ гұдакнинг саҳарда қилған дуоси ижобат бұлади» деган маслағаты билан иш тутишга мажбур бұлади... У ҳар куни саҳарда туриб, тұрт ёшли қызасини уйғотади ва уйқу ғашлиги билан йиғлаб турған қизига дуо ўргатиб, уни тақрорлашға мажбур қиласы. Бемор аёл бир куни оғирлашиб, саҳар вақтида үлади. Эри қызасини үлік ёнидан олиб, бошқа ёққа ётқизаётганды қизча уйғонади ва күзини очмасдан одатдагича дуо қиласы: «Худоё аямди дайдига даво бейгин...» дейди.

Сиртдан қараганды ҳикоя бошимдан кечган ҳодиса-га унча ўхшамайды. Ҳақиқатдан, бизнинг хонадонимизда бўлиб ўтган бу воқеа моҳияти эътибори билан ўша давр учун ниҳоятда характерли ҳодиса эди. Унинг бутун фожиаси ҳам худди ана шунда — камбағал, жаҳолатда умр кечирған одам учун одатдаги воқеа эканлигига эди. Аммо шунинг ўзи кифоя қилмас, инсоннинг ҳаёт-мамот, ҳолатини, унинг ниҳоятда оғир турмуш шароитидаги ўша ночор аҳволини, ўлимга маҳкум қилиб қўйилганини кўрсатиш талаб қилинарди.

Ҳар ҳолда мен учун «Бемор» ўша болалигимдаги таассуротларим билан чамбарчас боғлиқ. Сюжет таас-суротларни ўз ичига олганлиги учунгина эмас, балки бутунлай ўша таассуротларга асосланғанлиги учун ҳам шундайдир. Мен фактни ўзгартирап эканман, ҳаёт ҳақиқатига қарши бораётиман, деб мутлақо ўйлаган эмасман. Аксинча, ҳикояда ҳаётни худди шундай кўрсатиб тұғри иш қилғанлигимни энди билдим: беш ёшлигимда аямдан ажралиб, етим қолишим ўша давр шароитида ҳеч гап эмас эканлигини, бу жудолик натижасида юз бериши мумкин бўлған бутун даҳшатларни ва бунинг барча оқибатларини энди тушуниб етдим. Ўтмишнинг даҳшатли манзараларини хаёл ўз-ўзидан тўлдиради».¹

Кўринаяптики, А. Қаҳдор бошидан кечирған ҳаёт ҳақиқати билан ҳикоядаги бадий ҳақиқат ўртасида катта фарқ мавжуд:

Ҳаётда Абдулла Қаҳдорнинг аясини дард тутса ва охири кўз ёриши билан тугаса, ҳикояда Сотиболдинг хотини касалға чалинади ва охири вафот этади.

¹ А. Қаҳдор. Ҳаёт ҳодисасидан бадий тұқымага: «Адабиётимиз автобиографияси», Т., 196—199-бетлар.

Ҳаётда беш ёшли Абдулла отасининг ўргатишича, «Э худо, аямга нажот бер», — деб дуо қилса, ҳикояда тўрт яшар қизча қўшни кампирнинг ўргатганича, «Худоё аямди дайдига даво бейгин...» деб дуо қиласди.

Ҳаётда Яйпанда врач йўқ, тиббий ёрдам нималигиги ни хаёлга келтира олмасалар, ҳикояда «Докторхона деганда Сотиболдининг кўз олдига извош ва оқ подшонинг сурати солинган 25 сўмлик пул келар эди».

Ҳаётда Абдулланинг отаси — темирчи бўлса, ҳикояда Сотиболди — Абдуғанибойнинг батраги, «хонаки бир касб» эгаси, қарздор камбағал...

«Бемор» ҳикоясида ёзувчининг фоявий-бадиий мақсади — ўтмиш ҳаётнинг фожиаларга тўла аччиқ тақдирини, ночор аҳволини кўрсатиш воситасида ижтимоий тенгсизликни фош этишdir.

Ҳикояда ҳамма унсурлар ана шу мақсадга бўйсундирилади, ортиқча нарсалар тушириб қолдирилади, етмагани хаёлан тўлдирилади. Шу асосда Сотиболди хотинининг оғриб қолиши, bemornинг хўп азоблар тортиши ва жаҳолат ботқоғида яшаётган тўрт яшар қизчасининг оҳу-зорига қарамай вафот этиши — ўтмишнинг аччиқ бир тугал лавҳаси яратилади.

Юқорида айтганимиздек, ёзувчининг вазифаси ҳаётнинг айнан (копияси) нусхасини бериш эмас, балки бўлиши мумкин бўлган ҳаётни тасвирилар экан, ёзувчи ўз бошидан кечирган ва кўрган, эшитган воқеаларни онг ва қалб призмасидан ўтказади. Ўша давр шароитида етим қолиш ҳеч гап эмаслигини, жудолик даҳшатлари ва оқибатларини хаёлан тасаввур қиласар экан, камбағал, ниҳоятда оғир турмуш кечирган Сотиболди, унинг хотини ва қизасининг фожиаси, аччиқ тақдирни жонланади, кўз олдига келади.

Ёзувчи ҳаёт фактларини ўзгартирса-да, лекин болаликнинг соф ва беғубор таассуротлари, ҳаётий тажриба асосида тасвириланаётган ҳаётнинг жонлантирилиши тасвирининг ҳиссийлиги, гўзаллигини таъминлайди. Ана шу ҳаётнинг холис ва самимий тасвири умумлашма даражасига кўтарилади ва бизда ўтмишдаги ижтимоий тенгсизликка қарши кучли нафратни уйғотади. Абдулла Қаҳҳорнинг «Анор», «Кўр кўзнинг очилиши», «Минг бир жон» ҳикоялари ҳам худди шу усуlda яратилгандир.

Демак, бу хил усуlda яратилган асарларда санъаткор образ ёки сюжетни яратар экан, у тўлигича ҳаёт

ҳақиқатига мос бўлмайди. Масалан, «Бемор»да Сотибоддининг хотини ўлади, ҳаётда эса А. Қаҳҳорнинг аяси кўзи ёрийди. «Минг бир жон»да Мастура тузалиб кетади, ҳаётда Тўрахон аянинг қизи вафот этади ва ҳ.к.

Ёзувчи ҳаётнинг конкрет ҳақиқатини бадиий ҳақиқатга айлантириш жараёнида, уни онгли равиша «бузади», «адолат юзасидан иш тутади». Бу билан биринчи ҳикояда ижтимоий тенгсизлик ҳукм сурган жамият камбағал, ночор, бемор аёлни ўлимга маҳкум этишини кўрсатса, иккинчи ҳикояда инсоннинг ҳаётга муҳаббати бекиёс даражада қурдатли кучга эгалигини чукур акс эттиради.

Ёзувчи, умуман шу усулда яратилган асарларда, хусусан икки ҳикояда ҳам тасаввур ва таассуротларнинг ҳамма маълумотлари хотирасининг маълум «чуқурлик»-ларидан келиб чиқаётганини сезади ва яхлит, тугаллик касб этган асарнинг лавҳалари (қисмчалари) қандай фактлар ва кузатувлар асосида юзага келганлигини кўрсата олади.

Бошқача усул ҳам мавжуд. Бу усулда яратилган асарларда қачонлардир олинган кечинма, таассуротларга нисбатан тасаввур эркин ҳаракат қиласи; у қачондир билинган ва бошдан кечирилган нарсадан, гарчи унинг конкрет кўриниши, объектив ҳақиқат бўлмаса ҳам яхлит нарса яратади. Бу асардаги бадиий ҳақиқат ҳаёт ҳақиқатига шунчалик мос тушадики, гўё кашфиётдек туюлади.

Яна А. Қаҳҳорнинг ижодий лабораториясига қайтамиз. У ёзади:

«Менинг «Ўгри» деган ҳикоям 1936 йили, худди Чехов асарларини берилиб ўқиб юрган давримда ёзилган эди. Ҳикоя болалигимда курсаб олган турмуш, эски даврни кўрсатишга бағишлиланган. Аммо мен «Анор»даги Бабар, «Бемор»даги ўзимнинг онам («Минг бир жон»даги Тўрахон аянинг қизи — Ҳ. У.) сингари, бу ҳикояда «модель» хизматини ўтаган одамни кўрган, воқеанинг шоҳиди бўлган эмасман. Бу картиинани, гарчи уни ёзишда хотирамда қолган ва ён дафтаридан олинган баъзи тасвир воситалари ҳамда деталлардан фойдаланган бўлсан ҳам, ўзимча тасаввур қилганман, ўйлаб чиқарганман. Гап бу сафар хотира дафтаридан олинган ана шу деталлар устида кетаяпти. Улардан характерлар қад кўтарди. Бу эса прозада деталнинг аҳамияти ва имкониятлари юзасидан менга Чехов то-

монидан берилган таълимнинг ниҳоятда муҳим самараси эди.

Кунларнинг бирида хотира дафтаримга ҳалқнинг ҳазил-мутойибаларидан «Йўқолмасдан илгари бормиди?» деган иборани ёзиб қўйдим. «Ўгри» ҳикоямни ёзаётганимда шу иш бериб қолди. Шунчаки беғараз ҳазил учун айтиладиган бу иборани кекса деҳқон ҳўқизни ўғирланганидан шикоят қилиб борганда аминнинг тилидан айттирган эдим, ўткир пичинг маъно касб этди. Менинг ихтиёrimдан ташқари ижтимоий умумлашган кучга эга бўлди, айни чоқда, индивидуал шахс характерини очиб юборди.

Бу ҳикояни мен бошдан-оёқ деталлар, характерли савол-жавоблар асосига қурганман. Кейин ҳаётда ўрнитагида йўқ кекса деҳқон, унинг устидан мазах қилувчи, фаразларим самараси бўлган амалдорлар ҳам мен реал ҳаётдан кўчириб ёзган илгариги қаҳрамонларга қараганда бирмунча жонлироқ эканлигини кўриб ҳайратда қолдим ва севиниб кетдим¹.

Муаллифнинг ушбу гувоҳлигидан ҳам кўринаяптики, А. Қаҳҳор ҳаётда Қобил бобони ва ҳўқизнинг йўқолиши натижасида элликбоши, амин, тилмоч, приставлар билан бўлган аччиқ саргузаштини — картина «модел»ининг шоҳиди бўлган эмас, ўзича тасаввур қилган, ўйлаб чиқарган.

Ҳаётда айнан шу воқеа («модель») бўлган бўлмасада, лекин ўтмишда Қобил бобо сингари қадр-қиммати ерга урилган, бошига «ташвиш» тушган камбағалларнинг эл-юрт устунлари томонидан сўнгти бор-шудигача талон-тарож қилиниши, «отнинг ўлими — итнинг байрами»га айланиши ҳодисаси минглаб оддий кишилар тақдирига ҳамоҳанг эканлиги объектив ҳақиқат эди. Шунинг учун А. Қаҳҳорнинг ҳикояда яратган бадиий ҳақиқати реал ҳаёт ҳақиқатига шунчалик хос ва мос келалики, бундан ёзувчи севинади, ҳайратга тушибди.

Иккала усулда ҳам яратилган асарлардаги бадиий ҳақиқатга хотира материали, шахсий ва ижодий тажриба асосдир. Бизга кашфиётдек туюлган (Туробжон, унинг хотини; Сотиболди ва унинг хотини ҳамда қизчаси, Мастура, Қобил бобо, элликбоши, амин, пристав) образлар шахсий кузатишларга, кечинмаларга ва

¹ А. Қаҳҳор. Ҳаёт ҳодисасидан бадиий тўқимага: «Адабиётимиз автобиографияси», Т., 1973, 214—215-бетлар.

аниқ тасаввурларга асослангандир. Агар биринчи усулда ҳамма нарса онгли равища юзага келса ва бадий ҳақиқат тажриба билан исботланса, иккинчи усулда гүё у бадий ҳақиқатни «йўлаб чиқаради», шахсий тажрибанинг баъзи қирраларидан (хотира дафтаридан олинган йўқолмасдан олдин бормиди?) деталидан фойдаланилса ҳам, образ ва воқеаларни қузатмасдан, тасаввур орқали жонлантиради.

«Биз ҳаётий ҳақиқатнинг бадий ҳақиқатга айланиши ҳақида ёзганимизда кўпинча шундай таассурот туғиладики, ижодий жараённинг йўналиши доим ҳаётий ҳақиқатдан бадий ҳақиқатга томон боради. Объектив воқелик бирламчи эканлиги шубҳасиз, лекин бундан «ижод жараёни фақат сувга ўхшаб, юқоридан пастга қараб оқади. Яъни биттагина йўналишдан боради деган хулоса чиқмаслиги керак. Ижод жараёнида сувдан кўра электр зарядларига ўхшайдиган хусусиятлар кўпроқ. Бу зарядларнинг бош манбай ҳаёт бўлса ҳам, лекин йўналиш худди яшин ва чақмоқнинг йўналишидек ниҳоятда хилма-хил бўлади. Баъзи ҳолларда ёзувчи ҳаёт ҳақиқатига бошқа ижодкорлар томонидан яратилган бадий ҳақиқат орқали йўл топади.

«Анна Каренина» романининг ilk режаси Л. Толстойнинг хаёлига Пушкиннинг прозасини ўқиб ўтирган пайтида келади. Ф. Достоевский яратган Раскольников образининг асосий концепцияси Бальзак асарлари таъсирида туғилади..»¹

Худди шундай ҳолатларни ўзбек ёзувчилари ижодида ҳам кўриш мумкин. Ойбек «Евгений Онегин» (А. Пушкин) таржимаси билан шуғулланар экан, «Қутлуг қон»ни ёзиш фикрига келади. А. Қаҳҳор А. Чехов асарларини ўқиркан, у «нарса ва ҳодисаларга қараб, уларни қандай кўринишни ўргатганини» ва «Миллатчилар», «Бемор», «Ўтмишдан эртаклар» каби асарларнинг Чехов таъсирида юзага келганлигини таъкидлайди. А. Қаҳҳорнинг «Адабиёт муаллими» ҳикояси Қурбон Берегин деган таниши айтиб берган воқеалар таъсирида юзага келган бўлса, П. Қодировнинг «Юлдузли тунлар» романининг юзага келишида Бобур ҳақидаги тарихий манбалар, ҳужжатлар билан бир қаторда «Бобурнома» асарининг ҳам салмоқли таъсири борлигини кўрамиз.

Демак, бу усулда билвосита тажрибанинг далиллари

¹ Адабиёт назарияси, 11-том. Т., 1979, 113-бет.

ишга тушади; бу далиллар бирор-бир кишидан эшитилган, ё китоблар мутолааси натижасида туғилган, ё тарихий ва бошқа манбалардан олинган бўлиб, ёзувчи уларни тирилтириши ва яхлит нарсага айлантириши лозим бўлади. Бундай пайтда тасаввур ўзининг конкрет ва жонлилиги, кенглиги ва салмоқдорлиги билан ажралиб туради. Ёзувчи тасаввури ўтмишнинг жонли таассурот ва кечинмаларига бой бўлса ва шахсида ҳақиқат ҳиссиёти кучли ривожланган бўлса — яратилган бадиий ҳақиқат (бадиий асар) ҳаёт ҳақиқатига (ҳаётга) мос келаверади.

А. Қаҳдор «Ҳаёт ҳодисасидан бадиий тўқимага» номли ўз ижод жараёни таҳлилига бағишлиланган мақоласида ёзади:

«Адабиёт муалими» ҳикояси ёзилгунга қадар ва ундан кейин ҳам мен жуда кўп саводсиз адабиёт ўқитувчиларини кўрганман. У пайтда бундай «ўқитувчилар» кенг тарқалган эди, чунки илгари жаҳон ва рус классиклари асарлари жуда кам таржима қилинган, рус тилини кўпчилик, айниқса, қишлоқда яшовчилар унча яхши билишмасди, аксарият ўқитувчиларнинг билими хрестоматияларда бериладиган парчалардан нарига ўтмасди. Буни ҳам улар имтиҳон топшириб, диплом олиш учун зарур бўлганлиги учунгина ўқишган. Бундай одамларнинг ўз фанларини билмасликларигагина эмас, ҳатто тушунмасликларига ҳам ажабланмаса бўлади. Эсимда, бир куни қариндошларимиздан бири отпускага келди. У адабиёт муалимаси эди. Кечқурун у театрга борди. Саҳнада таржима пьеса кўрсатилаётган экан, спектаклни кўриб, уйга жуда хуноб бўлиб келди: ахир бу қанақаси, саҳнада ўрисларни кўрсатишди, лекин улар нуқул ўзбек тилида сўзлашади!

Бироқ ҳикояни ёзишга Қурбон Берегин деган танишим айтиб берган бир неча воқеа туртки бўлган. Берегин Марказий Комитет аппаратида ишларди. 1936 йили у мактабларда адабиёт ўқитишни текшириш учун тузилган катта бригада составида Самарқанд областига борган эди. У сўзлаб берган фактлар ҳақиқатдан ҳам кулгили эди.

Дарсда А. Горькийнинг «Она» романини ўтган бир ўқитувчи ҳеч эсимдан чиқмайди. Комиссия унинг дарсига киради, ўқитувчи комиссияни писанд қilmай тоза «олиб қочади». Лекин ўша дарсда «Она» романини ким ёзганлигини билмаслиги очилиб қолади. Берегин ўша дарсни кула-кула менга сўзлаб берган.

Текшириш натижаларини кенг муҳокама қилиш мүлжалланган эди. Бироқ, афтидан, муҳокама бўлмаган, ҳар ҳолда, мен у ҳақда ҳеч нарса эшигтганим йўқ ва тўпланган фактларнинг биттаси ҳам матбуот қўлига тушмайди. Шундан кейин ана шу темада жуда ҳам ҳикоя ёзгим келаверди. Берегин тасвиirlаб берган ўша ўқитувчи хаёлимни банд қилиб, ҳеч назаримдан нари кетмади. Мен унинг дарсидагина эмас, уйидаги қилиқларини ҳам, бутун интилишлари, адабиётга қанчалик алоқадор эканлигини ҳам тасаввур қилдим. Ҳикоя композицияси ўз-ўзидан тиклана борди. Фақат Горькийнинг «Она»си ўрнига унда Чехов асарларидан фойдаландим. Бунинг сабаби Чехов яратган образлар бутун ақлхушимни чулғаб олганлиги эди¹.

Гарчи Курбон Берегин айтиб берган бир неча воқеа ҳикояга асос бўлган ва ёзувчи ҳаёт ҳақиқатига ана шу орқали йўл топган бўлса ҳам, барибир асос — ҳаёт бўлиб қолаверади. Чунки, бадий ҳақиқат ҳаётнинг турли-туман ҳодисалари ичida бекиниб ва сочилиб ётади. Гап ана шу ҳақиқатни қайси йўллар билан бўлмасин (ҳаёт ҳақиқатидан — бадий ҳақиқатга ёки бадий ҳақиқатдан — ҳаёт ҳақиқатига томон бормасин) бир бутунлиги, ҳаққонийлиги, юқумлилигини таъминлашдадир.

Хуллас, юқоридаги фикрларимиздан равшан була-яптиki, ёзувчи онгига маълум бир ҳаёт ҳодисасининг аломатлари тўпланади. У ана шу ҳаёт ҳодисасига ҳамоҳанг бўлган кўрган-билгандарини, бошидан кечирган кечинмаларини, хотира ва шахсий тажрибасидаги ҳодисаларни у билан синтезлаштиради. Ҳар томонда тарқалиб ётган ҳодисаларни муайян фоя атрофига уюштиради ва бир бутун нарса ҳосил қиласди. Тасаввур ҳамма фактларни «жиловлади», ёзувчи мақсад сари интилган сайин, ўзининг шахсий ҳаёти ва тажрибаси давомида тўплаган, «теша» тегмаган, чўкиб ётган ўхшаш хотиралар, кечинмалар, ҳолатлар уйгонади, юзага чиқади, уни ҳаяжонга солади. Реал ҳаёт билан ёзувчининг ўз олами диалектик алоқага киришади, бир-бiringa сингади. Бири-бирини тўлдиради, бири-бирини юзага чиқаради.

Шунинг учун ҳам асарда тасвиirlанган воқеа-ҳоди-

¹ А. Қаҳҳоғ. Ҳаёт ҳодисасидан бадий тўқимага: «Адабиётимиз автобиографияси». Т., 1973, 206—207-бетлар.

салар, қаҳрамонлар турмушдаги фактларга ва одамларга үштайды. Ана шу үхшашликка асосланиб, баъзи китобхонлар у ёки бу асардаги воқеа ва қаҳрамонларни ёзувчи ўйлаб топганига ишонмайдилар.

Уларнинг тушунчасича, ёзувчи яратган воқеалар, ҳодисалар ҳаётда айнан бўлган воқеалар ва қаҳрамонлар эса бор кишилардир. Айни пайтда, асарнинг бош қаҳрамони — ёзувчининг ўзиидир...

Лекин бу тушунча нотўғри эканлигини ёзувчи П. Қодиров ҳам асосли таъкидлайди: «... мен ўзим «Кутлуғ қон»ни ўқиган ўсмирилик пайтларимда ҳаммасини воқеий деб ўйлаганман. У пайтда мен адабиётни яхши билмас эдим, агар ўшанда бирор «Йўлчи ҳаётда бўлган эмас, уни ёзувчи ўзи ўйлаб топган» деса, мен ишонмас эдим. Ишонсанм, китобдан ихлосим қайтиши мумкин эди. Кейинчалик бир журнал редакцияси Ойбек билан қилган сұхбатларини ёзиб олиб, эълон қилди. Бу сұхбатда Ойбек Йўлчининг прототипи бўлмаганини, «Кутлуғ қон»даги кўпчилик воқеалар ва қаҳрамонларни ёзувчи ўзи ўйлаб топганини айтади.

Илгари мен романнинг қаҳрамонларига қанчалик қойил қолган бўлсанм, энди бу қаҳрамонларни шунчалик ишонарли ва таъсири қилиб яратган ёзувчига ўшанчалик қойил бўлдим. Чунки тайёр ҳолдаги ҳодисаларни, одамларни воқеий қилиб тасвирлашдан кўра, аслида воқеийдай туюладиган, лекин таъсир кучи, умумлаштириш қудрати, воқеийдан ҳам баланд турадиган қаҳрамонлар яратиш мушқулроқ ва шарафлироқ эканини мен энди билдим...

Ёзувчи бутун асарни ҳаётдан олиб ёзган, фақат ҳаётдан жўн нусха кўчириб ёзган эмас, балки фактларни ўз ҳаётий тажрибаси ва фантазияси билан омухта қилиб, уни керагича ўзгартириб ёзган¹.

Ҳаёт билан поэтик ижоднинг, факт билан тўқиманинг ўзаро алоқаси, улар ўртасидаги меъёр масаласини тўғри тушуниш учунFaфур Гулом ижодига, унинг «Шум бола»сининг яратилиш тарихига мурожаат қиласлий. **У илҳом билан ёзилган асар — зарурият орқали юзага келишини таъкидлаб, ёзади:**

«Ҳар қандай проза асарини ёзиш менга қийин бўлса ҳам, лекин «Шум бола» устида ишлаётганимда кайфи-

¹ П. Қодиров. Ўйлар. F. Гулом номидаги адабиёт ва санъат нашриёти, Т., 1971, 115–117-бетлар.

чоғлиқ мендан ажралмаган эди. Тұғрисини айтганимда, ҳозир асарнинг дастлабки режасини тиклаш қи-йин — мен үз ёшлигим ҳақида автобиографик повесть ёзмоқчи эдимми ёки күвноқ саргузаштларга лиқ тұла болалар китобини яратиши ми? Тұғрироғи, ҳар қандай адабиётчи камолот зинасига қадам қўйганда юз берадиган ҳодисадек, мен тұсатдан ҳар ердан, бегоналар тарихидан ушоқлар терганимни аниқладим, менинг шахсий, қадрдон ва қимматли материалим деярли тегилмасдан ётибди... Мен хаёлан үз болалик хотиралиримни тиклагунча (улар жуда кўп эди, ҳар қандай китобга ҳам сифас эди); чанг-тұзонли, пахсали ма-халланинг ялангоғи ҳақида — биринчи бобларни ёзганимда; унинг зиммасига тушган бахтсизликлар ва қувончлар тұғрисида ёзганимда — мен чин кўнгилдан үз ҳақимда ёзаётібман деб ўйладим. Шундай эди ҳам. Лекин, бир вақт, ногаҳон мен Шум боламга четдан назар ташласам, тұсатдан шу нарсани аниқладим; у мен эмас. Дарвоқе, сира ҳам мен эмас. Буни мен пайқамасдан, юз йиллар мобайнинда халқимнинг болалари билан содир бўлган ҳодисаларни үз қаҳрамонимга нисбат берибман. Буни тушунгач, ҳайрон қолдим. Ахир, мен үз ёшлигимни бўрттириб кўрсатиш ниятида эмасдим. Аксинча! Энди, унга чуқурроқ кириб, мен фақат бор ҳақиқатни — хотиранинг сирли, кулгунинг муғом-бир ойначалари орқали қараганда ҳам, у моҳияти билан даҳшатли эканини айтмоқчи эдим. Лекин менинг Шум болам энди Fafur исмли бола ва қейинчалик ундан ёзувчи етишиб чиқсан шахс эмасди. Йўқ, у ўша вақтда, ундан олдинги асрда минглаб учрайдиган одатдаги ўзбек боласи эди; улар билан содир бўлган воқеалар. Шум бола билан ҳам бўлиши, унинг саргузаштлари эса умумга тегишли бўлиши мумкин эди...

Бу шунчаки чиройли сұзлар эмас. Асарнинг биринчи бўлимида бир эпизод бор. Шум бола уйдан палов учун ҳалфанага тухум ва ёг олади. Аммо эриған ёғ унинг иштонидан оқиб кетади, жаҳли чиқсан она унинг бошига ўқлов билан уради. Қалпоқ тагидаги тухум пачоқланиб, сарифи оқига аралашиб, юзига оқади. Буни кўрган она «Бола бечоранинг бошини ёриб, қатиғини чиқариб юбордимми» деб эсидан кетади... Бу тарих мен билан содир бўлганди — ҳозир сиз билан гаплашаётган Fafur Фулом билан. Ўшанда мен тўққиз ўшда эдим: лекин менинг бошимга урган онам эмас, бувим эди.

Бу воқеани оиласизда мендан бошқалар ҳам эслашади... Мен бу тарихни — айнан шу воқеани яқинда туркман халқ әртаклари түпламида учратиб қанчалик ҳаяжонланганимни фараз қилинг...

Ха, у — мен ва мен эмасдим. Анча-мунча ёзид қўйганимдан кейин, ҳеч қаерда ўз қаҳрамонимга ном бермаганимни сезиб қолдим, қиссада ҳикоя биринчи шахс номидан олиб борилади. Унинг исми йўқ эди — оддий шум бола. Бир вақт буни англаб, мен тўқиётган воқеаларга муаллифликдан ташвишланмай қўйдим. Бизда айтишади: «Ҳамма нарса, эгаси бўлмаса Афандига тегишилдири». Бу ерда ҳам худди шундай эди. Мен ёзган ҳикояларнинг бири ҳаётда, бири әртакларда учарди ва бунга Шум боланинг ҳақи бор эди, чунки у... ҳақиқатан ҳам халқ қаҳрамони эди... Ўйлаб қўринг: бу кичик камбағал сафирнинг тақдири ўта фожиали, аммо у битмас-туганмас ҳаётий кучга тўла; ҳамма мувваффақиятсизликларга кучли оптимизмни ва маккорона зийракликни, ҳар хил умидсизликларга битмас-туганмас кулгини, ҳар қандай кучли душманларга уларнинг заиф ва фалати томонларини топиш қобилиятини қарши қўяди. Ҳеч қачон иши юришмайдиган бу бошпанаисиз бола пировардида баҳтсиз шароитни ҳам, зарбаст бойларни ҳам, айёр савдогарларни ҳам енгиб чиқади... У билан хайрлашарканман, кўз ёши тўкмаслигимни, балки завқланишим ва кўнглим тўқ бўлишини олдиндан билардим: энди у мени ҳам умидсизланмасликка ва курашишга ўргатарди. Аслида, ўспирин Насриддин эди, лекин Насриддиндан ўзининг болаларча соддалиги билан ажralиб турарди. Айрим жойларда Насриддин ўзини гўл, тентак қилиб муғомбирлик қилса, Шум болада бу муғомбирлик ўз-ўзидан — унинг дилининг соддалигидан келиб чиқар эди, керакли вазиятда у бундан тўғри фойдаланаарди... Аслида шумлигига қарамасдан у жуда тоза, болаларча оқ кўнгил, қаерда яхшилигу, қаерда ёвузлик, қаерда тўғрилигу, қаерда ёлғон борлигини катталардан яхшироқ кўради.

Балким, Сизга менинг шахсий персонажимга бўлган бундай муносабатим кулгили туюлар, лекин мен унга ижодий қаҳрамонимга қарагандай қарайман, ёзган нарсамни эмас, балки унинг ортида турган (шахсий) ўз болалигимни, мени яратган халқимнинг хусусиятларини севаман. Ҳа, тўғрисини деганда, мен бу асарни

шахсан ўзимга эшитилаётган қандайдир диктовка асосида ёзганман...»¹

Демак, ижод жараёнида, П. Қодиров айтганидек ва Faфур Фулом тушунганидек, ҳеч вақт ҳаётнинг айнан эпизодлари тақрорланмайди. Ҳар қандай асар сюжети ёзувчи кузатган, билган нарсалари билан шахсий тажриба ва кечинмалари уйғунлашувидан яратилади. Гарчи «Шум бола»да F. Фуломнинг ўзидан нималар қўшганини (ҳаммасини) тўлиқ айтиш қийин бўлсаем, лекин асардаги ҳамма эпизодларни ҳис қилганига, гўё қайтадан бошидан кечирганига шак-шубҳа йўқ. F. Фулом ўз шахсий кечинмаларини Шум болага юклар экан, айни пайтда, у Шум болани ўша давр болаларининг кўпчилигига хос бўлган характерли хусусиятлар эгаси ҳам қилиб кўрсатади. Демак, қаҳрамон — умумлашма образ, аниқ бир шахсдан кўра, ўз даврининг типик вакилидир. Дарвоҷе, ёзувчи ижод жараёнида ўз тасаввури орқали ўзига таниш ва яқин одамлар, воқеалар ичida яшайди; маълум гоя асосида тўпланган алоҳида фактларни ўзининг шахсий тажрибаси билан бойитиб, қалб призмасидан ўтказиб, кўпчиликка хос қилиб умумлаштиради.

Шундай қилиб, «Шум бола»нинг яратилиш тарихини F. Фулом томонидан тушунтирилиши бизга реалистик тасвирнинг можияти ҳақида асосли ва етарли тушунча беради. Унда «Шум бола» асари қайси унсурлар бирлашувидан юзага келганлиги, ҳаёт ва ижоднинг бир-бирига туаш нуқталари қандайлиги аниқ кўрсатилганки, ундан шундай холоса чиқариш мумкин: **Ёзувчи тасаввури муайян ғояга асосланиб, ҳаётдаги алоҳида нарсаларни бузади, саралайди, тўқийди ва янгидан таъсирли ва жонли, табиий ва гўзал, типик ва яхлит нарса яратади. Бу жараён характер ва эпизодларни яратишда ҳам, қаҳрамон ва воқеликнинг айрим хусусиятларини кўрсатишда ҳам, яхлит сюжетни юзага келтиришда ҳам содир бўлади.**

Адабиётда ҳатто биргина образнинг портрети ҳам бир нечта ёки ўнлаб реал кишиларнинг ташқи кўринишларини жамлашдан ёки ҳаётда кўрган, билган кишиларнинг ўз хотирасида қолдирган кўринишларини кўз олдига келтиришдан, уларнинг қиёфаларидан ке-

¹ Биография замысла (Беседы с мастерами узбекской литературы, записанные А. Наумовым), изд. «Ёш гвардия», Т., 1974, стр. 20—21.

рагини танлашдан ва конкрет қаҳрамонда мужассамлаштиришдан яратилади.

Бироқ Абдулла Қодирий айтганидек, бунинг бир шарти бор: портрет сунъий, ясама нусха бўлмаслиги, халқ орасида бирорда бўлмаса бирорда кўрилган, табиий, мантиққа тўғри келадиган, китобхонни ишонтирадиган бўлиши керак.

Адабиёт, Оноре де Бальзак ёзганидек, рассомликда ишлатиладиган усулдан фойдаланади, гўзал образнинг яратилиши учун қўлни бир аёлдан, оёғни иккинчи аёлдан, кўкрагини бошқасидан, елкани — унисидан олади.

Буни тушуммаганларга Абдулла Қодирий кулиб, «Ўтган кунлар» романидаги Ўзбек ойимни ўз онаси Жосият бибидан, Офтоб ойимни қайноаси Хоним бибидан, Кумушни эса яқин қариндоши Ойкумушдан олганини айтар экан¹.

Бу нарса «Қодирий аёллар образини, хусусан, ўз оиласидан, яқинларидан олган, ўргангандек деб мулоҳаза юритиш»²нинг ноилмийлигини кўрсатади, лекин ўз яқин кишиларидан баъзи штрихларни, муайян образ учун зарурий хусусият ва ҳолатларни олганлигини рад этмайди.

Иккинчидан, ёзувчи қайси қаҳрамоннинг реалистик портретини яратмасин, унинг ташқи қиёфасидаги энг характерли белгиларни чизишига ва шу орқали уларнинг руҳий дунёсини акс эттиришга интилади. Хоним биби ҳам, Ойкумуш ҳам, Жосият биби ҳам ҳеч вақт Ўзбек ойимнинг, Офтоб ойимнинг, Кумушнинг руҳий оламини бошдан кечирмаганлар. Бу фикр ҳам Ҳ. Қодирийнинг юқоридаги даъвосини рад этади. Ҳабибулло Қодирий хотира китобида ёзади:

«Эшонгузар маҳалламиизда мулла Алижон исмли дадамнинг домласи бўларди. Ўзи дадамдан ўн беш ёшлар катта, 1910—1916 йилларда рус-тузем мактабида ўқитувчилик қилган, дадамга дарс берган, кейинчалик эса жуда дўстлашиб қолган киши эди. Дадам бу кишини «ҳам устоз, ҳам етук инсон» деб ниҳоятда ҳурмат қиларди. Агар Қодирий умрида биргина кишини ҳурмат қилган деб, фараз қилсак (албатта, ота-она бундан мустасно), ўша шахс шу Алижон домладир, дейиш муболага бўлмас...

¹ Ҳ. Қодирий. Отам ҳақида. Т., 1974, 115-бет.

² Шу китоб. 117-бет.

— Илгарилари муллалар аксар ўттиз йиллаб ўқиб мадрасини базўр хатим қиласдилар. Лекин Алижон домла Бухоро мадрасаларидан бирини беш йилда тамомлаб қайтган. Билағонлиги учун уни мадрасадагилар «Алича» деб аташган. Домланинг яхши хислати шундаки, у пок кўнгил, кибрсиз, тамагир эмас, сабр-қаноатли, камтар, мутолааси зўр олим, — дер эди, бу киши тўғрисида дадам.

Алижон домла 1964 йили саксон беш ёшларида вафот этди. Домла менга ҳам форс тилидан дарс берганлиги важидан мен ҳам у кишини яхши биламан. У оқищдан келган, озгин гавдали, чўзиқроқ, келишган юз, соқол-мўйловли, кичик бошига оқ симоби салла, телпак ёки камзули устида жўн, оёғида маҳси-кавуш кийиб юрувчи, тик қомат, нуроний чехра киши эди.

Домланинг ички дунёси ҳам нурга тўлган каби эди. Гапни ўйлаб, босик, содда, ёқимли сўзларди. Сўзида мантиқсиз, ортиқча иборалар мутлақо бўлмас, тингловчи гўё ҳузурланар, яна-яна тингласам, дер эди. Бунингдек оталар халқимизда гарчи кўплаб учрасада, неғадир, айниқса бу кишини мен Юсуфбек ҳожи образига жуда-жуда ўхшатаман. Муаллиф, албатта, Юсуфбекни сиёсий арбоб, маълум табақанинг вакили қилиб тасвирлайди. Алижон домлада гарчи бу томонлар кўринмаса-да, ҳар ҳолда бошқа жиҳатлари, менингча, руҳан ва жисман Юсуфбек ҳожига тимсолдекдир»¹.

Алижон домлани «руҳан ва жисман Юсуфбек ҳожига тимсол қилиб қўрсатиш, «мезонга олиш», уни Юсуфбек ҳожининг прототипи деб тушуниш ижод жараёнинг мураккаблигини ва унинг моҳиятини маълум даражада соҳталашибтиради. Чунки асаддаги Юсуфбек ҳожининг қиёфаси унинг хислатларини биргина Алижон домладан эмас, юзлаб бошқа кишиларда ҳам учратиш мумкин. Агар ёзувчининг вазифаси — Юсуфбек ҳожини ўз даврининг йирик савдогарлар табақасининг вакили, сиёсий арбоби, тик қомат ва нуроний ота, тингловчи ҳузурланувчи даражада ёқимли сўзловчи, босик қайнота қилиб тасвирламоқ экан, тасвирлаганде ҳам типик, умумлашма образ қилиб яратаркан, албатта, ўша табақага, ўша арбобларга, ўша оталарга, ўша қайноталарга хос бўлган асосий фазилат ва камчиликларни — хусусиятларни танлаб Юсуфбек ҳожи характеристи-

¹ X. Қодирий. Отам ҳақида. Т., 1974, 115-бет.

да бериши табиий эди. Шундай бўлгач, Юсуфбек ҳожи образини яратишдаги **ижодий ташлашнинг, умумлаштиришнинг, ҳаётдаги кишиларга ўхшаш қилиб яратишинг ролини, ҳаёт ҳақиқатининг бадиий ҳақиқатга айланиш жараёнини** пасайтирмаслик, балки бунга асосий ургуни бериш лозим. Чунки, Н. Гоголь айтганидек, ёзувчи ҳеч вақт оддий нусхадан **портрет чизмайди. У портрет яратади.**

Тарихий шахсларнинг портрети яратилганда ҳам санъаткор реал фактлар (юз тузилиши, қомати, кийиниши ва ш.к.)га, ташқи кўринишларига асосланса-да, лекин ўзининг поэтик тасаввури ва асарнинг режасига мувофиқ қилиб, уни «ичдан» ўзгартиради.

«Утган кунлар»да тасвирланган тарихий шахслардан бири Мусулмонқул. Автор унинг портретини қуидагича чизади:

«Хоннинг сўл томонидаги олтин ҳаллик курси, устидаги Ўратепа чакмани устидан қайиш камар боғлаб, соддагина қилич тақинган, бошига оқ барра попоқ кийиб, башарасидаги бурни юзи билан бир қаторда деярли текис яратилган, ўртacha соқол, қисиқ кўз, буфдой ранг, ўрта ёшли бир кимса — Мусулмонқул ўтирап ва ҳозиргина ҳудайчи тарафидан ўзига топширилган ариза ва мактублардан очиб ўқир эди».¹

Мусулмонқулнинг жасур киши бўлганилигини китобдаги изоҳда ҳам таъкидлайди: «Мусулмонқулнинг ўзи ҳам фавқулодда юраклик эди. 1853 й. тарихида Мусулмонқул қўқонликларга асир тушиб, уни тўпдан отиб ўлдириш учун дордек бир нарсанинг устига ўтқазирлар. Иккинчи томондан тўпга ўт бериш кутилади. Шу вақтда кишилар Мусулмонқулдан сўрайдилар: «Энди қалайсан, чулок?» Мусулмонқул кулибгина жавоб беради: «Алҳамдулилоҳ, ҳали ҳам сизлардан юқори бир ерда ўтирибман!..»²

Гарчи келтирилган бу фактлар — ҳаёт ҳақиқатига мос бўлса-да, лекин ёзувчи ўтган асрдаги хонлар ва олий амалдорларнинг бебурдлигини, адолатсизлигини, ҳалқ қонини сўрувчи зулуклигини, юртини талашдан бошқа манфаати бўлмаган, қирғин ва урушлар ижодкорларининг типик образини яратишда Мусулмонқул портретини «ичдан» янгилайди. Уни «киприксиз кўзлар-

¹ А. Қодир ий. Ўткан кунлар. Т., 1980. 108-бет.

² Шу китоб. 117-бет.

да ўтлар ёнадиган», «ниҳоятда тутаққан», «аламига чидай олмайдиган», «хонликдаги юқори бир күчгә молик сиёсат курсисига ўтирган», ҳийла ва найрангбоз, «маккор тулки», «қаҳру-ғазаб эгаси», «истеҳзоли илжаювчи», «чұлтоқ супурги», «уятысиз» қилиб яратади.

Демак, ёзувчи ҳақиқий санъаткор бұлса, у ҳамма вақт (асарнинг эңг нозик штрихларигача) яратади. Чунки унинг вазифаси — табиатни, шахснинг нусхасини яратиш әмас, балки үхшаш қилиб яратылған нарсага жон ва ҳаракат ато қилишда, унинг қалби, мазмуни, характерли күриниши ҳақида таассурот үйғотищадыр.

Хуллас, ёзувчи муайян бир шахс портретини яратғанда, шу шахс мансуб бұлған табақа вакилларининг уәки бу даражада кенг тарқалған ижобий ёки салбий хислатларини (күринишлари)ни пайқайды ва уларни конкрет бир шахс (образ)да үйғунлаштиради. Албатта, бу портрет ўзига хос юзлаб жонли кишиларга мүмкін қадар нозикроқ, чуқурроқ даражада үхшаган бұлиши ва муаллиф акс эттірмоқчи бұлған нарсаны ёрқинроқ күрсатиши шарт.

Шунинг учун ҳам «Ёзувчи күплаб шахсларда күринган фазилатлардан ўз тоғасига, ижодий мақсадига мұвоғиқ келадиганини хиллаб олиб, қаҳрамонида мужассамлантиromoқчи бұлғанда худди селекционерга үхшаб иш тутади. Яғни, одамларнинг хусусиятларини тирик ҳолида олади ва бошқа тирик характерга чатишиб, яшаб кетадиган қилиб ўтказади. Бұғдойда ҳаёттинг, эңг барқ урган пайти ва бошқа буғдойнинг ҳам хусусиятини олиб, ўзига умумлаштиришга қодир бұлған пайти — гуллаган пайти бұлади. Ёзувчи яратаеттан қаҳрамонларнинг ҳаёти ҳам барқ уриб туриши ва бошқа яхши кишиларнинг фазилатини ўзига олиб сингдиришга лаёқатли бұлиши керак.

Абдулла Қодирий ўз қариндошлари Ойқумуш каби ўзбек аёлларининг ҳуснлари, одоблари, бошқа инсоний фазилатларини Кумуш образида тирик бир характер шаклида мужассамлаштирган. Романдаги ёрқин воқеаларсиз, кескин түқнашувларсиз, Отабек каби севимли йигитсиз икковининг тақдирини белгиланған ҳаёттій асосларсиз бу мүмкінмиди? Йўқ. Кумушнинг шундай бир даврда яшаши, шундай ота-онанинг қизи, Отабекдай йигитнинг ёри, Ўзбек ойимдай аёлнинг келини-ю, Зайнабдай жувоннинг кундоши бұлиши — ҳаммаси бирлашиб ёзувчига бу образдаги тоғавий-бади-

ий күчларни барқ урдириш имконини беради. Кумуш ўзига ўхшаш ўзбек аёлларининг жуда кўп фазилатларини мана шу шароитдагина тирик ҳолича олиб, бир характерда мужассамлаштириши мумкин эди».¹

V. Маънавият ва ғоявийлик

Таянч сўз ва иборалар: Маънавият. Дунёқараш. Ғоявийлик (фикрлар мажмуй). Тенденциозлик. Халқчиллик ва унинг хислатлари. Адабиётдаги миллийлик ва умуминсонийлик.

Бадиий ижод жараёнида талант асосий тамойил бўлишидан қатъи назар, санъаткор ҳаёти давомида ортирган турли-туман бойликлар (илмий, фалсафий, сиёсий, ҳуқуқий, ахлоқий, эстетик, диний қарашлар, билимлар, тажрибалар)нинг аҳамияти ҳам кам эмас. Ёзувчининг парвозини баланд ва гўзал қушга ўхшатсак, унинг парвозини таъминловчи бир қаноти талант бўлса, унинг иккинчи қаноти дунёқарашидир.

«Дунёқараш — бу аввало, инсон ўзини ва дунёни зарурий равишда англаши, тушуниши, билиши ва баҳолаши натижасида юзага келган хулосалари, билимлари асосида шаклланган умумлашмалар тизимиdir. Бу жиҳатдан дунёқараш дунёning инсон онгидаги ўзига хос инъикоси бўлиб, инсон ўз-ўзини ва дунёни англашнинг алоҳида шаклидир. Дунёқараш, шу билан бирга, инсоннинг ўзига уни қуршаб турган борлиққа бўлган муносабатларини ифодалайдиган кўникмалари, малакалари, билимлари, ҳамда дунёни амалий ва назарий ўзлаштириши ҳамдир. Хуллас, у инсоннинг дунёни сезиши, идрок этиши, тасаввур қилиши, тушунишидан тортиб, унинг дунёдаги ўз ўрни ва ролини белгилаши, ўзини ва дунёни ўзгартиришининг умумий маънавий заминлари ҳамдир» («Фалсафа», Т., 1999, 9-бет; Таъкидлар бизники — X.У.)

Демак, дунёқараш маънавият орқали амалга кўчади, ўзликда акс этади. Маънавият — Аллоҳ олдидаги маъсуллик, Аллоҳ ҳақиқатини англаб этиш йўлидаги ҳаракатлар ва унинг билан уйғунликка эришишдир... «Шахс ва миллат руҳияти (адабиётнинг предмети — X.У.) ҳам маънавият билан туташ бўлиб, асосий фарқ-

¹ П. Қодиров. Ўйлар, 1971, 118—119-бетлар.

ларидан бири — руҳият мураккаб воқелик, сифатида ўзида ҳам раҳмоний, ҳам шайтоний хислатларни, ҳам фазилат, ҳам қусурларни, ҳам табиий, ирсий, ҳам атроф-муҳит таъсиридаги ҳолатларни акс эттирса, маънавият шахснинг, миллатнинг инсоний фазилатлари ни, унинг қалбидаги илоҳий нур инъикосини намоён қиласди»¹.

Адабиётнинг асли яратилишидан бош мақсади ҳам одамларни куфр зулматларидан иймон нурига — Аллоҳ йўлига олиб чиқишидир. Шу йўлда қалбни бадиийлик қудрати илиа поклаш, тозартириш, уйғотиш, ҳаракатга солишидир.

Кўринадики, талант ва маънавият ўзаро узвий боғлиқликда ўзликни ва дунёни кашф этиш қуролига айланади; адабиётдаги инсон тасвири тарихи ҳам миллий, ҳам умумбашарий моҳиятга эга бўлган, одамзотга хос баркамолликни мужассам этган, уни узлуксиз ҳаракатини ўзига оҳанрабодек тортувчи комил инсон гояси тарихидир, деган хulosага асос беради. Бундан адабиёт гоявийдир деган фикр келиб чиқади; ҳар бир асар, албатта, аниқ гояни ёки гоялар тизимини ўзида ифодалайди: инсон ва жамиятни тараққиёт ва эзгу мақсад — умуминсоний ҳақиқат сари етакладими ёки тескарими (зарар келтирадими) — ҳар икки ҳолда ҳам ўша асар муайян фикрлар мажмуюи (гоялар)ни жонлантиради. Энг характерли томони шундаки, ҳар қандай гоя талантли шахс қалбидаги интилишлар натижаси сифатида дунёга келади ва у ижтимоийлик касб этиб ҳаёт заруратига, давр тарихига, инсоний муносабатлар қоидасига айланади.

Шу сабабдан, Лев Толстой, «мақсадсиз ва фойда етказишга умидсиз ёзиш сира ҳам қўлимдан келмайди... Санъат шу билан қимматлики, у одамларга қандайдир бир янгиликни очиб беради ва кишиларни кўришга, ҳис этишга ўргатади», деб — ёзганди.

Фикр — «санъатнинг жону қудрати... уни юқори кўтариш» (В. Белинский) усули экан, асарнинг қиммати унда аксланган мазмуннинг инсон ва жамият тараққиётiga етказган умум фойдасига қараб тайин этилади.

Гоявийлик бадиий асарнинг ҳамма унсурларини — мазмуннинг ҳаққонийлик, самимийлик, салмоқдорлик, универсаллик, оригиналлик, таъсирдорлик каби хусу-

¹ М. И момназаров. Миллий маънавиятимиз назариясига чизгилар. Т., 1998. 168-бет.

сиятларини ҳам, шаклнинг характер, сюжет, композиция, тил каби воситаларини ҳам ўзига «ишлатади». Бундан адабиётнинг тенденциозлик, халқчиллик, милийлик, умуминсонийлик белгилари ҳам мустасно эмас.

Тенденциозлик (лат. *Tendensia* — интилиш) — санъат асари тоясига сингдирилган ёзувчининг тарафкашлиги, холосаси, ҳукми.

«Кенг маънода — очиқ ёки яширин, ихтиёрий ёки беихтиёр равишда бадиий асарда ифодаланган муаллифнинг тасвир объектига бўлган тоявий-эстетик муносабати (симпатияси ёки антипатияси, муҳаббати ёки нафрати), асардаги масалага ва характерга берган баҳоси. Шу маънода тенденциозлик бадиий тоянинг узвий қисми, асосий элементи, унинг энг муҳим жиҳати: муаллифнинг «хоҳиши», маъқуллаши ёки қоралаши — «ҳукми». Тенденциозлик ҳар қандай бадиий асарда (формалистик асарни мустасно қилганда) мавжуд бўлиб, у бадиий асар тоясида, шунингдек, муаллиф образи (эпос)да ёки лирик қаҳрамон сиймосида ўз ифодасини топади. Тор маънода санъаткорнинг асарда очиқдан-очиқ ифодаланадиган тоявий-сиёсий, ижтимоий-синфий тарафкашлиги, олдиндан мўлжаллаб қўйилган режаси — холосаси. Демак, бадиий асарда олға суриладиган тоя тенденциоз характерда бўлар экан».¹

Бўлиши мумкин бўлган ҳаёт ва қаҳрамонлар ёзувчи тафаккури ва қалбида туғилган ва унинг режасига бўйсндирилган бўлса ҳам, лекин объектив тасвир муаллифга «ўзбошимчалик» қилишга, яъни муаллиф истагига, хоҳишига монанд қаҳрамоннинг гапиришига, ҳаракат қилишига имконият бермайди. Бу имкониятни санъат рад этади. Чунки, юқорида таъкидлаганимиздек, қаҳрамон, ёзувчи қўлидаги қўғирчоқ эмаски, уни хоҳлаганча ўйнатса, хоҳлаган вазиятда йифлатса; балки у ўзига мустақил одам, ўзигагина хос фикрловчи, сўзловчи, қувонч ва изтироб чекувчи шахс, «ўзига биқиқ бир олам»дир. У муайян типик тарихий-ижтимоий муҳитда яшар ва курашаркан, худди ана шу ҳаётнинг талаб, эҳтиёжларига мос тарзда турмуши табиий бўлсин; айтмоқчимизки, тасвирланаётган ҳаёт оқими қанчалик табиий ва самимий бўлса, унда ҳаракатланувчи қаҳрамоннинг «ўзи қандай бўлса, шундай яшashi» шарт.

¹ Т. Бобоев. Адабиётшуносликка кириш, Т., 1979, 77-бет.

Л. Толстой айтганидек, «санъаткор шунинг учун санъаткорки, у предметларни ўзи кўриши керак бўлгандаи кўра олмайди, балки ўзи қандай бўлса шундай кўради»¹ (Таъкид бизники — X.У.)

Демак, ёзувчи қаҳрамонга бўлган симпатияси ёки антипатиясини декларатив тарзда очиқдан-очиқ баён қилишига, унинг табиий (ўзига хос) ҳаракат ва кечинмаларига бевосита аралашувига ҳожат йўқ. Чунки ҳаёт ўз оқимиға, характер ўз мантиқига биноан ҳаракатланар экан, «менимча, бу дунёда бирор сабаб билан юз бераётган нарсага аралашишга, ўзининг фикрини айтишга **романистнинг ҳаққи йўқ**. У ўз ижодида худога ўхшаши шарт, яъни, яратсину жим турсин».²

Дарҳақиқат, ёзувчи ўз foясини асар тўқимасига, ундаги қаҳрамонларнинг ўй-хаёллари, орзу-интилишлари, қувонч ва дардлари, бахт ва фожиаларига сингдириб юборади. Ана шу қаҳрамонларнинг ҳаёти, тақдирни ва уларни туддирган, ўстирган ҳалқ ҳаётининг ҳаққоний тасвири орқалигини ўз foявий позициясини, асар foясини китобхонга «юқтиради», унинг ҳисларини уйғотади, фикрларини кўзғотади. **Реалистик санъатнинг талабларидан муҳими ҳам шу: ёзувчи ҳаётнинг ҳаққоний манзарасини яратар экан, қаҳрамонга бўлган муносабатини ошкора айтмаслиги, унга нисбатан холис ва бепарво бўлиши, уни ўзидан ажратиши ва унга узоқроқдан разм солиши лозим.**

Ёзувчи А. Куприн ўз хотираларида устози ўғитларини эслар экан, А. Чеховнинг қуйидаги кўрсатмасини алоҳида қайд қиласди: «У ёзувчи ўз қаҳрамонларининг қувонч ва изтиробларига бепарво қарashi кераклигини ўргатарди. «Битта яхши повестда, — ҳикоя қилганди, у, — катта шаҳарнинг сув бўйидаги ресторани тасвирини ўқидим. Бирданига шу аниқки, муаллиф учун бу музика ҳам, бу электр ёруғлиги ҳам, тугма тешигидаги атиргул ҳам ажиб нарса; бу ажиб нарсага қараб ўзи ҳам иштиёққа, завқу-шавққа берилган. Бу яхши эмас. Бу нарсалардан ташқари туриш керак, гарчи у нарсаларнинг майда-чуйдасигача билиш яхши бўлса ҳам, лекин, уларга худди назарга илмагандай, юқоридан пастга қарагандай қараш керак. Ана шунда тўғри чиқади».³

¹ Толстой Л. Полн. собр. соч. в 90-ти томах. М., 1928—1958, Т. 57 с. 151.

² Флобер. Собр. соч. в 5-ти томах. М., 1956, Т. 5, стр. 247.

³ А. Куприн. Собр. соч. в 9-ти томах, М., 1973. Т. 9, стр. 32.

А. Чеховнинг ушбу фикрлари ҳам шундан далолат берадики, реалист санъаткор ҳаётнинг у ёки бу кўри-нишини, ижобий ёки салбий қаҳрамонни яратадими, ундан қатъи назар, яратадиган нарсаларидан баланд туриши, «унга тугал бир нарса» деб қараши лозим. Муаллиф ўзини, ўз қарапарни ва таассуротларини эмас, балки, ўз-ўзидан (албатта, бирор сабаб билан) ривожланувчи табиий ҳаётнигина тасвиirlасин, «яхши»-га ҳам, «ёмон»га ҳам холис бўлсин. Ўз нуқтаи назарини, баҳосини, муносабатини, хулосасини ўқувчига ошкора баён этмасин.

Ушбу фикрлар ҳикоя, повест, роман жанрларига бирдай тегишилдири. Шунинг учун ҳам масаланинг мөҳиятини тўлиқроқ очилишини истаб, реалист-санъаткор А. Қаҳҳорнинг «Бемор» новелласини тўлиқ келтирамиз.

«Сотиболдининг хотини оғриб қолди. Сотиболди қасални ўқитди — бўлмади, табибга кўрсатди. Табиб қон олди. Бетобнинг кўзи тиниб, боши айланадиган бўлиб қолди. Бахши ўқиди. Аллақандай бир хотин келиб толнинг хипчини билан савалади, товуқ сўйиб қонлади... Буларнинг ҳаммаси, албатта, пул билан бўлади. Бундай вақтларда йўғон чўзилади, ингичка узилади.

Шаҳарда битта докторхона бор. Бу докторхона тўғрисида Сотиболдининг билгани шу: салқин, тинч паркда, дараҳтлар ичига кўмилган баланд ва чиройли оқ иморат; шиша қабзали кул ранг эшигида қўнғироқ тумаси бор. Чигит пӯчоқ ва кунжара билан савдо қила-диган хўжайини Абдуғанибой омборда қулаб кетган қоплар остида қолиб үладиган бўлганида бу докторхона га бормай Симга¹ кетган эди. Докторхона деганда Сотиболдининг кўз олдига извоЖ ва оқ подшонинг сурати солинган 25 сўмлик пул келар эди.

Бемор оғирлашди. Сотиболди хўжайнининг олдига арзга борди. Бу боришдан муддаоси нима эканини аниқ билмас эди. Абдуғанибой унинг сўзини эшишиб кўп афсусланди, қўлидан келса ҳозир уни оёққа бостириб беришга тайёр эканини билдири, кейин сўради:

— Девонаи Баҳоваддинга ҳеч нарса кўтардингми?

Фавсул Аъзамга-чи?

Сотиболди кетди. Беморнинг олдидан жилмаслик ва шу билан бирга тирикчилик учун хонаки бир қасб

¹ Сим — ҳозирги Фарғона шаҳри.

қилишга мажбур бўлди, ҳар хил саватчалар тўқишини ўрганди. У эртадан кечгача офтобшувоқда гавронлар ичига кўмилиб сават тўқийди. Тўрт яшар қизчаси қўлига рўмолча олиб, онасининг юзини караҳт, нимжон, хира пашшалардан қўрийди. Ҳамма ёқ жим. Фақат пашша фингиллайди, бемор инқиллайди: ҳар замон йироқ-йироқдан гадой товуши эшитилади: «Ҳей дўст, шайдулло баноми олло, садақа радди бало, бақавли расули худо...»

Бир кечаси bemор жуда азоб тортиди. У ҳар ингрanganда Сотиболди чаккасига буров солинган кишидай талвасага тушарди. Кўшниси — бир кампирни чақирди. Кампир bemornинг тўзиган соchlарини тузатди, у ёқ-бу ёғини силади, сўнгра... ўтириб йиглади.

— Бегуноҳ гўдакнинг саҳарда қилган дуоси ижобат бўлади, уйғотинг қизингизни! — деди.

Бола анчагина уйқу ғашлиги билан йиглади, кейин отасининг ғазабидан, онасининг аҳволидан қўрқиб, кампир ўргатганча дуо қилди:

— Худоё аямди дайдига даво бейгин...

Бемор кундан-кун баттар, охири ўсал бўлди. «Кўнгилда армон бўлмасин» деб «чилёсин» ҳам қилдиришга тўғри келди. Сотиболди тўқиган саватчаларини улгуржи оладиган баққолдан йигирма танга қарз кўтарди. «Чилёсин»дан bemор тетик чиққандай бўлди; шу кечаси ҳатто қўзини очиб, қизчасини ёнига тортди ва пи-чирилади:

— Худо қизимнинг саҳарлари қилган дуосини даргоҳига қабул қилди. Дадаси, энди тузукман, қизимни саҳарлари уйғотманг.

Яна қўзини юмди, шу юмганича қайтиб очмади — саҳарга бориб узилди. Сотиболди қизчасини ўлик ёнидан олиб, бошқа ёққа ётқизаётганда қизча уйғонди ва қўзини очмасдан одатдагича дуо қилди:

— Худоё аямди дайдига даво бейгин...»¹

Ҳикояда Сотиболди оиласининг фожиаси — аёвсиз суратда реал гавдаланган. Бу тасвирга муаллиф ўзидан бирон гап, бирон сўз қўшмайди. Сотиболди, хотини, қизчаси, қўшни кампир, Абдуғанибой образларини тасвирларкан, уларнинг хатти-ҳаракатларини, ўй-хаёлларини, орзу-интилишларини кўрсатади, қўяди. Аммо ҳеч аралашмайди. Уларни қораламайди ҳам, оқламайди ҳам. Тасвирланган ҳаёт ҳақидаги холосасини чиқармайди

¹ А. Қаҳоғар. Асарлар. Т., 1967, I-том. 56—58-бетлар.

ҳам. Гүё узоқдан туриб, совуққонлик, бепарволик, лоқайдлик билан ҳикоядаги воқеа ва қаҳрамонларни кузатади. Гүё бу ғам, бу изтироб, бу кулфат, бу азоб, бу фожия унга тегишли эмасдай. Худди юрак деган нарсаси бўлмаган, меҳритош, боқибекам, раҳм-шафқати йўқ кишидек туралардан тамоман ўзлигини ажратади, четда туради.

Ана шу муҳим фазилат — санъат ҳаёт ва образларнинг табиий ривожини таъминлайди. Тасвирланаётган ҳаётнинг реал манзарасининг моҳиятини очади. Сотиболди оиласи фожиасининг даҳшатлилигини бутун борлигича кўрсатишга олиб келади.

Бироқ ҳикояни ўқиб бўлгач, асарнинг ҳар сатрида, ҳар заррасида ёзувчининг фикри, қалби, гоясининг муҳри борлигини сезамиз. «**Муаллиф кўринмасдан ўз асарининг ҳамма ерида худди олам худосидек ҳозири-иозир эканини**» (Г. Флобер) кўрамиз. Сотиболди хотинини докторга олиб бормай, кинначига ўқитар, кўрсатар, «Чилёсин» қилди ракан, унинг «қўли калта»лигидан, омилигидан муаллиф «кўринмасдан» изтироб чекади. Оғир азоблар тортаётган хотиннинг сал ўзига келгач, «худо қизимнинг саҳарлари қилган дуосини даргоҳига қабул қилди. Дадаси, энди тузукман, қизимни саҳарлари уйғотманг» деяркан, онанинг болага бўлган соғ мөхрининг кучини биз ҳам сезамиз; шу мөхрни ёқлаймиз. Эртадан кечгача меҳнат, қорин тўйғазиш ва роҳатланиш ўрнига тинка-мадорни қуритадиган, қарзга ботирадиган меҳнат ва гадойнинг «Ҳей дуст, шайдулло баноми худо...» нидосидан иборат ҳаётга, азобу уқубатдан, жаҳолатдан иборат турмушга нафратини сочади. Жаҳолат ботқофида ўсаётган, келажаги қоронғу бўлган ғунчанинг «Аямди дайдига даво бейгин...» дуосини, ноласини эшитарканмиз, муаллиф каби биз ҳам қайғуга чўмамиз. Ҳаётнинг аччиқ ва даҳшатли зарбаси — Сотиболди хотинининг ўлими ва ўлик ёнида ётган қизчанинг одатдаги дуосини эшитиб, ёзувчи сингари бизнинг қалбимиз ҳам ларзага келади... Муаллиф ва унинг қалб изтироблари бевосита кўзга ташланмаса ҳам, унинг асарнинг ҳамма ерида ҳозири нозирлиги, мөхрини босганлиги бизни муаллиф айтмоқчи бўлган хуносага, муаллиф образнинг (ўзганинг) қалбida яшаб, бошидан кечирган кечинмаларни бизда ҳам уйғонишига олиб келади.

Ҳикояда тасвирланган Сотиболди оиласининг оғир

ва даҳшатли фожиасининг «юқумлилигидан» китобхоннинг додлагиси келади. У бу оиласа ҳамдард кишига айланади. «Оҳ, бечоралар, не кунларни бошингиздан кечиргансизлар-а! Одам ҳам шунчалик хўрланадими-а! Сизларни азобга соглан, ўлимга маҳкум этган замонга лаънат! Одам учун «Осмон йироқ, ер қаттиқ» бўлган ҳаётга лаънат!... Ўтмишимиз қанчалик даҳшат-а! Озод Ватаннинг фарзанди бўлиш — катта баҳтим-ку, менинг!» деган мушоҳада ва хulosага келади.

Китобхоннинг бундай хulosага келиши ёзувчи айтмоқчи бўлган фикр, фоя билан ҳамоҳангdir. «Асли ёзувчилик, айтмоқчи бўлган фикрни ҳаммада баробар англата билишда, орага англашилмовчилик солмасликдадир».¹ Шундай бўлгач, юқоридаги ҳамоҳанглик ҳаётнинг объектив тасвири яратилганда, яъни ёзувчи ўзлигини ундан тамом ажратгандагина содир бўлади.

Реалист-санъаткор ўз асарларида ҳаётнинг муайян бир кўринишини тасвирлаш орқали китобхонда умуман ҳаёт ҳақида, одамлар ҳақида мушоҳада уйғотади. Шакл фояни ўзига сингдиргани каби, айтмоқчи бўлган фикрини, фоясини, фалсафасини асаддаги қаҳрамонларга, асар руҳига сингдириб юборади. Унинг вазифаси фақат ҳаётий масалани тўғри тасвирлаш ва унинг ечими қандай бўлиши мумкинлигини китобхонга ҳавола этишдадир.

А. Чехов Суворинга ёзган хатида буни алоҳида таъкидлайди. «Санъаткордан ўз ишига онгли муносабатни талаб қиларкансиз, сиз ҳақсиз, лекин, сиз икки тушунчани аралаштириб юбораяпсиз: масаланинг ечилиши ва масаланинг тўғри қўйилиши. Фақат иккинчиси санъаткор учун шарт. «Анна Каренина»да ҳам, «Евгений Онегин»да ҳам бирон бир масала ечилгани йўқ, лекин улар сизни бутунлай қониқтиради, чунки уларда ҳамма масалалар тўғри қўйилган».²

Кўринадики, муаллиф ҳеч вақт тасвирланган ҳаётий масалалар ҳақида ўз фикрини очиқ айтмайди, балки айтмоқчи бўлган фикрини китобхоннинг ўзи чиқаришига имкон яратади. Шу аснода китобхоннинг фаолиятини, мушоҳада қобилиятини фаоллаштиради.

Реализмнинг бу хусусиятини ҳатто буюк танқидчи В. Белинский ҳам дастлаб тушуниб етмаган. И. Гончаров «Белинский шахси ҳақида хотиралар» асарida ёзи-

¹ А. Қодирий. Кичик асарлар. Т., 187-бет.

² И. Гончаров. Собр. соч. в 8-ми томах. М., 1980, Т., 8, с. 85.

шича, «тиниб-тинчимас» танқидчи унга боқибекамлиги, лоқайдлiği учун ташланар ва «Сизга барибир, у аблажми, аҳмоқми, бадбашарами ёки олижаноб ва номусли нусхами ҳаммасини бир хил тасвирлайсиз: уларнинг ҳеч бирига на севгингиз бор, на нафратингиз!» — деб жуда кўп айтар экан. Лекин кунларнинг бирида қўлини ёзувчининг елкасига қўйиб, ўзининг бу масалага қараши нотўғрилигини бошқалар эшлишидан қўрқандай, шивирлаб дейди: «Бу — яхши, бу — керак, бу — санъаткорлик белгиси».

Демак, муаллифнинг тасвирланаётган воқеа ва қаҳрамонларга лоқайдлiği, бетарафлиги — ҳақиқий лоқайдлик, бетарафлик эмас, балки ўқувчининг фикрини фаоллаштирувчи, қалб зарбини ҳаракатга келтирувчи воситадир. Образлар воситасида ҳаётнинг холис (объектив) манзарасини тасвирлаш — ўз навбатида кераги бўлмаган (ўқувчи биладиган, аммо севмайдиган) патетикани, дидактикани қувиб чиқаради. Ҳаёт борлигича, ўз-ўзидан китобхон кўз ўнгидан намоён бўлаверади. Бу табиийлик китобхонда муаллиф фикрларига, гоясига тўлиқ ишончни юзага чиқаради.

Ҳаёт ва турмушни борлигича объектив тасвирланганда А. Чехов айтганидек, санъаткор ўз персонажларининг сульяси эмас, балки холис (бегараз) гувоҳи бўлиши керак. У шахсий тушунчаси, кечинмасини, ўйларини (ўзини) эмас, балки одамларга одамни бериши лозим. Ана шундагина, яъни фақат муаллифдан образ ажратилгандагина ёзувчининг ўзи яратганидан устунлиги кўзга ташланади.

Шу нуқтаи назардан «Ўткан кунлар» романига бир назар ташлайлик. А. Қодирий романда «мавзууни мозийдан, яқин ўтган кунлардан, тарихимизнинг энг қора кунлари бўлган кейинги «хон замонлари»дан белгиларкан, бу асарда унинг қарашлари, кечинмалари эмас, балки ўтган аср одамлари, уларнинг ақли, маънавияти гапиради. Уларнинг яхши ёки ёмон эканлигини таъкидлаш, оқлаш ёки қоралаш ёзувчининг иши эмас. Унинг вазифаси ўтган асрни бутун ҳақиқати билан жонлантиришdir.

Дарвоқе, ёзувчи яратган қаҳрамонлар ўзлигини топиб, мустақил, объектив яшар экан, улар ҳаёти давомида қандай ишлар қилмасин, қандай азобу, завқушавқларга берилмасин, бу ўша ҳаётнинг, ўша қаҳрамонлар характери мантиқининг ишидир. Бунга ёзувчи-

нинг ҳеч қандай дахли йўқ, у бу ҳаракатларни оқловчи ёки қораловчи прокурор ҳам эмас, балки, бўлаётган воқеа-ҳодисаларнинг холис яратувчиси (тасвириловчи-си)дир.

Шунинг учун ҳам «Ўткан кунлар»да деярли (агар китобхонлар билан ёзувчининг очиқ муносабатга киришганини ҳисобга олмасак) А. Қодирийнинг ўзини кўрмаймиз. У тасвирилаётган образлари, воқеалари ортига яширинади ва ўтган асрни худди кўз ўнгимизда юз берадиган ҳаётдек жонлантиради.

Мана, Отабек Кумушнинг заҳарланганлигини табибдан эшитди...

«— Заҳарни ким берди?

Нима дейишга ҳам ҳайрон табиб:

— Мен... Мен... Ўзингиз ўйлаб кўринг-чи... Мен дарров дори юборай, дарров ичиринг, тузукми? — деди.

— Билдим, билдим — деди бечора Отабек. — Зайнаб, Зайнаб, Зайнаб... Ифлос! Юборинг, юборинг, дарров юборинг!

Табиб кетди, Отабек телбаларча югуриб, Кумушнинг бошига келди, юзини очиб манглайини босди ва ўпди... Кумуш кўзини очиб куч билан сўл қўлини эрининг елкасига ташлади... Қўлида чақалоқ билан Ўзбек ойим кирди.

— Зайнабни чақир, Зайнабни!!!

Ўзбек ойим табиб сўзидан хабардор эди:

— Зайнаб...

Зайнаб югуриб уйга кирди. Туси мурдадек оқарган эди. Отабек Кумушни қўйиб ердаги аталани олди:

— Ич муни, ич, жалаб!

Зайнаб орқасига тисланди... Отабек косани унга отди... Зайнабнинг кийими атала билан беланди. Шунинг устига даҳлиздан Юсуфбек ҳожи кўринди.

— Кет, ифлос, кет! Талоқсан, талоқ!

«Талоқ» сўзини эшитган Кумушнинг кўзи ярқ этиб очилиб, яна юмилди... Ҳожи воқеани табибдан эшитган, шунинг учун ҳозирги фожеа саҳнасида ажабланиб турмади.

— Чиқ, Зайнаб, чиқ, — деди у ҳам. — Ларьнат сендек хотинга!

Зайнаб четланиб уйдан чиқди...¹

Ушбу лавҳадан ҳам кўринаяптики, А. Қодирий бу

¹ А. Қодирий. «Ўткан кунлар», Т., 1980, 359—380-бетлар.

фожиага ўзининг ҳеч қандай муносабатини очиқдан-очиқ билдирамайди. Фақат бир ерда ўзини тута билмайди ва Отабекнинг ҳолатига ачинганидан «Бечора Отабек» дейди. Ҳолбуки, унинг «бечора» эканлигини айтмаслиги, унинг бошига тушган алам ва кулфатларнинг тасвири орқали китобхоннинг унга бўлган ачиниши ҳиссини уйготиши керак. Китобхоннинг ўзи «Бечора Стабек» десин. Бу ҳиссиёт китобни ўқиш жараёнида туғилади, шундай экан, ёзувчининг буни таъкидлаши — китобнинг эмоционал таъсирига ҳеч нарса қўшмайди, балки китобхоннинг ижодий фаолиятини маълум даражада сусайтиради. Шу сабабли, А. Чехов ёзганидек, муаллиф қаҳрамонни севсин, лекин буни овоз чиқариб айтмасин. Ана шундагина, яъни кечинма қанчалик объектив бўлса, у шунчалик таъсирили чиқади. Кумушни оқлаб, Зайнабни қораламайди ҳам. Ёзучи учун азоб ҳам, укубат ҳам йўқ. У жуда лоқайдлик билан ўтмиш ҳаётда юз берәётган реал ҳодисанинг манзарасини яратади, холос. Ўзи кўзга ташланмайди, қаҳрамонлар ортига бекинади.

Лекин, бундан тасвирланган фожеага Қодирийнинг ҳеч қандай алоқаси йўқ, у азоб ҳиссини ҳам, фожеага муносабатни ҳам билмайди деган қатъий тушунчага келмаслик керак. Чунки, «Бадиий асарнинг бутунлигиоянинг бирлиги, қатнашувчи шахсларнинг ишланганилиги кабилардан иборат эмас, балки, бутун асарга сингдирилган муаллифнинг воқеликка бўлган ўз муносабатининг равшанлиги ва аниқлигидан иборатдир»¹.

У бу фожеанинг ижодкори экан, албатта, бу фожеанинг бутун даҳшатини, оғир азобини тасаввури орқали ўз бошидан кечирганлигини, ҳис қилганлигини биламиз. **Бироқ бу яширинган, фожеанинг ортидадир.**

А. Қодирий ҳар қандай тушунтиришлардан қочиб, бу вазифани қаҳрамонларнинг ўзига юклайди. Уларнинг бир-бирига муносабатларини ва кечинмаларини жонлантириш орқали бу фожеага ўзининг муносабатини яширин ифодалайди.

Отабек Кумушнинг Зайнаб томонидан заҳарланганилигини билгандан сўнг, телба ҳолатига тушади, кўзига ҳеч нарса кўринмайди. Фазаб ва нафрат отига минади. Ардоқлаб ўстирган онасига жуда ҳурмати, иззати баланд бўлишига қарамай, уни сенсирашга боради. Зайнаб

¹ Л. Толстой. Об искусстве и литературе. М., Т.1, стр. 233.

набни энг құпол сүзлар билан ҳақоратлайди. Ундан нафратланади ва унга «Талоқ» әйлон қиласы.

Юсуфбек ҳожи воқеани табибдан әшиттегі, у ажабланмай Зайнабни лаънатлайди. Кумуш ҳолатини күриб, үзини тұхтата олмасдан йиглайди.

Кумуш қанчалик азоб тортаёттан бұлмасин, Зайнабға әйлон қилинган «Талоқ»ни әшитаркан, күзи ярқ этиб очилади.

Туси мурдадек оқарған Зайнаб ҳақоратланар, за-харли аталага белана, «Талоқ»ни әшитар, ҳайдалар экан, бирор кишиға сүз қотишга қурби етмайди, үз ҳаракатларини баҳолай билмайди...

Ана шу қаҳрамонларнинг бир-бирига муносабаттарини ифодалаш орқали Зайнабға нисбатан үзидаги нафрат ҳиссини, Кумуш, Отабекка... нисбатан муҳаббат ҳиссини үйғотади. Бу айнан шундай тарзда китобхонга ҳам «юқади».

Демак, А. Қаҳдор ёзганидек, «Адабиёт бирон ижти-моий ҳодисаның яхши ёки ёмон эканлыгини фактлар, рақамлар билан исбот қилиб холоса чиқармайди, унның яхши ёки ёмон эканлыгини күрсатыб, кишиларда шу ҳодисага нисбатан муҳаббат ёки нафрат ҳисси туғдира-ди».

«Езувчи үзи ҳис қилмаган нарса гүгрисида ёзса, буни ўқиган ўқувчи ҳам ҳеч нарсаны ҳис қилолмайди. Демак, күйдириш учун қуйиш, ардоқлаш учун ардоқ-ланиш шарт...».

Юқоридаги фикрлардан шундай холосага келамиз:

Биринчидан, ёзувчи инсонларни «предметларни қандай бұлса, шундай, үз шахсидан ажратиб» (В. Белин-ский) күради. Тасвиrlанаёттан воқеадан, яратаеттан қаҳрамондан устун туриб фақат ҳаётни бутун ҳақиқати билан холис күрсатади.

Иккинчидан, ёзувчи тасвиrlанаёттан образларнинг, предметларнинг моҳиятига, «ичига кириб кетади ва уларнинг ҳаёти билан яшайди» (В. Белинский). Езувчи қаҳрамонларнинг қувонч ва изтиробларига шерик бўла-ди, улар ҳаётида юз берадиган кечинма ва ҳодисаларни үз қалбida, үз танасида содир бўлаёттан кечинма ва ҳодисадек қабул қиласы.

Ана шу қарама-қаршилик диалектик бир бутунлики-ни, яхлитликни ташкил этади.

Лекин, бунинг зарурий ва ҳамма реалистлар учун умумий бўлган қонунияти бор: **Реал ҳаётга ва үзи қай-**

та яратган оламга бўлган эҳтиросли, ички алоқаси, эстетик ўлчови, симпатия ва антипатияси яширинган бўлиши ва у асарнинг умумий руҳига сингиган бўлиши шарт. Китобхон фақат ҳаётнинг объектив тасвирини кўрсину, асарнинг умумий руҳига ёзувчи томонидан зарбланган, мухрланган ҳиссиятни ўзи бошидан кечирсин, фикрхўлосани ўзи чиқарсин.

Шунинг учун ҳам ёзувчини қўёшга қиёс қилишда ҳикмат бор. Қуёш ер юзидаги ўсимлик ва мавжудотларга бир хилда нурини, иссифини сочади. У ўсимликларни ҳар хил гуллари ва ҳосилига, шаклу шамойили ва мазмунига, заҳарлию фойдалилига қараб ажратмаганидек, ёзувчи одамларни ҳам миллати ва мансабига, яхшилиги ва ёмонлигига, шўх ва бузуқлигига, чиройли ва хунуклигига қараб ажратмайди. Уларнинг ўз ички қонуниятларига мос ривожини таъминлайди. Ёзувчи ҳам ўз қаҳрамонларини уларнинг ички қонуниятларига мос ғивожлантириш ва бунга қалб ҳароратини аямасдан сарфлаши керак. Қаҳрамонлар яратувчиси (ёзувчи)нинг кўрсатмаси асосида яшashi мумкин эмас, яратувчи (ёзувчи) ҳам, ўз навбатида, улардаги ички кучни уй-отиши ва уйғонган, ҳаракатга кирган ана шу кучнинг ўзига хос ривожига «тўсиқ» бўлмаслиги, аралашмаслиги лозим.

Асада ёзувчи кўринмасин, фақат ўзининг бевосита ҳаракати, табиий ривожи билан, ўзининг турли-туман ранглари билан ҳаёт кўринисин.

Ҳаёт объектив тасвирини топгандагина китобхон ёзувчини унутади, у асарни ўқиш жараёнида, тўғрироғи ўқиб бўлгач, образлар системасидан, танланган воқеалардан, воқеа-ҳодисаларнинг мантифидан, персонажлар иродада йўналишининг ёритилишидан ёзувчининг ўзлигини топади. Китобхон кўз ўнгida содир бўлаётган ҳаётни кўрар (ўқиш жараёнида шу ҳаётни тасаввурнида жонлантирап) экан, бу ҳаёт ҳақида ўзи хуласага келади, унда кўтарилган масалаларни ўзи ечади, персонажларга бўлган муносабатини ўзи тайин этади, асадаги яхши ёки ёмонни ўзи ажратади.

Агар асадаги ўз-ўзидан ғивожланувчи ҳаётга ёзувчи аралашса, ўз номидан тушунтиришлар бера бошласа, ички сабаб натижасида «мустақил» ҳаракат қилувчи бу ҳаётнинг китобхонга таъсири жуда пасайиб кетади. Чунки, биз образ хатти-ҳаракати, психологиясини кўрмасдан, муаллифнинг ўзини, унинг муносабатини кўра-

мизки, бу салбий реакция уйғотади, бадиий асар маълум даражада тарихий-адабий характердаги ҳужжатта ёки қаҳрамон ҳақидағи қуруқ ахборотта үшшаб қолади. Бундай пайтда ҳаёт ҳақида ҳаётнинг ўзи, персонаж ҳақида персонажнинг ўзи гапирмайди. У муайян даражада билимимизни бойитади, қаҳрамон хатти-ҳаракатлари ва ҳолатларини, тақдирини тушунишимизга ёрдам беради, лекин ҳеч қандай эстетик түйфу уйготмайди.

«Ўткан кунлар» романида Кумуш вафотидан сўнгги воқеаларни тасвирлаш борасида ёзувчи Зайнаб тақдири ҳақида ёзади:

«Кумушнинг яқинларигина эмас, балки фожеадан хабардор бўлган шаҳарнинг катта-кичиги Зайнабга бериладиган жазони эрта-кеч кутмоқда эдилар. Бироқ, фожеанинг ўнинчи кунларида Зайнабнинг жинни бўлиб, очиқ кўйи кўчада юрган хабари ва оғаси томонидан ушланиб кишангага солинган можароси эшитилди. Зайнабнинг жунуни қозилар ва табиблар тарафидан ҳам тасдиқ этилгач, унинг устидаги жазо қўтарилиди. Дарҳақиқат, ақлдан озиб кўчаларда очиқ кезиш ва кишишнинг ўзи ҳам Зайнаб учун кичкина жазо ҳисобланмас эди»¹.

Ушбу ахборот — ўз кундошини заҳарлаган Зайнабнинг тақдири, фожиаси ҳақида китобхонга маълумот берса-да, лекин, унинг асарга бўлган мафтункорлиги ҳиссини йўқча чиқаради. Муаллифнинг ўзи қаҳрамони тақдирига бевосита сингишиб кетмасдан, аралашуви («Дарҳақиқат, ақлдан озиб кўчаларда очиқ кезиш ва кишишнинг тусишининг ўзи ҳам Зайнаб учун кичкина жазо ҳисобланмас эди, — деб Зайнабга ўз муносабатини очиқ билдириши») Зайнабнинг ўз тақдири ҳақида ўзи гапиришига имкон бермаган. Натижада, китобхоннинг бу хабардан кўнгли тўлмайди, Зайнабга бўлган қизиқиши ҳисси қониқмайди.

Буни А. Қодирий ҳам сезади. Асарнинг «Хотима»сида Зайнаб ички дунёсининг, характер мантифининг ривожини тўғри белгилайди. Зайнаб ўз ҳаёти билан яшайди, ўзининг қандай ҳолга тушганлигини ўзи фош этади. А. Қодирий ўзини Зайнаб образидан тамоман ажратади, четдан, узокроқдан туриб разм солади. Образ ва муаллиф объективлашади:

«...Кеча ойдин, қабристон тип-тинч, узоқроқдан

¹ А. Қодирий. «Ўткан кунлар». Т., 1980. 361-бет.

куръон товуши эшитилар эди. Икки туп чинор бутоқларида қўниб ўтирган уч-тўртта бойқушлар, қабр ёнига тизланган Отабек ва юқори, қуи дўмбайган қабрлар бу тиловотга сомиъ каби эдилар. Куръон оятлари қабристон ичида оғир оҳангда оқар эди. Қабр ёнига тиз чўккан йигитнинг кўз ёшлари ҳам қуръон оятларига қўшилиб оқар эди. Бирор соатдан кейин тиловот тўхталди. Отабек ҳолсизланиб оёқ узра турди ва орқасидаги ярим ялангоч кўриб бир неча қадам қабр томонга тисланди...

Кўлага ялингансимон унга яқин юриб келди...

— Ким бу?

— Мен Кумуш!..

Отабек товуш эгасини таниди. Бу мажнуна Зайнаб эди.

— Кет мундан!

— Мен Кумуш!.. — деди яна Зайнаб, аммо кетмай иложи қолмади. Зероки, дунёдаги энг яқин кишиси «кет!» амрини берган эди. Зайнаб орқасига қарай-қарай Отабекдан узоқлашди. Отабек қайтиб унга қарамади, қабр ёнига тиз чўкди...¹

Ушбу мисолдан ва юқоридаги фикрларимиздан аниқ бўляяптики, муаллифнинг тасвирланган ҳаётга, образга «зўрлик» қилиши — аралашуви реалистик санъатга зиён етказади. Шундай экан, кўпгина асарларда («Евгений Онегин», «Зайнаб ва Омон», «Бўрондан кучли», «Кудратли тўлқин» ва ш.к.) муаллифларнинг бевосита аралашувига дуч келамиз. Лекин, биз бу асардаги «муаллиф чекинишларини» — лирик чекинишларни кўплаб учратасак ҳам, уларнинг бадиий қудрати, эмоционал таъсири олдида лол қоламиз. Сабаби нимада? Сабаби шундаки, бу асарларда персонажлар фақат биз учун эмас, балки муаллиф учун ҳам объективлаштирилганидадир. Бу асарларнинг муаллифлари персонажларнинг ўз ҳаёти билан ящашига, ўз ички кучлари или ривожланишига аралашмаганларидадир. Уларнинг конкрет образга эмас, балки образлар системасига, асарнинг умумий руҳига аралашуви — ҳаётнинг кўпқиррали ҳаққоний манзарасининг моҳиятини фалсафий, публицистик, лирик жўшқинлик билан тўликроқ гавдалантиришга имкон беради.

Ўзбек романчилигига, айниқса, Ш. Рашидов ижо-

¹ А. Қодирӣ. «Ўткан кунлар», Т., 1980, 363—364-бетлар.

дида, унинг «Кудратли тўлқин» романида бу ҳодиса ўзининг яққол ифодасини топган.

«Кудратли тўлқин»даги муаллиф чекинишларида биз халқ ва раҳбариятнинг бирлиги ҳақида, дўстлик ва севгининг олижаноб қудрати тўғрисида, она Ватан, меҳнатнинг поэзияси борасида ҳаётий-фалсафий мушоҳадаларни, ҳиссият ва фикрга тұлиқ изоҳномаларни ўқиймиз, ундан таъсирланамиз. Бу романдаги образлар системасига табиий сингдириб юборилганки, муаллиф ўз қаҳрамонига муҳаббатини изҳор қиласидими, унинг билан ҳаётий масалалар устида тортишадими, қолоқлини қоралаб, эскиликни фош этадими, меҳнат романтикасини улуғлайдими — ҳамма ўринда ҳам онгли равишда алоҳида, ўз номидан беради. Муаллифнинг субъективизми — у ёки бу масалага унинг илғор шахсий қарашлари қаҳрамон қарашлари билан ҳамоҳанглик касб этиб, асарнинг гоясини теранлаштиради.

«Пўлат! Мана ҳозир Баҳор тўғрисида ўйлаб турибсан. Уни сен баҳор авжиди бўлган пайтда майсазорда, қалин-қалин очилиб, ер юзини қоплаган лолалар ичиди кўраяпсан. Унинг оқ шойи кўйлаги кўклам шабадасида ҳилпирайди. Қоп-қора соchlари нур билан товланиди. Нима учун бу воқеаларни эсингга олганда, юрагинг тез-тез уради? Ахир, сен баҳор билан бирга ана шу майсазорда лола терганингда, юрагинг бу қадар урмаган эди-ку! Эҳтимол, бунга айрилиқ сабабдир? Эҳтимол, кўз олдингда Баҳор гавдалангач, нима бўлса ҳам у билан кўришгинг келгандир. Унинг елкаларидан қучоқлаб бағрингга босиб, индамай кўзларига термилган ҳолда тургинг келгандирки, шунинг ўзи дилингда битмас-туганмас севинч-қувонч уйготди.

Шундай экан, нима учун энди Баҳорни чин дилдан севганингга икрор бўлишдан қўрқасан? Ёки бу билан чин дўстлигимиз тамом бўлади деб ўйлайсанми? Ахир, севгининг ўзи ҳам дўстлик эмасми? Жаҳон қадар кенг, қуёш қадар ёрқин, ҳар қандай қийинчиликка бардош берадиган ва ҳар бирингизга меҳрибонлик, ғамхўрлик бағишлийдиган асл дўстлик—қайноқ дил севфиси эмасми? Бу дўстликнинг ўзига хос хусусияти бор,— севишган қиз ёки йигитнинг кўзига бир назар ташлаб, баҳтиёр бўласан! Сен Пўлат, қизнинг қўлинини қўлинингда ушлаб турсанг, яшаш ширинроқ туюлади. Агар у рўмолчасини ҳилпиратиб, сени ишга кузатса, ишинг унумли бўлади, тоғларни ағдариб, дарёларни бўғасан,

жаҳонда сендан кучли киши бўлмайди, севимли қизингдан чиройли қиз бўлмайди!.. Бироқ, бу йўлдан адашма, гар туртиниб йиқиладиган бўлсанг, шармандайишармисор бўласан. Киши учун дунёда севгига ва севимлининг дўстлигига номуносиб бўлишдан бошқа зўр мусибат йўқ.

Бундай дўстлик учун сўз ҳам ноўриндир. Чунки, бу икки ҳаётнинг бир-бирига ажойиб қуйилишидир. Ҳозир чўнтағингда ўз ҳарорати билан юрагингни иситган Баҳорнинг хати турибди. Гарчи бу хатни ўқиб кўргмаган бўлсанг ҳам, юрагинг ёрқин ва қувончлидир. Баҳорнинг шу саломи билан сен қайтадан туғилдингу, ҳаётнинг яна тўла, яна ёруғ бўлгандай сезилади. Энди сен бундан ҳам огир, бундан ҳам катта меҳнат ва жасорат истайсан!

Мана, Пўлат, энди сизларнинг оддий дўстлигиниз, ўзаро муносабатларингиз кўп вақтлар дўстликтан нарига ўтмаган бўлса ҳам, энди чин севгининг нозиклигини ва нуронийлигини касб этдики, эҳтимол ўзинг ҳам ишонгинг келмас.

Севги одамларга турли-туман бўлиб келади. Худди сизларниридай ҳам бўлади-ю, болаликда пайдо бўлган дўстликтан ҳам келиб чиқади. Сизлар ёшлиқданоқ ажralmas дуст эдингизлар. Мана энди бу ажойиб камтарин дўстлик гули бошқа ҳис-туйгуларнинг қип-қизил фунчасини чиқарди. Пўлат, ҳозиргача сен Баҳорни севишингни билмай туриб, рашк қила бошладинг. Қиз билан учрашувинг табиий бир ҳол эди ва сизлар ҳам шунга кўнишиб қолган эдинглар. Энди-чи? Энди бундай учрашув узоқ кутилган байрамдир. Чунки, неча ойлар ўтдики, бир-бирингиз билан қўришганингиз йўқ. Шунинг учун ҳам Пўлат, Баҳорсиз яшашининг нақадар қийинлигини ҳар куни ҳис қилиб турибсан.

Агар сен айни пайтда, оддий синфдош дўстингдан хат олганингда, оҳистагина қўл юбориб, чўнтағингда турган муқаддас уч бурчак хатни ушлаб-ушлаб ором олармидинг? Эҳтимол, бу хатда Баҳор бармоқларининг иссиқ ҳарорати сақлангандир.

Энди сен меҳмонларнинг тезроқ тарқалиб кетишлини тоқатсизлик билан кутмоқдасан. Уларни кузатиб қўйгач, шошилинч равишида Қосимовга, Саодатга ва ойингга ҳам хайрли кеч тилайсану, ҳовлиниг пастидаги узумзорга кириб, гойиб бўласан. Кўм-кўк ўтлар устида ўтириб, шошилинч равишида уч бурчак хатни

очасан. Бу хатнинг ҳар бир сатри сенга сирли бўлиб кўринади-ю, гарчи, Баҳор бу хатда оддий гапларниги на ёзган бўлса ҳам, буларнинг ҳаммаси сенга узумзорлар ичидаги билан бирга икковингиз учун ҳам бир хилда муҳим ва маҳфий бўлган ҳис-туйғулар тўғрисида шивирлашгандек бўлади. Кўзларинг шундай деб турибди...»¹

Ушбу лирик чекиниш орқали ёзувчи Ш. Рашидов, биринчидан, тенгсиз қувонч ва баҳт келтирувчи дўстликни улуғласа, севгини мадҳ этса, иккинчидан, бевосита асарнинг бош қаҳрамони Пўлатга мурожаат қўлади: унга бу дўстликнинг, севгининг моҳиятини тушунтиради, бу туйғуларни асрани лозимлигини таъкидтайди, биринчи бор жудолик азобини тортаётган Пўлатнинг Баҳордан келган хат баҳонасида қалб тебранишларини, юрак уришларини нозик таҳлил этади.

Бундай таъсирли лирик чекинишларни романда кўплаб учратиш мумкин (ўн икки ўринда). Муаллиф Баҳор, Зеби, Анвар (асосан Пўлатга) каби фақат ижобий образларга бевосита мурожаат этади. Уларнинг фаголияти ва руҳиятида юз берастган ўзгаришларнинг моҳиятини очади, тушунтиради.

Бироқ, ёзувчи юқоридаги мисолимизда кўринганидек ҳеч вақт Пўлат, Баҳор, Зеби, Анвар образларининг ички ривожига, ҳар бирининг «алоҳида, ўзида яширинган дунё» (В. Белинский)сига дахл қилмайди. Бу қаҳрамонларнинг ҳар бири ўзи ҳақида ўзи гапиради, ҳар бирининг ҳаракатида характер ирова йўналишидан келиб чиқувчи ҳаётйлик, табиийлик барқ уради.

Танқидчи С. Мамажонов ёзганидек, «...бундай лирик чекинишларнинг ўрин олиш сабабларидан бири бизда китобхон билан ёзувчи ўртасида шаклланиб етган foявий, маънавий, руҳий яқинлик, мақсад — идеал бирлигидир...». Шундай экан, асарнинг умумий мазмунига, образлар системасига сингиб кетган бундай қудратли лирик чекинишларни — зарур фикр-мулоҳазаларни ифодалашнинг бундай шаклини реализм кўллаб-куватлайди.

Шу ўринда яна бир алоҳида хусусиятни таъкидлаш лозимга ўхшайди. Муаллифнинг персонажига субъектив муносабатини ҳамма вақт рад қилиш керакми?

¹ Ш. Рашидов. Қудратли тўлқин. Т., 1964, 138—140-бетлар.

Муаллиф образда «ўзини» берса, образда муаллиф қараашлари, фикрлари, симпатияси ва антипатияси маълум даражада кўзга ташланса, демак, асарнинг гоявийбадиий таъсир кучи пасаядими? Бу нарса юқорида таъкидлаганимиз реализм қонуниятига зид эмасми?

Танқидчи С. Мамажонов «Лирик олам, эпик қўлам» китобида ёзувчи Ш. Рашидовнинг воқеликни бадиий тадқиқ этиш усули—услубини текширас экан, ҳақли равища ёзди:

«...Голиблар», «Бўрондан кучли» асарларида муаллиф позицияси билан ижобий қаҳрамонлар позицияси, улар овози жипс қўшилиб кетган. Муаллиф овозида халқнинг фикри, нуқтаи назари, персонажлар нутқида муаллиф овози доим иштирок этади...

Ижобий қаҳрамонлар билан муаллиф нутқининг яқинлигининг илдизи уларнинг ҳаётга қарашидаги ягоналик бир хил позицияда туришларига бориб туташади. Ижобий қаҳрамонлар нутқининг муаллиф нутқи каби кўтаринки, ҳатто шоирона оҳангда бўлишнинг асоси ҳам худди шу ерда бўлса керак...»¹

Ушбу мисолдан ҳам кўринаяптики, муаллиф — Ш. Рашидов ўз сўзларини қаҳрамонга юклайди, ўзи қаҳрамон қиёфасига тўлиқ сингимайди. Худди шундай ҳолатни Д. Фонвизин, В. Гюго, Н. Чернишевский, М. Лермонтовнинг баъзи асарларида ҳам кўришимиз мумкин. Жумладан, Лермонтовнинг «Замонамиз қаҳрамони» асарини таҳлил қилиб, В. Белинский «у (муаллиф) томонидан тасвирланган характер... шунчалик унга яқинки, ундан ўзини ажратишга ва объективлаштиришга куч топа» олмаганигини таъкидлайди. Бунинг сабаблари нимада? Сабаби — муаллиф ва персонажнинг «ҳаётга қараашдаги яқинлиги» (С. Мамажонов)дир. Муаллиф фикри, сўзи, хатти-ҳаракатининг персонажички дунёси мазмунига тўлиқ мослигидир.

Бу хил тасвир асар яратилган давр китобхонлари учун қанчалик аҳамиятли ва таъсири беқиёс бўлмасин, ёзувчи қаҳрамон «киндиги»ни кесгач, яъни ўзини персонаждан ажратгач, яна «киндиқ»ни улаш — ўзини персонажда бериш, албатта, асарнинг гоявийбадиий кучига, китобхоннинг ижодига маълум даражада салбий таъсир кўрсатади. Ёзувчининг қалами ўрнига (юқоридаги мисолга диққат қилинг!) журналист-

¹ С. Мамажонов. Лирик олам, эпик қўлам. Т., 1970, 317—318-бетлар.

нинг қалами ишга тушади. Тасвир ўрнини публицистик оҳанг эгаллайди... Шу сабабдан ёзувчига китобхон А. Горькийнинг қўйидаги сўzlари билан мурожаат қилмоққа даъват ҳис этади:

«Сиз, ҳар ҳолда унинг (персонажнинг — Х.У.) кўзи билан қарашингиз керак. Унга нима лозим бўлса, шуни орзу этиш ва тасаввур қилиш учун тўла эркинлик беринг. Агар сиз ўз қараашларингизни унинг қулоғига қўйиб турсангиз, унда персонаж эмас, балки сиз гавдланасиз».

Хуллас, муаллиф ҳаётни, персонажни тўлиқ объективлаштириш, улардан устун бўлиши шарт. У ёки бу масала бўйича зарур фикрларни айтмасликнинг иложи бўлмаса ва бу фикрларни образга «юклатишга» имкон бўлмаса (образни объективлаштиришга монелик қиласа) лирик чекинишлар орқали очиқчасига, муаллиф (ўз) номидан ифодалаш шакли маъқулдир. **Гарчи бундай шаклни реалистик метод қўллаб-кувватласа-да, у умумий қоида бўла олмайди.** Унинг учун ҳаётни аниқ ва холис тасвирлаш ва тасвирланган воқеликка бўлган ўз муносабатини яширин ифодалаш — умумий қоида бўлиб қолаверади.

ХАЛҚЧИЛЛИК. Русларнинг «тиниб-тинчимас» тандидчиси В. Белинский айтганидек, «агар халқчиллик деганда бирор ҳалқ, бирор мамлакат одамларининг хулқ-авторини, урф-одатларини ва характеристи хусусиятларини ҳаққоний тасвирлашни тушунадиган бўлсак, **халқчиллик** чинакам бадиий асарнинг зарур шартидир».¹ Айни пайтда, унингча, адабиёт ҳалқ фикрини бир марказга йигади ва уни яна ҳалқقا қайтариб беради.

Демак, ҳалқ ҳаёти ва турмушини, орзу-умидлари ва манфаатларини тасвирлаш ва ҳалқни комиллик руҳида тарбиялашга қодирлик адабиёт ва санъатнинг халқчиллиги деб аталади.

Адабиёт ва санъатнинг халқчиллиги (демакки, унинг бадиийлигини белгиловчи муҳим хислати) бир неча омилларга боғлиқ; улар:

Биринчидан, ҳалқ учун аҳамиятли бўлган ҳаётий масалаларни ўртага қўйиш, ҳалқ ҳаётининг энг муҳим томонларини акс эттириш, ҳалқнинг порлоқ орзу-умидларини акслантириш;

¹ В. Белинский. Адабий орзулар. Т., 1997, 250-бет.

Иккинчидан, тасвирланган ҳар бир воқеа-ҳодисага, масалага халқ манфаатлари ва орзу-умидлари нуқтаи назаридан ёндошиб, умуминсоний дунёқарааш ва гоявийликни намойиш этиш;

Учинчидан, кенг халқ оммаси учун тушунарли миллий тил ва услубдан, ранг-баранг жанр ва шакллардан фойдаланиш;

Тўртингчидан, «бегона» халқлар ҳаётини объектив ва эъзозлаб тасвирлаш, ўз ижодини халқ оғзаки ижоди билан чамбарчас боғлаш;

Бешингчидан, халқнинг туйгуларини бирлаштириши, эътиқодини мустаҳкамлаши, уни янада юқорироқ (олижаноб, пок, ҳалол қилиб) кўтариш ва халқ томонидан севилиш каби муҳим фазилатлар билан, бу фазилатларнинг яхлитлашган ҳолдаги қудрати или белгиланади.

Миллийлик ва умуминсонийлик. Адабиётнинг халқчиллиги унинг миллийлигини тақозо қиласди. Чунки халқ ҳаёти билан мустаҳкам боғланган адабиёт ҳар бир халқнинг ўзига хос урф-одатларини, руҳиятини, фикрлаш, яшаш тарзини акслантириши табиийдир-ки, бу — адабиётнинг миллийлигини вужудга келтиради. Ва бу миллийлик шу адабиётни яратган даҳоларнинг ижодларида, уларнинг энг яхши асарларда яққол кўзга ташланади. Жумладан, Навоий, Бобур, Машраб, Яссавий, Ф. Фулом, Ҳ. Олимжон, Э. Воҳидовлар бутун дунёда севилиб ўқиласди. Чунки уларнинг асарларида ўзбек халқнинг «ўзлиги», характеристери чуқур ифодаланганидан ташқари, уларда инсоният учун, инсон учун зарур бўлган муммомлар тасвир ва таҳлил қилинганидан умуминсоний хислат касб этади.

«Бадиий ижод шундай дарахтки, шохида умуминсоний мевалар етилади, илдизи эса миллий заминда ётади», — деганида ёзувчи Ўткир Ҳошимов тамомила ҳақдир.

Шу нуқтаи назардан шеъриятимиз маликаси Зулфия ҳаёти ва ижодига бир нигоҳ ташлайлик.

Зулфия 29 ёшида бир қизу бир ўғил билан бева қолди. Умрининг охиригача Ҳамид Олимжон севгисига «садик бўлмоқ ўзи саодат» деб тушунди.

Тунлар тушимдасан, кундуз ёнимда,

Мен ҳаёт эканман, ҳаётсан сен ҳам, — дея куйлади. Вафоси, садоқати билан ўзбек **Онаси, ўзбек аёлининг** **Вафоси** рамзи сифатида бизнинг қалбимизни иситди,

ҳақиқий ва буюк мұхаббат құдрати ҳақида жонли дарс берди, ибрат намунасини күрсатди.

Камалак етти рангда етмиш хил жилоланиб, барчани мафтун қылғанидек, Зулфия «тонгнинг ўзидай рост ва ёрқин ҳақиқатга» йўғрилган поэзияси билан («Кечир, қолдим фафлатда!», «Баҳор келди сени сўроқлаб», «Не балога этдинг мубтало» ва ш.к.) садоқат ва вафодорлик туйғусини — инсонийликнинг бош мезони даражасига кўтардики, усиз ҳақиқий комил инсонни тасаввур этиш ҳам мумкин эмас. Бугунги ҳәётимизда қўйди-чиқдилар, сарсон-саргардан етимлар, ҳавойи истаклар деб ор-номусдан воз кечган, «игнага ўтирган» аёллар, ҳәёсиз, ибосиз жувонлар жабрини тортаётган жаҳонда Зулфиянинг ҳаяжонли, ўтли чақирифи, жасоратга тўлиқ қўшиги — ҳар бир қалбда (фаранг, олмон, инглиз, араб, форс қалбидаги ҳам) жарангламоқда. Вафога, садоқатга, ҳурмат ва эъзозга, назокат ва латофатга, ор-номус ва инсонийликка чақираётиди. Шу билан одамдек яшашимизга, комил инсон ва соғлом авлод учун курашишимизга фаол ёрдам берапти. Бу Зулфия ижодининг умумбашарийлигидан, умрбоқийлигидан, чуқур замонавийлигидан, бутун инсоният учун зарурат эканлигидан далолат беради.

Демак, санъаткор ижодида, унинг чинакам асарида миллийлик ва умуминсонийлик бир вужуддан озиқлашади. Миллийлик қанчалик чуқур ва ёрқин ифодаланса, унда умуминсоний хислатлар шунчалик улуғ ва таъсирчан құдрат касб этади; миллион-миллионларни инсонийлик йўлида ҳамкорликка чорлайди, қалблар ва онгларни бирлаштириб эзгуликка, комилликка етаклади.

Бунинг учун умуминсоний қадриятлар ҳар бир миллатнинг маънавий мулкига айланиши зарур. XXI асрда ҳалқлар ўртасидаги низо ва зидлашувлар бўлмаслиги учун ҳалқлар ўртасида уларни бирлаштирувчи аҳиллик ва муросани юзага келтириш, «Улуғ мақсадлар йўлида йўлдошлик қилишга кўндириш» (И. А. Каримов) — адабиётнинг умуминсоний вазифасидир.

Ёзувчининг дунёқараши, маънавияти ҳәёт оқими билан бирга ўсиб, ўзгариб, ривожланиб борар экан, айни чоғда, у ёзувчининг ижодий эволюциясини ҳам белгилаб беради. Ёзувчи маънавияти ва салоҳияти қанчалик бой бўлса, унинг бадиий олами ҳам foявий жиҳатдан шу қадар тиник ва равшан, таъсирчан ва юқув-

chan бўлади. Агар ёзувчининг foявий (фикр) доираси, маънавияти тор ёхуд заиф, биқиқ ёхуд ўртамиёна бўлса, у қанчалик талантли бўлмасин (талант тинимсиз меҳнат билан озиқлантирилмаган бўлса), бу ҳол унинг ижодига салбий таъсир кўрсатади: хом-хатала ва заиф, чалажон ва рамақијон асарлар туғилаверади...

Хуллас, foявийлик адабиётнинг моҳияти, муҳим сифат белгисидир.

Ушбу бўлимни яқунлаб, шундай **хулосалар** қилса бўлади:

1. «Бирламчи табиат» — Аллоҳdir, Аллоҳ яратган ҳаётдир. «Иккиламчи табиат» «бирламчи табиат» асосида яратилган нарса, ҳодиса, жараёнлар ва санъат дунёсидир. Маънавият — кўнгил кўзгуси, Аллоҳ берган нурдир; кўнгилни сайқаллаштириш йўл-йўриғидир.

2. Санъат образлар орқали фикрлашдир. Санъатнинг ҳам жони, ҳам қони бадиийликдир.

3. Адабиёт сўз санъатидир. Унинг билиш обьекти ҳаёт, предмети — инсон, вазифаси инсон туйғулари тарбиясидир.

4. Образлилик — қайта яратилаётган ҳаётни тасаввур қиласидаги даражадаги жонли ва завқли тасвиридир.

Образ — тўқима ёрдамида яратилган ва эстетик таъсирдорликка эга бўлган инсон ҳаётининг умумлашма ва аниқ манзарасидир.

5. Ёзувчининг таланти — бадиий асарда ҳаётни қайта тиклаш, жонли яратиш қобилиятидир. Илҳом — қийин муаммоларни осонлик билан хузурли ечишдир. Қайта яратилган бадиий оламнинг бетакрорлигини таъминлаш, ҳиссий таъсирдорлигига эришиш — маҳоратдир.

6. Foявийлик — бадиий асар қимматини ўлчовчи бош мезонлардандир. Абдулла Қаҳҳор таъбири билан айтганда, унинг атомдан қудратлироқ кучини ўтин ёришга сарф қилишга ҳожат йўқ.

Иккинчи бўлим

БАДИЙ АСАР

I. Мазмун ва шакл

Таянч сўз ва иборалар: Бадиий асар бетакрор олам. Мазмун ва шаклнинг узвий бирлиги. Характер — ҳам мазмун, ҳам шакл ҳодисаси. Пафос. Бадиий пафос. «Ўткан кунлар» ҳақиқати.

Бадиий асар «абадиятни безайдиган, умри боқий ва мағзи тўқ гўзаллик» (А. Қаҳҳор) экан, демак, ҳаёт адабиётга сараланиб, тозаланиб, покланиб — бадиийлаштириб (бадиий ҳақиқатга айлантирилиб) киритилди; «яъни у қайта бичилади, қайта тикилади» ва бўлиши мумкин бўлган янги воқелик (В. Белинский) яратилади. Бу воқелик мазмуни характерлар олами орқали ҳаракатда ва ривожда ифода этилади. Бу ҳаёт тўлалиги ва боқийлиги билан китобхонда кучли ҳаяжон ва завқ уйғотади.

Бадиий асар ҳаётнинг ўзига хос яхлит, мустақил бир парчасини қайтадан жонлантиаркан, жуда кўплаб бетакрор ва мураккаб жараёнларни бошидан кечиради, айни пайтда, ҳар бири якка олам (асар) бўлиб дунёга келади.

Мавзу ва ғоя, образ ва характер, сюжет ва композиция, бадиий тил ва услуб, тур ва жанрлар каби воситалар, асарнинг мукаммаллигини, бадиийлигини таъминлашга хизмат қиласидилар. Улар ҳар бир асарда бетакрор тарзда уйғулашадилар ва жонли бир «вужуд»ни — бадииятнинг аниқ бир фарзандини дунёга келтирадилар. Бу жараённи қисмларга бўлиб текшириш гоятда қизиқарли ва долзарбдир.

Демак, адабиёт ҳақидаги тушунча ва мушоҳадалар тўлиқ бўлиши учун аниқ бадиий асарнинг таҳлилини заруратга айлантиради; ана шу асос бадиийликнинг қонуниятларини янада равшанлаштиради, бадиий ижод-

нинг биз ҳозиргача эътибор қилмаган мағизли хусусиятларини аёнлаштиради.

Буларнинг бирламчиси бадий асар (дунёдаги ҳамма нарса)да ташқи ва ички ҳаётнинг мавжудлиги ва улар ўртасидаги вобасталикнинг узвий алоқасидир.

«Адабий асарнинг жони — унинг мазмуни, лекин бу жоннинг жон бўлиши учун жасад ҳам керак. Жонни жасадсиз тасаввур қилиш мумкин эмас» (А. Қаҳҳор).

Бадий асарнинг бош мазмуни ёзувчи ифода қилмоқчи бўлган фоя бўлса, ана шу фоя бадий тарзда образларда ўз аксини топади. Образлилик ҳаётни акс эттиришнинг усулидир. Образлилик (образ) характер тасвири орқали воқе бўлади. **Характер (образ) бадий асарда мавзу ва фоя, сюжет ва композиция, бадий тил каби воситалар орқали яратилар экан, бу унсурларнинг ҳаммаси ҳам шакл саналади.** Демак, бадий асар мазмунининг «либоси», қобиги, жасади шаклдир.

Мазмун шаклга нисбатан доимо етакчилик қиласи (сифат белгиси унда жойлашади), доимо ўзига муносиб қобигни яратади. Жумладан, турлар ва жанрлар (эпос, лирика, драма; роман, газал, трагедия каби) ўз мазмун кўлами, мазмуннинг кенг ёки тор ифода этиш даражасига кўра фарқланади.

«Ижодий жараён аслида ҳаққоний, яъни салмоқдор мазмунни ёрқин ифода этишга қодир шаклни ахтаришдан иборат» (И. Султон), уни топиш, кашф этиш доимо қийин кечади.

Абдулла Қодирий «Ўткан кунлар» романига тегишли манбаларни тўплаган, қули қаламга хийла келиб қолганига қарамай, гарб романчилиги асосида каттароқ бир асар яратиш ҳаваси бўлса-да, тинчлик бермаётган тарихий воқеаларни бир ипга тизишни, қандай бошлашни аниқ тасаввур қила олмайди. Кунлардан бирида отасининг қадрдонларидан бири меҳмон бўлиб келади. Меҳмондан отаси «Андижондаги хотинингиздан неча болангиз бор?» — деб сўрайди. Уларнинг суҳбатидан ёзувчи бу меҳмон тошкентлик бўлиб уйлижойли, бола-чақали киши эканлигини, ёшлигига савдо важи билан Андижонда узоқ вақт истиқомат қилганини, уйланганини, бола-чақали бўлганини ва кексайгач, ўз шахрига қайтиб келганини англайди.

Меҳмоннинг ана шу содда тарихи «Ўткан кунлар» романининг шаклини чизиб беради. Ижодий режа ўз шаклу тамойилини топгандан сўнг роман воқеалари

аста-секин ривожлана бошлаган, 5—6 ой ичидаги ижодий изланишлар натижасида роман биз билган «Үткан кунлар» шаклига келган ва у туғилган.

«Үткан кунлар» романида тасвиirlанган XIX асрнинг иккинчи ярми — тарихимизнинг энг кирлик, қора кунлари — гояси Отабек, Кумуш, Юсуфбек ҳожи, Ҳомид, Зайнаб, Үзбек ойим, Ҳасанали, Мирзакарим қутидор каби образларнинг умумлаштирилган тасвири орқали тирилади. Уларнинг ўзаро муносабатларидан сюжет яратилади, воқеалар характер мантиғига, характер воқеалар мантиғига мос ҳаракатланади... Ана шу хусусиятта кўра характер (образ) алоҳида қудратга эга бўлади, яъни у ғояга нисбатан шакл ва айни пайтда, бошқа унсурлар (сюжет, тил, композиция ва ш.к.)га нисбатан мазмун (адабий асарнинг бош вазифаси характер яратиш) ҳодисаси ҳамдир. Характер бир вақтнинг ўзида ҳам шаклланади, ҳам мазмунлашади: у шаклдан мазмунга ўтади, мазмундан шаклга кўчади. Мазмун ва шаклни жон ва жасад каби яхлитлаштиради, тирилтиради. Бири-бирисиз яшай олмаслигини яққол намоён этади.

Шунинг учун ҳам назариётчи аллома Иzzат Отахонович Султонов ҳақлар: «Бадиий асар гўё бир жонли организмдир: организм жонсиз яшай олмаганидек, «жон» ҳам танасиз ўзини намоён қилолмайди. Жонли организмнинг энг кичик ҳужайраси ҳам унда айланиб турган илиқ қон туфайли яшагани каби, кичик қисми ҳам унга ҳаёт бахш этиб турган мазмун туфайли яшайди ва шу мазмуннинг ташқи ифодаси, нишонаси бўлиб хизмат қилади».

Ҳар қандай етук асар ёзувчи қалбининг қудратидан, зўр ҳаяжони ва кучли эҳтиросидан, бутун салоҳиятининг қудратидан яратилади. Ёзувчи — санъаткор қалби — мўъжизакор хазина саналади.

Шу сабаб, ҳар қандай хазинага кириш учун, даставвал, унинг эшигини очадиган қалитни топиш лозим. Адабиётшунослик ва адабий танқидчиларнинг фикрига кўра, ҳар қандай бадиий хазинани очувчи—ёзувчи шахсини ва асарларини тушуниш, кашф этиш, баҳолаш қалити пафосдир. «Пафоссиз шоирни қўлга қалам олишга нима мажбур этганини ва унга баъзан анча катта асарни бошлаш ва охирига етказиш учун куч ва имконият берган нарса нима эканини тушуниш мумкин эмас», — дейди В. Белинский. У давом этиб, шун-

дай тушунтиради: «Пафосда шоир худди жонли, гўзал мавжудотга кўнгил бергандек, фояга мафтун бўлган зот сифатида намоён бўлади, бу мавжудот ана шу гоя билан эҳтиросли равишда тўлиб тошган бўлади ва санъаткор бу фояни онги, идроки билан, фақат бир ҳис билан эмас ва ўз руҳининг бирорта қобилияти билан эмас, балки ўз маънавий ҳаётининг бутун тўлалиги ва яхлитлиги билан мушоҳада этади. «Пафос» деганда ҳам эҳтирос кўзда тутилади, шу билан бирга бошқа ҳар қандай эҳтирос каби инсоннинг тўлқинланиши, бутун асаб системасининг ларзага келиши билан боғлиқ бўлган эҳтирос кўзда тутилади; аммо пафос доимо инсон қалбida гоя кучи билан аланга олдирилаётган ва доимо гояга интилувчи «эҳтиросдир»¹.

Машхур назариётчи олим И. Султон, Абдулла Қодирий ижодининг пафосини — «умум маъносини» — «замонавийлик ва бадиийлик» деб таърифлайди (И. Султон, 169-бет). Бизнингча, бундай белгилаш унчалик асосли эмасга ўхшайди. Чунки, «ёзувчи ижодининг пафоси унинг асарлари қайси конкрет тарихий шароитда, не ният билан ёзилганига ва ижтимоий ҳаётда қандай тарбиявий эстетик роль ўйнаётганига қараб тайин этилар» экан, шу нуқтаи-назардан қараганда, А. Қодирий ўзбек халқининг XIX асрдаги ҳаётини меҳнаткаш халқ бошига тушган «қора кунлар» тариқасида тасвирлайди ва Чор Русиясининг бу босқини «қора кунлар»ни икки бора кучайтириши мумкинлигига шама қилади.

Унинг ижодий пафоси ўтмишнинг ва бугуннинг сарқитларини фожеий оқибатларини реалистик тасвирлаш ва халқни шу фожеалардан тезроқ қутилишга чорлашдир. Мана шу пафос — А. Қодирий асарларидағи фикр ва ҳиссиёт бирлигини, асарларининг асосий гоясини, ижодининг умумий йўналишини тайин этади.

А. Қодирий ижодининг пафосини тўғри тушунмаслик ёки уни социалистик реализм ва коммунистик партиявийлик нуқтаи назаридан келиб чиқиб белгилаш натижасида баъзи танқидчилар А. Қодирий Октябрь инқилобини тушунмаган, тарихий ўтмишга мурожаатини совет воқелигини тасвирлашдан қочиш, унга салбий муносабат натижаси деб даъво қилган бўлсалар, баъзилари эса А. Қодирий Октябрнинг куйчиси, совет воқе-

¹ В. Белинский. Собр. Соч., Т., 3, с. 378.

лигини мадҳ этган ёзувчи, деб хулоса чиқардилар. Бу иккала нуқтаи назарнинг бир ёқламалиги санъаткорга турли бўғтон ва камчиликларни ёпиштиришга сабаб бўлди. Ушбу икки хил ноўрин қарашлар адабиётнинг қалбига сиёсатни жойлаштиришга уриниш оқибатидир. Бугунги Мустақиллик ва истиқлол мафкурамиз, эстетик савиямиз уларни рад қилмоқда. Ҳаёт ҳақиқатини ва эзгуликларни куйлаш, инсонийлик қадри учун кураш осонгина юз бермаслигини яна бир бор исботламоқда. Дарвоҷе, Абдулла Қодирий умри давомида буюк ҳақиқатни излади. Бу ҳақиқатни Октябрь революцияси ҳам кашф эта олмади, лекин, уни эътироф этиш, баҳт-саодат йўли сифатида қабул қилишга ёзувчи мажбур бўлди. Коммунистик партия позициясини ёқлашида ҳам самимийликни сезгир китобхон ҳис қилмайди, балки «Ўткан кунлар»ни мутолаа қиларкан, кофирларни, ўрисларни — ёв сифатидаги (жумладан, «Мусулмон-қул истибодига хотима» бобидаги) тасвиirlарда самимийлик балқиб турганини очиқ сезади.

Жумладан, романнинг учинчи бўлимидағи «чўталчи бекларга» қарши Ҳожининг асабий ва қизғин монологи бунинг яққол исботидир:

«...Биродарлар! Ўрис ўз ичимииздан чиқадурган фитна-фасодни кутиб, дарбозамиз тегида қўр тўкиб ётибдир. Шундай машҳар каби бир кунда биз чин ёвфа берадиган кучимизни ўз қўлимиз билан ўлдирсак, сен фалон деб қирилишсак ҳолимиз нима бўладир. Бу тўғрида ҳам фикр қилғувчимиз борми? Кунимизнинг кофир қўлига қолиши тўғрисида ҳам ўйлаймизми ёки бунга қарши ҳозирлик қўйиб қўйганмизми?!»¹

«Мен ёвни (ўрусларни — Ҳ. У.) ҳар замон ўз яқинимга етган кўраман» деб очиқ фикр юритган Юсуфбек ҳожи асарнинг «Қипчоқقا қирғин» бобида жўшқинлик билан мушоҳадаларига якун ясади, асосли башоратлар қилади:

«...Иттифоқни не эл эканини билмаган, ёлғиз ўз манфаати шахсияси йўлида бир-бирин еб-ичган мансабпаст, дунёпаст ва шуҳратпаст муттаҳамлар Туркистон тупрогидан йўқолмай туриб, бизнинг одам бўлишимизга ақлим етмай қолди. Биз шу ҳолда кетадирган, бир-биримизнинг тегимизга сув қуядирган бўлсак яқиндирки, ўрус истибоди ўзининг ифлос оёғи

¹ А. Қодирий. Ўткан кунлар. Мехробдан чаён. Т., 1994 йил, 276-бет.

билингестонимизни булғатар ва биз бұлсак үз құли-
миз билан келгуси наслимизнинг бўйнига ўрус бўйин-
дирифими кийдирган бўламиз. Үз наслини үз қўли би-
лан коғир қўлига тутқин қилиб топширгувчи — биз
кўр ва ақлсиз оталарга Худонинг лаънати албатта ту-
шар, ўғлим! Боболарнинг муқаддас гавдаси мадфун
(дағн қилингандай) Туркистонимизни тўнгузхона қилишга
ҳозирланган биз итлар яратувчининг қаҳрига албатта
йўлиқармиз! Темур Кўрагон каби доҳийларнинг, Мир-
зо Бобур каби фотиҳларнинг, Форобий, Улуғбек ва
Али Сино каби олимларнинг ўсиб-унган ва нашъу намо
қилғонлари бир ўлкани ҳалокат чуқурига қараб судра-
гувчи, албатта тангрининг қаҳрига сазовордир, ўғлим!
Гуноҳсиз бечораларни бўғизлаб, болаларни етим, хо-
наларни вайрон қилғувчи золимлар қуртлар ва қуш-
лар, ердан ўсиб чиққан гиёҳлар қарфишига нишонади-
р, ўғлим!.. (259-бет).

Кўриняптики, А. Қодирий улкан санъаткор сифа-
тида турли сиёсаларни эмас, балки эл баҳти учун
кураш йўлини, бу баҳтга қарши бўлган «чўп-ҳасларни
супура бориш» йўлини — буюк ҳақиқат деб билди ва
уни ёқлади, эзгуликни, инсонийликни, мустақиллик-
ни, озодликни улуғлади, реалистик роман тасвирини
берди. Бунинг исботини романнинг турли унсурлари
мисолида ҳам кўрса бўлади.

Абдулла Қодирий ва Отабек. Ёзувчи ҳаётнинг қайси
соҳаларини жонлантирмасин, уни худди үзи кўргандай,
үзи бошидан ўтказгандай ишонарли ва таъсирчан
қилиб тасвирлайди. Шунга асосланган кўпгина содда
китобхонлар асар қаҳрамонини муаллифга нисбат бе-
радилар. Уларнинг тушунчасига кўра, «Болалик»даги
Муса—Ойбек, «Судхўрнинг ўлими»даги Қори Ишкам-
ба—Садриддин Айний, «Пўлат қандай тобланди?»даги
Павел Корчагин — Николай Островский... Чунки, бу
асарлардаги қаҳрамонлар шунчалик аниқ ҳиссиётлар-
га, кечинмаларга, ҳаётий тажрибаларга эгаки, муал-
лифлар буларни бевосита үз бошларидан кечирмаган-
ларида, бунчалик конкрет ва гўзал қилиб ёзмаган бўлар
эдилар... Бундай тушунча тамоман нотўридири. Бадиий
ижоднинг қонуниятларини тушунмаслик оқибатидир.

Муаллифни асаддаги қаҳрамон (гарчи бу қаҳрамон —
ёзувчи автобиографияси асосида яратилган бўлса ҳам)
бараварлаштириш, тенглаштириш ёзувчи ҳақида, унинг
турмуши тўғрисида, дунёқарashi ва шахсияти бораси-

да күпгина англашилмовчиликлар, нотүгри хulosалар, тушунмасдан айблашларни, унга нисбатан ноўрин, исботи йўқ, баразли субъектив фикрларни юзага келтириши мумкин.

Ф. Достоевский «Ўлик хонадондан хотиралар» («Записки из Мертвого дома») асарини ўз хотинини ўлдирган жиноятчи, тўқима асосида яратилган шахс номидан ёзган. Ўн беш йилдан кейин уни чоризм сиёсий жиноятчи сифатида сургун қилганлигига қарамай, кўпчилик кишилар Достоевский ўз хотинини ўлдиргани учун сургун қилинган деб ўйлаганлар ва тасдиқланганлар.

С. Айнийнинг «Судхўрнинг ўлими» асарида ўтакетган хасис образи яратилган. Лекин ҳозирга қадар хасисликни С. Айнийга нисбат берувчиларни, С. Айнийнинг яашаш тарзидан, меҳмон кутишидан, бозор қилишидан хасислик аломатларини топиб, ҳикоя қилувчиларни кўплаб учратиш мумкин.

Ҳолбуки, ёзувчи жиноятчини, хасисни тасвиirlар экан, албатта, ўзи жиноятчи, хасис бўлиши шарт эмас. У яратадиган ўша жиноятчининг, ўша хасиснинг қиёфасига кириб, уларнинг ҳаётида бўлиши мумкин бўлган ҳамма ҳолатларни тирилтириш қурдатига эга. Чунки, ҳар биримизда бўлганидек, ёзувчидаги ҳам ҳамма инсоний хусусиятларнинг куртаги мавжуд.

Иккинчидан, ҳар қандай бадиий асар умумлашма характеристерда бўлар экан, унинг асосида ҳеч вақт бир шахс (муаллиф)нинг конкрет ҳаёти, конкрет автобиографияси ётмайди, ундан бадиий ҳақиқат туғилмайди.

Шунинг учун ҳам Н. Островский ўшлар ташкилотининг раҳбарларидан бири — Андреевга юборган хатида ёзади:

«Сен тушунасан, Серёжа, менинг барча қаршиликларимга, ўнлаб хат ва мақолаларимга қарамай, барibir «Пўлат қандай тобланди?» китоби —менинг ҳаётимнинг тарихи, бошидан охиригача худди ҳужжат тарзida шарҳланаяпти. Уни роман сифатида эмас, балки ҳужжат сифатида тан оляптилар. Бу билан Павел Корчагин ҳаётини менга тиркайяптилар. Бунга қарши мен бирон нарса қилолмайман. Мен асарни ёзган пайтимда бундай деб ўйламаган эдим. Мени фақат битта орзу етаклаган — бизнинг ўшларимиз ибрат олувчи образни яратиб бериш орзуси. Албатта, бу образга мен ўз ҳаётимдан ҳам озгина қўшганман».

Кўринаяптики, Н. Островский ҳам автобиографик характердаги ижод билан санъатни тўлиқ фарқлайди. Муаллиф образи иккинчи бор реаллашганда ўзида танлашни, умумлаштиришни жамлашини тўғри тушунади, чунки автобиографик фактлардан кучсиз нусха юзага келади, у санъат асари бўлиши учун қайта ишланиши, ижодий фантазия билан бойиши, умумлаштирилиши зарур. Айни пайтда, тасвирланаётган хотира ва кечинмаларни ўз шахсидан ажратиши, уларни объективлаштириши лозим. У ҳақиқатан ўз бошидан кечирган воқеалар, хотираларни жонлантирганда ҳам, ўзини бу хотиралар орқали жонланувчи воқеаларнинг иштирокчиси сифатида эмас, балки холис гувоҳи сифатида тутиши керак. Ўзининг шахсини эмас, умумлаштирилган, кўпчиликка хос бўлган хусусият, фазилат, кечинмаларни бериши ва китобхонда бу — муаллиф турмушининг ҳужжати деган тасаввурни уйғотмасликка интилиши керак.

Демак, асарда тасвирланган қаҳрамон билан ҳаётдаги муаллиф-инсон ўртасида катта фарқ бор. Гарчи, «Болалик»даги Муса, «Ўтмишдан эртаклар»даги Абдулла, «Пўлат қандай тобланди?» асаридаги Павел Корчагин образлари асосида Ойбек, Қаҳдор, Островский-ларнинг маълум даражада автобиографиялари ётса ҳам, уларда ижодкорнинг шахсияти, муҳри босилган бўлса ҳам (бусиз мумкин эмаслигини юқорида таҳдил этган эдик), уларни Ойбек — инсон, А. Қаҳдор — инсон, Н. Островский — инсон билан аралаштириб ва бараварлаштириб юбормаслик керак...

Бадиий ижоднинг ана шу хусусиятларини тўлиқ англамаган ёки эътибор бермаган баъзи танқидчилар ижодида «Баъзан қаҳрамон нуқтаи назари, позициясидан муаллифни излаш, уни муаллиф нуқтаи назари, ҳаёт ҳақидаги концепцияси тарзида баҳолашга интилиш ҳам учраб туради. Жумладан, профессор Б. Имомов «Бадиий тафаккур усули» мақоласида А. Қодирийнинг «Ўткан кунлар» романидаги муаллиф позициясини назарда тутиб шундай дейди: «Айрим тадқиқотчилар Отабек ўлими сабабини «далил»сиз ёқлашга интилади. Менимча, ёзувчи ижодидаги бу хусусиятни унинг дунёқарashi ва позициясидаги ноаниқ зиддиятли хусусиятлар билан изоҳлаш тўғри бўлса керак. Бу ерда шуниси ноаниқ ва ишончсизки, руҳий изтироб ва тушкунликлардан тинкаси қуриган ёки куч ва қуввати қолмаган Отабекни

қандай гоявий маслак, идеал, эътиқод русларга қарши жангга олиб келди. Бундай ноаниқ позициядан китобхонда туғиладиган ҳайронлик ҳисси роман хотимасидаги: «Отабек руслар билан тұқнашувда биринчи сафдагилар қаторида бұлды ва «қаҳрамонона урушиб шахид бұлды» дейишда янада ошади... Менимча, буни (Отабек қисматининг сүнгги дақиқасини — Ү. Н.) Үрта Осиёning Россияга құшиб олиниши масаласига нисбатан ёзувчи тутган позициясининг аниқ эмаслиги, дүнәқараши зиддиятлилиги, воқеаларни марксистик тушуниш даражасига етмаганлығи билан изоҳламоқ даркор. Романда Үрта Осиёни құшиб олиш учун бошлаган ҳарбий ҳаракатта нисбатан ёзувчи муносабати хира ва ноаниқ қолади. Отабекнинг ўша давр учун прогрессив тарихий ҳодисага қарши жангга киришини қоралаш ўрнига бу борада А. Қодирийнинг лоқайд қолиши, ҳатто унга майл билан қараши ёзувчи позицияси анча хато эканини яна бир бор исботлайди...»

Шу тарздаги мұхокамасини давом эттириб профессор Ү. Носиров ёзади: «А. Қодирийнинг «Үткан кунлар» романида тасвир обьектига нисбатан муаллиф позицияси «ноаниқ, ҳаттоқи хато эди» деган фикрни Отабек үлеми билан боғлиқ моментдан излаш, шунгагина таяниб қолиш тадқиқотчани тор рамкага солиб, чегаралаб қўйиши ўз-ўзидан маълум. Отабекнинг сүнгги қисмати ҳақидаги хабар Юсуфбек ҳожининг таниши томонидан ёзилган мактубда хабар қилинганд. Тўғри, мактуб бир восита. Уни ўзгартириш ҳам мумкин эди. Аммо мактуб шу ўринда тарихий факт-ишендириш воситаси сифатида қаралади. Бунинг устига, муаллиф Отабекнинг русларга қарши курашини ёқлаш ё ёқламаслигини, шу орқали русларга муносабатини белгилашда Отабек қайси русларга қарши курашади деган саволга жавоб топишга тўғри келади».¹

Отабек образининг ички ривожи чор аскарлари билан тұқнашувда фожиага — «қаҳрамонона урушиб шахид» бўлишга олиб келди. Унинг тақдирини бундай хотималаниши муаллифнинг хоҳиши, истаги асосида эмас, балки ўша давр ижтимоий ҳаётининг ривожидан ва қаҳрамон ирода йўналиши мантиқидан келиб чиқаётганлигидадир. Буни тўғри тушуниш учун Отабек об-

¹ Ү. Носиров. Ижодкор шахси, бадиий услуг, автор образи, Т., «ФАН», 1981 йил, 149—151-бетлар.

разидаги асосий нарсани — унинг «фоявий маслаги, идеали, эътиқоди»ни — ижтимоий позициясини тұғри тушунмоқ лозим.

Отабек рус идораларидағи тартибни ёқласа-да, қирғин урушларнинг оқибатидан азбланса-да, лекин, у үз даврининг бош ҳақиқатини англаб етмаганмиди? Тұғри, у үз юрти ҳаёти, хұжалиги, сиёсатида илфор ва одилона тартиблар бўлишини, хонлик ва беклик лавозимларида инсофлик ҳокимлар бўлишини орзу ва ташвиқ қиласади. Оиладаги эскирган иллат ва таомиллардан воз кечишни, муҳаббатда эр ва аёл бир-бирининг таъбига мос бўлиши кераклигини ёқлади. Шу йўлда баязи ҳаракатларни қиласади, айниқса тузум иллатлари унинг шахси билан тўқнаш келганда («Мусулмонқул», «Душанба куни кечаси» боблари) мардлик ҳам кўрсатади. У даврнинг асосий ҳақиқатини, Россиянинг босқинчилигини англайди, лекин, оқибатини тўлиқ билмасди. «Адолатсиз муҳитнинг зарбали турткilarини ея бериб эсанкираган, ўжар, қаҳри қаттиқ воқеаликнинг шиддатли қуюнига дучор бўлган Отабекнинг шахсий баҳти узил-кесил чилпарчин бўлади, умидсизликка тушади, унинг «покиза қалби»ни эзгу туйғулар билан тўлдирган Кумушнинг вафотидан кейинги ҳаёт эса йигит учун маъносиз туюлади ва у рус қўшинларига қарши урушда иштирок этиб, ҳалок бўлади» (Х. Еқубов).

Демак, Отабек образи А. Қодирий томонидан етарли объективлаштирилган. Унинг тақдири одилона ва ишонарли хотималанганки, ҳар қандай китобхон ҳам унинг тақдири бошқача бўлиши мумкин эди деган хаёлга бормайди. Бу эса ёзувчининг санъаткорлигига, ҳаёт ҳақиқатини тўлиқ ва тўғри тасвирловчи реалист эканлигига исботдир.

Отабекнинг тақдирида ўша давр Отабекларидаги ҳақиқат ифодаланаар экан, нега энди, биз Отабек фикрлари, ҳислари, хатти-ҳаракатларини ёзувчига тиркашимиз: А. Қодирий «воқеаларни марксистик тушуниш даражасига етмаган» деб изоҳлашимиз, ундан «Отабекни ўша давр учун прогрессив тарихий ҳодисага қарши жангга» киритмасликни талаб этишимиз керак? «Отабек қайси русларга қарши курашди» деган ноўрин саволга жавоб ахтаришимиз лозим? Нима учун, ахир?

Агар биз асарни проф. Б. Имомовдек тушунсак, унда «Бемор»даги «Осмон йироқ, ер қаттиқ» эпиграфи А. Қаҳҳорнинг тушунчасини, фикрини ифодалайди деган

хулосани ва шу эпиграфнинг исботи учун ҳикояни ёзган деган тушунчани чиқаришимиз керакми?

Ҳолбуки, бу эпиграф ҳикояга, ҳикояда тасвирланган жамиятга, ана шу жамиятнинг аъзоларига тегишлайдир. «Бемор»даги ҳаёт тўлиқ объективлаштирилган. Унда содда Сотиболди оиласининг турмуши ҳаётда қандай бўлса, шундай тасвирланган. Асар қаҳрамони Сотиболди билан асар ижодкори А. Қаҳҳор ўртасида осмон билан ерча фарқ борки, ҳеч ким эпиграфни ҳикоядан ажратиб, А. Қаҳҳорга «уламайди».

Худди шунингдек, Отабек ҳам асарда ўз ҳаёти билан яшайди. Муаллифнинг хоҳишига боғлиқ бўлмаган ҳолда русларга қарши курашда шаҳид бўлади. Бу ҳаёт ҳақиқати. Отабек характеристики ҳақиқатидир. Бу объективликдир. Бу реалистик санъаткор учун қонундир.

Бу қонунга онгли равишда бўйсунган ёзувчини айблаш, асар қаҳрамонига хос хусусиятларни А. Қодирийга тиркаш, унинг дунёқарашидан камчилик ахтариб топиш нотўри, бадиий ижод қонуниятларига зиддир, ёзувчи ижодининг пафосини тўғри тушумасликнинг оқибатидир.

II. Мавзу ва фоя

Таняч сўз ва иборалар: Ҳаёт. Мавзу. Адабий мавзу. Замонавийлик. Бадиий фоя. Образли умумлашма ва бўрттирилган фикр. Фоя — бадиий асар қалби.

Бадиий асар мазмуни ва шаклидаги қонуниятлар ўз навбатида мавзу ва фояда ҳам, уларнинг узвий бирлигида ҳам намоён бўлади. Чунки, бадиий асарнинг тасвир обьекти — ҳаёт (мавзу), тасвир вазифаси — туйфулар тарбияси (фоя) — қуюлмадир.

«Адабиётнинг мавзуи бутун табиат, борлиқ дунёси, инсоннинг ўз ички-ташқи дунёсида сезиб онглағанларидир. Бир томчи сувдан тенгизгача, бир учкундан буюк бир ёғингача, кичкина бир япроқдан улуг ўрмонларгача нима бор эса, ҳаммаси адаб-ёзгувчи учун мавзу бўларлик нарсалардир» (А. Фитрат. «Адабиёт қоидалари»).

Шундан келиб чиқиб айтишимиз мумкинки, ҳаёт ва инсонга тааллуқли барча ҳодисалар адабиётнинг мавзуига асосдир; шу асоснинг энг майда заррачасида ҳам инсон билиши лозим бўлган, унинг яшashi учун зарур

ҳикматлар, сирлар, мұғжизалар мужассамдир. Бу чексиз, чегарасиз дүнёдирки, унда ҳар бир ёзувчи (шоир), үз кузатиши ва таҳлил қилишига, ҳәёттің тажрибаси ва қизиқишига, ҳаяжони ва кашфига, билиш ва салохиятига (яна үнлаб хусусиятларига) құра ҳикматни, мұғжизани (ғояни) үзіча (субъектив) кашф этади ва ана шунга муносабатини, фикрини-мақсадини очиб берадиган мавзу (ҳаёт парчаси)ни танлайди, түғрироғи унга ишқ құяды. Ният ҳам, ишқ ҳам юракдан туғилади.

Мавзу — бутун борлингизни, үйлаб юрган орзумидларингизни биринчи күришданоқ ҳаяжонга солған қиз, шу қызға тушган ишқингиз. Бу ишқ Сизни мафтун этади, қизни ўрганишга, кузатишга, билишга майлингиз юрган-турганингизда ҳам, уйқуда ҳам камаймайди; тасаввурингиз (қалбингиз), онгингиз (компьютерингиз) құдрати ила хаёлингизда жонланған бұлажақдаги учрашувлардан, турли-туман ҳолат ва түйғулардан лаззатлана бошлайсиз, ҳар бир кашфингиздан юрагингиз гуп-гуп тепа бошлайди, чарchoқ нималигини, очлик нималигини, ҳаёттинг бөшқа ташвишларини назар-писанд қилмайсиз. Қалбингиз фикр ва түйғулар нуридан «озиқланади»...

Бу жараённи тұлықроқ англаш учун бадиҳатай вә беназир шоир Faфур Fуломнинг ижодхонасига, у ҳақдағи Сайд Аҳмаднинг иқрорномасига мурожаат қилай-лик:

«...Ётиш олдидан билагидаги соатни ечиб, күзойнак тақиб қаради.

— Бўлди, — леди домла қайта ўрнидан туриб. — Шеър тайёр. Комил Алиев шундай деган эди: «Сарлав-ҳаси билан тагига ёзиладиган үз номинг нақд бўлса, асаринг битди деявер». Шеърнинг номи билан тагидаги Faфур Fуломи битди.

У кишига савол назари билан қарадим.

— Жияним Ҳамидулла ўтган куни шу соатни совға қилган эди. Шу соатга бағишилаб шеър ёзаман.

Бошқатдан кийиниб ўтириб олдик. Мен пастта тушиб, чой дамлаб чиқдим. Столга чойнакни қўя туриб қарасам, шеърнинг икки сатри ёзилиб қопти:

*Ғунча очилгунча ўтган фурсатни
Капалак умрига қиёс этгулик...*

«Вақт» шеърининг туғилишига совға қилинган соат катализатор (эврика!) вазифасини ўтамоқда. F. Fуломда

илгаридан вақт ҳодисасининг аломатлари тўпланган, у ҳақда сонсиз-саноқсиз ва бой тушунчаларчувалашиб ётган, унинг юзага чиқишига аниқ сабаб, вазият бўлмаган. Соат (сабаб) топилгач, шоирда муҳокама ва мушоҳада, талант, салоҳият вулқондай шиддат билан ишга киришади. Файратига файрат, шиҷоатига шиҷоат, юрак зарбига зарб қўшилади. «Ўйланган асар санъаткорнинг кўз ўнгида ўзининг барча гўдаклик нафосати билан намоён бўлади ва оналик туйғусига тўлиб-тошган санъаткор хушбўй фунчанинг рангини кўради, тез етилаётган меванинг мазасидан лаззатланади». Шеър қофозга завқу-шавққа тўлиқ дил изҳори самараси бўлиб, яъни «вақт»га бўлган ишқ илҳом бўлиб тўкила бошлиайди.

Ёзувчидан бу ишқ — мавзуга, тўғрироғи, мавзуга асос берувчи фояга тушади. Янада аникроқ айтсак, **фоя ва мавзу яхлитлашиб, бир бутун бўлиб дунёга келади** ва ана шу шаклда ёзувчини ўзига батамом маҳлиё қиласиди. Шунинг учун ҳам ёзувчи Алексей Максимович Горький бадиий адабиётнинг иккинчи элементини мавзу деб белгилайди ва унга қўйидаги тўғри, асосли тарьифни беради:

«Тема муаллиф тажрибасида бунёдга келган, ҳаётнинг ўзи кўрсатиб берган, аммо ҳозиргacha муаллиф тасаввурнида ҳам тўла-тўкис шаклланмаган бир ҳолда сақланиб, образларда гавдалантиришни талаб қилиб, муаллифда ишлашга майл уйғотадиган фоядир» (Таъкид бизники — X.У.)¹, — дейди; мавзу ва фоянинг бутунлигини таъкидлайди. «Ўткан кунлар»нинг муаллифи «Шунга кўра мавзуни мозийдан, яқин ўтган кунлардан, тарихимизнинг энг кирли, қора кунлари бўлган кейинги «хон «замонлари»дан белгиладим», — мавзу ва гоя бутунлигининг исботини беради.

«Муҳаббат ул ўзи эски нарса, лекин, ҳар бир юрак они янгарта» (Х. Тоқтош) экан, ёзувчи ҳатто бир хил мавзуга мурожаат қилганда ҳам, унинг мазмуни мутлақо бир-бирига уҳшамайди, такрор бўлмайди (такрорланса санъат ўлади).

Жумладан, А. Қодирийнинг «Ўткан кунлар» ва «Мехробдан чаён» романларининг мавзуи — кейинги «хон замонлари»даги ҳаёт. Аммо иккаласидаги мазмун (гоя) ҳам, шакл (образ, характерлар) ҳам тамомила янгирил.

Ҳатто, А. Горький таъбиrlаган «абадий» мавзу (му-

¹ Қаранг: Бадиий ижод ҳақида, Т., 1960, 92-бет.

ҳаббат, ўлим, хасислик каби)лар ҳам тасвирилаганда ҳар бир давр фарзанди унга замона янгиликларининг энг муҳим муаммоларини киритади, бугунги қалбнинг зарбларини муҳрлайди. Ана шундагина замонавийлик—бадиий асарнинг жон риштаси (томири)га айланади, замонасозлик — ёзувчининг ахлоқизлигини (минг афсуски, улар ҳамиша бўлганлар, ҳозир ҳам анчагина улар), «варрак хослиги»ни кўрсатади. Бу ҳолат даврий (бугунги кун) мавзуларни асос қилиб олган битикларнинг эгаларида яққолроқ сезилади. «Шамол қаёққа эсса, ўша ёққа қараб, шоҳ ташлайди. Шамол қанча қаттиқ эсса, думини шунча шитоб билан ликиллатади. Қанча ҳаволанса, дардараги шунча қаттиқ вариллади» (Ў. Ҳошимов). Бу «дардарак» («битик»)дан, саёз, ланж нодон-мутлақо кераксиз адабиётдан жамият ҳам, одамлар ҳам зарап қўради, у «инсоншунослик» ўрнига «шайтонийлик»ка етаклайди...

Ёзувчининг танлаган мавзуси яратилаётган асарида айтмоқчи бўлган салмоқли фикри, гояси билан чамбарчас боғлиқdir. Фоя ўз навбатида асардаги образларга сингиган бўлиб, уларнинг фаолиятлари — хатти-ҳаракатлари, курашлари, интилишлари, орзу -истаклари орқали реаллашади.

Шунинг учун ҳам «...бадиий асардаги ғоя турмуш ҳодисалари устидан чиқарилган оддий мантиқий хулоса эмас, балки ҳаётни бевосита мушоҳада қилиш, синчиклаб тадқиқ этиш ва образли, эмоционал ифодалаш якунидир. Бу якун бадиий асар организмининг ҳар бир ҳужайрасига сингиб кетган бўлади. Шу сабабли бадиий асардаги ғояни фақат шу асарнинг бутун образлари мазмуни орқалигина англаш мумкин. Л. Толстой таъбири билан айтганда, ҳар бир бадиий асарнинг ғоясини ифода этиш учун у қандай ёзилган бўлса, шундай қайта ёзиб чиқиши керак бўлади» (И. Султон, 170-бет).

Агар биз «Ўткан кунлар» романидаги А. Қодирий «Тарихимизнинг энг кирлик, қора кунлари»ни тасвириланган десак, унда роман ғояси ўз рангини, кўринишини, латофатини, гўзалигини, таъсирини йўқотади. Муаллиф айтмоқчи бўлган фикрларнинг юздан бирини ҳам айта олмаган ва уларни образлардан (демакки, ўтмиш ҳаётдан) ажратган бўламиз.

Холбуки, роман бўрттирилган (демакки, умумлаштирилган), ёрқин ғоялар дунёси, образли фикрлардир. У Отабек, Кумуш, Зайнаб, Юсуфбек ҳожи, Мирзака-

рим қутидор, Ҳомид, Мусулмонқұл, Офтобойим, Ҳушрүй, Ҳасанали, уста Олим каби үнлаб образлар ҳаёти ва тақдирли орқалигина ўтмиш ҳақиқати — «энг кирлик, қора кунлар» бўлганлигини тўлиқ ҳис қиласиз ва англаймиз. Чунки, ундаги фоя ўша образларнинг қисматига айланади. Шу сабаб, ишонамиз ва афсус чекамиз. Қайфурниш из ва бугунги кунимиздан хурсанд бўламиш. Ёзувчининг ҳар бир қаҳрамонга бўлган муносабати бизда—ўқувчидаги ҳам шундай муносабат уйғотади: у қайси образ (тақдирли)дан ҳаяжонга келса, йиғласа, айбласа, нафратланса, биз ҳам ҳаяжонланамиз, йиғлаймиз, айблаймиз, нафратланамиз.

Фоя «бадиий асар қалби» (Короленко) бўлгани учун «ҳамма нарса ана шу концепцияга» (Гёте), фояга боғлиқки, ёзувчи ўзининг қараашлари, эътиқоди, ихлоси, ишончини бермаслиги мумкин эмас. Фоя магнит каби ҳамма адабий унсурларни ўзига тортганидек, ёзувчининг маънавияти, эътиқоди ҳам китобхонни ўзига ром этади.

Бундан шундай хуросага келиш мумкинки, ҳар қандай талантнинг кучи — маънавиятни эгаллашига, унинг ижтимоий позициясига боғлиқдир. Чунки талантнинг ҳалқ ҳаёти билан алоқаси бўлмаса, унинг юрагида фуқаролик олови ёнмаса, бу олов Ватан ва давримиз бунёдкорлари тақдирли билан ловулламаса, завқданмаса, буни чин юракдан самимий тарғиб этмаса, ифода қила билмаса — у менинг, сизнинг, бизнинг ёзувчи эмас. У ҳеч вақт ҳалқ баҳтининг куйчиси, ҳимоячиси бўла олмайди.

Шу сабабдан, **фоя бадиий асар тақдирини ҳал қилувчи негиз** (А. Чехов), мавзууни таанлашнинг тириклигини, таъминлашнинг асоси, ижодкор мақсади, қараашлари, патосини тартиблаштирадиган, бир ўзаига соладиган, ягоналаштирадиган ҳодисадир.

III. Сюжет ва композиция

Таянч сўз ва иборалар: Воқеа-сюжет. Характерни очувчи восита. «Сайёр» сюжет. Конфликт ва унинг хиллари. Сюжет элементлари. Асослаш. Бадиий деталь. Тағсилотлар. Вергул. Композиция. Композицион воситалар. Сюжет ва композициянинг узвийлиги.

Бибихоним ҳақидаги афсонада (хотирангизга кел-

тириңг) «ҳақиқий подшох ўз фуқароларининг орзу-интилишларини рүёбга чиқаради» деган фикрни етказиш учун «ҳаётний бир воқеа» яратилади: Бибихоним Амир Темур сафарда юрганида Самарқанд салтанатини бошқаради, фуқаролар аҳволини билиш учун эркакча кийиниб бозорларни, мозорларни, мадрасаларни айланади. Учта муллабаччаларнинг сұхбатини тинглайди ва уларнинг орзуларини рүёбга чиқаради... Бу таъсирчан воқеанин китобхон қалбан ва ақдан ҳис этиб, мушоҳада қилиб, ёзувчи айтмоқчи бўлган фикрни гўё ўзича кашф этади. Китобхонни худди ана шу гоянинг туғилишига ишонтирган **асардаги воқеа (воқеалар силсиласи)**ни сюжет деб юритиш одат тусига — ижодий жараённинг асосий қонуниятларидан бирига айланган.

Кўринадики, сюжетни бунёд этувчи, унинг таъсирчанлигини таъминловчи куч — фоя, шу сюжет ичидаги ҳаракат қилувчи характер (образ)ларнинг ўзаро муносабатларидир. Шунинг учун ҳам, «Адабиётнинг учинчи элементи сюжетдир, яъни одамларнинг ўзаро алоқалири, улар ўртасидаги қарама-қаршиликлар, симпатия ва антипатиялар, умуман кишилар ўртасидаги муносабатлар — у ёки бу характернинг, типнинг тарихий ривожланиши, ташкил топиб боришидир»¹.

Ушбу таърифда сюжет характерни, унинг хусусиятларини очиш воситаси, аниқ воқеа-ҳодисалар тасвирига монанд характерлар ўртасидаги муносабатлар йиғиндиси эканлиги яққол ифодаланган. Дарвоқе, «Воқеа характерни кўрсатиш»² санъатидир. Бу тушунчалар эпик ва драматик тур асарларига хос, лирикада эса сюжет кечинмаларнинг ривожига (улар асосида ётган билинч-билинмас «воқеалар»нинг ташкил топиб боришига) асосланади. Умуман олганда, барча бадиий асарларнинг мажбурий, универсал учта элементи (тил, мавзу, сюжет) борлиги — **сюжетсиз бадиий асар бўлмаслигининг исботидир**. Демак, сюжет ҳаётнинг объектив оқимиини, тарихини оддий тасвирлаш (чунки санъаткор, нусха кўчирувчи шахс эмас) билан юзага келмайди, балки ёзувчи томонидан энг характерлилари танланган, ишлов берилган, моҳиятни очиб берадиган, фояга мувофиқлаштирилган воқеалардир.

Бу мулоҳазалардан кўринадики, ҳар қандай сюжет-

¹ А. Г о р ь к и й. Адабиёт ҳақида, Т., 1962, 243-бет.

² К а р а н г: Уэллек и О. Уоррек. Теория литературы, М. 1978, стр. 206.

нинг асоси ҳаётдир, лекин у доимо бадиий характер билан муносабатда аниқ намоён бўлади, қиёфаси равшанлашади. Шу сабаб, трагик характер қалтис, оғир ҳолатларни, шиддатли воқеаларни талаб этса ва ана шундагина ўзлигини намоён қилса, кулгули характер комик вазиятда, кулгу қўзгатувчи «арзимас» воқеаларда — ўзлигини кўрсатади. Отабек «Ўткан кунлар»да ўзининг севгисига содик қолади, Кумушни қутқариш учун ўлим (Ҳомид, Мутал, Содик) билан олишади. Бундай воқеалар Боқиҷон Бақоев («Адабиёт муаллими»)га умуман ёпишмайди, фақатгина Боқиҷон «арзимас» воқеалардагина ўзининг саводсизлигини, ношудлигини намоён этади.

Яна ижодий жараёнда бир хил мавзу, бир хил қаҳрамонлар тақдири нақл қилинадиган — бир хил сюжеттинг такори турли муаллифлар, даврлар, асарларда учрайди. Бунинг яққол мисолини Шарқда яратилган «Хамса»чилик (Низомий Ганжавий, Хусрав Дечлавий, Абдураҳмон Жомий, Алишер Навоий) анъанасида ҳам кўриш мумкин. Ёки турли халқларнинг эпосларида ота танимаган ўғли билан курашга тушиши сюжетини учратиш мумкин: антик эпосда Одиссей Телегон билан, олмонларда Гилдебранд Гадубранд билан, эронларда Рустам Сухроб билан, русларда Илья Муромец Сокольник билан, ўзбекларда Гўрӯғли Аваз билан олишадилар.

Бундан қатъи — назар «сайёр» сюжет асосида яратилган ҳар бир асар — мустақил асардир; ундаги кашф қилинган характерлар бетакордир; муаллифларнинг мушоҳада салоҳияти, бадиий маҳорати турлича ва ҳар бирининг ўзигагина хосдир.

Баъзан ҳаётда ёмби олтинлар учраганидек, «тайёр» сюжетлар ҳам учрайди. Жумладан, Мирзо Улугбекнинг Самарқандда қирқ йил подшоҳ бўлганлиги, юлдузлар илмини («Зижи Курагоний» асарида) чуқур ўрганган астроном эканлиги, уни ўғли Абдулатиф томонидан ўлдирилгани ва оқладар ўғилнинг б ой ўтмасдан ажал топгани сюжети Шайхзоданинг «Мирзо Улугбек» трагедиясига, Одил Ёқубовнинг «Улугбек хазинаси» романига асос бўлгандир.

Гарчи сюжетлар ранг-баранг кўринишларда учрасаларда, барибир сюжет ёзувчи тоғасига, асарнинг мавзуига мос тарзда бадиийлашади. У муаллиф хоҳишига (хоҳлаган воқеа-ҳодисани киритишга) мувофиқ тарзда

яратилмайды, балки у **асардаги характерларнинг мантигидан воқеалар мантиги, воқеалар мантигидан характерлар мантиги келиб чиқадиган универсал қонуниятга бўйсунади**. Характер ва воқеа ўртасидаги уйғунлик, ҳамкорлик шу даражада бўлиши лозимки, воқеа характерни яқъол кўрсатишга, характер ўз навбатида воқеанинг (типик шароитнинг) моҳиятини тушунишга калит бўлиши лозим. Пировардида шу калит фоянинг тириклигини, юқчанлигини очиши шарт.

Шу нуқтаи-назардан қараганда, биринчидан, сюжет характерлар мантигини намоён қиласидиган воқеалар силсиласидир. А. Қодирий Отабекни иродали, «Хон қизига лойиқ йигит», «асл йигит», орзудаги ўғил, софдил ва мард йигит тарзида тасвирлашни кўзлагани сабаб, роман сюжети воқеалари шу характердан келиб чиқиб қурилади.

Отабек ота-она орзузи билан Зайнабга уйланганда ҳам Кумуш муҳаббатига содик қолади. Кумушни, факат Кумушни севади. Кумуш ундан юз ўтирганда ҳам уни кутқариш учун ўлимга тик боради, Содик, Мутал, Ҳомидни—ёвузларни ўлдиради. Қайнатаси томонидан ҳайдалганига, Кумуш томонидан (Ҳомид иғвосига асосан) рад этилганига қарамай, Зайнабга кўнгли исимайди... Кўринадики, Отабек характеридаги мантиқ асар охиригача бузилмайди.

«Бадиий асарда тасвирланган характерлар сюжетнинг ҳамма катта ва кичик моментларини, тафсилотларини тайин этадилар ва ўз навбатида, ҳаётдан тўғри танлаб олинган ёки ёзувчи томонидан тўқилган мана шу тафсилотлар туфайли характерлар ўқувчи кўз олдидаги бутунлиги ва ёрқинлиги билан намоён бўлади. Бадиий адабиёт инсоншунослик ва характерлар яратиш санъати экан, сюжетнинг ҳар бир катта ва кичик элементининг характерлар мантигига тўғри ва мос бўлиши — асар бадиий муваффақиятининг энг муҳим шартларидан биридир» (И. Султон, 182-бет).

Иккинчидан, ҳар қандай характер ўз ҳаракатларидаги куч-қувватни тарихий оқимдан оладилар, тарихий-конкрет шароит уларни юргизиб-тургизади. «Ўткан кунлар»да давр шароити мантигига ёзувчи изчил равишда амал қиласиди: XIX асрнинг иккинчи ярмида рўй бериши мумкин бўлган воқеалар (хон ва бекларнинг амал учун курашлари, қипчоқ ва қораҷопонлар ўртасидаги қирғин, эски «одат»га биноан хотин устига хо-

тин олишлар, кундошлар фожиаси ш.к.)ни типиклаштиради ва шу шароитда Отабекни тұлиқ гавдалантириб күрсатади.

«Үткан кунлар» романининг фақат бир жойида сюжет элементи билан шароит мантигининг унчалик мос эмаслигини қайд этиш мүмкін: құзғолончи Тошкент ахолисининг Азизбек устидан ғалаба қозонгани ҳақидағи хабарни Құқонга Ҳасанали олиб келади ва шу йүл билан Юсуфбек ҳожини хон олдида оқлад, Отабек билан Кутидорни ўлимдан қутқаради; Ҳасаналининг кексалигини эътиборга олганда, хонга зуд хабар етказиш вазифасининг Юсуфбек ҳожи томонидан унга топширилиши файритабийдир. Бу ерда муаллиф Ҳасанали характерларыда Отабек ва Кутидорга садоқатни үқтиromoқчи ва унинг қаҳрамонлар тақдиридаги ижобий ролини бүрттиromoқчи бұлғану, шу яхши ният учун типик шароит мантиқи (Ҳасаналининг кексалиги)дан күз юмган» (182-бет.), деб ёзганида, И. Султоновни ҳақли дейиш қийин.

Бириңчидан, Отабек ва Кутидорни ўлимдан қутқариш учун энг күп саъй-харакат күрсатиши мүмкін бұлған одам — Отабекнинг маънавий отаси Ҳасаналидир. Иккінчидан, Юсуфбек ҳожи «Хонга зуд хабар етказиш вазифаси»ни ҳам оиланинг чин бир аъзоси»га ишониши «файритабий» эмас, мантиқлидир. Учинчидан, Ҳасанали Тошкент — Құқон йўлида жуда күп қатнаган, йўлни қисқартириш, қаерда тунаш, қаерда отта дам бериш... каби юмушларнинг ҳадисини олган тажрибаси күп киши... хабарни Құқонга Ҳасанали олиб келиши табиий ва асослидир — шароит мантигининг талашибидир.

Сюжет образларнинг ўзаро алоқалари, улар ўртасидан қарама-қаршиликтар, симпатиялар ва антипатиялар экан, демак, у ҳаёт зиддиятларини ҳам ихтиро қиласы, умумлаштиради, кашф этади. Ҳаёттый зиддиятлар асарга ифода этилган ғоялар, тасвирланган характерлар, кайфиятлар кураши тарзидә күчади ва у **конфликт** деб юритилади.

Конфликт-сюжетни ҳаракатта солувчи күч. Унинг таъсирдорлигини, қизиқарлигини, күламини белгиловчи унсурдир. Унинг турли хиллари учрайди:

1. **Психологик (рухий) конфликт** қаҳрамон қалбидаги ҳиссиётлар, тушунчалар (ожиз ва кучли жиҳатлар) кураши;

2. Ижтимоий конфликт — асар қаҳрамонлари билан улар яшаётган шароит үртасидаги кураш;

3. Шахсий — интим конфликт — бир бирига қара-ма-қарши характерлар, гурухлар үртасидаги кураш. Конфликтнинг ушбу уч хили ҳамма романларда ҳам учрайди, лекин психологик конфликт етакчи бўлган асарлар («Сароб» — А. Қаҳҳор; «Улуғбек хазинаси» — О. Ёкубов) доимо адабиётнинг сифат кўрсаттичи бўлиб, ёрқин из қолдирганлар.

Жумладан, «Ўткан кунлар» романида Юсуфбек ҳожи, Отабекларнинг маслакдошлари билан Мусулмонқул, Азизбекка ўхшаш феодал тузум ҳукмдорлари орасидаги тўқнашув — ижтимоий конфликтта асос солса, Отабек, Ҳасанали, Кутидор ва Ҳомид, Мутал, Содик, Жаннат кампир ўрталаридағи олишув шахсий-интим конфликтни келтириб чиқаради. Отабек иккинчи марта ба уйланиш Кумушга нисбатан хиёнат эканини тушунади, ахлоқсизлик қилаётганини тан олади, бироқ ота-онанинг иродасига буйсинади. Ана шу жараёнда қалбida кечган кураш-психологик конфликтни вужудга келтиради. Уч хил конфликт бирлашиб, катта қурат қасб этади ва «Ўткан кунлар» сюжетининг шиддатли ва таъсиричан ҳаракат қилишини, асар қаҳрамонларининг драмаларини яққол очилишини таъминлайди.

Бадиий асарларда (эпик ва драмада) воқеалар силсиласи муайян босқичлар билан ўсиб боради. Бунинг классик намунасини «Ўткан кунлар» романида (муқаддима-экспозиция (дастлабки ҳолат) — тугун — воқеа ривожи — кулминацион чўққи — ечим — хотима) кўриш мумкин ва у «Адабиёт назарияси» (И. Султон)да атрофлича ўрганилган. Бундан ташқари «Адабиётшуносликка кириш» курсида ҳам анча кенг таҳлил қилингани боис, яна такрорлашдан воз кечдик. Дарвоқе, асар сюжетида қандай воқеа-ҳодисаларни яратиш ва уларни қай даражада ва қай йўсинда акс эттириш ёзувчи характерларларга юкланган foяга, шу foяни аниқлаштирувчи мавзуга, жанрга, ҳатто жанр кўринишларига ҳам боғлиқ.

Жумладан, Проф. М. Қўшжоновнинг бу соҳадаги изланишлари («Ойбек маҳорати»)ни умумлаштиrsак, биргина роман жанрида сюжет яратишнинг бир нечта кўринишлари борлигини кўрамиз:

1. Саргузашт характеридаги асарлар («Сариқ девни миниб...», «Шайтанат») сюжетида воқеалар силсиласи етакчилик қиласи.

2. Автобиографик характердаги асарлар («Давр менинг тақдиримда» — А. Мухтор, «Наврұз» — Н. Сафаров) да характер етакчи вазифасини үтайды.

3. Тарихий романлар («Навоий» — Ойбек, «Юлдзули туңлар» — П. Қодиров) сюжеттида воқеа ва характер бирликта қаралат қылади.

4. Замонавий романлар («Күтлуг қон» — Ойбек, «Құшчинор чироқлари» — А. Қаҳхор) сюжеттің даставал характер, кейинча воқеа мантиғи устунлик қылади ва ш.к.

Бадий асар сюжетининг турли-туман күринишилари бұлнишидан қатын назар бош муддао—асардаги характерларнинг равшан ва чуқур тақдиллідір. Шунинг учун ҳам «сюжет-хаётни тадқиқ қилишдір» (В. Шикловский).

Бадий асарда содир бұладиган бирор иш (фикер, қилик, күлгү, пичинг...) ёки воқеа-ходиса тасодиғий бўлмай, балки ҳар бирининг воқе бўлиш жойи, вақти, сабаблари аниқ бўлиши ва у маълум характердаги ғоявий юкнинг зарур заррасини очишга бўйсинган бўлиши шарт: шу билан у ёзувчи томонидан ўқувчи ишонадиган тарзда асосланиши талаб қилинади. Бу **асослаш (мотивировка)дир**.

... Асарнинг бадий таъсирдорлигида асослашнинг аҳамияти жуда катта. Асосланмаган қилик, воқеа ва фикр (киши томонидан айтилган сұз) — тасвириңнинг ҳаққонийлигини бузади. «Ўткан кунлар»нинг энг кучли томонларидан бири — унда асослаш талабига қатый риоя этилганидір», — деб ёзади Иzzat Отахонович Султонов ва асослашнинг қатор намуналарини мисол келтиради:

Ёзувчининг ниятича, Кумуш, ота-онасидан узоқда, ёлғизликда (улар иштирокисиз — Х.У.), ҳалок бўлиши керак; Кумушнинг фожиасида (бинобарин, эски одат ва кундошликтин оқибатларини) яна ҳам бўрттириб тасвиrlаш учун муаллифнинг шундай ният қилгани романнинг сұнги боблари мазмунидан англашилиб турибди. Аммо, одатга биноан, қизнинг туғиши олдидан она унинг ёнида бўлиши керак. А. Қодирий Кумушнинг ёлғизликда ҳалок бўлишини асослаш учун Ойшабиби (Кумушнинг бувиси) ўлимини худди шу пайтда бўлган воқеа қилиб тасвиrlайди. Табиийки, азали Офтобойим яқин орада Марғилондан кетолмайди. Оқибатда, Офтобойим ва Мирзакарим қутидор фақат

Кумушнинг дафн маросими ўтгандан кейингина Тошкентга етиб келади. И. Султон, 185-бет).

Бадий асар сюжетига алоқалар энг кичик (аслида энг катта) муаммолардан бири — **бадий деталь ва тафсилотлардир**. Чунки «Деталларни ҳаққоний тасвирлашдан ташқари, типик характерларни типик шароитда тасвирлаш—реализмдир» деган таърифни кўпчилик ёд билади. Бундан кўринадики, сюжет воқеалари (типик шароит) типик характерларни намоён қиласкан, бу вазифани деталларсиз, деталларнинг ҳаққонийлиги, аниқлиги, таъсирчанлигисиз тўла руёбга чиқара олмайди. Демак, асар деталсиз (уни «зарра» деб атасак), тафсилотсиз яшай олмайди.

Бадий зарра ва тафсилот «кўз илғамайдиган ҳар бир майда нарсани» (А. Пушкин) барчага бўрттириб кўрсатади, шу сабаб «романистнинг санъати ҳамма деталларни ҳаққонийлиги»га боғлиқ (Бальзак). Дарвоқе, унда (энг майда заррада) бутун бир коинот (худди томчилади) кўёш акс этганидек) жойлашади.

«Деталь — санъатнинг миниатюра модели»¹ экан, демак «ҳамма гап тафсилотларда» (И. Тургенев)дир.

«Ўткан кунлар»га бир нигоҳ ташлайлик:

«— Нега қочасиз? Нега қарамайсиз? — деди бек.

Кумушбиби шу чоққача қарамаган ва қарашни ҳам тиламаган эди. **Мажбурият остида, ёв қарashi билан секингина душманига қаради...** Шу қарашда бир мунча вақт қотиб қолди. Шундан кейин бир неча қадам босиб Отабекнинг бетига яқин келди ва эсанкираган, ҳаяжонланган бир товуш билан сўради:

— Сиз ўшами?

— Мен ўша, — деди бек...» (60-бет).

Мана шу парчада биз таъкидлаган («Мажбурият остида, ёв қарashi билан секингина душманига қаради»: «Сиз ўшами?») иккита ҳолат ва нутқий деталнинг ўзиёқ Кумуш ҳолатини ва муҳаббатининг тарихини шунчалик яққол кўрсатадики, унинг ўнлаб саҳифалардаги тасвири бу ишни бажара олмаган бўларди. Чунки бу икки «зарра» нишонга тўғри урган: Душманга қарашни истамаслик, мажбурият-ла қарагач, севганини — баҳтини кўриш ва «Сиз ўшами?» сўзларига бутун борлигини (орзуларини, қийналишларини, зориқишилари-

¹ Е. Добин. Сюжет и действительность. Искусство детали, Л., 1981 год, стр. 304

ни, севгисини, ибосини, самимийлигини, қалбини...) баҳшида этиш... Қисқа ва содда, равшан ва таъсирдор (Биринчи бўлиб кўзга ташланади ва китобхонни лол қолдиради). Типик ва ўзига хос.

«Баъзилар асарга чиройли деталь киритишга ўч бўлади. Ўша деталь чиройли бўлса бордир. Аммо асарнинг бош мақсадига хизмат қилмаганидан кейин тегирмончининг маҳсисига ўхшаб қолаверади, оёқни бир қоқсангиз ёпишган ун гарди тушиб кетади-ю, буришган маҳси кўриниб қолади.

Деталь пардоз эмас, хусн бўлиб асарни очиши керак» (А. Қаҳҳор). Ана шундагина деталь ва тафсилотлар китобхонда характер ҳолати, шароит хусусияти ҳақида асосли тасаввур уйғотади.

«Ўткан кунлар»даги Ўтаббой қушбеги портретини аниқ кўриш учун, уни бўлакларга ажратайлик:

«Тўрдаги кичкина эшик очилиб
ичкаридан
тўла юзли,
ўсиқ қошли,
огир қарагувчи кўзли,
сийрак соқол,
ўрта бўйли,
устидан кимхоб тўн кийиб,
белига қилич осган
қирқ беш ёшлар чамасида
бир киши кўринди» (70-бет).

Тафсилотлар занжири ана шундай қаторлашгани сабабли қушбеги қиёфаси жонланади. Кўринадики, «тафсилот кўплиқда таъсир қиласида. Деталь яккаликка интилади» (Е. Добин). Деталь тафсилотга нисбатан қисқароқ бўлади, бир неча «зарра»нинг йифиндисидан тафсилот яратилади.

Шу ўринда яна бир «арзимас майда-чуйда», «икирчикир» ҳақида гапириш ўринлига ўхшайди. «Кўпгина ёзувчилар, асарларидағи тиниш белгиларга, абзацларга эътиборсиз қарайдилар. Ҳолбуки, «Тиниш белгилар фикрни бўрттириш, сўзларни тўғри таносибга келтириш ва жумлаларга енгиллик ва тўғри оҳанг баҳш этишга яратилган».¹

Ёзувдаги энг кичик белгилардан бири вергул... Ле-

¹ К. Пастовский. Олтин гул, Т., 1967, 137-бет.

кин унинг қудрати шунчаликки, мусулмонни ширк эгасига айлантириши мумкин. «Йўқ, Аллоҳнинг ҳар бандаси гоҳ ҳуд, гоҳ бехуд тушлар кўрар...» жумласидаги биринчи вергулни олиб ташланг-чи, дахрийнинг айнан ўзига айланасиз...

Хуллас, бадиий асарда «майда-чўйда», «икир-чикир» деган тушунчаларга ўрин йўқ. Энг кичик зарра — микрорэлемент ҳам асарда инсонийлашар экан, унга эътиборсизлик қилган ёзувчи инсонийликдан ҳаққоний даре бериши, «халқнинг ўқитувчиси», «туйгулар тарбиячиси» (Ч. Айтматов) бўлиши мумкин бўлмаса керак.

Композиция. «Хаос (боши-кети йўқ,чувалашган фикр-ўйлар) — бирорта чинакам, юксак ва поэтик ижод дебочасидир. Даҳо нури бу зулматни ёриб ўтса бас. Шу чоққача бир-бирига рақиб бўлган кучда тенг зарралар муҳаббат ва уйғунлик ила жонланади, бари бақувватроқ заррага жамланиб, кўркам қиёфа касб этади, кристаллар янглиғ чўзилиб тог сингари қад кўтаради, денгиз каби мавж уриб тошади ва унинг жонли кучи янги жаҳон баҳтномасини баҳайбат ҳарфлари ила битажак»¹ (Тарькиллар — Ҳ.У.)

Ҳар бир нарса, ҳодиса жонли қиёфа касб этганда-гина (мазмун ва шакл каби яхлитлашганда) ва ўзида ҳётнинг моҳиятини гўзал ифода қилганида — бетакрорлиги билан киши диққатини жалб этади. Бадиий асар ҳам ўзидаги минглаб, миллионлаб зарраларни мутаносиблик билан бирлаштирганда ва бўлиши мумкин бўлган ҳёт моҳиятини, ғоясини, яхлит ва бетакрор қилиб жонлантирганда унинг қудрати «янги жаҳон баҳтномасини» яратади.

«Жаҳон баҳтномаси»ни яратиш—бадиий асар композициясини ҳам заруратга айлантиради. Чунки ҳар қандай асарнинг гоявий-эстетик таъсири — ундаги шаклнинг (образ, сюжет, тил каби) мазмун (ғоя) билан уйғунлашувига, бу ҳодисанинг бетакрорлигига боғлиқки, бу вазифани асар композицияси воқе қиласи. Композицияда ҳам ёзувчи нуқтаи назари (ғояси) ҳал қилувчилик вазифани бажаради. Шу асос туфайли ҳар бир асарда, даставвал, композицион марказ (Л. Толстой) тайин этилиши шарт, яъни композициянинг «ўқ томири»ни аниқлаб олиш лозим бўлади; ана шу «ўқ томири»га боғлиқ ҳолда асар қисмчалари, зарралари ўз

¹ Қаранг: Пастовский. Олтин гул, Т., 1967, 186-бет.

ўринларига, тайин жойларига, вазифаларига эга бўла-дилар.

А. Қодирий «Ўткан кунлар»да тасвир марказига — XIX асрдаги «хон замонлари»нинг энг кирлик, қора кунларини қўяди ва бу вазифани Отабек, Кумуш, Зайнаб, Юсуфбек ҳожи, Ўзбекойим каби характерларга юклайди.

Асарнинг қолган барча компонентлари ва образлари ана шу марказ («ўқ томир»)га ва марказий характерлар (бош образлар)га буйсинадилар, бош гояни очиш йўлида яшайдилар, заҳмат чекадилар — умргузаронлик қиладилар.

Жумладан, романдаги «ўз замонасининг машҳур девонаси», «қизиқ ҳаракатлари ва тутал сўzlari» билан ҳаммани қизиқтирувчи Қовоқ девона образини кўз ўнгимизга келтирайлик. «Хон замонларида «Оч қоринга салимсоқ еб, кўкчой ичишдан зериккан кишилар чойхонада» ўтирас эканлар, девонанинг қовоқлари касбини айттириш орқали даврдан, даврнинг улуғлари устидан куладилар, уларни эрмак қилиб хуморларини ёзадилар:

«Қовоқ девона белидаги қовоқлардан битта эгри маймоини кўрсатиб: — Манов Мусулмон чўлоқ, — деди, унинг ёнидаги кичкина томоша қовоқни туртиб: бунов, Худойбачча (Худоёрбачча), — деди, Сув қовоғини эркалаб «Норкалла» — (Нормуҳаммад қушбеги), — деди. Қолган иккита силлиқ қовоқчаларни «носқовоқ, юпқа томоқ», — деб қўиди. Эрмакчилар кулишдилар»¹.

Биринчидан, ҳалқнинг бунчалик абгорлигини Қовоқ девона ҳаёти, ҳолати, у ҳаракат қилаётган шароит исботлаб, у даврнинг кир, қора кунлар эканига шаъма қилса, иккинчидан, Қовоқ девона ва унинг тўйдан олган белбоги воқеаси орқали «кўз оғрифи», «қоратегин», «юзига чечак чиққан» — Ҳомид, Отабекнинг ёлғиз ўғил эканини, тошкентлик қизга уйланганини билиб олади, ана шу гоявий юкни бажарганидан сўнг Қовоқ девона роман саҳнасида бошқа кўринмайди.

Композиция бадиий асарнинг барча унсурлари билан узвий боғлиқ эканини унинг сюжет билан алоқасида ҳам яққоли кўриш мумкин. Ёзувчи гоявий ниятига ва асар композициясининг «ўқ томири»га мувофиқ сю-

¹ А. Қодирий. Ўткан кунлар. Мехробдан чаён. Т., 1994, 154-бет.

жет бўлаклари турли-туман тарзда жойлаштирилиши (композициялаш) мумкин.

Жумладан, «Ўткан кунлар»да тадрижий тартиб (Муқаддима — дастлабки ҳолат — тутун-воқеа ривожи — кульминация — ечим — хотима) сақланса, баъзи асарлар («Ўғри» — А. Қаҳҳор) тутундан, баъзилари («Кўр кўзининг очилиши» — А. Қаҳҳор) кульминациядан бошланади. Ва ҳаммасида ҳам сюжет бўлаклари тасвирланётган ҳаёт парчасини яққолроқ ва таъсирчан гавдалантиришга, характерларни чуқур ва ҳар томонлама тасвирланишига, оқибатда, асар гоясининг таъсирдорлиги ва жонлилигига (юқувчанлигига) хизмат қиладилар.

Композиция ҳодисаси — асарнинг танаси (вужуди) десак, асарнинг қолган унсурларининг ҳаммаси ҳам унинг ичида яшайди, шу жиҳатдан сюжетнинг бўлаклари ҳам, сюжетдан ташқаридаги қисмлар (асар номи, эпиграф, лирик, фалсафий, публицистик чекинишлар; қўшимча лавҳалар, пейзаж, портрет, руҳий таҳлил ва ҳ.) ҳам композициянинг ичида ўз ўринларида ҳаракат қилишлари билан айни пайтда, композициянинг баркамоллигини таъминлашлари лозим. Бу композиция (вужуд)нинг мазмун (руҳ, фоя) билан яхлитлиги (бир-бирига ўтиши, тўлдириши, жозиба ато этиши)дан далолат беради, деганидир.

**«Кўйида йиғлар эдим мен зор ҳар беморга,
Энди йиғларлар бари беморлар мен зорга.**

Ошиқ ўз севгилиси кўчасида ҳар беморга, яъни ишқ дардига гирифтор бўлганларга ўз ҳасратини айтиб зор йиғларди. Бу ҳасрат шунчалик қайгули, шунчалик жон ўртар эканки, аҳли дард — беморлар ўз дардларини унугиб ошиқи-зорга қараб йиғлай бошладилар.

Чуқур фамгин ҳиссиёт ифодаси баробарида бу байт ажаб санъат намунаси сифатида кишини ҳайратга солади. Ҳолатга мос байт ичида сўзларнинг, сўз қўшимчаларининг маъно товланишлари фақат Навоийга хос баркамол санъаткорлик билан намоён этилади. «Зор» сўзи бир ўринда инсон ҳолати, сифати маъносида келса (мен-зор), иккинчи ўринда ҳаракат сифатида (зор йигламак). «Йигламак» сўзи биринчи сатрда айтмак, шикоят қилмак маъносини билдирса, иккинчи сатрда ачинмак, ҳамдард бўлмак маъносини ифода қиласи.

«Бемор» сўзи бошда «ишқ аҳли», «дард аҳли» кейинда «хаста», «касал» маъноларига яқин келади.

Хатто «fa» құшымчаси икки үринда икки хил маъно товланишга эга.

Байтни хаёлимда такрорлайман:

*Күйіда йиғлар әдім мен зор ҳар беморға,
Энди йиғларлар бари беморлар мен зорға.*

Такрорлаганим сари бамисоли олмосда нур жило-лангандек янги-янги қирраларни кашф қыламан»,¹ — деб ёзади шоир Эркин Вохидов. Шоирни шоир күзи билан күриш, байт таҳлилини ва у үйғотган ҳайратини келтиришдан мақсад, асар мазмунни (инсон қалбига чўккан зору андуҳ ифодаси)нинг бетакрорлиги, чукурлиги композициянинг ҳам ўзига хос оламини, таъсирчан ва завқлигини юзага чиқарганини кўрсатмоқдир, яъни байтдаги биронта сўзнинг бошқасига алмаштиришнинг, биронта сўзнинг үрнини бошқаси билан ўзгатиришнинг имкони йўқлигини, ҳолат ва фикр мантиқининг монолитлигини таъкидлашдир.

Шунинг учун ҳам асар композициясига эътиборсизлик баёнда эзмаликка, тасвирда меъёрнинг бузилишига олиб келади, зарурати бўлмаган мавзуларнинг асаргла киритилишига, кераксиз такрорлар ҳисобига асарнинг бесўнақайлашишига сабаб бўлади. Бу қонуниятни ёзувчи Ўткир Ҳошимов ҳам шундай таъкидлайди:

«Асар бинога ўхшайди. Фақат бино фиштдан қурилади, асар эса сўздан. Энди бир нарсани тасаввур қилинг: битказилган бинодан битта фиштии суғуриб олсангиз, унинг ҳуснига шикаст етади. Ўнта фиштии кўчирсангиз, бино босиб қолади...

Шундай асарлар борки, бутун-бутун жумлаларни олиб ташласангиз ҳам, юзта сўзни ўчирсангиз ҳам, мингтасини үрнини алмаштирангиз ҳам ҳеч нима ўзгармайди...

Бунақанги «асар» бино эмас, вайронадир!»

Шунинг учун ҳам санъаткор зарур сўзни топища баязан F. Фуломдек қонига ташна бўлади, А. Ориповдек анча кунлар безовта юради.

Ҳа, Абдулла Орипов «Она сайёра» шеъри ёзиб бўлингач, роса олти ойдан сўнг чоп эттиради. Сабабини суриштирганда, у шундай дейди:

«Унда («Она сайёра»да — Ҳ.У.) «Бир зумлик безовта ўйлар сўнгиди, яна рухсорингга термуламан жим»

¹ Э. В. оҳидов. Шоиру шеъру шуур. Т., 1987, 99-бет.

деган сатрлар бор. Унинг дастлабки нусхаларида «безовта» сўзи ўрнига «ташвишли», «ғамгин» ва шунга ўхшаган сўзларни ишлатгандим. Аммо, назаримда, улар жойига тушмагандек туюлаверди. «Қанақа сўз топсам экан?» деб анча бош қотирдим. Бир куни менинг ҳолими ни кўриб, ўртоқларимдан бири «Нега бунчалик безовтасиз?» деб қолувдики, ўша мен хуноб бўлиб излаган сўзим ана шу «безовта» эканини ҳис қилиб, суюниб кетдим-у, дўстимга: «Раҳмат! Энди безовта бўлмайман!», дедим»¹.

*«...О, бунча дардкашсан, она сайёра.
Сен ҳозир сувратсан кўзим ўнгидা,
Эшита билмасман сўзимни балким.
Бир зумлик безовта ўйлар сўнгидা,
Яна руҳсорингга тикиламан жим».*

Ёзувчи П. Қодировнинг «Юлдузли тунлар» романида Шайбонийхоннинг Қоракўз бегим билан учрашуви лавҳаси бор («Юлдузли тунлар», 1979, 296—297-бетлар)»

Бизнингча, роман композициясида бу тасвир ортиқадир, Шайбонийхоннинг аввал кўрсатилган разиллигини ва бузук хулқининг янги қирраларини кашф этмайди. Қолаверса, олий табақа аёлларининг «галвира» қилиқларини меъёrsиз ошкора кўрсатиш ўзбекона туйгуларимизга, миллий руҳимизга унчалик ёпишмайди...

Сюжет характер (образ)ларнинг шаклланиши ва ривожланиш тарихини кўрсатувчи воқеалар силсиласи сифатида мазмун ҳодисаси бўлса, композиция асарнинг ташқи кўринишини гўзал ва таъсирчан қилувчи, мазмунни ўз ичидаги ёрқин ифодаланишига имконият яратувчи, асарнинг қизиқарли ва ўқимишли бўлишини таъминловчи шакл ҳодисасидир. Мазмун шаклланиши, шакл мазмунлашиши каби қонуният бу унсурларда ҳам такрорланади ва «бадиий оламнинг модели»ни яратишида асос бўладилар.

IV. ТИЛ ВА ОҲАНГ

Таянч сўз ва иборалар: Бадиий тил. Образли тил. Татьсирдор тил. Қисқа ва равон тил. Маънодор ва сиқиқ

¹ А. Орипов. Эҳтиёж фарзанди, Т., «Ёш гвардия», 1988, 110-бет.

тил. Халқчил тил. Содда бүёқдор тил. Муаллиф нутқи. Муаллиф образи. Персоиажлар нутқи. Оҳанг.

Ёзувчи Алексей Максимович Горький «...бадиий адабиёт қандай элементлардан иборат?» — деган саволга жавобини шундай бошлайди:

«Адабиётнинг биринчи элементи — тилдир. Тил — адабиётнинг асосий қуролидир, ҳаёт ҳодисалари, фактлари билан бирга унинг материалидир... Сўз — барча фактлар, барча фикрлар либосидир. Аммо ҳар бир факт замирида ижтимоий маъно бор, ҳар бир маъно замирида эса, бир ёки иккинчи фикр нега бундай-у, нега ундаи эмас, деган сабаб бор. Фактлар замирида яши-ринган ижтимоий ҳаёт маъносини унинг муҳимлиги, тўлалиги ва ёрқинлигича тасвирлашни ўз олдига вазифа қилиб қўйган бадиий адабиётдан равон, тушунарли тил, пухта танланган сўзлар талаб қилинади»¹ (Таъкидлар — X.У.).

Адабий асарни яхлит, жонли қилувчи асосий куч — бадиий тилдир. У шунинг учун ҳам бадиий асарнинг ҳамма ҳужайраларида яшайди, шу ҳужайраларнинг тириклигини таъминлайди. Агар асарни миллионлаб сўз-ҳужайралардан ташкил топишини кўз ўнгимизга келтира олсак, гоя ва мавзу ҳам, образ ва характер ҳам, сюжет ва композиция ҳам қўйингки, бадиий асарнинг ҳамма унсурлари ҳам ана шу асосдан бунёд бўлади, айни пайтда, уларсиз бадиий тил яшай олмайди. Асарни жонли вужудга ўҳшатсак, шу вужуднинг моҳиятини ифодаловчи бадиий тил руҳ (жон), ҳар бир сўз эса ана шу руҳнинг ришта (томир)ларидир. Руҳ ва вужуд (мазмун ва шакл) шунчалик уйғунлашганки, улар вобасталиқда тириладилар, ажралганда ўладилар. Тил бадиий асарнинг шакли эмас, балки шакл яратишнинг универсал воситаси бўлиб майдонга келади (И. Султон), айни пайтда, мазмунни воқе қиласди.

Адабий жараёнда бадиий тилнинг қанчалик аҳамият касб этишини ёзувчи Ўткир Ҳошимов шундай ифодалайди:

«Мактаб ўқитувчисининг Сўзи ўттиз болага етиб боради.

Дорилфунун домласининг Сўзи юз талабага етиб боради.

¹ А. Горький. Адабиёт ҳақида, Т., 1962, 239—240-бетлар.

Нотиқнинг Сўзи минг тингловчига етиб боради.

Қаламкашнинг Сўзи бир йўла ўн минг, юз минг китобхонга етиб боради. Демак, унинг Сўз маъсулияти ҳам бошқаларнидан минг ҳисса ортиқроқдир».

Хўш, бадиий асар тилининг ўзига хос хусусиятлари, поэтик дунёси (ёрқинлиги, ифода-тасвир қуррати, тириклиги...) сирлари қандай воқе бўлади?

Адабиёт — сўз орқали бадиий тасвирлаш санъати экан, бадиий тил, даставвал, образлилик хусусияти билан намоён бўлади, яъни ҳаётнинг жонли манзарасини яратади ва кўрсатади. Абдулла Қаҳҳорнинг «Ўғри» ҳикоясидаги қўйидаги парчага эътибор берайлик:

«Кампир тонг қоронғисида хамир қилгани туриб ҳўқизидан хабар олди.

О!... Ҳўқиз йўқ, оғил кўча томондан тешилган... Дехқоннинг уйи куйса куйсин, ҳўқизи йўқолмасин. Бир қоп сомон, ўн-ўн бешта хода, бир арава қамиш-уй, ҳўқиз топиш учун неча замонлар қозонни сувга ташлаб қўйиш керак бўлади.

Одамлар дод овозига ўрганиб қолган: бирорни эри уради, бирорнинг уйи хатга тушади.. Аммо кампирнинг додига одам тез тўпланди. Қобил бобо яланг бош, яланг оёқ, яктақчан оғил эшиги ёнида туриб даф-даф титрайди, тиззалири букилиб-букилиб кетади; кўзлари жовдираиди, ҳаммага қарайди, аммо ҳеч кимни кўрмайди. Хотинлар ўғрини қарғайди, ит ҳурди, товуқлар қақағлайди. Кимдир шундай кичкина тешикдан ҳўқиз сиғишига ақл ишонмаслиги тўғрисида кишиларга гап маъқуллайди».

Ёзувчи сўз билан бор бисоти — ҳўқизидан ажраган камбағал фожиасини шундай ифодалайдики, ундан Қобил бобонинг гангиганидан «яланг бош, яланг оёқ, яктақчан»лигини ҳам, фалокатдан «даф-даға титрашини» ҳам, фавқулоддаги зарбадан «тиzzалири букилиб-букилиб кетиши»ни ҳам, «кўзлари жовдираши»ни... ҳам кўз ўнгингизда яққол кўрасиз, дод овозига етиб келгандарнинг ҳолатларини ҳам, ҳаракатларини ҳам, уларнинг ўзаро муносабатларини ҳам аниқ тасаввур қила оласиз.

Бунга ёзувчи тилни умумлаштириш, индивидуаллаштириш, бадиий тўқимадан фойдаланиш, эмоционал таъсирдорликка эришиш орқали эришади. Ҳикоядаги камбағал дехқонлар яшаётган шароитни майдачуйдаларигача бўрттириб кўрсатадиган сўзларнигина

танлайди ва ўтмиш ҳаётининг чуқур маъноли, ачинарли ва ёрқин манзарасини яққол гавдалантиради.

Ҳикоядаги барча персонажларнинг тилини индивидуаллаштириш орқали уларнинг қиёфаси конкретлаштирилади.

Жумладан, «бурунсиз элликбоши», «пант товуш»да «Ҳўқизинг ҳеч қаёққа кетмайди, топилади!» қабилида менсимасдан, ўзидан ёши анча улуг одамни сансира бапирса, бу фожиага лоқайдлигини яққол кўрсатса, «Амин чинчалогини иккинчи бўгинигача бурнига тикиб кулади».

« — Йўқолмасдан илгари бормиди? Қанақа ҳўқиз эди?

- Ола ҳўқиз...
- Яхши ҳўқизими ё ёмон ҳўқизими?
- Кўш маҳали...
- Яхши ҳўқиз бирор етакласа кета берадими?
- Бисотимда ҳеч нарса йўқ...

— Ўзи қайтиб келмасмикан?... Бирор олиб кетса қайтиб кела бер, деб қўйилмаган эканда! Нега йигланади? А? Йигланмасин!, — тарзида гапиради. Олдида турган қариянинг тақдирини эмас, балки машшатдан кейин нафсини ором олдириш билан овора бўлади, амал фуруридан янада ҳаволаниб учинчи шахс (ўтимизиз феълнинг мажхул нисбати шахсиз шакли) номидан гапиради, «чинчалогини этигининг остига артиб» суюнчи (чашна) сўрайди. Аминнинг қўполлиги, фаросатлизлиги, камбағални менсимаслиги, унинг фожиасидан роҳатланиши ва уни мазах қилиш жараённада нафси ўпқонини янада тўлдиришга ҳаракати ҳаётий гавдаланади.

Қобил бобонинг ярим-ёрти сўзларидан, фикрларини тўлиқ ифода этишга имконияти йўқлигидан — унинг ожизлиги, ҳамон караҳтлиги, аянчли тақдирни манаман деб турибди.

Мана шу қисқагина лавҳада — Қобил бобо, элликбоши ва Амин бетакрор ва аниқ шахслар тарзида гавдаланади, уларнинг ўзаро муносабатларидан характерлари, қалбларидаги ўй-хәёллари «тебранишлари» ишончли очилади. Чунки ёзувчи уччала образнинг ички мазмуни (ғоявий мағзи)га етиб боргани, яъни Қобил бобо сингари қадр-қиммати ерга урилган, бошига «ташвиш» тушган камбағалларнинг эл-юрт устунлари томонидан сўнги бор-шудлигача талон-тарож қилиниши,

«Отнинг ўлими — итнинг байрами»га айланиши ҳодисасини — объектив ҳақиқатни тұлиқ кашф этгани учун ҳам ана шу мазмунни ифодаловчи сүз ва иборалар қуюлиб келади, деталлар қаҳрамонлар руҳиятини барала күрсатади. Демак, бадий тил — ҳар қандай асарнинг ички мазмунни (ғояси, характеристики)ни очиши қонуният эканлиги ва ана шу қонуният бадийликнинг моҳиятини күрсатиши аксиомадир.

Бундан ҳар қандай сүз бадий асарда «ўз «юки»га эга бўлиши керак деган қоида келиб чиқади. «Кунларнинг бирида хотира дафтариға ҳалқнинг ҳазил-мутойибаларидан «Йўқолмасдан илгари бормиди?» деган иборани ёзиб қўйдим. «Ўгри» ҳикоясини ёзаётганимда шу иш бериб қолди. Шунчаки беғараз ҳазил учун айтиладиган бу иборани кекса деҳқон ҳўқизи ўғирланганидан шикоят қилиб борганда аминнинг тилидан айтиргандим, ўткир пичинг маъно касб этди. Менинг ихтиёrimдан ташқари ижтимоий умумлашган кучга эга бўлди, айни чоғда индивидуал шахс характеристини очиб юборди»,¹ — дейди А. Қаҳдор.

Демак, ёзувчи ҳар бир «микро» образ — сўзни ишлатганда — тасвирланаётган кишиларнинг ҳис-туйғу ва ҳаракатларини яққол гавдалантирсинг, улардаги маънони китобхон чуқур англасин, кўз ўнгидаги «таниш бўлган нотанишларни» аниқ кўрсинг. Ана шундагина (сўз — жозибага, ширага, сермаъноликка, оҳангга айланганда) асар воқеаларини, қаҳрамонлар ҳиссиятини китобхон бирга кечира бошлайди, «бўлиши мумкин бўлган ҳаёт» ичидаги яшайди, ўшандан таъсиранади: Қобил бобонинг аянчли тақдиринга ичи ачишади, ҳақиқий ўғрилардан — эл-юртнинг амалдорлари саъй ҳаракатларидан газабга келади. Сўз яратади, бадий оламдан янги оламни бунёд этади.

Бадий тилни характеристловчи, унинг образлилигидан туғиладиган муҳим ҳусусиятларидан бири — маънодорлиги (афоризм) ва қисқалиги (лаконизм)дир. Бу ҳам асарнинг бадий моҳиятидан келиб чиқувчи талаб бўлиб, санъаткор мағизли сўзни ишлатиб, кўп фикр айтишга эришиши лозим.

«Чин сўз мұътабар; яхши сўз қисқа — мухтасар... Сўзи ҳисобсиз, ўзи ҳисобсиз. Сўзида паришонлик — ўзида пушаймонлик» (А. Навоий)дир. Ҳа, ҳадиси шарифда

¹ А. Қаҳхор. Ҳаёт ҳодисасидан бадий тўқимага: «Адабиётимиз автобиографияси», Т., 1973, 215-бет.

айтилганидек, «Сўзда сеҳр бор, шеърда эса ҳикмат». Шундай экан, бадиий асар моҳиятини очишга хизмат қилмайдиган биронта сўз ишлатмаслик санъатини эгаллаган ёзувчи доимо ютади. Уларнинг наздида сўзни тежаш зарни тежашдан қимматлидир. Адабий лақмаликка йўл қўйган, фойдасиз сўзларни қаторлаштиришдан эринмайдиган, сўзга — илоҳий неъматга ўйсизларча ёндошганлар ҳаммавақт ютқазишган, сабаби уларнинг китобхонга айтадиган дарди етарли пишмаган ёки бу дард ясама бўлганилигидан тили ҳам сунъийлик касб этади.

Шу ўринда ёзувчи Пиримқул Қодировнинг «Юлдузли тунлар» романига, унинг уч хил нашрига бир нигоҳ ташлайлик.

Асар ёзиш жараёни ёзувчи ижод лабораториясида ҳар хил кечади. Бир тажриба, иккинчи мукаммалроқ тажрибани келтириб чиқаришга сабаб бўлганидек, ёзилган асарни қайта ишлаш жараёни ҳам лаборатория тажрибасига ўхшайди. Ҳаёт воқеликларини қузатиш натижасида ёзувчидаги янги эпизодлар, мукаммалроқ лавҳалар, олдингисини рад этувчи асосли фикрлар юзага келар эканки, натижада, ёзувчи ўз асарини мукаммаллаштиришга эҳтиёж сезади.

Асарни қайта ишлаш жараёни ҳам осон кечмайди. Баъзан асарлар қайта ишланганда китобхонга манзур бўлади. Айрим ҳолларда эса асарни қайта ишлаганда унинг бирбутунлиги, таъсирчанлиги заифлашади.

Хуллас, асарни қайта ишлаш — пластик операцияни бошидан кечирган инсонга ўхшайди. Унинг қандай кечиши, қайси натижаларга олиб келишини тасаввур қилиш учун Пиримқул Қодировнинг «Юлдузли тунлар» романининг 1979, 1990 ва 1999 йилдаги нашрларини таққослаб, тадқиқ этмоқни лозим кўрдик. Романинг 1979 йилдаги нашрида «Андижон. Гул ва қуон» бобида шундай эпизод бор: Аҳмад Танбалга навкар хабар берар экан, у дейди:

« — **Бек жаноблари, севинчи беринг, — деди. —**
Бобур Мирзо қўргонга кирмай қайтиб кетдилар.

— Шеримбек билан биргами?

— Айни шундай!»

1990 йилда нашр қилинган роман нусхасида бу лавҳа анча ўзгарган:

« — **Бек жаноблари, севинчи беринг!** — деди. **Бобур Мирзо қўргонга кирмай қайтиб кетдилар.**

— Айни шундай!»

Кўриб турганимиздек, диалог қисқартирилган. «Шеримбек билан биргами?» деган жавоб гапи олиб ташлангану, лекин диалог давоми бўлмиш «Айни шундай» жавоб гапи қайта ишланмай, аввалги ҳолича қолиб кетган. Ёзувчи диққати ва таҳлили лавҳага кемтиклик баҳш этган. Натижада, фикр изчиллигига гализлик пайдо бўлган.

Агар биринчи мисолдаги диалогда «Шеримбек билан биргами?» деган сўроқ гап Аҳмад Танбалга тегишли бўлса, иккинчи мисолда бу сўроқ гап олиб ташланганилиги туфайли, навкарнинг «Айни шундай!» тасдиқ гапи беихтиёрий равишда Аҳмад Танбалга тегишли бўлаяпти. Натижада, Аҳмад Танбал нутқида сўроқ гап ўрнини тасдиқ гап эгаллади. Демак, қисқа диалогда навкар келтирган хабарни Аҳмад Танбал тасдиқлайди, бу ҳолат эса Аҳмад Танбал Бобур Мирзонинг қўргонга кирмай қайтиб кетганлигини аввалдан билганини исбот қиласди. Ҳолбуки, эпизод давомида: «Аҳмад Танбал учун бу чиндан ҳам қувончли хабар эди. Чарм ҳамёнидан битта олтин танга олиб, бўсаға олдига ташлади...» деган навбатдаги муаллиф баёнидан Аҳмад Танбалга бу хабарни эндиғина етиб келганлиги ва қувонтирганлигининг гувоҳи бўламиз. Кўринадики, муаллифнинг эътиборсизлиги натижасида китобхон бир-бирига зид бўлган тушунчага эга бўлади.

Кейинги 1999 йилдаги нашрида эса юқоридаги фализлик, яъни «Айни шундай!» гапи «Айни муддао!» гапи билан алмаштирилди, қайта ишланди, яъни:

« — Бек жаноблари, севинчи беринг! — деди. — Бобур Мирзо қўргонга кирмай қайтиб кетдилар.

— Айни муддао!»

Бу сўз узукка кўз қўйганлай ўз ўрнига тушди. Лавҳа ҳам, сўз ҳам поэтиклишди; жонланди. Чунки, Бобур Мирзонинг қўргонга кирмай кетганлиги Аҳмад Танбал учун айни муддаодир. Диалогдаги «Айни шундай!» деган гап муаллиф томонидан «Айни муддао!» гапи билан алмаштирилиши Аҳмад Танбал руҳини яққол очилишига олиб келган. «Айни муддао!» жумласи қаҳрамон табиатидан, характеристидан «оқиб» чиққани учун уни янада тўлдириб, бойитиб, аниқлаштириб, мукаммалаштириб гавдалантиради. Ўрнида, сидқидилдан айтилган оддийгина сўз қудратли ва енгилмас кучга айланади. Айни пайтда, лавҳадаги мантиқсизлик барҳам топади, фикр ёришади, силлиқлашади.

Бадиий асар тили халқ тили (жонли тил, адабий тил, бадиий тил)га асослангани сабаб, унда халқчиллик руҳи доимо устун туради. Бадиий асарларда турли жамиятлардаги ҳамма табақалар (одамлар)нинг тилига дуч келар эканмиз, уларнинг тилида қўлланилган ҳар бир сўз тушунарли бўлиши (халқ мақоллари, маталлари, иборалари, афоризмлари руҳига асосланиши) талаб қилинади; халқнинг дилидагини топиб ифодалашни асосий муддаога айлантиради. Халқчилликка «жонли халқ тили оқимидан энг ўткир, энг мувофиқ, бамаънисини танлаб олиб» (А. Горький), моҳирона ишлатиш орқали эришилади.

Маълумки, давр ҳақиқатидан келиб чиқиб «Юлдузли тунлар» асари ҳам ижодий қайта ишланди: ёзувчи диққати «кўпроқ унинг бадиий нуқсонларини тузатишига, тарих ҳақиқатини чуқурроқ очишга қаратилди».¹

Шу нуқтаи назардан мавжуд боблардаги айрим лисоний ўзгартиришлар ёзувчи мақсадига мос ҳолатни ифодалашда, қаҳрамон руҳиятини тўлиқ очиб беришда ижобий натижа берди. Чунончи, Бобур шеър ёзишни машқ қилиб юради, «лекин уларни бировга кўрсатишга уялади. Шундай бўлса ҳам, катта шоир бўлиш орзуси уни ҳеч тарк этмайди»². Ваҳоланки, орзу инсонни «ҳеч тарк этмайди» эмас, балки инсон орзу, ниятларни тарк этмаслиги, унинг ортидан эргашиши ҳаёт ҳақиқатига мосроқ. Шу ҳақиқат сўнги нашрда ўринли ифодаланган: «Шундай бўлса ҳам катта шоир бўлиш орзусини ҳеч тарк этмайди»³.

Ёки иккинчи бир мисол. Бобур беклари билан етти ойлик қамалдан сўнг эгалланган пойтахт шаҳар Самарқанддаги муҳит билан танишиб борар экан, сахҳоф (муқовачи, китоб сотувчи)лар дўконига киради. У ердаги ҳолат шундай тасвирланади: «У (Қосимбек) Самарқанд хазинаси шип-шийдам эканини, Андижондан олиб келган олтинлари кўпга бормаслигини ўйлаб, Бобир ажрататиб китобларга ташвишланиб қараб турарди. Ниҳоят, Бобир ажратиб олган китоблар ўндан ошганда, Қосимбек секин шипшиди: Амирзодам, ҳозир хизоначи йўқ...»⁴ Бу парчани ўқиган китобхон мулоҳа-

¹ П. Қодиро в. Юлдузли тунлар. Бобур. Т., Ўқитувчи, 1999, 3-бет.

² П. Қодиро в. Юлдузли тунлар. Т., 1979, 116-бет.

³ П. Қодиро в. Юлдузли тунлар. Бобур. Т., Ўқитувчи, 1999, 177-бет.

⁴ П. Қодиро в. Юлдузли тунлар. Т., 1979 120-бет.

залари айрим ноаниқликларга дуч келади: давлатни бошқариш сиёсатини, ҳокимияти аҳволини жуда яхши биладиган Бобурнинг юқоридаги ҳаракатидан Қосимбекнинг ташвишланиши ўринлимикан? Андижондан олтинларни Қосимбек «олиб келган»и учун ташвишланаётгандир, олтинлар давлат хазинасиға тегишли эмасми? Хазинани ақл ва тежамкорлик билан сарфлаётган Бобур китобларни танлаб олаётисиб, хазинанинг аҳволини ҳам ёддан чиқармаслиги бекда ташвишланиш ҳолатини уйғотмаса ҳам бўлар эди-ку...

Услубий ғализлик (такрорланиш) ва фикрий ноаниқликларни муаллиф қуийдагича таҳрир қилади: **«У Самарқанд хазинаси шип-шийдам эканини, Андижондан олиб келингган олтинлари қўпга бормаслигини ўйлаб қараб турарди. Ниҳоят, Бобур ажратиб олган китоблар ўнданд ошганда Қосимбек секин шипшиди: — Амирзодам, ҳозир хазиначи йўқ...»**¹

Бу каби таҳрирлар асарда анчагина бўлиб, Бобур шахсияти, руҳиятидаги бутунлик, баёндаги изчилиллик, аниқликни таъминлайди; ёзувчининг тил воситаларидан фойдаланишдаги маҳоратини қўрсатади. «Сўзга тушмаган сўзни айтма, Созга тушмаган ғазални» деганларидек, ёзувчининг сўз устида ишлаши асарнинг моҳиятини чуқурлаштиришга, асардаги руҳиятни жонлантиришга олиб келади. Акс ҳолда, сўз юк ташимаганда — поэтиклишмаганда, бемаъни ва қуруқ бўлиб қолаверади.

«Юлдузли тунлар» асарининг номи ҳам «Юлдузли тунлар. Бобур» деб ўзгартирилади. Бу ҳолат ёзувчининг асосий мақсади шу образ орқали ифодалангани ва асардаги асосий юк Бобур характеристига юкланганидан келиб чиқиб изоҳланиши мумкин.

Роман икки қисмдан иборат бўлиб, бу қисмлар «Аросат» ва «Фалакнинг гардиши» деб номланган эди. Иккинчи қисм кейинчалик «Тақдирнинг тақозаси» номи билан алмаштирилади. Бу ҳолат ҳам ёзувчининг айтмоқчи бўлган фикрини аниқроқ, тўликроқ, англашимиизга ёрдам беради: «фалакнинг гардиши» билан Бобурнинг кейинги ҳаёти Ҳиндистонда кечар экан, бу «тақдир тақозоси», тақдирлар «ўйини» сабаблидир.

Бадиий асар тилида унинг ўйноқилигини, тасвирийлигини, таъсирдорлигини вужудга келтиришда ба-

¹ П. Қодир ов. Юлдузли тунлар. Бобур. Т., Ўқитувчи, 1999, 120-бет.

дийи-тасвирий воситалар (ўхшатиш, сифатлаш, метонимия, метафора, истиора, литота, муболага каби), маҳсус лексик ресурслар (историзмлар, архаизмлар, неологизмлар, диалектизмлар, варваризмлар, вульгаризмлар каби), поэтик фигураналар (интонация, параллелизм, такрор, инверция, антитета, риторик сўроқ каби), сўз ўйинлари (омоним, полисемантизм каби) алоҳида аҳамият касб этадилар:

«Чиройлидир гүё ёш келин
Икки дарё ювар кокилин...»

Ҳамид Олимжоннинг «Ўзбекистон» шеъридаги ушбу образли ўхшатишдан сизнинг кўз ўнгингизда Ватанимиз — чиройли ёш келин қиёфасида, унинг кокилини юувучи икки (Аму ва Сир)дарё яққол гавдаланади. Чунки айни шу тасвир муаллифнинг Ватан гўзаллигини, ўхшаши йўқ бўстон эканлигини таъкидловчи фикрини аниқлик ва қисқалик билан очишга бўйсунади.

Баъзилар шу асосга таяниб, қайси санъаткор тилида бадиий воситалар кўп ишлатилса, ўша санъаткорнинг асарлари жозибадор бўлади, деган хulosани чиқарадилар. Ҳолбуки, бу хулоса асоссиздир. Муҳаммад Юсуфнинг «Мехр қолур» шеърини эсласангиз, унда юқорида таъкидланган воситалар яккам-дуккам учрайди, лекин шеър айтилмоқчи бўлган фикрни, ҳолатни аниқ ва таъсирчан ифода қила олади; шу асосга кўра у — бадиий тилдир:

«Нима дейсан, эй, ғаюр инсон?
Гийбатларинг қилди мени қон.
Сен ҳам бир кун ўтурсан, инон
Мехр қолур, муҳаббат қолур»

«Бадиий асар тили гўзаллигининг аниқ бир шарти бор: тасвир аниқ ва равон бўлиши, яъни тасвир этилаётган хулқ, ҳаракат ёки манзара тил туфайли ўқувчиларнинг кўз олдида аниқ ва ёрқин намоён бўлиши зарур» (И. Султон, 206-б.)

Бадиий асар тили — равон, содда, бўёқдор бўлиши бадиийликнинг зарур шартларидандир. Жумладан, Сотти Ҳусайн «А. Қодирий ҳар қандай ҳолнинг тасвирига, сўзга жуда уста» деб таърифласа, унинг бу хулоасини Ойбек ҳам тасдиқлади: «Романнинг тили ҳақиқатан бой, бўёқли, содда, ифода кучи зўр, оммага англаши-

ларли... жоңли, образли тили мусиқий, лирик жүшқин». «Үткан күнлар» тили картинали, эмоционал бир тил. Үқувчининг ҳиссига таъсир қилиш, маълум фикр, туйгуларни сингдириш учун ёзувчи тилини жуда рангдор қилғанлигини уқдириб, «асарнинг бадиий тўқимасида юзларча мақоллар, маҳсус ифодалар, тугал гаплар, қочирмалар, сўз ўйинлари ярқирашини» асарнинг турли қисмлари таҳдили орқали исботлайди. У ёзади: «Кумушнинг сўз ўйини» деган қисмда ёзувчининг тил устидаги маҳорати жуда яққол кўринади. Кундошларнинг ўзаро пичинги, кесатик, мисатиклари ва ингичка ҳийлакорликлари, кундош психологиясининг энг чукур ва тутилмас томонларининг ифодаси учун ёзувчи тили минг товланади, рангдан рангга киради, порлайди»¹

Ушбу фикрлардаги ҳақиқатни тўлиқ англаш зарурати — асарга мурожаат қилишга, кундошлар сўз ўйинидан ҳеч бўлмаганда бирини келтиришни тақоза этади; ана шундагина ёзувчининг тилга усталиги, жудаям усталиги яққол кўринади:

- Неча ёшга кирдингиз, Зайнаб опа!
 - Ўн тўққизга шекиллик.
 - Ҳали сиз бола экансиз, — деди Кумуш.
 - Сиз нечага кирдингиз?
 - Мени сўраманг, мен энди қариб қолдим...
- Зайнаб унга ҳасадланиб қаради ва кучланиб айтди:
- Ҳали ёшга ўхшайсиз-ку.
 - Неча ёшга кирган деб ўйлайсиз?
- Зайнаб Кумушнинг тўлиб етмаган гавдасига ва ўн олти ёшлар чамалик ғубор тегмаган ҳуснига ҳайрон бўлиб, мулоҳазасини айтишдан кўрқди.

Зайнабга қолса Кумуш ўзидан ҳам ёш чиқар эди.

- Мен қаёқдан билай...
- Йигирмага кирдим.
- Мендан бир ёш катта экансиз.
- Сиздан албатта каттаман! — деди Кумуш.

Кумушнинг «Албатта каттаман» деган сўзини Отабек ичида тасдиқлади, унинг ҳусндагина эмас, ақлда ва бошқада Зайнабдан неча баробар юқорида эканлигини ўйлади»².

Ана шу тажрибадан келиб чиқиб, А. Қодирий ёш ёзувчиларга деганди: «Сўз сўзлашда ва улардан жумла

¹ О й б е к. Танланган асарлар. 14-том, Тошкент, «Фан», 1979 йил, 145-бет.

² А. Қодирий. Үткан күнлар. Мехробдан чаён, 328—329-бетлар.

тузишда узоқ андиша керак. Ёзувчининг ўзигина тушуниб, бошқаларнинг тушунмаслиги катта айб.

Асли, ёзувчилик айтмоқчи бўлган фикри ҳаммага баробар англата билишда, орага англашилмовчилик солмаслиkdir. Бундан бошқа фикрнинг ифодаси хизматига ярамаган сўз ва жумлаларга ёзувда асло ўрин берилмаслиги лозим. Шундагина иборанинг тузатиб босилишига йўл қўймаган ва мустақил услуб ва ифодага эга бўлиб, ўзингизнинг қаламдаги истиқболингизни таъмин қўлган бўласиз».¹

Бу сабоқни А. Қодирий ёзувчининг бирламчи фазилати деб тушунади.

Бадий асар тили — муаллиф нутқи ва персонажлар нутқи деб номланадиган, бир-бири билан мураккаб боғланишда бўлган иккита катта қисмдан иборат.

Муаллиф нутқи ва муаллиф образи. Ҳар қандай бадий асар (бутун борлигича) ёзувчи томонидан яратилган экан, ёзувчининг салоҳияти ўша асарнинг энг кичик «жажжи» образлари (сўз)гача, тиниш белгиларигача (нуқта, вергул, ундов, сўроқ белгилари каби) сингиб кетади, уларнинг ҳар бирига ўзининг аниқ мухрини босади.

«Роман ва повестда тасвиrlанаётган кишилар муаллифнинг ёрдами билан ҳаракат қиладилар, муаллиф ҳаммавақт улар билан бирга бўлади, у китобхонга роман қаҳрамонларини қандай тушуниш лозимлигини айтиб туради, яширин фикрларни, одамлар ҳаракатининг маҳфий сабабларини тушунтириб туради, кайфиятларини табиат ва шароит тасвиrlари билан бўргтиради ва умуман, ҳаммавақт уларнинг жилови муаллиф мақсадига мувофиқ тутиб турилади, муаллиф персонажларнинг ҳар бир ҳаракати, сўзи, иши, мумаласини бемалол ва кўпинча — китобхон сезмайдиган дарожада — устунлик билан ўзича бошқаради. Бу билан у романдаги кишиларнинг бадий жиҳатдан аниқ ва ишонарли чиқиши учун ҳар тарафлама ғамхўрлик қиласи»²

Демак, **муаллиф асарни яратувчи шахс, айни пайтда, мустақил ўзига биқиқ оламларнинг — асардаги ҳамма шахсларнинг фаолиятини гоявий марказзга бўйсундирувчи «қўмондон»-ки, уни муаллиф образи деб юритиш асослидир.**

¹ А. Қодирий. Ижод машақнати, Т., «Ўқитувчи», 1995 йил, 6-бет.

² А. Горький. Адабиёт ҳақида, Т., 1962, 192-бет.

«Масалан, саҳнада Улугбек образини ўйнаётган Шукур Бурхонов бизга Улугбек бўлиб кўринади. Айни вақтда, биз унинг Шукур Бурхонов эканини ҳам унгтумаймиз, бу образда биз машҳур актёрнинг истеъодидини, санъатини, ўзига хос услубини ҳис қилиб, унинг тақорорланмас овозини, нутқини эшитамиз...

Тўғри, реалистик асарда муаллиф ўзи гўё «четга чиқиб», воқеаларни холис кўрсатаётгандай бўлади. Лекин, қаҳрамонларнинг характеристи ҳам аслида муаллиф ҳаётда кўрган, қалбida қайта яратган характеристерлардир. Қаҳрамонларнинг тили ҳам муаллиф ўзи билган ва эшитган тил материалига асосланади»¹.

Шунга асосан, бадий асарни яратган ижодий шахс — муаллиф бўлса, ана шу муаллифнинг асардаги баёни, нутқи (ҳикоячилиги) — муаллиф образидир. В. Виноградовга таянсак, ҳикоячи (баёнчи) образи ёзувчининг «артистлик» шаклидир («О языке художественной литературы», с. 122). «Бадий асарнинг бутунлиги тоянинг бирлиги, қатнашувчи шахсларнинг ишлангани кабилардан иборат эмас, балки бутун асарга сингдирилган муаллифнинг воқеликка бўлган ўз муносабатининг равшанлиги ва аниқлигидан иборатдир»².

Бу холосаларнинг воқеа бўлиши тилга келиб боғланади. Шунинг учун ҳам Пиримқул Қодиров персонажлар тили ҳам, муаллиф тили ҳам асарнинг ягона (бош) марказига келиб бирлашади, бу марказда эса ёзувчининг ўзи, унинг асосий тояси ва ҳаётга, тасвирланаётган одамларга муносабати туради, — деб асосли таъкидлайди.

«Адабиёт муалими» (А. Қаҳҳор) ҳикоясининг бош қаҳрамони — ўзини билимдон санайдиган Бақижон Бақоевнинг нутқига, фикрлари»га диққатни қаратайлик:

« — Ҳимм... — деди Бақоев, — Чехов тўғрисида ўзимнинг фикрим бор. Бошқалар нима деса десин, ҳар ҳолда унинг дунёга қарашида... Унинг дунёга қараши Пушкин ва Лермонтовларнинг дунёга қарашидан фарқ қиласди. Бир давр, бир синф, бир мамлакат ёзувчилари бўлишларига қарамасдан мутлақо фарқ қиласди!

— Чехов Пушкин билан бир даврда яшаган эмас-

¹ Қаранг: Адабиёт назарияси, I-том (Адабий асар), Т., «Фан», 1978, 333-бет.

² А. Толстой. Об искусстве и литературе. Т. I, М., 1958, стр. 233.

ку, — деди Ҳамида, — бизнинг кутубхонада унинг Максим Горький билан олдирган сурати бор. Чехов 1904 йилда ўлган бўлса керак.

Ўртоқ Бақоев бир оз ўнгайсизланди.

— Сизлар қайси Чехов тўғрисида гапираётибсизлар? Чойдан куй!.. Бу Чехов ҳақидами? Тўғри, бу 1904 йилнинг биринчи ярмидами, иккинчи ярмидами ўлган... Бошқа рўмолча бер, бундан пиёс ҳиди келаётитпи. Мен ана у Чехов, илк буржуазия реализмининг намояндаси бўлган Чехов ҳақида сўзлаётиман!'

Ҳикояда ёзувчи саводсиз, мақтанчоқ, илмий фикри йўқ ўқитувчини фош қилмоқда. Бақоев «ўзимнинг фикрим бор» дейишига қарамай, билмаган ҳолида «олди-қочди» тарзида тахминий гапларни қаторлаштириверади. Саводсизлиги, адабиётни (Чеховни) билмаслиги исботини топганда «Ўртоқ Бақоев бир оз ўнгайсизланади», холос. Ва яна Ҳамидани писанд қilmай, «олди-қочди»га ўтиб, ўзича иккита Чехов (у Чехов, бу Чехов)ни яратади; ҳақиқий Чеховни — Антон Павлович Чеховни билмаслиги рўйи-рост эканлигига ёзувчи ҳам китобхонни ишонтиради.

Демак, бадиий асарда муаллиф образи персонажлар образи билан уйгунашиб кетади, бири-бирининг моҳиятини чуқур таъсирчан, бирбутун бўлишига ва очилишига сабаб бўлади: Аслида оми, мақтанчоқ, мантиқий мулоҳаза юрита олмайдиган, ўз фанини билмайдиган, саводсизлигини ўзи ҳам тўлиқ тушунмайдиган «практикум, минимум, максимум; Детирдинг, Стендинг, Шеллинг, Меринг, Демпинг...» каби атамалар, ясама номлар билан яширадиган адабиёт ўқитувчисини яққол фош этади.

Хуллас, муаллиф нутқи ва муаллиф образи бирлашиб, асардаги барча унсурларни ўзаро алоқага киритади ва уларни яхлитлаштириб — бадиий олам моделини, яъни монолитлашган, такрори йўқ бадиий асарни яратади.

Персонажлар нутқи. Бадиий асар тилининг серқатламлиги (турфа хил одамларнинг иштироки) унда қатнашувчи ҳар бир шахснинг ўзига хос тили бўлишилигини тақозо этади ва уларнинг типик тили хусусиятларини нутқ воситасида воқе қиласи.

¹ А. Қаҳҳоғ. Асарлар, биринчи том, Ф. Фулом номидаги бадиий адабиёт нашриёти. Т., 1967, 105-бет.

Ҳар бир персонаж нутқи ана шу персонажнинг ҳаётий тажрибасига, маънавиятига, фаҳму идрокига, ҳулқу атворига, касбу корига, маданияту руҳиятига мос бўлади. Унинг нутқидан қандай одам эканлигини тўлиқ англаш мумкин. «Адабиёт муаллими»да Ҳамида «нâ-фис адабиёт муаллими» ўртоқ Бақижон Бақоевдан Чеховнинг «Ўйқу истаги» ҳикояси ҳақидаги нутқати назарини сўрар экан, даставвал, унга жавоб беришдан Бақоев қочади. Ҳамида қайта сўраганида у қуйидагича жавоб беради:

« — Чеховми? Ҳимм... буржуазия реализми тўғрисида сўзлагандан энг аввал унинг объектига диққат қилиш керак. Буржуазия реалистлари тушунган, улар акс эттирган объектив воқееликни англаш лозим бўлади. Турган гапки, Чеховнинг ижоди бошдан-оёқ, бутун моҳияти билан илк буржуазия реализми, яъни ҳимм... Мукаррам, товуқча мояк қўйдингми? Қўйиш керак, бўлмаса дайди бўлиб кетади... Тавба, товуқдан аҳмоқ жонивор йўқ — мояк қўйсанг тугади! Нима учун мояк қўйсанг тугади? Ҳуроз нима учун саҳарда қичқиради? Ажойиб психология! Биология ўқийсизларми?» (Юқоридаги асар, 105-бет)

«Ўйқу истаги»даги гўдакни ўлдирган қизга Чеховнинг муносабатини асослаш ўрнига, Бақоев буржуазия реализми ҳақида гапира бошлайди. Ҳар «ҳимм...»да фикри бошқа бир муаммога кўчади: Буржуа реализми ҳақидаги тутириқсиз тушунчасини яқунламасдан, товуқча мояк қўйишга, у яқунланмасдан хўrozга, ундан биологияга кўчади. Ана шу нутқи орқали ўзининг саводсизлигини, мантиқий фикр юрита олмаслигини, айни пайтда, ўзини билимдон қилиб кўрсатишга уринишини яққол фош этади.

Персонаж нутқи **диалог** (икки ёки ундан ортиқ персонажлар ўртасидаги сухбат) ва монолог (Персонажларнинг ўз-ўзига ёки ўзгаларга қаратилган ички нутқи)-дан иборат бўлиб, уларнинг иккаласи ҳам образ ва характеристер яратишнинг муҳим воситаларидан саналади.

Диалог жўшқин бўлиши, кишининг руҳий кечинмасини кўрсатибгина қолмай, характеристерни ҳам очиб бериши лозим (А. Макаренко) бўлса, монолог муайян персонажнинг руҳий дунёсини, қалб тутёнларини чукур очишда қўл келади.

« — Войдод, ҳалойиқ, бу қандай эркакки, хотини-

ни бирровга қүшиб қўйиб, ўзи эшик пойлаб ётади! Войдод, хотинингга қўшгани бўйдоқ йигит қуриб кетганими-ди! Иккита болам бор...

Одамлар ажратмаганда бу хотин мулла Норқўзини фажиб ташлар эди. Мулла Норқўзи, оғзини ушлаганича четланди. Хотини эшик ёнида деворга суюнганича турар, ранги мурдадай, ўзи қалтирас эди. Бегона хотин ҳушидан кетиб йиқилди. Икки киши — аёллар кириб, у фариштани уйдан олиб чиқишиди. У атлас кўйлак, лозим кийган, бошяланг, оёқ яланг, ёшгина чиройли бир йигит эди. Ҳамма жим қолди. Бу сукунатни етмиш ёшлардаги бир чол бузди. У, мулла Норқўзига қўлини пахса қилиб деди:

— Садқаи одам кетинг-э, айб эмасми?! Хотин қилиш қўлингиздан келмаса талоқ қилинг! Кўйинг-э, кўчиб кетинг маҳалладан, ё биз кўчиб кетамиз!..

Девор устида турган ўн икки ёшлардаги бир қиз девордан кесак кўчириб олиб мулла Норқўзига ўқталди.

— Ху ўл, турқинг қурсин! Бошинга солайми шу билан! Маҳаллада сасиб, ўқувчи қизларга кун бермайсану, ўзинг нотўғри иш қиласан...

Ҳамманинг диққати хотинча кийинган ва эшик ёнида ерга қараб турган йигитга жалб бўлди. Яна жимлик ҳукм сурди. Бу сукунат оғир тегирмон тоши бўлиб мулла Норқўзини янчидан юборди. У, девор устидаги қизга қараб, бўғиқ товуш билан ўшқирди:

— Сен гапирма! Сенга ким қўйибди гапиришни! Уста Мавлоннинг ўғлидан, бир ҳовуч майиз олганингни ўз кўзим билан қўрганман!..

Ҳамма кулиб юборди. Томдан кимдир қичқирди:

— Ҳа, бу кишининг хотини майиз емаган!» (Юқоридаги асар 142—143-бет).

А. Қаҳҳорнинг «Майиз емаган хотин» ҳикоясининг финал қисмини ҳукмнингизга ҳавола қилдик. Унинг таҳлилини ёзувчи ва олим Пиримқул Қодировга «юкладик», сабаби «Чумчуқ сўйса ҳам қассоб сўйсин» мақолининг амали — А. Қаҳҳорнинг тилдан фойдаланиши маҳоратини (персонажлар нутқини яратишдаги усталигини) яққолроқ англашга олиб келади деган ишончдамиз:

«Мулла Норқўзи ҳам, унинг уйига кириб дод солган хотин ҳам, кекса чол ҳам, ўқувчи қизча ҳам бу

ерда фақат бир оғиздан гапирадилар. Лекин шу қисқа гапларда уларнинг руҳий ҳолатлари, ҳар бирининг ўзига хос тили ва дили, савияси ва позицияси, ёши ва жинси яққол кўриниб туради. Мулла Норқўзини қўшмачиликда айблаётган хотин «Войдод, бу қандай эркак!» деганда биз эрни ўйнаши билан тутиб олган аёл кишининг аламини, ғазабини, түғёнини сезамиз. «Садқаи одам кетинг-э, хотин қилиш қўлингиздан келмаса, талоқ қилинг!» деган гаплар эса етмиш яшар мўйса-фиднинг дилида борини, унинг феълини, эътиқодини аниқ ифодалайди. Ўқувчи қизчанинг девордан кесак кўчириб олиб, ёмон кўрган одамига ўқталиши ҳам, «ўқувчи қизларга кун бермайсан-у, ўзинг нотўғри иш қиласан» дейиши ҳам унинг табиатига, ёшига жуда муносиб. Айниқса, «Ўзинг нотўғри иш қиласан» деган ибора бизни қизчанинг янги мактаб тарбиясини олаётганига ишонтиради. Отдан тушса ҳам эгардан тушмаётган мулла Норқўзи бир қизчага ўшқириб, унга бирорнинг ўғли бир ҳовуч майиз берганини айтганда, баттар шармандаси чиқади. «Ҳа, бу кишининг хотини майиз емаган!» деган киноя янги инсоннинг эскилик муҳиби устидан чиқарган ҳажвий ҳукми ва голибона кулгусини интиҳосига етказади.

Демак, парчада икки кишининг диалоги эмас, балки беш кишининг беш хил характердаги гапи маҳорат билан тасвирланади¹.

Одил Ёкубовнинг «Улуғбек хазинаси» романи психологик таҳлил асосига қурилган асар бўлгани учун ҳам унда монолог ва диалог чатишиб кетади. Асаддаги руҳият мавжланган сайин, уни юзага чиқарувчи бадиий тил унсурлари ҳам мавжланади; улар бирлашиб қаҳрамон қалбидаги ҳоким кучга китобхоннинг дикқатини, қалбини оҳанрабодек забт этади:

«Шаҳзода туш кўрди. Гўё у Кўксаройда, ҳарамхонага ёндош ўрадай кенг, муҳташам хонада катта базми жамшид кураётган эмиш. Базмга барча амирлар ва нуфузли беклар, девон ва сарой маҳрамлари ва шаҳзоданинг энг яқин муқарриблари йигилган эмиш. Бақавуллар олтин баркашларда таом устига таом тортишар, май дарё бўлиб оқар эмиш. Пойгода ўтирган машхур созандалар жон олувчи дилрабо куйлар чалармиш, хо-

¹ К а р а н г: Адабиёт назарияси, I том, Т., «Фан», 1978, 328-бет.

нанинг тўридаги ҳарир парда орқасида эса ярим яланғоч нозанинлар зеб-зийнатларини ёқимли жаранглатиб, нозу карашмалар билан минг мақомда хиромон қиласмиш... Тўсатдан эшикдан амир Султон Жондор Тархон кириб, саждага бош эгармиш. Шаҳзода амир Жондорни кўриб, ўрнидан туриб кетармишу:

— Ушланглар бу фитначини! — деб бақиравмиш.

— Бу каззоб доруссалтанатда яшириниб, бизга чоҳ қазиб юргандур!

Тўрда ўтирган бир неча амирлар ўринларидан сакраб туриб, қиличларини яланғочлар эмиш. Лекин амир Жондор бунга парво қилмай, шаҳзодага юzlаниб яна таъзим қиласмиш.

— Пушти паноҳим! Фақир фитна-фасоддан йироқ садоқати зоҳир қулингиздурмен! — дермиш.

— Содик қулим бўлсанг қайларда юрибсен, баттол? — деб бақирап эмиш шаҳзода.

— Садоқати зоҳир қулингиз сиздай валинеъмат пушти паноҳимга кийик овлаб, тоғларда юрган эдим. Бу-кун бир кийикнинг бошини келтирдим! Уни есангиз барча фурбат, барча хасталикдан фориг бўлиб, қушдай енгил тортасиз, давлатпаноҳ!

Амир Жондор шундай деб, эшикдан кимнидир имлаб чақиравмиш. Хонага дастурхон ёпилган катта олтин баркаш кўтариб, нотаниш бир навкар кириб келармиш. Амир Жондор унинг қўлидан баркашни олиб, шаҳзодага узатармиш:

— Барча дардингизга даво бўладур, татиб қўринг, давлатпаноҳ!

Шаҳзода баркашни олиб, дастурхонни очармиш. Олтин баркашда... қонга бўялган унинг ўз боши тиржайиб ётармиш... Баркаш қўлидан тушиб, қонга бўялган боши ерга юмалаб кетармиш.

Шаҳзода дод солиб қичқирганича... уйгониб кетди. У тушидагина эмас, ўнгидаги ҳам дод солиб бақириб юборди чамаси, чанг ва сетор овози келаётган ёндош хонадан балхлик саройбон билан яна бир маҳрам югуриб чиқди. Улар чиққанда, шаҳзода, ўнг қўлида яланғоч қилич, чап қўли билан айвоннинг устунини қучоқлаганича сармаст одамдай чайқалиб турар, унинг бу туриши, олазарак кўзлари, бутун важоҳати шундай мудҳиш эдики, югуриб чиққан саройбон билан маҳрам яқин келолмай бўсағада тўхтаб қолишиди.

— Сиз... сизга не бўлди, давлатпаноҳ?

Балхлик саройбоннинг таниш овози шаҳзодани хиёл хушига келтириди. У ҳозир қўрганлари туш эканини эндини тушуниб, бўшашиб кўзини юмди. Лекин кўзини юмиши билан нигоҳи олдига яна олтин баркашда тиржайиб ётган ўз боши келиб, бир иргиб тушди-ю қилич яланғочлаганича қаршисида турган саройбонга томон юрди. Саройбон билан унинг орқасига яшириниб олган маҳрам, саросима ичида, ўзларини четга олишди. Бошидаги тождор телпаги бир томонга оғиб кетган, кўзлари қинидан чиқаётган шаҳзода гандираклай-гандираклай чароғон хонага кирди. Пойғакда кути ўчиб турган бир неча машшоқ ва хонандалар уни кўриб, ўзларини зинадан пастга отдилар, тўрда ипак парда орқасида бир-бирларининг пинжалрига кириб олган канизаклардан бири додлаб юборди.

— Йўқол! — бақирди шаҳзода пойгаҳда тўхтаб. — Йўқол бу даргоҳдин!

Ярим яланғоч канизлар, гўё ҳурккан кийиклардай, бир-бирларини туртиб-суриниб, мармар зиналардан пастга отилишди.

Шаҳзода уларнинг диркиллаган оппоқ танларидан кўзини олиб қочаркан: «У ерда ҳам яланғоч канизлар, бу ерда ҳам яланғоч канизлар, — деган фикр хаёлидан ўтди. — Эй, дариф! Тушимми бу ё ўнгимми? Бошимда яна не савдолар бор, халлоқи олам!»...

Чароғон хона уни хиёл ўзига келтириди. У қиличини қинига солиб, хонанинг ўртасида тўхтади. Лекин юраги ҳамон турс-турс урар, нафаси етмай ҳансираради.

«Оллоға шукурким, туш экан. Туш! Лекин қонга бўялган ўз боши... эй дариф! Осий банданг бошига тағин не савдолар соласен? Тақдир нени раво қўрадур?». Бу тушда падаркуш Абдулатифнинг маънавий дунёси, психологик драмаси ёрқин ва ишонарли тасвиirlанган. Унинг қалbidаги ҳоким куч — қандай бўлмасин мудҳиш туйғулар ва хатарли ҳисларни, гурбат ва изтиробларни унутиб, бир дақиқагина бўлса ҳам улуғ тахт, шону шавкат завқи оғушида ором олишга интилиш эди. Лекин бунга унинг ўз отасини ҳам қатл эттиргани, фитналар сарбони эканлиги йўл қўймас, қўксини аччиқ фарёд қамрар эди.

¹ О. Ё қубов. Улуғбек хазинаси. Ф. Фулом номидаги адабиёт ва санъат нашиёти, Т., 1974 й. 288—289-бетлар.

Унинг разолат ва қабиҳликка лиммо-лим ички дунёси, саройдаги сотқинлик, ота хуни — тақдирининг абадул-абад зулмат билан тугашига ишора берса-да, чўқаётган киши хасга ёпишганидек, у ҳам «милт» этган умидга, «Парвардигори олам»га ёпишади. Бироқ Али Кушчи ўйлаганидек, «...Бу фоний дунёда ҳам ҳақ ва адолат бордур. Бандаи мўминларга қатлу қирғин келтирган, меҳр-шафқат ўрнига жабру жафо, илму маърифат ўрнига зулмат уруфини сочган ҳеч бир кимса интиқомсиз қолмайдур...»

Хуллас, психолигик романда қаҳрамоннинг онгли ва онгсиз ҳаёти (туши ва ҳуши) мантиқан бир-бирига боғлиқ ҳолда тўлиқ тасвирланади. Шу асосда уйқу ва англанган ҳаётнинг оқими берилади. Туш умумий психолигик картинага сингиб кетади ва айни пайтда, қаҳрамон руҳий изтироблари, кечинмаларининг барча кўришиларини, «ранг»ларини реаллаштиради.

Бадиий асар тилининг ифода кучини оширувчи воситалар (оҳанг, ритм, пауза, подтекст каби) ичida оҳанг алоҳида аҳамият касб этади. Чунки, А. Горькийнинг фикрича, қалб тафаккурга нисбатан оҳангда кўпроқ акс этади. Тафаккур чақа тўла ҳамёнга ўхшайди, оҳанг эса ҳар нарсадан холи, ичи тоза.

Шунинг учун шоир Р. Парфи: «Оҳанг варақлади дунёни. Дунё — ўқилмаган бир китоб», — дейди. Шу сабаб, Саид Аҳмад дейди: «Агар ўзим яхши кўрган бирон куй таъсирига тушиб қолсан, шу оҳангни лейтмотив қилиб оламан-у, китоб битгунча ўша куй кўнглимда чалиниб туради. Бу менга худди шеърга ўхшаб вазнни сақлашга ёрдам беради»...

Кўринадики, бадиий асарда тасвирланган ҳар бир характер, тақдир ўзига хос оҳангни талаб этар экан, демак, ўша оҳангга мос «жажжи» образлар-сўзлар танланади; бусиз, бирон бир ҳолатнинг аниқ тасвирини яратиш ҳам мумкин эмас. Дарвоқе, ҳар бир шахснинг кулгуси, йиғиси, уҳ тортиши, ғазаби, қувончи ҳар хил — бетакрор бўлганидек, унинг оҳангни ҳам турфа хилдир.

Юқорида мисолга келтирилган асар қаҳрамонларига диққат қилсак, Қобил бобо гангиганидан узуқ-юлуқ

¹ Қаранг: У. Норматов. Талант тарбияси, «Ёш гвардия», Т. 1980, 104-бет.

оҳангда («Ола ҳўқиз...» «Қўш маҳали...». «Бисотимда ҳеч нарса йўқ...») гапирса, адабиёт муаллими «Боқијон Бақоев тутуриқсиз тарзда (Ҳимм... буржуазия реализм.. ҳимм... Мукаррам товуққа тухум қўйдингми?) оми, лекин ўзини билагондек тутувчи одамдек гапиради, чунки «Сўз — ақл ўлчовидир».

Бадий асар тили оқар дарё. Уни ўрганиш ҳам узлуксиз ҳаракатни тақозо этади. Ҳаёт ва сув (адабиёт ва сўз) бир-бирига шунчалик зарурки, бири-бирисиз яшай олмайди; бири-бирисиз яратиш курратига эга бўлмайди.

Инсон юраги қандай уриб турса, қандай товланса, ёнса, адабиётдаги сўз ҳам шундай жонли бўлиши, товланиши, ёниши лозим. Ўшандагина қалб тирикликни билдирганидек, сўз поэтиклишаши, яъни у адабиётга дахлдор бўлади. Юраксиз инсон мавжуд бўлмагани каби, сўзсиз адабиёт, сўзшуносликсиз — адабиётшунослик ҳам юзага келмайди. Шу сабабдан сўз адабиётнинг биринчи элементи, универсал ва айни пайтда, асар тақдирини ҳал қилувчи муҳим (бирламчи) ўринни эгаллайди.

Хулоса. Юқоридаги қисмларда кўрдикки, асар мавзуси ва гояси таҳлили характерлар таҳлилига ўтади (характерлар билан алоқаси бўлмаса, у кераксиз «матоҳ»-дир), характерлар таҳлили ўз навбатида сюжет, композиция, бадий тил таҳлилига кўчади (Бу унсурлар сиз характернинг юзага келиши мумкин эмас). Сўнгра, сюжет, композиция, бадий тил ва унинг воситалари характер таҳлилига, характер таҳлили асар мавзуси ва гояси таҳлилига ўтади. Пировардида, мазмун ва шакл бирлигига, мазмуннинг шаклланиши, шаклнинг мазмунланиши (Л. Тимофеев, И. Султон, П. Қодиров) жарёнига етиб келамиз. Демак, бадий асарни яхлит (монолит, бирбутун, ёмби олтин) — жонли организм сифатида тасаввур қилиш, англаш ва шундан сўнгина уни тадқиқ ва таҳлил қилиш лозим. Бу ижоднинг энг қийин муаммоси бўлишига қарамай, уни ечиш мумкинлиги аҳамиятининг фоятда зўрлигини, долзарблигини, зарурийлигини кўрсатади.

Поляк Казимеж Вуйцицкий таъкидлаганидек, санъат асари ўзига биқиқ бир бутунликдир. Бадий асарда ҳар бир унсур ўзининг мазмунига ва аҳамиятига эгадир ва у бошқа унсурлар билан алоқадагина яшайди. Шу алоқа сабабли ҳар бир унсурнинг қисмчалари асо-

сий мақсадға томон йұналадилар. Ҳар қайси қисм, Бёклиннинг аниқ ифодасига күра, «Мен хизмат қила-ман» («Я служу») шиори асосида ишлайди. Биронта унсурда юз берәёттан үзгариш бошқаларыда ҳам үзга-ришлар бўлишга олиб боради, пировардида, асар ха-рактерида ҳам үзгариш юз беради. Шу сабаб, **бадиий асар — турли-туман бир-бирига боғлиқ унсур (восита)-ларнинг кутилмаган тарздаги нозик чатишмасидир**. Бир-бирига боғлиқ алоқа қанчалик бирлашса бадиий асар бадиийлиги шунчалик зўр бўлади.¹

¹ К а р а н г: Г. М а р к е в и ч. Основные проблемы науки о литературе (перевод с польского), М., «Прогресс», 1980, стр. 86--87.

У ч и н ч и б ў л и м

ШЕЪРИЯТ

I. Шеърий асарда мазмун ва шаклнинг ўзига хослиги

Таянч сўз ва иборалар: Шеъриятда мусиқийлик. Ритм. Бўғии. Туроқ. Вази. Ритмик пауза. Туркум. Қофия. Оддий қофия. Тўла қофия. Нотўла қофия. Радиф. Равий. Зулқофиятайн. Мусаллас қофия. Банд. Содда банд. Мураккаб банд.

Сўзшуносликнинг барча ўзак (олдинги бўлимларда таҳдил этилган) масалалари шеъриятга ҳам тааллуқлидир. Дарвоҷе, В. Белинский ёзганидек, «Буткул дунё, ундаги тамомий гуллар ва бўёқлар, табиат ва ҳайётнинг барча шакллари шеърият ҳодисаси бўла олади. Ана шу ҳодисаларда яшириб, уларни ҳайёт жилвалари или жозибадор этган нарса шеъриятнинг моҳиятини ташкил этади. Шеърият — бу олам ҳайётининг тирик томири, унинг қони, унинг олови, унинг шуъласи ва қуёшидир» (Собр. соч. в трёх томах, Т., 1, М, 1948. с. 644).

«Шеър оҳанг жиҳатидан маътум бир тартибга солинган ҳис-туйғу ифодаси сифатида вужудга келган ҳаяжонли, ритмик нутқдир»¹ ва айни пайтда, мусиқилиги, ёқимлиги, мўлжалга урадиган жозибаси, дилкашу дардкаш инсонийлиги билан ажралиб турадиган мўъжизадир. Бу иккала жиҳат доимо уйғунлашгандагина шеър дунёга келади.

Чунки «Вазну қофияси бўлиб, шеър бўлмаган парчалар бўғани каби вазну қофиясиз (сочим) шеър парчалари-да кўбдир»².

Шеърият асосида лириканинг қонунияти (лирик кечинма — ҳис ва туйғулар тафсилоти) ётар экан, де-

¹ Н. Хотамов, Б. Саримсоқов. Адабиётшунослик терминларининг русча-ўзбекча изоҳли лугати, Т., «Ўқитувчи», 1983, 311-бет.

² А. Фратат. Адабиёт қоидалари, Т., «Ўқитувчи», 1995, 22-бет.

мак, унда ҳиссиёт ва фикр (мазмун ва шакл бирлигидек) қоришиқ яшайди. Образли қилиб айтганимизда, ҳиссиёт — она, фикр — ота, улардан бино бўлган фарзанд — шеърдир.

Ушбу фикрларни тўликроқ англаш мақсадида Ҳамид Олимжоннинг «Зайнаб ва Омон»ига бир нигоҳ ташлайлик.

Очеркда:

«... — Ахир бирга юрар эмишсан-ку!

— Тўғри, мактабдан бирга қайтган вақтларим бўлган. Лекин сен айтган гаплар ҳаммаси ёлгон.

— Очиқ кунда, етти ёт бегона бўлган одам билан эргашиб юрганинг нима қилганинг ахир? — Сора яна ўт олди.

— Энди нима дейсан? — Зайнаб опасига тикилди.

— Бузилиб кетибсан. Омон билан юрма дейман. Поччангнинг амакисининг ўғли бор. Сени ўшанга бераман.

— Эрга тегадиган манми, сан? — Зайнаб яна тикилди.

— Сан, лекин ман бераман! — Сора қатъий айтди. Узоқ олишгандан сўнг опа-ука йиғладилар. У Зайнабга «сан бузилиб кетдинг», деб даъво қилди. Зайнаб опаси билан хайрлашмасдан унинг уйидан чиқди¹.

Достонда:

1 2 3 4 5 6 7 8 9

— Бўлмайдими / Собир, тез гапир!

— Опа, бўлмас, / жоним, гапим бир!

— Ё мени де, / ёки Омонни?

— Нетай, тикдим / йўлида жонни!

— У пасткашнинг / зоти ким экан?!

— Опа урма / қалбимга тикан.

Уни мен ҳам / билолганим йўқ,

Бу юмушни / қилолганим йўқ.

Лекин ишонч / билан тўлиқман,

Шу ишончим / билан улугман...

— Кўринмагин, / йўқол, қўзимга,

Йўқол, хотин / бўлсанг ҳар кимга,

Энди, менинг / номимни айтма,

Расвонликдан / орқангга қайтма.

Биринчидан, очеркда ҳаётнинг объектив манзараси

¹ Ҳ. Олимжон. МАТ, III том, Т., «Фан», 1981, 69-бет.

яққол кўзга ташланса, воқеабандлик (воқеани бетараф тарзда унга аралашмасдан баён қилиш) устиворлик қилса, достондан келтирилган парчадан субъективлик, лирик кечинма (қаҳрамонларнинг ички дунёси (ҳолати) тафсилотлари) ҳукмронлик қиласи.

Иккинчидан, биринчи парча драматизмга бой бўлишидан қатъи назар, ундаги нутқ оҳанги осойишта. «Сўзлар, гаплар белгили бир оҳангга боғланмасдан, белгили бир ўлчов билан ўлчаммасдан, тарқалиб, сочилиб тузилган» (А. Фитрат).

Шеърий парчада эса нутқ ўта эҳтиросли, ўта тўлқинли, ўта шиддаткор. Мусиқийлиги, нафислиги, руҳнинг бутун ҳолатини (Зайнабнинг ишонч ва жасоратини, Соранинг эскича қарааш ва фикрлашини — иккаласи қалбининг оғир, изтиробли ғалаёнларини) шоир шахси яхлитлаштиради.

Демак, ҳаётга ўхшаш қилиб қайта яратишнинг — бадиий олам моделининг кўринишлари турфа хил бўлиб, унинг шеърий шаклида яна учта муҳим хусусият маъжуд. «Зайнаб ва Омон»дан келтирилган парчага диққат қилсак, унда:

1) Сўзлар маълум тартибда уюшган шаклда мисраларга бўлинниб келади ва ҳамма мисралар бир хил (тўққиз) бўғинлардан иборат;

2) Ҳар бир байт муайян жойда изчил равишда оҳангдош сўзлар (тўғрироғи қўшимчалар) билан туғалланади (гапир — бир; Омонни — жонни; экан — тикан каби).

3) Дастребаки мисрадаги туроқланиш (4+5) асарнинг охиригача қонуний тарзда бир хил такрорланади.

Бу хусусиятлар йиғилиб ҳиссиёт ва фикрлар мазмунига мос эҳтиросли нутқнинг оҳангдорлигини, мусиқийлигини таъминлайдилар. Бу ҳолат — шеърият қўпчиликнинг мулки, юракнинг тафти, ички оламнинг бетакрор мусиқаси ва ҳикмати эканлигини яна бир бора исботлайди.

«Одамнинг қалби қайнаб турган қозондан ҳам ўзгарувчанроқдир»¹, «Одам қалбидаги гўё ой ёнидагидек бир булут бордир. Ой ёритиб турганда тўсатдан булут келиб уни беркитиб қўйса — қоронгулик, булут қўтарилиса — ёруғлик бўлиб тургани каби, қалб ҳам баъзида рав-

¹ Аҳлоқ — одобга оид ҳадис намуналари, Т., «Фан», 1990, 122-бет.

шанлашиб, баъзида хиралашиб туради» (Шу асар, 130 бет). Ана шу жараёндаги фалаёнларни, оҳангларни, ҳолатларни тафсилотларни... моҳиятини англаб, сўзлар воситасида бир зумлик образини яхлит акс эттира олса — ана шу шериятдир, шоирлиқдир, қисматдир.

Қалбдаги товланишларнинг инсоний қиёсини равшанлаштиришда, мусиқийлигини таъминлашда, қисмат тарихини — сўз воситасида жонлаштиришда учта асос муҳим аҳамият касб этади. Булар **ритм** («Ритмика»), **қофия** («Илми қофия» — «Фоника»), банд («Строфика»).

РИТМ (грекча тенг ўлчовлилик) борлиқдаги барча ҳодиса ва ҳолатлар товланишларини рўёбга чиқарувчи, уларни изчиллик билан бир меъёрда тақрорланишини таъминловчи асосдир. Шунинг учун инсоннинг юрак уришида ҳам, қорнинг ёғишида ҳам, фасллар алмашинувида ҳам, раққосанинг ўйинида ҳам, таралаётган куйда ҳам ритм (зарб) бор. Бу — дунёнинг яратилиш қонунияти. У адабиётга ҳам дахлдордир, фақат шеъриятда айрича хусусият касб этади: мусиқийликни яратувчи асосий элементлардан бирига айланади ва «шеърий нутқнинг бош аломати» (И. Султонов), унинг мафтункорлигини таъминловчи восита, нутқни «зийнатли нутқ»қа (Аристотель) айлантирувчи саналади.

«Шеърий нутқ ритмга, ритм шеърий нутққа муайян шакл, яхлитлилик ҳадя қиласи. Ритм шеърий нутқни, ҳар қандай оддий фикрни ҳам бир даража юқори кўтаради. Ритмдан сўзга сеҳр, таъкид, кўтаринкилик насиб бўлади; ритмлик фикр — ишонч, муҳимлик ато этгандай бўлади; шеърий ритмли сўз обрули сўздир, ритмли фикрни ёдлаш осон ва эсдан узоқ вақтгача чиқмайди... Қолаверса, ритмдорлик кишига завқ-шавқ бағишлайди, нутқдаги ҳиссият, эмоционалликни ортиради; руҳий эҳтиёжни қондиради. Аристотель айтганидек, нутққа зебу-зийнат тақдим қиласи, фояннинг кишига сингишига кўмаклашади.»¹

Шеъриятимизда ритмни яратувчи доимий элементлар — бўғин, туроқ, ритмик пауза, туркум ва вазн саналади. Албаттa, ритмни яратища қофия ҳам, банд ҳам иштирок этади, лекин улар фақат ўлчов, метрикага алоқадор (жумладан, қофия мисралар охирини эс-

¹ У. Тўйчиев. Ўзбек поэзиясида аруз системаси, Т., «Фан», 1985, 212-бет (Бундан сўнг асарнинг номи ва саҳифаларини қайд қиласиз).

латади; эркин вазнда қатъий тартибли банд йүқ) бўлмагани учун уларни алоҳида ўрганиш ва айтилган ушбу мулоҳазани доимо эсда тутиш маъқулдир.

Бўғин. Бир нафас билан айтиладиган сўз ёки сўзнинг бўлаги — бўғиндир. Сўзлар талаффуз қилинганда, чиқарилаётган ҳаво оқими турли-туман оҳанг касб этиб, бўғинларни ҳосил қиласди. Бўғинни ҳосил қилувчи нарса — нутқ товушидир. Нутқ товушлари унли ва ундошга бўлинганидек, ундан ҳосил бўлувчи бўғинлар икки хил бўлади. Агар бўғинларнинг охири унли билан тугаса (бо-ла, ка-ри-ма каби) очиқ бўғин, ундош билан тугаган бўлса (мак-таб, нон каби) ёпиқ бўғин саналади.

Бўғин — ритмни ҳосил қилувчи энг кичик ўлчов бирлиги саналади. У ритм яратиш учун гурухланади, айни пайтда, ритм қайси мисрада бўғин сони кўп ёки кам эканлигини аниқлайди. У ритм яратиш вазифасини бунёди учун туроқларга (арузда руқнларга) уюшади.

Туроқ. Бўғинларнинг мисраларда қатъий тартибда гурухланиши — туроқдир.

Дарвоқе, агар шеърларнинг ритмига эътибор қиласак, бўғинларнинг сони жиҳатдан бир туркумга кирган шеърларнинг ритмидан бир-биридан фарқ борлигини сезамиз.

О — дам зо — ти / дун — ё — да — ки бор $4+5=9$
У — нинг би—лан / му — ҳаб — бат — дир ёр $4+5 = 9$

(Ҳ. Олимжон)

На кўк-нинг / фо-на-ри / ўч-мас-дан $3+3+3=9$
На юл-дуз / сайр э-тиб / кўч-мас-дан $3+3+3=9$

(Ўйғун)

Бир туркумга мансуб икки парчанинг ритмик ҳолатидан икки хил оҳангни юзага келиши — бўғинларнинг икки хил тартибда ($4+5=9$; $3+3+3=9$) гурухланиб келишидир. Ҳамид Олимжон шеърини Ўйғун шеъридаги туроқланишга ёки Ўйғун шеърини Ҳ. Олимжон шеъридаги туроқланиш тартибига солиб ўқисангиз, шеърдаги мазмун йўқолади, оҳангдорлик ясама ва бесўнақай шовқинга айланади.

Кўринадики, туроқланиш шеърдаги ҳис ва фикрнинг уйғунлигидан, мазмундан келиб чиқади, шеър бирданига (мазмун ва шакли билан) яхлит туғилади,

вазни — ўзлиги билан дунёга келади. Ҳар бир туроқдан сўнг табиий равишда келиб чиқувчи изчил пауза (билинар даражадаги сукут) оҳангдорликни, шеърга мос ритмикани воқе қиласди.

Мисрадаги туроқларнинг икки катта гуруҳга бўлувчи туроқ — *Бош туроқ* деб айтилади:

Дарё тўлқин / сувлар тошқин // ўтолмайман
Отим ориқ / манзилимга // етолмайман.

(F. Fулом)

Бу байтда туроқланиш тартиби $4+4+4=12$ тарзида-дир. Агар унинг туроқланиш тартиби $8+4=12$ тарзида бўлганида ҳам «ўтолмайман», «етолмайман» туроқла-ри — Бош туроқ саналади, чунки у мисралардаги фикр-нинг нисбий тугал бўлган холосасини қайд этади.

Лекин иккинчи хил туроқланишда шеър ритми (оҳанг) биринчиси (сокин оҳанг)га нисбатан анча тезлашади, тўғрироғи янгича оҳангни (ритмикани) ву-жудга келтиради.

Вазн. Мисралардаги бўғинларнинг, туроқланиш тартибининг муайян ўлчовга солиниши — вазндири. «Вазн нутқни ўлчайди, гуруҳлайди ва унга муайян тартиб кирилади. В. Кожинов уни каркас (синч), шеър танасининг скелети деб атаган эди. Скелетсиз одам бўлмагани сингари вазнсиз поэзия йўқ. Вазн схема, у пассивдир; вазн ҳар йили яратилавермайди. Маҳмудали Юнусов «тез-тез ўзгариб турадиган ҳодиса ... эмас», деган эди. Хондамир: «Вазнли ва қофияли сўз тоза ва порлоқ гавҳардир» деган эди» («Ўзбек поэзиясида аруз системаси», 224-б).

Демак, вазн ўз ҳолида, алоҳида яшамайди. У ҳам ғоявий-эстетик мазмунни юзага чиқариш учун ишланганда, яъни сўзларни, бўғин ва туроқларни ўлчовга солгандагина «тирилади», зарур воситага айланади, шеъриятнинг қонуниятини юзага чиқаради.

Новдаларни безаб / гунчалар,
Тонгда айтди / ҳаёт отини.
Ва шаббода / қурғур илк саҳар,
Олиб кетди / гулнинг тотини.

(Х. Олимжон)

Бу банднинг биринчи мисрасидаги $4+5$ туроқ тартиби шеърнинг охиригача қонуният тарзида такрорланиди. Шу сабаб бу шеърнинг вазни $4+5=9$ бўғинли бармоқ вазnidir. Айни чоғда шеър бир туркумга киравчи бўғинлар ($4+5$) гуруҳидан иборат бўлгани учун содда вазн деб юритилади.

Агар вазн икки туркумга киравчи бўғинлар сонини бир шеърда уюштириш асосида юзага келса, бундай вазн — қўйшина вазн деб айтилади:

Баланд шоҳда қизил олма = 8

Пишган экан. = 4

Узуб олиб қарасам, қурт = 8

Тушган экан. = 4

Шеърнинг турли мисраларида мусиқийлик турлича товланиб, ўзгариб турса-да, лекин бирбутунлигини сақласа, якка ва бетакрор намуна эканлигини намойиш этса — ана шу қонуният бўй қўрсатса — Эркин вазн дунёга келади ва у ҳам ҳаяжонли ҳолат («хос ҳол» ва «хос маъно») ни бунёд этгани, сақлагани, таъсирдорликка эришистиргани учун (садда, қўшма вазн сингари) мўъжизадор бўлаверади:

Дунё омон бўлсин 6

Сиз омон бўлинг 6

Омадли бўлинг сиз 6

Бахтли бўлинг сиз 5

Лекин 2

Билиб қўйинг, 4

Билиб қўйинг, ҳамон 6

Сизни унупотомас Муҳаммадингиз!11

(Муҳаммад Юсуф)

Ритмик пауза. «Пауза жаҳондаги ҳамма халқлар ва миллатларнинг шеър системалари учун хос бўлган умумий одатdir. Чунки ритмсиз шеър бўлиши мумкин эмас. Демак, паузасиз ҳам шеър йўқ. Бунинг сабаби шундаки, нутқ бўлакларининг муайян ўлчовда такрорланишигина ритмни юзага келтиради, такрорланиш тартибли тўхтамларсиз, яъни паузасиз юз бермайди...

Ҳар бир тиниш белгисидан сўнг ҳам пауза бор. Бу — оддий паузадир. Аммо мисра, банд, туроқ, руқн охиридаги пауза ўзгачадир. Бу паузани ҳам мазмун, кечинма, синтаксис-интонацион тузилиши белгилайди.

У прозада йўқ, чунки у ўлчанган, бир-бирига тенг ва паралел бўлган шеърий нутқ ҳодисадир. Шунинг учун уни ритмик пауза деб аташ лозим» («Ўзбек поэзиясида аруз системаси», 236-б).

Нега менга / қарайди дебсан,
Ва қилибсан / боқишимга фаш.
Билмасмидинг / қалбимга ўзинг,
Солиб қўйган / эдинг-ку оташ.

(Юсуф Ражаб)

Бу тўртлик $4+5=9$ бўғинли бармоқда ёзилган бўлиб, ҳар бир туроқнинг охирида ритмик пауза бор. Биринчи туроқдан (4) кейинги пауза — кичик, иккинчи туроқдан (5) кейинги пауза — катта пауза (мисранинг охирни бўлгани сабабли)дир.

Цуни унумаслиқ лозимки, ритмик пауза — шакл бўлиши билан бир қаторда у ўзини мазмун билан алоқала воқе қиласди. Ритмик паузани шеърдаги мазмун белгилайди. Чунки ҳар бир сўз, ҳар бир ҳолат муайян оханг орқали аниқланар экан, ана шу оҳангни юзага келтиришда ритмик пауза иш беради.

Асаблар, / асаблар, / асаблар,
Сабабсиз / сочилиган / ғазаблар,
Гуноҳсиз / чекилган / азоблар,
Кўз ёшлар... / барига / сабаблар —
Асаблар, / асаблар, / асаблар.

(Э. Воҳидов)

Ушбу асардаги мисраларнинг ҳар бирида учта (2 та кичик ва битта катта) ритмик пауза бор. Шеърдаги «Асаблар» сўзининг уч бора пауза билан такрорланиши — асабга диққатни қаратади ва бу туйғунинг уйғониши сабабсиз ғазабларга, гуноҳсиз азобларга, кўз ёшларга олиб келиши мумкинлигини ва шу сабаб унга ўта эҳтиёткорлик, босиқлик билан ёндошиш лозимлигига чорлади. Лирик қаҳрамон қалбидаги ана шу мазмун — ритмик пауза таркибини, ривожини (биринчи мисрадаги тушунчани 2,3,4 мисраларда бир погона ба-ландга кўтаради ва охирги мисрада сўнгги — хуласавий маънони таъкид этади), ечимини — шунга мос оҳангни рўёбга чиқаради.

Туркум. Муайян мисрага кирган ва бошқа мисраларда (шеър охиригача) ҳам такрорланиб, ритмни юзага

келтирган бўғинлар сонига асосланган ўлчов — туркумдир.

1 2 3 4 5 6 7 8 9

Мен дунёга келган кунданоқ,
Ватаним деб сени уйғондим.
Одам баҳти биргина сенда,
Бўлурига мукаммал қондим.

(Ҳ. Олимжон)

1 2 3 4 5 6 7 8 9 10 11

Бир тутам соchlаринг менинг қўлимда,
Фижимлаб ўпайми, ё тараб ечай.
Сир деб сақлаганинг менинг қўйнимда,
Сир деб сақлайинми ё елга сочай.

(Чўлпон)

Ҳамид Олимжон шеъри «тўққизлик», Чўлпоннинг шеъри «ён бирлик» туркумга киради. И. Султонов таъкидлаганидек, ўзбек поэзиясида 13 хил туркум — бешлик туркумдан ўн еттилик туркумгача бор. Ҳар бир туркум доирасидан бир неча вазн рўёбга келиши мумкин. Масалан, «тўққизлик» туркумдан 4+5; 5+4; 3+3+3; 6+3; 3+6 каби вазнлар яратилиши мумкин. Иккитасига мисол:

А) *Содда вазн (4+5=9)*

Ўхшалий / бу гўзал бўстон,	9
Достонларда / битган гулистон.	9
Ўзбекистон / дея аталур,	9
Уни севиб / эл тилга олур.	9

(Ҳ. Олимжон)

б) *Қўшма вазн (3+6 / 3+5)*

Озмунча / жанглар қилмадим мен,	9
Озмунча / қонлар чекмадим.	8
Озмунча / тоғлар ошмадим мен,	9
Озмунча / сувлар ичмадим	8

(Шуҳрат)

Қофия. «Стилистика ва шеър тузилиши» китобининг муаллифи Б. Томашевскийнинг фикрича, қофиянинг ритмни ташкил қилиш ва оҳанедошлик яратишдек иккита белгиси бор. Айни пайтда «қофия қандайдир фикрни ўз ҳолиша ифодалай олмайди. Бироқ турли тушунчалар-

ни муносабатдор қилиб, уларни онгимизда товушлар оҳангдошлиги орқали алоқадор этиб, у ёки банддаги асосий фикрларни ифодалашга олиб келади» (Гончаров Б.). Демак, «*Қофия мазмун билан боғлиқ, у керакли түшунчаларни, уларни мисралар охирига чиқариш орқали таъкидлаб кўрсатишни тақозо этади; иккинчидан, қофияяга ажератилган бу муҳим сўзлар фикр оқимидан келиб чиқади ва унинг зарур ҳалқаси бўлиб қолади*» («Ўзбек поэзиясида аруз системаси», 248-б; Таъкидлар Ҳ.У.)».

Қофиянинг мазмун билан алоқадорлиги таъсирдорликни юзага чиқаради ва шеърдаги мазмунни осон эслаб қолишга (ёдлашга) ёрдам беради. Бу хусусиятларнинг мужассами мақолларда ифодасини топгани учун ҳам, уларни бир бора эшигтан киши умрбод эсида сақлаб қолади: «*Мөҳнат — роҳат*», «*Яхшидан боғ қолағ, ёмондан — доғ*» «*Яхшининг ўзи ўлса ҳам, сўзи — ўлмас*» каби.

Кўринаидики, мисраларда сўзларнинг оҳангдош бўлиб тизилиб келиши — қофияни юзага келтиради, қофия, пировардида, шеърдаги мусиқийликни яратиш ишига хи змат қиласи.

Сўзлар (тўғрироги бўғинлар) бир-бирлари билан турлича дараражада оҳангдош бўлганлари сабабли, қофиялар ҳам турфа хилдир.

Ўзаги биринчи ҳарф (товушдан ташқари) бир бири билан тўла оҳангдош бўлган сўзлар (унли ва ундошлар) *тўлиқ-тўқ қофия* деб юритилади:

Ботирлари канал қозади а
Шоирлари газал йозади. а
Куйчилари ўқийди йалла б
Жувонлари айтади алла. б

(Ҳ. Олимжон)

Шеършунос Уммат Тўйчиевнинг уқтиришича, «*Қофиядош сўзларда оҳангдошлиқ яратиш учун эшитилишда бир-бирига мос келган товушлар тиргак*» дейилади. Тиргак қофияни товуш жиҳатидан ташкил этувчи асосий негиздир. («Ўзбек совет поэзиясида бармоқ системаси», Т, «Фан», 1996, 115-б).

Юқоридаги мисолимизда («қозади-йозади») «озади», («йалла-алла»), «алла» товушлари тиргаклардир.

Агар сўзларнинг фақат баъзи товушларигина оҳангдош бўлса оч (*чала*) қофия туғилади:

Шаҳарларда ишга чиқиб эл,
Одам билан тўлар *Текстил*.

(Ҳ. Олимжон)

Оҳангдошлик фақатгина мисралар охиридаги сўзлардагина бўлмай, баъзан мисра ичидағи сўзларда ҳам учрайди. Бундай ҳолат ички қофияни юзага келтиради:

Лабинг бағримни қон қилди, кўзимдин қон *равон* қилди,

Нега ҳолим ёмон қилди, мен андин бир сўорим бор.

(Бобур)

Оҳангдошлик мисралардаги бир нечта сўзларда рўй берса, унда қўш қофия вужудга келади:

Қорли тоғлар *турап бошида*.

Гул водийлар *яшнар қошида*.

(Ҳ. Олимжон)

Радиф — қофияга яқин воситадир. Радиф қофиядан сўнг мисралар ёки бандлар оша муттасил такрорланиб келадиган «ўзгармас сўзлар» ёки сўзлар бирикмасидир.

Жондин сени кўп севарман, эй умри азиз!

Сондин сени кўп севарман, эй умри азиз!

Ҳар неники севмоқ ондир ортиқ бўлмас,

Ондин сени кўп севарман, эй умри азиз!

(А. Навоий)

«Жондин, сондин, ондин» — Бош қофия, «сени кўп севарман, эй умри азиз!» — радифдир. Радиф — шеърнинг мазмунини таъкидловчи, унга китобхон диққатини қаратувчи ва шоир мақсадини уқтирувчи таъсирчан воситадир. Дарвоҷе, ушбу мисолда ҳам радиф («Сени кўп севарман, эй умри азиз») Алишер Навоийнинг инсонга муносабатини ёрқин ифодалайди: инсон энг умри азиз зотдир, энг кўп севилишга, энг кўп эъзозланишга арзидиган жондир. Шу сабабдан-да, унинг ижоди лейтмотиви — инсонийликни улуглаш, инсонга муҳаббат қўйиш, ҳаётни севишидир.

Шеърда ритмик мисралар охирини кўрсатишдек вазифани қофия радифга юклайди. Натижада радиф шеър мусиқийлигига, унинг таъсирдорлигига таъсир кўрса-

тади. Демак, радиф бир вақтнинг ўзида шеърдаги фоянинг қудратини очишга, уни мусиқий ва таъсирдор бўлишига хизмат қиласи.

Юқоридаги фикрлардан, шеърда қофия ҳал қилувчи аҳамият касб этади, деган холосага келмаслик кепрак. Чунки, қофиясиз ёзилган (оқ шеър) «Мирзо Улубек» (М. Шайхзода) «Бобомнинг фалсафаси» (У. Носир) каби классик асарларнинг борлиги қофиянинг ритмга нисбатан иккинчи даражали восита эканлиги ҳам, қофиянинг ўз ўрни борлигини ҳам исботлади.¹

Қофия мумтоз шеършунослигимизда чуқур ўрганилганлиги сабабли алоҳида фан («Илми-қофия») юзага келган. «Илми қофия»да қофиянинг тузилиши турлари, шеърий жанрларнинг қофия хусусиятлари, қофия хатолари, радиф ва қофия, вазн ва қофия муносабатлари, қофия санъати муаммолари чуқур таҳлил қилинган. Унинг ютуқларини тарғиб ва таҳлил қилувчи (XX аср ўзбек адабиёти назариясида) қатор изланишлар ҳам юзага келди.²

Мумтоз қофиянинг асосини ҳарф ташкил этади. «XVI асрда ўтган машхур шарқшунос олим Воҳид Табризий айтишича ҳам, «қофия ўзакдаги битта ҳарфдир, ҳам араблар бу ҳарфни **равий** деб атайдилар... ва шеър равий ҳарфисиз тўғри бўлмайди. Бу ҳарфни шундай такрорлаш керакки, у ҳар бир байтда муайян бир ўринга қўйилган бўлсин. Равий қилинган ҳарф сўзнинг ўзига тегишли бўлади, агар бу ҳарф у сўздан олиб ташланса, сўз ўз маъносини йўқотади». Ана шу фикрни таъкидлаган, Уммат Тўйчиев асосли шундай холоса қиласи:

«Қўриниб турибдики, равийнинг бешта белгиси бор:

1. Равий бир ҳарфдан иборат бўлади;

2. Сўз негизи ё ўзагидагина мавжуддир;

3. Такрорланади;

4. Байтдаги мисралар охирида ритмик жиҳатдан бир ўринда келади;

¹ Бу хусусиятлар ва қофиянинг тартиби, унинг ритмик, эвфоник, баъзи бадиий жиҳатлари (И. Султонов, У. Тўйчиев, Н. Шукуров, Н. Хотамов, Б. Саримсоқов, Т. Бобоев) ўзбек шеършунослигига таҳлил қилингани учун кенг тўхталиши лозим кўрмадик.

² Уларнинг энг асосийларидан баъзиларини эслатамиз: У. Тўйчиев «Ўзбек поэзиясида аруз системаси», Т., «Фан», 1985. Қаранг: Қофия ва унинг назариясига оид, «Адабиёт назарияси», II т., Т., «Фан», 1993 й. А. Ҳожиаҳмедов. Шеърий санъатлар ва мумтоз қофия, Т., «Шарқ», 1998 й.

5. Бу ҳарф олиб ташланса, сўз ўз маъносини йўқо-тади» (Қаранг: Адабиёт назарияси, II том, 372-6.).

Ана шу қоидани тўлиқроқ англаш учун «Равий» сўзининг маъносини билдиради. Туянинг юки юрганида сочилиб кетмаслиги учун аргамчилар иш берганидек, қофиянинг барча воситаларини ўзаро боғлаб турувчилик вазифасини равий бажаради:

Кел, эй соқий, кетур паймона бизга
Иноятлар қилур жонона бизга

(Хоразмий)

мисраларидағи қофияларда («паймона, жонона») «Н» товуши равий саналади.

Демак, равий бир-бирига оҳангдош-қофиядош икки сўздаги таянч битта ҳарф (товуш)дир.

Шарқ мумтоз шеъриятида қофия ҳарфлари ўн бештадир. В. Табризийнинг таъкидлашича, қофия ҳарфлари тўққизтадир: «Ҳарфи равий», «қайд ҳарфи», «ноира», «ридф», «таъсис», «даҳил», «васл», «хуруж», «мазид». Бундан ташқари қофияланувчи сўзлардаги қисқа унлилар — а, у, и араб тилида қофиядаги ўрнига кўра олтига ном билан аталади: «рас», «ишъбо», «хазв», «тавжи», «мажро», «нафоз».

Ана шу 15 та ҳарфнинг қофияланувчи сўзларда қайтартибда жойлашишига қараб қофия турлари юзага келади. Шарқ поэзиясида қофиянинг асосан 25 та тури мавжудлигини қофияшунос Баҳром Сирус ҳам, Уммат Тўйчиев ҳам, Муяссар Акбарова ҳам таъкидлайдилар ва мисоллар билан изоҳлайдилар.¹

Уларни чуқурроқ ўрганишни-мустақил изланишга қолдирамиз.

Биз эса қофиянинг зулқофиятайн, мусаллас қофия, мураббаъ қофия сингари навларига бир нигоҳ билан чекланамиз.

Байт мисраларида икки сўзни оҳангдош қилиб келтириш санъати зулқофиятайн деб юритилади. Агар икки сўз мисра охирида келса — мутакарин қофия, икки сўз мисранинг икки ўрнида келса — маҳжуб қофия аталади.

¹ Б. Сирус. Рифма в таджикской поэзии, Сталинабад, 1953 г. Уммат Тўйчиев. Қофия ва унинг назариясига оид: «Адабиёт назарияси», II Т., Т., «Фан», 1979. М. Акбарова. Алишер Навоий ғазалларида қофия, Т., «Фан», 1993 ва ш.к.

*«Шавқида күксумни шигоф айлади
Жилдиға күнглумни гилоф айлади.*

(A. Навоий)

*Боққай деса дөғи қуввати йүқ
Боқмай деса дөғи тоқати йүқ.*

(A. Навоий)

Икки қофияли байтлардаги қофиялардан бири тажнис бўлса тажнисли зулқарнайн деб юритилади.

*Машаққатдин йигитни эл қари дер.
Ки, қозилмиш икки-уч юз қари ер.*

(A. Навоий)

Биринчи «қари» — «кеекса», иккинчи «қари» — «75 сантим»ни билдиради. Шаклан бир хил, маъноси ҳар хил бўлгани учун тажнисдир.

Мусаллас қофияда уч ва ундан ортиқ сўзлар бир-бirlарига оҳангдош бўлади ва ҳар бир сўз мазмунни таъкидлашга, таъсирдорликка хизмат қиласиди:

*Рухсорида ламъаи малоҳат
Гуфторида нашъаи фасоҳат.*

(A. Навоий)

Мураббаъ қофияда тўртта сўзнинг қофиядошлигига эришилади:

*Сендеқ манга бир ёри жафокор топилмас,
Мендеқ санга бир зори вафодор топилмас.*

(M. Бобур)

Хуллас, айтилган бу фикрлар билан қофия муаммоси ҳал бўлмайди. XX асрда кенг тарқалган эркин шеърда қофиялаш тартиби ҳам эркинликни қўлга киритди: байт ва бандларда баъзи бир неча мисралар қофияланса, баъзан улар кифояланмайди.

Халқ достонларида кўплаб учрайдиган сажълар ёзма адабиётга ҳам кириб келди. Насрий асарларнинг тилини сербўёқ, таъсирлар қилиш билан қаҳрамон характерини чуқурроқ очишга хизмат қила бошлади:

*«Оби равон, боғи жаҳон, шоҳ супага зеби жаҳон,
мўрча миён, писта даҳон, нозик адо, пари жаҳон, яъни*

исми шарифлари Жамилажон. Ким эканлар десам, Фо-фир қаззобнинг хотинларию Мусо қаллобнинг қизлари экан...»

(Х. Х. Ниёзий)

БАНД. Шеъриятда бўғинлар гуруҳланиб туроқни, туроқлар гуруҳланиб вазнни ташкил этадилар. Бундай гуруҳланишдаги изчиллик ва такрорийлик мусиқийликни юзага келтиради. Бу қонуният мисраларнинг ҳам гуруҳланиб келишини, унинг изчил ва такрорийлигиги ни талаб қиласди. Бу талабнинг ижроси банд деб юритилади.

Лирик асарга хос бўлган мазмун ҳам, сюжет ва композиция ҳам бандни заруратга айлантиради, чунки, муайян асардаги мавзунинг асосий гояси, мазмуннинг қирралари, бир оний кечинманинг холосасини кенгайтириб, ёйиб, асослаб, очиб берувчилик вазифасини банд ўтайди. Айни чоқда, банд бандлараро «со-чилган» фикр ва кечинмаларни яхлитлаштиради; уларнинг ифодасидаги ўзигагина хос бирликни юзага келтиради, биргина сўз билан ифодаласак, банд инсонийлашади, образли воситага айланади.

Мен дунёга келган кунданоқ	а
Ватаним деб сени <i>уйғондим</i> .	б
Одам бахти биргина сенда	в
Бўлурига мукаммал <i>қондим</i> .	б

Кулғимга номинг киргандা	а
Кумлик каби ташна <i>боқурман</i> .	б
Сенинг жаннат водийларингдан	в
Наҳрлардай тўлиб <i>оқурман</i> ,	б

Билсинларим: йўлдошим бўлмас	а
Кўзда ёши билан <i>кулганлар</i> ,	б
Ўзлари бор, тиллари ҳаёт	в
Лекин юрак — бағри <i>ўлганлар</i> .	б

Ҳар айтганинг буюк жангнома	а
Қайга десанг қайтмай <i>кетурман</i> .	б
Кўзларимни юммасман асло	в
Дарё каби уйгоқ <i>ўтурман</i> .	б

Ҳамид Олимжоннинг «Ўлка» шеъри тўрт банд (абвб, абвб, абвб, абвб)дан иборат. Унда Ватанга — баҳтис-

тонга фарзанднинг кучли муҳаббати аксланган. Биринчи бандда лирик қаҳрамоннинг дунёга келганиданоқ Ватан деб уйғонгани, инсон баҳти фақат ундагина бўлишига мукаммал қонгани (хабари берилса) ифодаланса, иккинчи бандда ана шу Ватан учун ташналик, жаннатмакон водийларни дарёдек тўлиб яшнатишга баҳшидалик аксланади. Бу туйғу кейинги бандда янада кенгаяди: Ватанни яшнатиш, севиш, ардоқлаш, улуглаш йўлида «юрак-бағри ўлганлар»нинг йўлдош бўла олмаслиги асосланади. Охирги бандда Ватан чақириғига қаҳрамоннинг доимо тайёрлиги, Ватан учун «дарё» каби уйғоқликлиги (кечинма хулосаси) ифодаланади.

Кўринаидики, ҳар бир банд мазмун ва оҳанг (ўқилиши ва эшитилиши) жиҳатидан алоҳидаликни сақладайди (гўё алоҳида ирмоқ денг), айни чогда, бандлар бирлашиб (ирмоқлар бирлашгани каби) битта оний (дарё каби тошқин) кечинмани — Ватанга муҳаббатни бир бутун ва гўзал қилиб, ҳамидона тарзда жонлантиради (бадиийлаштиради).

«Демак, шеър мусиқийлигини ташкил этишда қатнашувчи, муайян қофия тартибиға риоя қилинган, бир меъёрда ва қонунан қайталанувчи, ритм ва вазн жиҳатидан ўзаро алоқадор, мазмун ва интонация жиҳатидан тутал бўлган мисралар уюшмасига банд дейилади».¹

Мумтоз адабиёт назариясида икки мисрали банддан ўн мисрали бандларгача бўлиши мумкинлиги қайд қилинган. Уларнинг ҳар бири муайян ном билан аталади. Ҳар банди икки мисрадан — олти мисрагача бўлгандар — содда банд ва етти мисрадан — ўн мисрагачалар — мураккаб банд деб номланади:

Икки мисрали банд — маснавий, уч мисрали банд — мусаллас, тўрт мисрали банд — мурабба, беш мисрали банд — муҳаммас, олти мисрали банд — мусаддас, етти мисрали банд — мусаббаъ, саккиз мисрали банд — мусамман, саккиз мисрали банд — мутассасъ (таснеъ), ўн мисрали банд — муашшар (машруъ)дир.

Бундан ташқари ҳар бир банди ўн олти мисрадан иборат бўлган — маркиббанд, ўн олти мисрадан йиғирма тўрт мисрагача (ҳар банднинг охирида биринчи банднинг охирги мисраси такрорланиши шарт) бўлган

¹ У. Тўйчиев. Ўзбек совет поэзиясида бармоқ системаси, Т., «Фан» 1966, 162-бет.

таржибанд жанрлари ҳам борлигини назарга олсак, бандлар (строфика) ҳақидаги илмнинг кенг ва белоёнлигини кўрамиз. Бу илм И. Султоннинг «Адабиёт назарияси»да, Уммат Тўйчиевнинг «Ўзбек совет поэзиясида бармоқ системаси» монографиясида анча чуқур ўрганилганлиги ва «Адабиётшуносликка кириш» курсида таҳлил қилиниши сабабли, такрордан қочамиз ва фикр мулоҳазаларимизни кам учрайдиган мусаллас (содда банд) ва мусаббаб (мураккаб банд) мисолида баён қиласиз.

Учлик (мусаллас). Шеъриятимизга XX асрда кириб келганига қарамай, бугун у катта эътибор қозонмоқда. У мустақил жанрга айланмоқда — учликка асосланган ноёб асарлар дунёга келмоқда:

- | | |
|--|----------|
| 1. <i>Мен кўзларингга қарайман,</i> | <i>а</i> |
| <i>Сен ўзгаларга</i> | <i>б</i> |
| <i>Кимнинг кўзларидан излайсан мени?</i> | <i>в</i> |
| | |
| 2. <i>Ер ўз ўқидан айрилар, инон</i> | <i>а</i> |
| <i>Инон, осмонидан айрилар қуёш,</i> | <i>б</i> |
| <i>Агар биз айрилсак.</i> | <i>в</i> |

(Р. Парфи)

Рауф Парфи қаламига мансуб бу асарларни таҳлил қилишдан кўра, уни тақрор ўқиб, бир оламни ўзида жо қилган «жажжи», аммо барча оламга татийдиган асар деган ишончли хулоса чиқарган маъқулдир. Ҳа, айнан шу мусалласдагина бу ўтли муҳаббатнинг (излаш, айрилиш) туйғулати бус-бутун, тугал, фикрий мушоҳадага ундейдиган, завққа кўмадиган тарзда гавдаланиши мумкин эди ва уни шоир маҳорат билан воқе қилгандир. Ана шунга ўхашаш асарларга дуч келганда, Абдулла Қаҳҳор: «Ёзувчининг маҳорати шундаки, бутун баҳорни атиги чигитдек келадиган фўра ичига қамаб бера билади», — деб ёзган бўлиши ажабмас.

Еттилик (мусаббаб) бандида ёзилган шеърлардан бири — Абдулла Ориповнинг ҳазил йўлида ёзилган «Турмуш ташвишлари» асаридир:

- | | |
|--|----------|
| <i>Турмуш ташвишлари</i> | <i>а</i> |
| <i>Турмуш ташвишлари</i> | <i>а</i> |
| <i>Биз сендан баландроқ тура олсайдик,</i> | <i>б</i> |
| <i>Биз сендай баландроқ юра олсайдик,</i> | <i>б</i> |
| <i>Балки ўнғаярди дунё ишлари</i> | <i>а</i> |

Турмуш ташвишлари, а
Турмуш ташвишлари. а

Хотин иш буюрар, а
Бола йиғлайды, б
Богча деб қайгадир югурмоқ даркор. в
Балки бу ташвишлар бўлмаса эди, б
Шоир бўлармидим анча улуғвор в
Турмуш ташвишлари, г
Турмуш ташвишлари. г

Қассоб оғайним бор а
Қароқчи — «пират» б
Суякни қўшмаса қўнгли тўлмайди в
Ахир, қофияни еб бўлмас, «брат» б
Наҳот сен бўлмасанг турмуш бўлмайди, в
Турмуш ташвишлари, г
Турмуш ташвишлари. г

Улуғ режалар бор менда ҳам ахир а
Хусусан, бир ишни битказмоқ даркор. б
Унда қаҳрамоним ёвқур фазогир а

.....
Кошкийди, сен шуни билсанг нобакор б
Турмуш ташвишлари, в
Турмуш ташвишлари. в

Шириндир шу ҳаёт. а
Холи фироқдан. б
Майли битмасин ҳеч унинг ишлари. в
Ҳаволаниб кетсак гоҳ г
Тортсин оёқдан, б
Турмуш ташвишлари, в
Турмуш ташвишлари. в

Ушбу асар беш банддан (тўртинчи банди бир мисра кам) иборат бўлиб, қофияланиши турличадир. «Турмуш ташвишлари» асар бошида икки бора таъкидланади ва унга диққат жамлангач, ташвишларнинг қирралари кашф этила бошлайди. Қаҳрамон руҳидаги ҳазилкашлик — ҳаётнинг мазмунини оча боради, ташвишнинг ҳам овора қилувчи, ҳам юксакликка етакловчи фалсафаси яққол гавдаланади. Ҳар банд охирида икки бора такрорланувчи «Турмуш ташвишлари» жумласи

бандлараро мазмун ва кайфиятни бирлаштиришга, монолитлаштиришга хизмат қиласи, диққатни бир нуқтага жамрайди, гүё ҳамма нарсани ташвишлар оқлаёт-гандек енгил рух — ҳазин рух қалбни эгаллайди...

II. ШЕҮРИЙ СИСТЕМАЛАР

Таянч сүз ва иборалар: Силлабик. Метрик. Тоник. Силлаба-тоник. Бармоқ. Аруз. Эркин шеър.

Жаҳон шеъриятида асосан түрттә шеър системаси (тизими) мавжуд: силлабик, метрик, силлабо-тоник, тоник.

Силлабик шеър системаси бўғинлар миқдорига асосланади. Унга ўзбек, турк, озарбайжон, уйғур, поляк, фаранг, испан, рум халқлари поэзиясидаги шеър тизими киради.

Метрик шеър системаси бўғинларнинг узун-қисқалигига, унлилар ҳолатига аосланади. Грек, лотин, араб шеъриятига шундай хусусият хос.

Тоник шеър системасида уруғли ҳижолар ўртасидаги ургусиз бўғин нисбати эркин бўлади.

Ритм ҳосил бўлиши принципига қараб силлабик-тоник, дольник, акцентли шеърларга бўлинади. Рус, инглиз, олмон шеъриятидаги мустақил тизимдир.

Силлабо-тоник шеър системаси бўғинларнинг ургули, ургусизлигига, уларнинг миқдорига ва тартибига, изчил такрорланишига аосланади. Рус шеъриятининг асосий тизими саналади.

Ҳар бир шеърий система халқ тилининг ички имкониятлари, қудрати билан яратилади. Шу нуқтаи назардан қараганда, ўзбек тилининг ифода ва оҳанг имкониятлари, грамматик-стилистик қурилиши — бармоқни миллий шеърий система сифатида бунёдга келтиради. «Бармоқ вазни» бутун турклар учун-да, биз ўзбеклар учун-да миллий вазндири, мусулмонлардан бурун, бутун турк шоирлари шул «бармоқ вазни билан тизимлар, шеърлар ёзар эдилар», — деб таъкидлайди А. Фитрат.

Ўзбек шеъриятида иккинчи — аруз системаси ҳам бор. А. Фитрат ёзганидек, аруз — арабларникидир. Улардан форсларга ўтган ва араб арузи тузатилиб, камчиликлари тўлдирилиб, араб-форс арузи ҳолига келтирилган. Араб-форс арузи Ўрта Осиё халқлари поэзия-

сига ҳам кирган. «Қутадғу билиг» (XI аср) ўзбек шеъриятидаги арузда ёзилган дастлабки асар саналади.

И. Султон аруз ва бармоқ системалари орасида маълум бирлик мавжуд эканлиги (Ритмнинг фақат бўғинлар миқдорининг сони билангина эмас, балки ҳар мисрага кирган бўғинларнинг «сифати» — узун ва қисқалиги билан тайин этилиши ҳодисаси)ни таъкидлайди ва бу фикрни «ўзбек ҳалқининг поэзиясида икки ритмик системани яратиш факти» билан изоҳлайди.

Бармоқ шеър системаси. Бармоқ мисраларда бўғинларнинг муайян миқдорига ва изчил тақорорига, бир хил туроқларнинг ўзига хос тартибда гурухланишига асосланади.

1	2	3	4	5	6	7	8	9	10	11	
Қаршига қор ёғади,	/қор	устига								7+4=11	
Йигитлар ёр олмангиз,	/ ёр	устига								7+4=11	
Йигитлар ёр олсангиз,	/ёр	устига	—							7+4=11	
Намокоб қуйгунча бор,	/ бол	устига.								7+4=11	

Мисралардаги бўғинлар миқдорини бармоқлар билан санаш жуда қулай ва осон бўлгани сабабли, мазкур шеър қурилишини *бармоқ вазн* деб юритиш расм бўлган. Бироқ бармоқда турли туркумлардан юзлаб вазнларнинг юзага келиш қонунияти борлиги учун «Бармоқ вазни» дегандан кўра, «Бармоқ системаси» дейиш асослироқдир.

Демак, бармоқ системасидаги мусиқийлик ритм асосида юзага келар экан, мисолимизда яққол кўринганидек, ҳар мисрада бўғинлар сони 11 та ва у қолган ҳамма мисраларда ҳам бир хил тақорорланади. Ҳудди шу қонуният туроқларга ҳам хос; биринчи мисрада туроқлар $7+4$ тартибида жойлашган ва у асар охирига-ча сақланади.

Шеъриятда ритмни юзага келтирувчи (бўғин, туроқ, вазн, ритмик пауза, туркум) воситалар, қофия ва банднинг хусусият ва алоқалари юқорида бармоқ системаси мисолида тадқиқ ва таҳлил этилди. Ўша айтилган фикрлар билан чекланган ҳолда, бармоқда учлик туркумдан — ўн еттилик туркумгача (асосан 15 та туркум) борлигини, содда ва қўшма туркумларнинг жуда кўп ва хилма-хиллигини, улардан юзага келадиган вазнларнинг ранг-баранг ва гўзаллигини таъкидламоқчимиз. Уларни мустақил ўрганишга тезроқ кири-

шиш лозимлигини эслатиб, дастлабки йўлланмаларни берувчи тадқиқотлар сифатида Уммат Тўйчиевнинг «Ўзбек совет поэзиясида бармоқ системаси» монографиясини, И. Султоннинг «Адабиёт назарияси» дарслигини тавсия қиласиз.

Аruz шеър системаси. Бу система араб олими Халил Ибн Аҳмад (милодий 790—791 йилда туғилган) томонидан яратилган. Аруз, айниқса, ўзбек мумтоз адабиётида (ўн-ўн иккى аср) етакчилик қилди. «Илми аруз» Алишер Навоий («Мезонул авзон») Мирзо Бобур («Мухтасар») томонидан ҳам ўрганилди; туркий шеъриятдаги арузнинг назарий асосларини, қонун ва қоидаларини ишлаб чиқдилар.

Хозирги замон ўзбек «арузийлари» — А. Фитрат ҳам, И. Султон ҳам, У. Тўйчиев ҳам, А. Ҳожиаҳмедов ҳам, А. Абдураҳмонов ҳам арузни ўрганишга, ўргатишга катта куч сарф этдилар.¹ Ана шу асарларга суюнган ҳолда арузни жадваллар асосида ўрганишни лозим кўрдик, чунки «Ҳар қандай илмнинг вазифаси инсон мушкулинни баттар қилиш эмас, балки осонлаштиришдир» (Адабиёт назарияси, II том, 1979, 349-бет).


Маълумки, *арузийлар* сўзларни бўғинларга эмас, балки ҳарфларга бўладилар. Ҳарфлар икки хил: *мутаҳаррик* (ҳаракатли) ва *сокин* (ҳаракатсиз).

Чўзғилар (унлилар) — о, а, у, и «ҳаракат» деб аталади. Ана шу унлиларнинг бири билан бирикб келган ҳар бир ҳарф — мутаҳаррикдир. Қолган ҳарфлар — б, ф, н, л, к, м кабилар сокиндир.

Жузвлар ундош ва унлиниң микдорига, уларнинг мутаҳаррик («зер», «забар» ёки «пеш»ли) ва сокин («зер», «забар» ёки «пеш»сиз) бўлишига қараб уч гурухга бўлинади: *Сабаб, Ватад, Фосила*. Бу жузвларнинг ҳар бири икки хил бўлади:

¹ А. Фитрат. Аруз ҳақида. Т., «Ўқитувчи», 1997; И. Султон. Аруз назарияси: «Адабиёт назарияси», Тошкент., «Ўқитувчи», 1980; У. Тўйчиев. Ўзбек поэзиясида аруз системаси, Т., «Фан», 1979; А. Рустамов. Аруз ҳақида сұхбатлар, Т., 1972, А. Ҳожиаҳмедов. Мактабда аруз вазинин ўрганиш, Т., «Ўқитувчи», 1978; А. Абдураҳмонов. Аруз назарияси, Ҳўқанд, 1993 ва ш.к.

1-жадвал



Ушбу жузвларнинг ифодасини белгилаш учун Алишер Навоий «Ул кўзи қаро дарду ғамидин чидамадим» жумласини келтирадилар ва қуйидагича тақтеъ қиладилар:

- «Ул» — сабаби ҳафиф (—)
 «Кўзи» — сабаби сақийл (—V)
 «Қаро» — ватади мажмұу (V—)
 «Дарду» — ватади мафруқ (— —)
 «Ғамидин» — фосилаи сурғо (V — —)
 «Чидамадим» — фосилаи кубро (VVV —)

Сабаб, ватад, фосила жузвларининг турли туман чатишувидан аruzda *саккизта асл рукн түгилади*. Ҳалил ибн Аҳмад «фаала» феълидан ҳеч қандай маънони англатмайдиган, лекин жузвлардаги чўзғиларниң узун ва қисқалигини аъло даражада билдирадиган саккизта рукнни — *ағоилни* яратган.

2-жадвал

№	Номланиши	Баҳрлар тузилиши	
1	Фаулун	Мутақориб	
		«Ватади мажмұу», «Сабаби ҳафиф»	V — —
2	Фоилун	Мутадорик	
		«Сабаби ҳафиф», «Ватади мажмұу»	— V —
3	Фоилотун	Рамал	
		«Сабаби ҳафиф», «Ватади мажмұу»	— V — —
4	Мафоийлун	Ҳажаз	
		«Ватади мажмұу», «Сабаби ҳафиф», «Сабабли ҳафиф»	V — — —
5	Мустафъилун	Ражаз	
		«Сабаби ҳафиф», «Сабаби ҳафиф», «Ватади мажмұу»	— — V —
6	Мафоилотун	Вофир	
		«Ватади мажмұу», «Фосилаи сурғо»	V — V V —
7	Мутафоилун	Комил	
		«Фосилаи сурғо», «Ватади мажмұу»	V V — V —
8	Мафъулотун	— — — — — —	
		«Сабаби ҳафиф», «Сабаби ҳафиф» «Ватади мафруқ»	— — — V —

Рукилар икки турга бўлинадилар: *солим* (ўзгартирилмаган, бутун) ва *ғайри солим* (ўзгартирилган, пачақ). Асл рукиларни ўзгартириб янги рукилар ясаш «зихоф» деб аталади. Асллардан янгича «аслчалар» яратиш — зихофат бўлса, «аслчалар»дан «кичик (шохобча) асл» яратиш — *фаръ* деб аталади. Иззат Султон «Мафоилун» аслининг зихоф ва фаръларини кўрсатадилар:

3-жадвал

Зихофат ва Фурӯҳ ҳақидаги таълимот


(*Зихофат (арабча)* — ўзгартирилган, силжитилган демакдир).



Асл, зиҳоф, фаръ рукнлар тақоридан ёки бирбирига аралаштириб олинишидан баҳрлар туғилади. Улар ўн тўққизта: *тавил, мадид, басит, вофир, комил, ҳазаж, ражаз, рамал, мунсарех, музореъ, муқтазаб, мужтас, сареъ, жадид, қариб, ҳафиф, мушокил, мутақориб, мутадорик*.

4-жадвал

АРУЗ БАҲРЛАРИ



5-жадвал

Баъзи баҳрларга мисоллар

Ражази мусаммани солим

1 рукн	2 рукн	3 рукн	4 рукн
Мустафъилун	Мустафъилун	Мустафъилун	Мустафъилун
— — V —	— — V —	— — V —	— — V —
Эй шоҳ карам Ки меҳр ну	айлар чағи ри тенг тушар	тенг тут ямо вайрону о	ну яхшини бод устина

Хазажи мусаддаси мақсур

1 рукн	2 рукн	3 рукн	4 рукн
Мафоилун	Мафоилун	Мафоил	
V — — —	V — — —	V — —	
Жаҳонда қол Билиб таҳқи	мади ул ет қ(и) ни касб эт	маган илм маган илм	

Ўзбек мумтоз адабиётида рамал, ҳазаж, ражаз, мутақориб энг кўп кўлланилган. Жумладан, Алишер Навоийнинг «Хазойин ул-маъоний» девонидаги фазалларнинг ярмидан кўпроги рамал баҳри (фоилотун рукни нинг турлича такрори)да ёзилгандир.

Баҳрлар бир-бирига яқинлиги, «ўзаги» бир хил бўлишига кўра гуруҳданиб, *аруз доиравларини* ташкил этадилар. Бир ўзакли (яқин) баҳрлар учун битта байт ёки мисра шеър айтилади ва у турлича жойдан бошлаб ўқилса, маҳраж (ўзак) атрофида гуруҳлашган қонуқардош баҳрлар келиб чиқаверади.

6-жадвал



Ушбу доираи мұтталифадан ташқари доираи муттағиқа, доира мұжталиба, *доираи мұжталибаи музоҳафа*, *доираи мұжталибаи мұхтараа*, доираи мұхталифа, доираи мұштабиҳо, доираи мұштабиҳои солим, доираи

мунтазиға каби құринишилари ҳам бор. Таъкидлаган доиралар З. М. Бобур томонидан «Мұхтасар» асарларида қашф этилған ва Алишер Навоий аниқлаган доиралар сонини иккитага бойитиб, түққизтага етказғанлар.

Хуллас, илму арузни алоҳида фан сифатида ўрганиш даврнинг тақозосидир. Чunksи, аruz мұмтоз шеъриятимизнинг асосидирки, уни етарли тушунмасдан мұмтоз адабиётимизнинг салоҳиятини, мұмтоз шоирларимиз бадиий маҳоратларини тұлық тасаввур этиш мүмкін эмас. Яна Эркін Воҳидов, Жамол Камол каби замондош шоирлар арузнинг гүзаллигини намоён қилмоқдаларки, уларни борлиғича англамоқ учун ҳам арузни ўрганиш зарур.

Эркін шеър системаси. Бу шеър тизимида мисраларда бўғинлар миқдори тенглиги (бармоқ), ҳижоларнинг чўзиқ ва қисқалиги (аруз) каби қонуниятлар ҳукм сурмайди. Унда бўғинлар миқдори ҳам, туроқлар (рукнлар) тартиби ҳам, қофияланиш ва бандлар ҳам турлитуман бўлади, лекин мусиқийлик — оҳангдорлик доимо барқ уриб туради. Шу сабаб, у эркін шеър системаси деб юритилади. Бу системада ҳам шаклнинг рангбаранглиги мазмун ва мантиқ талабига, кечинмаларнинг моҳиятини рўй-рост кўрсатувчи оҳангдорликка бўйсунади.

Бизнингча, бу шеър системасининг XX аср шеъриятида туғилиш ва тараққийси жамиятнинг, инсоннинг тезкор ҳаёти билан боғлиқдир. Ҳаёт оқими қанчалик тезлашса (XX аср бошида энг катта тезлик соатига 10—12 км бўлган бўлса, асрнинг ўрталарида бу тезлик бир секундга тенглашди) инсон қалбидаги туғёнлар ҳам шунчалик фаоллашади, бу ўз навбатида шеъриятдаги мазмуннинг ўзгаришига, пафоснинг айрича кучлилигига олиб келди, яъни оний ҳис-туйғулар вулқондек, бирданига бор қудрати билан воқе бўлиб — янгича интонацияни, янгича ритмни юзага келтирди. Бармоқ ва аруздан фарқ қилгани ҳолда, мазмун ва мантиқ, маъно ургуси талабига кўра интонацияни кучайтириб бориш, муайян сўзлардаги мантиқ ургусини бўрттириш мақсадида мисраларда ва бандларда туроқлар, қофиялар тартибини турлича ўзгартириб, товлантириб бориши мүмкін бўлди.¹ Бу хусусиятларнинг мо-

¹ Қаранг: Н. Шукров, Н. Хотамов, Ш. Холматов, М. Махмудов. Адабиётшуносликка кириш, Т., «Ўқитувчи», 1984, 179-бет.

ҳирона ижросини Ҳ. Олимжоннинг «Бахтлар водийси», F. Фуломнинг «Сен етим эмассан» каби ўнлаб шеърларида, М. Шайхзоданинг «Мирзо Улуғбек» трагедиясида, Р. Парфининг юзлаб асарларида — гўзал лирикасида кўриш мумкин.

Эй, Фаргона!
Эй, бўйнига
қора тўрва
осган жонлар,
Эй ҳар куни,
гадойликка
тортган онлардан
Эй танларни
шилиб ётган
ҳаром қонлардан
Бир йўласи озод бўлган азамат ўлка!

(Ҳ. О л и м ж о н)

Битта шеър доирасида бўгин, туроқ, мисра, банд, қофия, ритмик пауза каби воситаларнинг мазмун ва оҳанг талабига мос тарзда товланиши (ранг-баранг ва эркин бўлиши) эркин шеър системасининг бош қонунидир.

Бу система (эркин, оқ, сарбаст шеър йўллари) халқ тилига — оддий сўзлашув тилига жудаям яқинлашгани билан ажralиб туради. Халққа хос бўлган оддий, «қўпол» сўзлар ҳам, сўз бирикмалари ҳам бу системага кира билдилар, одатдагидан кўра катта вазифани — поэтик олам образини яратса олдилар. Бу хусусият системанинг оммаболлигини, жонлилигини, зарурлигини таъминлади.

Эркин шеър системаси турли халқларнинг шеър системаларига (айниқса, турк, рус, япон) қизиқишини ҳам оширди; уларнинг намояндалари (Нозим Ҳикмат, Гарсия Лорка каби) ва жанрлари (хокку, танка) чанқоқлик билан ўрганила ва таржима этила бошланди.

Айтилганлардан шундай **хулосага** келиш мумкин: Эркин шеър системаси XXI аср жаҳон поэзиясида, жумладан ўзбек шеъриятида ҳам етакчилик қилса ажабмас, чунки у «тезкор» замона кишиларининг мураккаб зиддиятларга тўла, шиддаткор, бетакрор руҳий дунёларини борлигича намоён этишга қодир куч-муъжизадир.

III. ШЕЪР ТАҲЛИЛИ

Таянч сўз ва иборалар: «Бўлсам»нинг тугилиши. Унинг вазни. Тақтесь қилиш. Бадиий воситалар. «Ўрик гуллаганда»нинг туроқланиши. Фояси. Фояни юзага келтирувчи унсурлар. F. Фулом шахси. Бадиҳагўйлиги. Шеър яратиш жараёнидаги ҳолати. «Умр». Ундаги ҳаётийлик ва фалсафийлик. Яшамоқнинг мазмуни. Э. Воҳидов ва «Ўзбек Навоийни ўқимай қўйса...».

«Ўзимнинг санъатимга сўнг ўзим ҳайратда лол бўлсам»

а) Фазалнинг матни:

- На бўлгай бир нафас мен ҳам ёнофинг узра хол бўлсам,
Лабинг япроғидан томган ки гўё қатра бол бўлсам.
- Бутоғингга қўниб булбул каби хониш қилиб тунлар
Ўпиб гунчангни очмоқликка тонг чоғи шамол бўлсам.
- Бўйингни тарқатиб, оламни қилсан маству мустағриқ,
Ўзимнинг санъатимга сўнг ўзим ҳайратда лол бўлсам.
- Сенинг бирла қолиб бу маству лол оламда мен ёлғиз
Ўзимни ҳам тополмай, майлига охир хаёл бўлсам.
- Агар боғингда гул бўлмоқ менинг чун нораво бўлса
Ки минг бор розиман қасрингга ҳаттоким дувол бўлсам.
- Бошим ҳеч чиқмаса майли маломат бирла бўхтондин
Рақиблар рашикига кўкрак керай, майли қамал бўлсам.
- Кезиб сахрою водийлар етишсам бир висолингга,
Фидо жонимни қилдим йўлингга, майли увол бўлсам.

б) Фазалнинг вазни:

Номланиши — ҳазажи мусаммани солим

I рукн	II рукн	III рукн	IV рукн
Мафоийлун	мафоийлун	мафоийлун	мафоийлун
у — — —	у — — —	у — — —	у — — —
На бўлгай бир	нафас мен ҳам	янофинг уз	ра хол бўлсам
Лабинг япро	ғидан томган	ки гўё қат	ра бол бўлсам

в) Луғат ва изоҳлар:

«Бүй — ҳид, ис. Лол — 1. Соқов, тил тутилиши. 2. Сўзлай олмай қолишилик, бирор нарсадан таъсирланиб сўзлай олмай қолишилик; Мустағриқ — фарқ бўлган, чўмган; увол — айб, гуноҳ. 2. Бевақт йўқ бўлиш: нестнобуд.

г) Байтларнинг насрый баёни:

1. Нима бўлар эди мен (ҳам) бир нафасга ёноғингдаги хол бўлсам
Лабинг япроғидан томган асал қатраларга айлансан.
2. Тунлар сенинг боғингдаги гул шохига қўниб хониш қилган булбул сингари,
Тонг чоги фунчаларни ўпиб очувчи шабодага айлансан.
3. Сенинг исмингни бутун оламга тарқатиб, шу оламни сенинг ҳидларингга фарқ қилсам,
Шундай ҳолатдан сўнг, ўзимнинг қилган ишимга ҳайрон бўлиб, тилим сўзлай олмай қолса,
4. Сен билан ёлғиз мен шу сўзлай олмайдиган масти оламда қолсам,
Ўзимни ҳам топа олмай, хаёлга айлансан ҳам майлига.
5. Сенинг боғингда менинг гул бўлмоғлигим мумкин бўлмаса,
Майли қасрингга девор бўлишга ҳам минг марта розиман.
6. Майли менинг бошим маломат ва бўхтонлардан чиқмасин,
Рақиблар қанча рашк қилмасин, мен ҳаммасига қамалдагилардек чидайман.
7. Сахрою водийларни кезай, сенинг висолингга етишини ўйлаб,
Сенинг васлингга етишим учун жонимни фидо қилишга ҳам тайёрман, гарчи бевақт ўлсам ҳам.

д) Фазал таҳлили:

Ҳамид Олимжон 60 йиллик тўйини нишонлашга катта тайёргарлик кўрилаётган йили. Куз. Самарқанд давлат педагогика институтининг ректори, ажойиб адабиётшунос Ориф Икромов бошлиқ жамоа ҳам пахта йигим-теримида ҳашарда эди. У ерда шоир юбилейига тайёргарлик жуда авж олганидан, кетма-кет йигин уюштирилаётганлигидан, шоир ҳаёти ва ижоди бўйича

бадиий композиция яратилаётганилигидан хабардор эдик. Дарвоқе, вилоят бўйича юбилейга тайёргарликнинг маркази ҳам институтуда эди.

Чунки Орифжон Икромов Ҳамид Олимжоннинг Сармарқанддаги энг йирик тадқиқотчиларидан бири, айни пайтда, шоирнинг севимли жияни эди. Қизиги шундаки, Орифжон акага тоғасининг жуда кўп фазилатлари «юқсан»лигини ҳамма тан олар, шунинг учун у киши билан суҳбатлашишга, маслаҳат олишга ошиқар эдилар...

Бу сафарги суҳбатимиз мавзуи ҳам Ҳамид Олимжон бўлди. Шоирнинг ҳаёти ҳам, ижоди ҳам, оиласи ҳам, салафлари ҳам қизгин муҳокама уйғотди. Суҳбат жараёнида гап Ҳамид Олимжоннинг «Бўлсам» радифли фазалига тўхтади. Шунда Орифжон aka шу асарнинг ёзилиш тарихини гапириб берганлари ҳамон эсимда: «1943 йил, рўзгоримиизда озиқ-овқатларнинг таноби жуда тортилиб қолган пайт эди. Дадам ва аям Тошкентга бориб, бувим, тоғам ва келинойимдан хабар олиб келишимни айтиб қолдилар. Дуч келган поездга тушиб, қош қорайгандга Тошкентга етиб келдим. Ҳаммалари уйда эканлар, рўзгорларида тинчлик, саломатлик...

Мен тўйиб овқатлангач, йўл ҳордиги ҳамда овқатнинг бадани бўшаштириши таъсирида уйқуга майл қила бошладим. Тоғам буни сезиб, сен ётабер, мен ҳали ишлайман, кундузлари имконият йўқ, деб ижод хонасига ўтиб кетдилар. Анча вақтгача тоғамнинг овозини узуқ-юлуқ эшитиб ётиб, ухлаб қолибман. Уйқуга кетгунимча эшиганим тугал жумлалар эмас, балки «мафойлун, фойилун» каби турли баҳрларнинг рукнларини англатувчи сўзлар такори ёки «хол», «бол», «шамол», «хаёл» ва ҳоказо қофияли сўзлар такори эди, холос.

Бир пайт тоғамнинг «Орифжон! Орифжон, турақол энди! Мана чиройли ғазал туғилди», — деган овози билан уйғониб кетдим. Ташқари ҳали жуда қоронғи, тонг отишига анчагина вақт бор эди. Ҳамид Олимжоннинг қўлида бир тутам қофоз. Чехрасида ўз ишидан мамнунлик, қувноқлик акс этар эди.

«Мана сен ухладинг, биз эса фидойи ошиқнинг маҳбубасига дил сўзларини қофозга туширдик», — деб мени қаршилади шоир. «Биласанми, — деб давом этди Ҳамид ака, — ошиқнинг ҳиссисиётларини тугалроқ жумлаларда ифодалаш учун кўп рукнли, халқ қўшиқларига

монандроқ вазн танлаш лозим эди. Роса терлатди бу юмуш. Тұғри, рамал шу исталган баҳр эди. Лекин байттарда мен құлламоқчи бұлган бадийлик воситалари бошқачароқ вазнни талаб қилди. Охири вазнларни тинтий-тинтий ҳазажи мусаммани солимни танладим. Ўттис икки бұғындан иборат байтда «мафойлун» саккиз марта такрорланади. Ҳосил бұлган мусиқийлик эса үзбек халқ құшиқларига, айниқса, катта ашула йүлиға жуда мос келади. Тинглаб күр-да, — Ҳамид Олимжон шундай деди-да, ғазални хиргойи қила бошлади: «На бұл-гай бир на-фас мен ҳам я-но-финг уз-ра хол бұл-сам, ма-фо-ий-лун ма-фо-ий-лун ма-фо-ий-лун ма-фо-ий-лун».

Ғазални жуда гұзал хиргойи қилиб бұлиб, шоир: «Күрдингми, — деб яна менга мурожаат қилди, — вазн ұтто ҳар бир мисрада бирор бир тасвирий воситани құллашга монеълик қилмайди. Лекин энг асосий масала фидой ошиқнинг руҳини бера билишда эди. Шукрки, вазнни танлаб топа олдик. Бошқа вазн ё «шұхроқ» чиқар ёки «калталық» қиласы. Чунки шеърда ифодаланмоқчи бұлган поэтик мазмун вазнни белгилаши керак. Бу нарса, тұғрироғи, бутун ижод жараённега тааллуқлидір».

Нонушта пайтида газал янги тингловчиларга ҳам үқиб берилди. Менгина эмас, үтирганларнинг ҳаммасини ҳам қалби ларзага келди гүё.

Ҳар қачон шу ғазал хотирамга келса, үша қунни әслайман. Құз ўнгимда ижод тұлғоғида зақмат چеккан Ҳамид Олимжоннинг меңнаткаш қиёфаси келади».

* * *

Ғазал севги мавзуида ёзилган бұлиб, унда фидой ошиқнинг ёр висолига интилиши, унга етишиш йүлидаги руҳий кечинмалари ғоятда күчли, қабариқли ифадасини топған.

Асаддаги лирик қаҳрамон (шоирнинг ўзи) севикли ёрига шунчалик мафтунки, у учун бутун ҳаёт ва қалбини бағишлиайды. Чунки ёр салоқат ва вафо, гұзаллик ва латофат, баҳт ва шодлик рамзидир. Шунинг учун ҳам ошиқ идеали, орзуси бир нафас бұлса ҳам севимли ёрининг бир парчасига, зарур әхтиёжига айланишдир, бу жуда самимий, изҳори эса ҳароратта тұлиқдир:

*На бұлғай, бир нафас мен ҳам яноғинг узра хол бұлсам,
Лабинг япрогидан томган ки гүё қатра бол бұлсам.*

Шоир етакчи фояни юзага чиқарувчи лирик ҳиссиятни тұла ва мукаммал ифодалаш мақсадида тадриж воситасидан фойдаланади; мавзу ва образни астасекин ривожлантириб, такомиллаштириб боради:

*Бутогингга құніб, булбул каби хониш қилиб түнлар,
Үйіб гүнчанғы очмоқликка тонг өгі шамол бұлсам.*

Бу мисралардан сұнг, яна ривожлантириш, яна құтариңки тасвирлеш мүмкін әмасдай туюлади. Лекин Ҳамид Олимжоннинг моҳирлиги шундаки, марказий фоя — ёрга фидойиликнинг такомилини давом эттиради, олдинги байтлардаги фикр, ҳиссиёт оқимини яна да баландроқ погонага олиб чиқади; ёрнинг бүйини (ҳидини) тарқатиб, оламни үзини билмайдиган дара жада маст ҳолға келтириб, сұнг бу ҳолатта үзи лол қолишини, ёр билан ёлғиз қолғанда ҳатто хаёлга айланышга рози эканлигини күйлайдыки, фидойиликнинг бунчалик кучли, бунчалик гүзәл ифодасидан, шоирнинг саңъатидан киши ҳайратта келади:

*Бүйингни тарқатиб оламни қылсам маству мустағриқ,
Үзимнинг саңъатимга сұнг үзим ҳайратда лол бұлсам.
Сенинг бирла қолиб бу маству лол оламда мен ёлғиз,
Үзимни ҳам тополмай, майлига, охир хаёл бұлсам.*

Ҳамид Олимжон бундан кейинги байтларда тадриж билан бир қаторда тазодни құллайды. «Гул»га «дувол», «маломат бирла бұхтон»ға «қамал», «висол»ға «увол» қарама-қарши құйилади. Ва бу усул орқали ошиқ қалб диалектикасининг ички мөһиятини тұласинча очиб бериштағы эришади.

*Агар бөгингде гул бұлмоқ менинг-чун нораво бұлса,
Киминг бор розиман қасрингга ҳаттоким дувол бұлсам.
Бошим ҳеч чиқмаса, майли, маломат бирла бұхтондин,
Рақиблар рашиғига құқрак керай, майли, қамал бұлсам.
Кезиб сахрою водийлар етишсам бир висолингга,
Фидо жонимни қылдым йүлингга, майли увол бұлсам.*

Хуллас, ғазалда баҳтиёр ошиқнинг қалбдаги психологияк тебранишлар — унинг ширин орзулари ҳам, хаёлан висол оғушыда топған бир нағаслик лаззати ҳам ва әнг асосийси, садоқатли ёрга фидойилиги ҳам саңъаткорона аксина топған.

Бекиес истеъдод зәгаси Ҳамид Олимжон қайси асарини ёзған бұлмасин, у аввало, оқанғни — асар рит-

мини ва мусиқийлигини, эмоционал ва таъсирчанлигидини яхлит юзага келтирувчи ички сехрини топа олган. Бу шоир ижодининг сирларидан биридир.

Ҳақиқатдан ҳам шундайлигини ушбу газалнинг яратилиш жараёни ҳам, асарнинг халқ, кўшиқларига мос соддалиги ҳам, унинг услубини шўх ва жонлилиги, енгил ва равонлиги ҳам исботлайди. Шоир газалда, унинг ҳар бир мисрасида фидойи ошиқнинг руҳини очадиган энг зарур, энг гўзал сўзларни бехато танлай олган. Газалда фақат биргина архаик «мустафариқ» сўзи ишлатилган. Бу сўзнинг маъноси «тарқ бўлган», «чўмган» бўлиб, уни бошқа сўз билан алмаштирилганда вазн (унлиларнинг чўзиқлиги) бузиларди, фикрни («оламни маст қилиб хаёлга тарқ бўлмоқ») равонлиги, ошиқнинг муддаоси тиник чиқмаган бўларди. Шунинг учун газалда ишлатилган сўзлар қалбнинг нозик қирраларини ўзига тортувчи оҳанрабога ўхшайди. Шоирнинг ўта содда ва жўшқин, жуда қуюқ ва ширали қилиб айтганига, ҳа, топиб айтганига қойил қоласан, киши.

Ҳақиқатдан ҳам 25 яшар қирчиллама йигит (1934 йил) қалбига ошна бўлган дард— севги у билан мангу яшади. Ҳамид Олимжоннинг Зулфияга бўлган пок муҳаббати, бу муҳаббатдаги садоқат ва вафо, ҳурмат ва иззат, фурур ва мардлик, баҳт ва саодат шунчалик кудратга эгаки, уни ниҳоясиз отилиб чиқувчи вулқон оташига қиёс қилиш мумкин. Шунинг учун ҳам бу оташ бугунги кунда ҳам қалбимизни иситади, иккала санъаткорнинг севгисидан юзага келган самимий иттифоқ ҳавасимизни уйғотади. Ҳа, газал яратилганига ярим асрдан кўпроқ вақт ўтганига қарамай, унда шоир муҳаббатининг ҳамон ловуллаб ёниши, фидойилигининг бекиёслигини кўрамиз.

«Бахтим борми, дея сўрайман»

a) Шеърнинг матни:

*Деразамнинг олдида бир туп
Ўрик оппоқ бўлиб гуллади...*

*Новдаларни безаб ғунчалар
Тонгда айтди ҳаёт отини
Ва шаббода қурғур илк саҳар
Олиб кетди гулнинг тотини.*

Ҳар баҳорда шу бўлар тақрор,

*Ҳар баҳорда ҳам шундай ўтади.
Қанча тиришсам ҳам у беор
Йиллар мени алдаб кетади.*

*Майли дейман ва қылмайман ғаш,
Хаёлимни гулга ўрайман.
Ҳар баҳорга чиққанда яккаш,
Бахтим борми, дея сўрайман.*

*Юзларимни силаб-сийпалаб,
Бахтинг бор деб эсади еллар.
Этган каби гўё бир талаб,
Бахтинг бор, деб қушлар чийиллар.*

*Ҳамма нарса мени қаршилар,
Ҳар бир куртак менга сўйлар роз.
Мен юрганда боғларга тўлар,
Фақат бахтни мақтаган овоз.*

*«Мана сенга олам-олам гул,
Этагингга сиққанича ол.
Бунда толе ҳар нарсадан мўл,
То ўлгунча шу ўлкада қол.*

*Умрида ҳеч гул кўрмай йиглаб
Ўтганларнинг ҳаққи ҳам сенда.
Ҳар баҳорни йиглаб қаршилаб
Кетганларнинг ҳаққи ҳам сенда...»*

*Деразамнинг олдида бир туп
Ўрик оппоқ бўлиб гуллади.*

6) Шеърнинг вазни:

1 2 3 4 1 2 3 4 5
Де — ра — зам — нинг ол — ди — да бир туп

1 2 3 4 1 2 3 4 5
Ў — рик — оп — поқ бў — либ гул — ла — ди
4 + 5 = 9

в) Лугат ва изоҳлар:

тот — таъм, маза, лаззат;

роз — 1. Махфий топилган нарса, сир. 2. Дилдаги орзу; тилак, дард; толе — 1. Омад, баҳт. 2. Қисмат, тақдир.

Ушбу шеър 1937 йилнинг 30 марта ёзилган ва биринчи марта «Қизил Ўзбекистон» газетасининг 1937 йил 5 апрель сонида босилиб чиққан.

«Сайдин саҳифа» фильмида (сценарий автори С. Азимов, постановка режиссер Й. Аззамов) «Үрик гуллаганда» шеъри қўшиқ қилиб айтилади.

г) Шеър таҳдили:

Ҳ. Олимжон 1937 йил эрта баҳорда Қозоғистонда бўлиб, қозоқ халқининг ҳаёти билан танишади. Ҳасан Қайғи, Жамбул каби оқинлар ижодини ўрганади. Мартнинг сўнгги кунларида «хаёлларга тўлиб-тошган шоир Тошкентга қайтади. Тошкентда эса баҳор. Обсерватория кўчасидаги ҳовлисида, шундайгина ишхона деразаси олдида бир туп ўрик оппоқ бўлиб гуллаган — илҳом парисининг ўзгинаси. Натижада, бадиий реализмнинг юксак ифодаси бўлган, шоир кечинмаларининг гўзал намунаси даражасига кўтарилган «Үрик гуллаганда» шеъри туғилади» (С. Азимов. Ҳамид Олимжон агадияти, 127-бет).

Шоир «лирикасининг энг латиф намунаси — «Үрик гуллаганда» шундай мисралар билан бошлиниади:

*Деразамнинг олдида бир туп
Ўрик оппоқ бўлиб гуллади.*

Бу хабарни эшитган ўқувчида ҳам турли-туман фикрлар уйғонади. Лекин шоир нима демоқчи? Үрик гуллари — ҳаётнинг навбаҳори, навбаҳорнинг илк элчиси шоир қалбидаги қайси кечинмаларни юзага чиқарар экан? Бу кечинма, ҳиссиёт, фикрлар оқими сизу бизни ўзига ошна қиласмикин? Шоир ҳис-туйғулари бизнинг кечинмаларимизни ҳам уйғота олармикин? Ҳаяжон сола билармикан? Ҳаёт ритмини сўз ва образларнинг ҳаракати орқали ифодалай олармикан? Бу эмоционалликни, романтикани, уларнинг турфа рангларини бўй-басти билан кўрсатиб, қалбларимизга зарур бўлган эстетик «озуқани» бера билармикан?

*Новдаларни безаб ғунчалар
Тонгда айтди ҳаёт отини.
Ва шаббода қурғур илк саҳар
Олиб кетди гулнинг тотини.*

*Ҳар баҳорда шу бўлар тақрор,
Ҳар баҳор ҳам шундай ўтади.*

*Қанча тиришсам ҳам у беор
Йиллар мени алдаб кетади.*

Кўринаяптики, ўрикнинг гуллаши шоир қалбидаги кечинмаларни уйготади: Ҳар баҳор ўрик гулларининг мизасини шаббода олиб кетади. Бу йил ҳам шундай тақрорланаяпти. Инсон умри ҳам шунга ўхшашиб эмасми? Энг завқда, кучга, шодликка тўлганингда — гуллаганингда ҳаётинг ришталари гул каби сочилемасмикин?...

*Майли дейман ва қилмайман ғаш,
Хаёлимни гулга ўрайман.
Ҳар баҳорга чиққандা яккаш,
Бахтим борми, дея сўрайман.*

Ўрик новдаларини безаган фунчалар — гул ҳаётининг баҳори экан, лирик қаҳрамон ҳаётининг баҳори нима? Бу — баҳт. Баҳтли ҳаёт. Лекин у борми, мангубарқарорми?

«Анз шу тарзда гулнинг тоти тўғрисидаги фикрлар баҳт ҳақидаги ўйлар билан уйғунлашади. Гулнинг тоти, лирик қаҳрамоннинг баҳти — шеър foяси ана шу икки қалбнинг учрашгани ва учқун сочган нуқтасида очилади» (Н. Каримов). «Бахтим борми?» деган сўроқ лирик қаҳрамонни ўйлатса, «иккинчидан, ўқувчининг онгигда қандайдир савол аломатини ҳам, яъни «бундан кейин нима бўлади» деган қизиқиши, масалага фаол муносабатни ҳам уйғотади. Шоир ўз ўқувчисида шундай туйгуни уйғотиб олгандан кейингина, бу эса поэтик маҳоратнинг «сир»ларидан биридир, баҳтли ҳаёт баҳорини ифода этувчи яхлит фикрларни мисраларга тизиб ташлайди» (С. Азимов):

*Юзларимни силаб-сийпалаб,
Бахтинг бор деб эсади еллар.
Этган каби гўё бир талаб,
Бахтинг бор, деб қушлар чийиллар.*

*Ҳамма нарса мени қаршилар,
Ҳар бир куртак менга сўйлар роз.
Мен юрганда боғларга тўлар,
Фақат баҳтни мақтаган овоз.*

*«Мана сенга олам-олам гул,
Этагингга сиққанича ол.*

*Бунда толе ҳар нарсадан мұл,
То ўлгунча шу ўлкада қол.*

*Умрида ҳеч гул күрмай ииғлаб
Үтгәнларнинг ҳаққи ҳам сенда.
Ҳар баҳорни ииғлаб қаршилаб
Кетгәнларнинг ҳаққи ҳам сенда...»*

Демак, лирик қаҳрамон бахтининг борлигига еллар ҳам, қушлар ҳам, ҳар бир куртак ҳам, баҳт овози ҳам иймон келтиради, тасдиқлады. Бахтнинг ижодкори бұлган ҳаёт «умрида ҳеч гул күрмай ииғлаб үтган»лар тақдиди билан қиёсланади ва «баҳти мангу барқарор эл», «ҳар гулистонда баҳор мангу» бұлган Ватан улуғланади.

Үқувчининг қалбига ана шу олийжаноб тушунчалар, ана шу бир олам ҳислар күчгандан сұнг, «ҳар нарсадан баҳт мұл ўлка»га содиқ фарзандлигидан севинчга тұлғач, шоир шеърни тутатади:

*Деразамнинг олдида бир түп
Үрик оппоқ бўлиб гуллади...*

Ҳа, «шеър күнгилларга нур олиб киргани яхши, гашлик ва најотсизлик түйғусин эмас» (Ә. Воҳидов). Баҳт ва баҳт ҳақидаги орзу — инсон камолоти учун зарур омил экан, уни куйлаган ҳам мангу тирикдир.

«СамДУ қопқасида бир қизни күрдім»

Фафур Фулом шахсининг юксаклиги, хаёл кучининг парвози, ақл уғқининг кенглиги, ижодий ҳозиржавоблиги камең ҳодиса эди. Шоир қалби ҳамма вақт сув тұла косадек халқымиз ва Ватанимиз меҳрига лиммо-лим эди. Уни ифодалашға эса доимо руҳан тайёр турарди. Косадаги сувга бирор томчи сув құшилса ёки турткі бұлса тошганидек, Faфур Fуломнинг бадиҳағый қалбидан турли сабаблар баҳонасида шеърлар фавварадек отилиб чиқарди.

Сайд Аҳмаднинг таъқидлашича, баъзан «Faфур ақани ёзув столи ёнига үтқазиб олиш қийин эди, бир үтириб олғандан кейин турмасди. Айниқса, шеър бұлса битта түртлик, ҳикоя бұлса биринчи саҳиға тұлғандан кейин үзи ҳам қизиқиб кетиб, то асар битмагунча үрни-

дан турмасди». Шуқрулло: «У қаерга борса, ўша ер унинг учун ижодхона, ҳам дам олув ери ҳисобланарди. Одамлар орасида туғилган фикрларни ўша ерда қоғозга тушириб, уларни ўқиб ҳам берарди. Faфур аканинг иш вақти ҳеч кимникига ўхшамасди. У дам олув орасида ижод қиласар, ижод қилаётган пайтида дам олаверарди — деб эслайди. «Бирорта сўз ёки тарихий воқеалар илдизларини иш баҳонасида сўрасанг, у шу туртки сабаб бир зарб билан шеър тўқирди» — дея хотирлайди устозни Нуриддин Шукуров.

Сайд Аҳмад «Назм чорраҳасида» китобида ёзганидек, F. Ғулом кўплаб шеърларининг туғилишига у «до-ялик» қилган. Жумладан, шундай ёзади: Мен Faфур аканинг... эркаликларини яхши билардим. Унинг қайсарлиги-ю, жиндек мақтанданнамо гапиришларини, ёзилган ҳар бир тўртлик кетидан мақтаб турадиган одам зарурлигини ҳам билардим. Бошқалардан кўра у кишини мен келишишириб мақтардим. Ўзи ҳам бунга тан берриб: «Мақташни сенга-ю ёзишни менга чиқазган» дерди. Унинг ёзишича, F. Ғулом расмлар чизар эди. У рақс тушганида зўр раққосалар ҳам даврадан чиқиб, томоша қиласарди. Кўлига тақсимча олиб, халқ термаларини айтганда, ҳамма жимиб қоларди. Дутор чертгандага, тингловчилар бош эгиб тебранишарди. Faфур aka Юсуф қизиқлар билан тенг келиб асқия айтишарди. Халқ достонларини баҳшидек оҳангি, ифодаси билан бошдан-оёқ айта оларди.

Хуллас, F. Ғулом ҳақидаги бу хотираларни ўқир экансиз, шоир бўй-басти билан кўз ўзингизга келади. Унинг илҳом пайтидаги ҳолатини Сайд Аҳмад билан бирга кўрасиз:

«...Хаёлинини бузмаслик учун чой қуйиб, стол четига қўйдим. Қараб турибман. Faфур aka ўйлаяпти. Кўзи гоҳ шифтга тикилар, гоҳ қошлари чимирилиб, худди уришмоқчи бўлгандек менга ёмон қараб қоларди. Биламан, бунақа пайтда Faфур aka мени кўрмайди. Хаёлида ярататётган нарсанигина кўради. Ручкани сиёҳдонга зарда билан ботирди-ю, ёза кетди:

Гоҳида бир муддат олгулик нафас...

Бу сатрни шошиб ўчирди-да, бошқатдан ёзди.

*Баъзида бир нафас олгулик муддат
Минг юлдуз сўниши учун еткулик.*

Шундан кейин ўчиб қолган папиросни сүрди. Гуртта қақиб, қайта үт олдириди-да, менга қаради.

— Қалай? Мана буни Faфуровский шеър дейилади.

Faфур аканинг бутун хусусиятларини яхши билиб олган эдим. Шунаقا пайтда мақтаб қўйсанг руҳи кўтарилиб кетади-ю, ажиб бир файрат билан ишга тушади.

— Э, қойил қивордингиз, F. Гуломуп ака.

— Жим тур, аралашма. Келиб қолди.

Яна ручкани олиб, бироз ўйлади-ю, жуда ҳам тез ёза бошлади. Сўзлар қоғияси билан, вазни билан, маъноси билан қўйилиб келарди. Ручкани тез-тез сиёҳдонга ботирав, хусниҳат билан, устидан ўчирмай, кетмакет ўн икки сатрни ҳам дам олмай ёзиб бўлди...»

Китобни ўқир экансиз, F. Гуломнинг «Вақт» шеъринини шундай туғилганига сиз ҳам гувоҳ бўласиз, гўё шу жараёнга ўзингиз ҳам иштирок этгандек ҳузурланасиз. Ушбу айтилган фикрларни Шукруллонинг «Жавоҳирлар сандиги» китоби, китобдаги устоз ва шогирд (F. Гулом ва Шукрулло)нинг муносабатлари янада бойитади.

Унда F. Гуломнинг исталган мавзу буйича, исталган нарса ҳақида, исталган ҳодиса тўғрисида шеър ёза олиш қурдати, ҳозиржавоблик қобилияти ишонарли очиб берилган:

«— Кўзингга кўринган нарсани бир лаҳзада шеър қила оласанми? — деб сўради. — Ҳар нарсани шеър қилиш мумкин. Мана, кўзингга кўринган, кўнглингга келган бирор нарсани айтиб кўр, шеър бўладими, йўқми — биламиз кўямиз.

Мен шоирнинг хонаси ва ҳовли атрофидаги нарсаларни кўздан кечира бошладим. Бу уйдаги ҳар бир нарса шоирона дид билан танланган. Ҳар бир нарсада шоирнинг нозик табиати, ўткир фаросати кўриниб туради. Иш столи устида Гётенинг бронздан қилинган кичкинагина бўсти... деворларда гилам, танбур, дугор осифлиқ. Мен ҳали ҳеч ким шеър қилиши учун кўл урмаган, Faфур аканинг ўзи ҳам кутмаган нарсани излар эдим. Бирданига кўзим сиёҳдонга тушди-ю, шу ҳақда бир шеър қилишларини сўрадим. Faфур aka сиёҳдонга бир тикилиб, гувраниб олди.

Ниманидир тутмоқчи бўлгандек, йирик-йирик бармоқлар ҳаракатга келди. Кўзлари ёнди, лаблари ниманидир пичирлай бошлади. Ҳамлага отланган шердек бир он жим қолди, кетмакет сатрлар қофозга туша бошлади:

*Алишер давотга қылганда хитоб,
Қалами ёдидан күтариладыму
Сиёҳдон, азизим, қора күзлугим,
Қора тунлар аро ёрига күзгү...
Улуғ жсанг кунларни ёзар чогимда
Шаҳидлар қонидек дафтарга томдинг,
Лаънати малъунлар номин ёзганда
«Мен қора эмасман» дединг-у, тондинг.*

Faфур aka шеърни битказиб, менинг фикримни сўради:

— Қалай?

Мен нима дердим... битта сиёҳдон орқали шунча гапларни топиб айтиш менинг хаёлимга келмаган эди. Албатта, мақтадим. Бу шеърнинг ёзилиши мен учун мўъжиза эди».

Faфур Fуломнинг зукколигига, билимдонлигига, тантлигига, мардлигига, соддалигига, эркаликлариға қойил қолмаган, бекиёс истеъдод эгаси эканлигини тан олмаган кишилар топилмаса керак. У киши мўъжиза яратадиган афсунгар — «шеъриятимиз афсунгари» эканлигига бизлар ҳам шоҳид бўлганмиз.

1961 йил март ойида СамДУ нинг мажлислар залида F. Fулом билан учрашиш учун шаҳар аҳли, ўқувчилар, талабалар тўпланишди. Айниқса, олдинги қатордан жой олиш, шоирни яқинроқдан кўриш ва эшитиш истагидаги юзлаб толиби илмлар эшиқдан киришга ошиқар эдик. Ҳали киришимизга улгурмасимизданоқ F. Fуломни ҳамроҳлари билан вилоят раҳбарлари кузатиб келиб қолишиди. Бир қисмимиз уларга йўл беришга мажбур бўлдик. Йўлак очилганидан фойдаланган бир гурух қизлар олга интилишди. Қизлар ҳам меҳмонларга аралашиб кетишиди. Шунда Faфур Fулом улардан бир нечтасини тўхтатиб, нималардир деяётганига ва сукланиб боқаётган нигоҳларига кўзимиз тушди. Қизлардан бири нимадир деганди, Faфур Fулом кулиб юборди. Сўнг ҳамма бирин-кетин мажлисхонага кириб кетди. Гулдурос қарсаклар остида меҳмонлар президиумдан жой олишиди. Тантана бошланди. Faфур Fулом ҳақида ким гапирмасин зал уни ҳам шоирга қўшиб олқишлиарди. Faфур Fулом эса ўтирган пайтиёқ киссасидан қофоз ва ручка чиқарди. Залга бир зум нигоҳ ташлади-ю, нималарнидир ёза бошлади. Маъruzачиларнинг нутқи унга тегишли эмасдек, ўзи билан ўзи банд эди. Чехрасида

баъзан ним кулги балқир, баъзан ўта жиддийлик на-
моён бўларди. Биз табиийки, сўзга чикувчиларнинг гап-
ларига муносабат билдириш учун бирон нарсалар қора-
лаётган бўлса керак, деган фикрга борардик. Сўз бе-
рилганда, уларни «богласа» керак, деб ўйлардик.

Мажлис раисиFaфур Фуломга сўз берди, олқиши-
лар янгради. Шоир ўнг қўлини кўтариб залдан тинчла-
нишни сўрадилар-да, «Сизларга бағишлаб ҳозиргина
ёзган шеъримни ўқиб бераман» дедилар:

СамДУ қопқасида бир қизни кўрдим

Бу мисрани эшитиши билан залдагилар гулдурос
қаңсак чалиб юбориши. Бироздан сўнг шоир мамнун
қиёғада залга нигоҳ ташлади ва қўлини кўксига қўйиб,
раҳмат, дегандай эгилиб қўйди. Бир зумда зал шунчалик
тинчландикни, пашша учса ҳам эшитиларди. Faфур
Фулом жарангдор ва ширали овозда шеър ўқий бошли-
ди:

*СамДУ қопқасида бир қизни кўрдим,
Етти ранг товланган қуёш каби пок.
Кошкийди ўттиз йил орқага қайтиб,
Ишқимни айтсайдим қилиб ёқа чок.
Сўзларнинг жарангин эшитмак учун,
Изланиб, тополдим баҳона — савол
Самарқанд тонгининг елидай майин
Кулимсираб лаб очди, бир бутун жамол:
— Майиз бозорига чапдан борилур,
Анжир ҳам шу ерда, анор ҳам шунда.
Мунча ҳам соддасиз, мунча ўзбексиз,
Йўл етиб бўларми, ёп-ёруғ кунда...
Агар-чи, қадимий Самарқандийман,
Кафтим чизингидай ҳамма ер аён.
Багримни эркалаш, мусиқа тинглаш,
Фоят зарур эди шу нозик баён.
СамДУ қопқасида кўрганим қизнинг
Қаймоқ мазмунига жоним омода.
Самарқанд мазмунли кўркам юлдузни
Севсам севибман-да, ўзбекман, содда...*

СамДУ нинг қизи — «Илҳом париси» сабаб Faфур
Фулом ҳамма самарқандликларга меҳру муҳаббатини
ана шундай изҳор этди. Айни пайтда, бетакрор бади-
ҳагўй шоирлигини, ёшлиқни жудаям қўмсаган ҳазил-
каш ва нуроний инсонлигини, умуман, ўзбекнинг содда

мутафаккири, шеъриятимизнинг кўркам юлдози эканлигини кўрсатган эди ўшандা. Шоир «Капалак умрига қиёс этгулик» умри жараёнида содда, аммо мазмунан бой, файласуфона сатрлари билан шеърият ихлосмандлари қалбидаги ўчмас из қолдирди. Қалбимизда у шундай нақшланди ва ўлмас асарлари билан тириқдай бугун ҳам Сиз-у мен билан Истиқлол сари улкан одим отмоқда.

«Умр... бамисли отилган ўқ»

Азизлар! Тўхтанглар! Бир зум диққатингизни олмоқчиман. Сиздан, дастур аҳамиятига молик бир шеър баҳонасида, умр ва умрингиз ҳақида сарҳисоб сўра-моқчиман: «Жамиятга, одамларга фойда келтирдингизми? Эзгулик қилдингизми? Қалбингизни тоблай, поклай олдингизми? Нур сочасизми ёки ёмон ишлар билан оворасизми? Порляяпсизми ёки бурқсияпсизми?...» Бундай журъатимни айблашдан олдин, келинг бир мулоҳаза юритайлик:

«Ҳаётнинг маъноси фарогату айшу-ишрат бўлса, Аллоҳнинг энг суйған кишилари фиръавиylар бўлиб чиқади. Агар — яшаш билмоқ, ҳис қилмоқ, севмоқ, дард чекмоқ, ёнмоқ, ўртамоқ бўлса, энг баҳтли одамлар бизлар бўламиз. Кўнглим дерки, бизлар саодатлироқмиз», — дейди шоир Эркин Воҳидов.

«Ҳа, яшамоқ, мунча йил еб-ичмоқ, мансаб ва пул деб ўлиб-тирилмоқ, бўш вақтларда эса мудраб, пашша қўримоқ ва қартавозлик қилмоқдан иборат эмас... Яшамоқ бу ҳис этмоқ ва фикрламоқ, изтироб чекмоқ ва роҳат қилмоқдир. Булардан бошқа ҳар қандай ҳаёт ўлимдир. Бизнинг туйғу ва тафаккуrimиз қанчалик катта мазмунни қамраб олса, изтироб ва роҳатланиш қобилиятимиз қанчалик кучли ва теран бўлса, демакки, биз шу қадар кўп яшаяпмиз. Бундай ҳаётнинг лаҳзаси майда-чўйда ишлару бир чақага қиммат ниятларни деб руҳсиз, мудраб ўтказилган юз йилдан аҳамиятироқдир...

Ҳа, ҳамма нарсани руҳан забт этмоқ, эгалламоқ, ҳамма-ҳаммасида устун келмоқ ва ҳеч нарсага тобе бўлмаслик — мана ҳаёт шу!» (В. Белинский. Адабий орзуладар, 97-бет).

Нақадар топиб айтилган гаплар. Одилона мулоҳазалар. Асрларга татийдиган ва асрлар оша яшаётган

ҳақиқат, ҳақ сүзлар. Такрор-такрор айтишга арзийдиган, амалиётга күчирилса буюк мазмун ато эта оладиган ўлмас фикрлар.

Аммо инсон учинчи минг йилликда ҳам ўзи яратган, нафси-аммораси бунёд этган «занжиirlар» сиртмоғидан озодми?

«Нақадар оғир, нақадар қадрдон бу занжиirlар. Уларни топгунча инсоният узундан-узоқ тараққиёт йўлларини босиб ўтди. Ақли органи сари занжиirlари кўпайди. Зоҳирий занжиirlар ботинийга алмашди. Темирлари ечилиб, олтинлари боғланди. Тараққий занжир топди ва занжир тараққий топди. Занжир одатга айланди. Ўлмаган қулнинг қуллиги ўлмади. Коинотнинг ҳожай арзандаси ва ўз нафсининг бандаси бўлиб яшади инсон. Молу давлатнинг, шону шавкатнинг, урфу одатнинг, вақту соатнинг ва яна минг бир ҳолатнинг қули бўлиб яшаётир инсон».

Шоир шахси ҳам бу занжиirlардан озод эмас. Ана шу занжир ила у «инсониятга туташ», «замонга дахлдор» (Э. Воҳидов)дир. Шунинг учун ҳам аллома шоир Эркин Воҳидов «Чексиз, абадий макону замон ичра мавжудликни улуф баҳт ва оламу ўзни англамасликни улуф дард» деб билади. Ўзини зарра санаб, зоҳирий ва ботиний занжиirlарга қарши матонат кўрсатишга чорлайди, «минг бир ҳолатнинг қули» бўлиб эмас, умидбахш эртанинг яратувчиси бўлиб яшашга чақиради, «оламда меҳру саховат, поклик ва эзгулик голиб бўладиган» замонлар келишига ишонади-ю, суюкли Ўзбекистонни, ҳур ва озод Ватанини, меҳнаткаш халқимизни улублайди, уларни қалбига жойлайди:

«Эй, менинг буюк ва озурда юртим, қудратли ва жафокаш Ватаним! Сен ўз занжиirlарнинг ичидаги уқубатлиси, энг оғриқлиси бўлган тобелик ва мутелик занжиридан ҳалос бўлдинг. Озодлик кунинг аср деса аср, минг йиллик деса минг йиллик ичидаги энг буюк кундир. У сенинг янги тарихинг, менинг янги умрим бошланган кун. Милодий ва ҳижрий йил ҳисоби ёнида қалбимнинг ўз йил ҳисоби бор. Янги йил милодий икки минг биринчи, ҳижрий — бир минг тўрт юзу йигирма биринчи, озодий — ўнинчи йил бўлади» (Таъкидлар — Ҳ. Ү).

Ушбу фикрлар «Ажаб саодат эрур...» ва «Ассалом, келажак!» номли жажжи бадиҳаларда ифодасини топган. Ақл ва қалбда пишиб, теранлашиб, дур шодаси

каби яхлитлашиб, ҳайқириқ бўлиб қоғозга тўкилган. «Янги аср остонасидаги ўйлар» (Ўзбекистон адабиёти ва санъати, 22 декабрь 2000 йил) туркумидаги бу бадиҳалар — XXI аср ўзбек ижодкорларининг **бөш дастуридай** таассурот уйготади. Унинг ҳар бир сатридаги ёниқ мулоҳазалар — «яшашининг маъносини теран англашга» даъват этади. Ватан ва халқимизнинг тепиб турган юрагига қондош ва жондош бўлиб яшашга, уларнинг руҳиятини ёрқин ифодалашга, ҳаққоний тасвиirlашга — поэтик дунёсини кашф этишга чақиради. Айни пайтда, бу талаблар ўзига ҳам даҳлдор эканини чуқур англаган шоир унинг исботини ҳам беради: бадиҳаларига учта шеърини илова қиласди. Бу шеърларнинг ҳар бирида Эркин Воҳидов поэтик қудратининг юксак ва бекиёслиги яққол кўзга ташланади.

Айниқса, кўпгина шоирларимиз бугунги кунда ўз ижодлари нафасини — мақтovларга ва насиҳатларга буркаганлари учунми, ўзларини кашф этишда давом этиш ўрнига, айтган борлиқларини такрорлаётганлари сабаблими, умум дардини, раму андуҳини, жасоратини, соғинчини, шодлигини куйлаш ўрнига, ўзларининг шахсий садоқатлари ва муҳаббатлари «қўшигини» куйлаётганлари оқибатими ёки бу уччала ҳолатнинг аниқ бирлашиб кетгани ва авжда экани сабабиданми, ҳар қалай, бу шеърлар юксаклиги, **истиклолғоясига чамбарчаслиги** билан ухлаганни ўйғотади, ўйғотганни фикрлатади, фикрлаганни ҳаракатга солади. Ҳиссиятнинг жўшқинлиги, оҳангининг ўйноқилиги, мазмунан чуқурлиги сабаб ҳаммада ҳайрат қўзғотади. Му shoҳадаларимизни биргина асар ҳам исботлай олади. У — «Ўзбек Навоийни ўқимай қўйса...»

*Ўзбек Навоийни ўқимай қўйса,
Олтин бошнинг калла бўлгани шудир.
Бедил қолиб Демъян Беднийни сўйса,
Қора сочнинг малла бўлгани шудир.*

Юрагингиз ҳапқириб кетдими? Оддий ва доно ҳақиқатнинг магзига бирдан етдингизми? Буюклигинизни, кимлигингизни ҳис қилдингизми? 150 йиллик босқиннинг шафқатсиз ва аянчли фожиасини туйдингизми? Бир олам мазмунни икки байтга сифдира билган шоир маҳоратига ҳайратландингизми? Сўзларнинг оддийлигига, маънодорлигига, ўз ўрнида нурланиши-

га, рангдор оҳангиға — барининг созлигига, сехрига лолмисиз?

Бир бандданоқ ҳәелингизни банд этган, унда денгиздай ҳайқираётган туйгуларни уйготган, у туйгуларингиздаги баҳодирона қудратни ва мұтелеңкнинг оқибатини пафос даражасига күтарған поэтик қашфга, шоирнинг чечанлигига түймайсиз, кейинги бандга шошамиз:

*Ўзбек Навоийни ўқимай қўйса,
Дод демоққа палла бўлгани шудир.
Маърифатдан айру ўйнаса, кулса,
Аза чоги ялла бўлгани шудир.*

Президентимиз Навоийни ўрганишга чорласалар, «Жамият тараққиётининг асоси, уни муқаррар ҳалоқатдан қутқариб қоладиган ягона куч — маърифатdir... Маърифатчи фидойи бўлмоғи керак», — дея таъкидласалар, мутафаккир худди шу ҳақиқатларнинг таъсирдор поэтик тасвирини беради. Мұхтарам И. А. Каримов: «Онгли яшайдиган, мустақил фикрлайдиган шахс маънавиятини камол топтириш бизнинг бош foямиз бўлиши керак»лиги йўлида жон куйдирсалар, шоир мушоҳадани талаб қилувчи поэзия (асар)ни яратади. Бирлашибирларидан таъсирланиб, истиқдол учун ёнишни воқе қиладилар, яшашнинг моҳиятини ўзларида музассам этиб намуна кўрсатадилар... Асадаги лирик қаҳрамон — Истиқдол қалбини ўзида жо этган замондошимиздир. Бор ҳақиқатни айтишдан қўрқмайдиган, мавжуд касалликнинг моҳиятини очувчи ва ундан кутилиш йўлини кўрсатувчи ёниб, куйиб яшаётган уйғоқ қалбли биродаримиздир.

*Ўзбек Навоийни ўқимай қўйса,
Алдангани, алла бўлгани шудир.
Юлғич азиз бўлиб, билгич хор бўлса,
Пайтаванинг салла бўлгани шудир.*

Бу банд кучли қалбингизга энг катта зарбни уради: ларзага тушасиз. Ундаги мазмун ва эҳтирос кучли зилзиладек, ғами зил-замбил темирдек. Юракни тарс ёрвонадигандек қудратли.

Айниқса, «Алла» сўзининг «Гўдакни ухлатишда айтиладиган қўшиқ»дан, яна бошқача — «Чирпирак

бўлиб, қуламоқ» маъносини ташишини билганингиздан сўнг шоирнинг топқириллигига, сўз сеҳргари эканлигига қойил қоласиз. Қалбингиз жунбишга келади. Мардоналик ва равшанлик билан, поэзия тилида — теран айтилган залворли ҳақиқат руҳи қалбингизга кўчади. Бир ўқищданоқ ёд олган мисраларингизни такорламасликка имкон топа олмайсиз; чунки у сизнинг ҳам, менинг ҳам қалбимдаги жароҳатни уйғотиб юборди:

*Юлгич азиз бўлиб, билгич хор бўлса,
Пайтаванинг салла бўлгани шудир.*

Бу балолардан, касофатлардан қандай қутилиш мумкин? Қанақа йўллари бор? Ёруглик қанисан? Умид борми?... Чекаётган қайфунгиздан қутилишга интиқлик сезасиз. Шоир тараңг тортилган, оловланган туйгуларни ечиш йўлига ўтади. Комил бўлиш учун ҳам, ҳалқ қалби тўла нур бўлиши учун ҳам, ўзликни англаш учун ҳам, Навоийнинг ўлмас таълимоти зарурлигига ишонтиради. Юзлаб навоийшуносларнинг ташвиқини, орзуларини биргина поэтик асари билан миллионлаб қалбларга сингдиради, Навоийга ошно этади. Шундай ечим туфайли бир оз енгил тортасиз, қалбингизда яратиш руҳи ҳукмрон кучга айланади:

*Эл комил бўлмаса, юрт эмас улуғ,
Беқадр маҳалла бўлгани шудир.
Қалб тўла нур ҳалқнинг ризқи ҳам тўлуғ,
Омбор тўла ғалла бўлгани шудир.*

*Ўзбек ўзлигин англаса бекам,
Унинг «Баракалла» бўлгани шудир.
Оlamга Навоий наслиман деган,
Овози барадла бўлгани шудир.*

Кашфиёт бўлиб туғилган бу асар чуқур замонавий ҳамдир. Ўзбекона миллийликни ташиши билан, айни пайтда, умуминсоний ҳамдир. Қалб ва онгларни бирлаштириб эзгулик, комилликка етакловчи оқилона илҳомнинг бетакрор, ҳайратомуз мевасидир.

Демак, Э. Воҳидов ҳақли равишда XX асрнинг сўнгти ва XXI асрнинг биринчи буюк шоиридир.

Tұрт инчи бүлім

ТУР ВА ЖАНРЛАР

I. Тур ва жанрларнинг хусусиятлари

Таянч сүз ва иборалар: Эпос. Лирика. Драма. Воқеа. Кечинма. Ҳаракат. Турларнинг фарқлари. Турнинг жанрий хусусиятлари.

Адабиёт ҳақидағи илм дунёга келгандан буён адабий асарларни **эпос**, **лирика**, **драмага** — уч турға бўлиб ўрганиш қоида тусига кирган.

Адабиётни ҳаётдан нусха кўчириш деб тушунган Аристотель «Поэтика» асарида уни шундай асослайди: «... асарлар яна акс эттириш усуллари жиҳатидан ҳам бир-биридан фарқланади. Зотан, бир хил нарсани бир хил восита билан тасвирлаган ҳолда ё автор воқеаларга аралашмай ҳикоя қилиши ёки ўзини Гомердай тутиши мумкин. Ёки бутун ҳикоя давомида автор ўзлиги-ча қолиши ёхуд барча акс эттирилувчи шахсларни гавдалантириши мумкин.

Нима билан, нимани ва қандай акс эттириш усулидаги уч хил тафовут ана шулардан иборат.¹

Инглиз танқидчиси Э. С. Даллас ҳам адабиётни уч асосий турға ажратади: пьеса, эртак ва қўшиқ. Унинг тушунчасида драма — бу иккинчи шахс ҳозирги замон, эпос — учинчи шахс, ўтган замон, лирика эса биринчи шахс, бирлик, келаси замон².

XVIII асрға келиб Италия, Олмония ва Францияда ҳам турлар тушунчаси тасдифини топади. Жумладан, Гётенинг ёзишича, поэзиянинг уч хил табиий шакли мавжуд: очиқ ҳикоя қилувчи шакл — эпопея, кечинмани ҳаяжонли тасвирловчи шакл — лирика, шахс ҳаракатини ифодаловчи шакл — драма³.

¹ Аристотель. Поэтика, F. Фулом номидаги Адабиёт ва санъат нашриёти, 1980, 10-бет.

² Р. Уэллек, О. Уоррен. Теория литературы. Москва, 1978, стр. 245.

³ Г. Маркевич. Основные проблемы науки о литературе, М., 1980, стр. 170.

Рус танқидчиси В. Г. Белинский ҳам ўзининг «Поэзиянинг хил ва турларга бўлиниши» асарида¹ адабиётни эпик, лирик, драматик поэзияга — уч турга ажратади ва ҳар бирига хос хусусиятларни, айни пайтда, бир-бири билан таққослаш орқали чукур маъноларини очади.

ХХ асрга келиб рус назариётчиси Л. Тимофеев уч турга «лиро-эпик тур (шэърий роман, достон, баллада, масал, ода), тарихий-бадиий тур (очерк, репортаж, кундалик)ни ва сатирани қўшади» (Л. Тимофеев, 320—368 бетлар).

Ўзбек назариётчиларидан А. Фитрат уч турни — лирика, ривоя, томоша (Фитрат, 91 б.) деб юритса, И. Султон В. Белинский фикрини қўллаб-қувватлайди. Н. Шукуров, Т. Бобоевлар дарслик ва қўлланмаларида «лиро-эпик тур»ни ҳам яшашга қодирлиги ҳақида гапирадилар.

Турлар тарихининг қисқача обзоридан ҳам маълум бўляяптики, бу муаммоларнинг ҳамма қирралари: турларда сўзнинг вазифаси, вақт нуқтаи назаридан фарқи, турларда муаллиф, персонаж ва китобхоннинг алоқаси ҳамон ечилган эмас. Лекин уларга таянган ҳолда турлар ҳақида асосий қонуниятларни умумлаштиrsa бўлади.

В. Белинский юқорида номи келтирилган асарида ёзади:

«1. Поэзия идеяниң маъносини ташқи кўринишда ифодалайди ва маънавий дунёсини бутунлай аниқ, пластик образларда уюштиради. Бунда ҳамма ички маъно ташқи кўринишга чукур сингиб кетади ва бу икки томон — ички ва ташқи томонлар бир-биридан айрим ҳолда кўзга кўринмайди, аммо бевосита жам ҳолда олганда улар аниқ, ўз қобиғига ўзи бурканган реаликни — **вокеани** гавдалантиради. Бунда шоир кўзга кўринмайди; пластик муайян дунё ўз-ўзидан тараққий этади, шоир эса ўз-ўзидан вужудга келган ҳодисанинг гўё оддий бир ҳикоячисигина бўлиб қолади. Бу **эпик** поэзиядир.

II. Ҳар бир ташқи ҳодисадан аввал тилак, орзу, ният, хуласа фикр туғилади; ҳар бир ташқи ҳодиса ички, яширин кучларнинг фаолияти натижасидир: поэзия **вокеанинг** мана шу иккинчи ички томонига, бу

¹ В. Белинский. Таъланган асарлар, Тошкент, Ўздавнашр, 1955, 131—213 бет.

кучларнинг ич-ичига кириб борадики, ташқи реаллик, воқеа ва хатти-ҳаракат ана шу кучлардан ўсиб чиққандир; бунда поэзия янги қарама-қарши бир турда намоён бўлади. Бу субъективлик салтанатидир; бу ички дунёдир, ўз ичидаги қолувчи ва ташқарига чиқмайдиган ташаббуслар дунёсидир. Бунда поэзия ички дунё элементида, сезувчи ва фикрловчи хаёл доирасида қолади; бунда руҳ ташқи реалликдан ўтиб, ўз ичига ўзи яширинади ва ташқи дунёни ўзида акс эттирган ички ҳаётининг мислсиз жило ва жилваларини поэзияга ҳадя этади. Бунда шоирнинг шахсияти биринчи планда намоён бўлади, биз ҳамма нарсани фақат ва фақат у орқалигина қабул этамиз ва англаймиз. Бу *лирик* поэзиядир.

III. Ниҳоят, бу икки тур (жинс) ажралмас бир бутун бўлиб қўшоқлашади: ички ҳодиса ўз ичидаги қолишдан тўхтайди ва ташқарига чиқади, хатти-ҳаракатда ўзини кўрсатади; ички, идеал (субъектив) ҳодиса ташқи реал (объектив) ҳодиса бўлиб қолади. Эпик поэзияда бўлгани каби, бунда ҳам турли субъектив ва объектив кучлардан чиқиб келувчи белгили, реал хатти-ҳаракат ривожланади; лекин бу хатти-ҳаракат энди соф ташқи характерга эга бўлмайди. Бунда хатти-ҳаракат — воқеа бизга бирданига ва тамом тайёр бўлиб қолган ҳолда кўринмайди, биздан яширинган самарадор кучлардан чиққан, ўз ичидаги эркин бир доира чизган ва кейин ўз ичидаги таскин топган воқеа сифатида кўринмайди, йўқ, бу ерда биз хатти-ҳаракатнинг индивидуал иродалар ва характерлардан бошланиш, келиб чиқиши процессининг ўзини кўрамиз. Бошқа томондан олганда, бу характер ўз ичидаги бекиниб қолмайди, балки узлуксиз равишда ошкор бўла боради ва ўз руҳининг ички мазмунини амалий манфаат-интилишда очади. Бу поэзиянинг олий тури ва санъатнинг тожидир, бу *драматик* поэзиядир» (В. Белинский, 134—135-бетлар).

Демак, эпик поэзия (эпик тур) дунёнинг объектив томонини, лирик поэзия(лирик тур) дунёнинг субъектив томонини акс эттиради. Драматик поэзия (драматик тур) дунёнинг объектив ва субъектив томонини бирлаштириб, шахс ҳаракати орқали тасвирлайди, яъни у «хатти-ҳаракат билан кўрсатиладиган ва изтироб билан инсон руҳини покловчи муҳим ва тугал воқеа тасвиридир» (Аристотель, 16-бет).

Турлар Аристотель айтганидек, баён услуби билан ҳам, ҳажми билан ҳам фарқланадилар. Эпопея вақт жиҳатдан чекланмаган, драма — муайян вақтга (дастлабки вақтларда бир кунлик, ҳозирги замонда 2—4 соатга) мүлжалланган бўлади. Эпосда муаллиф нутқи ҳамма воқеаларни бошқарувчи «қўмондон» бўлса, драмада муаллиф нутқи (ремаркаларни ҳисобга олмасак) ишлатилмайди. Лирикада муаллиф нутқи — лирик қаҳрамонни монологидан иборатdir.

Жан Полнинг тушунчасида, лирика — бугунни, эпика — ўтмишни, драма — келажакни тасвирлайди (Қаранг: Г. Маркевич, 475-бет). И. Султон ўтмиш адабиётшуносларга таянган ҳолда «Эпик асарда (масалан, роман, повесть, ҳикояда) тавсиrlанган ҳаёт — бўлиб ўтган воқеалар таассуротини қолдиради. Драмада эса ҳатто узоқ ўтмишдан олинган ҳаётий манзаралар ҳам бизнинг кўз олдимизда ҳозир бўлиб ўтаётган воқеалардек намоён бўлади. Лирик асар эса ... инсоннинг оний ҳиссиятини ҳозиргина бўлиб ўтгандек, бутун ҳарорати билан тасвир этади» (И. Султон, 231-бет), деб таъкидлайди.

Юқорида қайд этилган аломатлар турларнинг фарқини кўрсатса-да, моҳиятини очиб бера олмайдилар. Уларнинг энг катта фарқли хусусиятларини (Гегель, Гёте, Белинский, И. Султон) ҳар бир турнинг предмети очиб беришини тайин этадилар: **эпосники** — **воқеа**, **лириканики** — **рухий кечинма**, **драманики** ҳаракатdir. «**Эпосдаги қаҳрамон** — **воқеа**, **драманинг қаҳрамони** — **инсон шахси**» (В. Белинский, 143-бет), лириканинг қаҳрамони инсоннинг ички сезгилаидир.

Ушбу мулоҳазаларни асос қилиб олсак, ундан шундай хулоса чиқади: агар адабиётни чинор дея тасаввур қиласақ, бу чинорнинг учта (эпик, лирик, драматик) шохи бор, яъни учала шоҳ ҳам бир танадан; учаласининг ривожи ҳам, тириклиги ҳам ана шу танага ва бир-бирига боғлиқдир.

Бундан кўринадики, ҳар бир турнинг ўзига хос хусусиятлари (предметлари) бўлишидан қатъи назар, асоси бўлиши мумкин бўлган ҳаётни қайта жонлантириш экан, демак, улар бир-бирларидан кескин чегаралар билан ажралмайдилар, балки кўпинча бир-бирларига аралашиб, қуралашиб, ўзаро таъсири кўрсатиб, таъсиrlаниб яшайдилар. Шунинг учун ҳам «Ўткан кунлар»да драмага хос бўлган кескин тўқнашувларни (масалан, Отабекнинг Ҳомид, Содик, Муталлар билан ҳаёт-ма-

мот олишувини эсланг), лирикага хос ички кечинмаларни (масалан, «Наво» қуи ва Отабекнинг қалб изтиробларини кўз олдингизга келтиринг) яққол кўрамиз. «Ўткан кунлар» эпоси ўз ичига драма ва лириканинг унсурларини киритганда, «эпик асар ўз мумтозлигини йўқотмайди, балки бундан ютади» (Бунинг исботи ушбу тадқиқотнинг «Бадиий маҳорат» қисмida келтирилган). Худди шу қоида лирикага ҳам, драмага ҳам тегишилди.

Фақат эпосда кечинма (лирика), шахс (драма) устидан воқеа ҳукмронлик қилади. Драмада эса... воқеа (эпос), кечинма (лирика) устидан «инсон ҳукмронлик қилади, инсон ўз иродаси билан воқеани истаганча якунлайди, унга истаганича хотима беради» (В. Белинский, 144-бет).

Шу сабаб бугунги кунда «лиро-эпик тур»ни, бошқа турларни ҳам ихтиро этиш асоссиз, чунки уларнинг «ўзларигагина» тегишли бўлган — предметлари йўқ. Шунинг учун ҳам В. Белинский «Поэзиянинг ҳамма турлари... фақат учта, бундан ортиқ бўлиши мумкин эмас» (В. Белинский, 207-бет), дейди.

Ҳар бир асар ўзининг ташқи (ҳажми, баён усули, қурилиши) ва ички (кайфияти, муносабати, нияти, яъни ўзининг мавзуси, ҳаёт ҳодисаларини қамраш қўлами) кўриниши жиҳатидан фарқланади. Ана шу тарзда уюшган асарлар гурӯҳини жанр деб юритиш мумкин. Жанр адабиётлар тараққиёти жарабёнида истеъмолдан чиқиб кетиши (муаммо жанрига ўхшаб), бойиб бориши (роман жанри каби) мумкин; анъанавий жанрларнинг бирлашувидан янги жанрлар (масалан, трагикомедия жанри) туғилиши ҳам табиийдир.

Агар биз адабий турларни адабиёт (чинор)нинг учта хили (шохи)га ўхшатсак, жанрлар ана шу хиллар (шохлар)нинг аниқ шакли (бutoқлари)дир. Яъни эпик турнинг «бutoқлари» роман, повесть, ҳикоя, очерк кабилардир. Айни пайтда, бutoқларнинг майдароқ бўлакчалари ҳам бўлади, яъни роман жанрининг тарихий роман, замонавий роман ва ҳоказо шакллари каби.

Хуллас, тур ва жанрлар — инсон ҳаётини турли тарзда, турлича акс эттирувчи унсурлар бўлиб, улар битта асосга бўйсунадилар: бўлиши мумкин бўлган ҳаёт (инсон)нинг бадиий моделини яратадилар.

II. Эпос

Таянч сўз ва иборалар: Эпос. Эпос мавзуси. Воқеа — тақдир иродаси. Эпоснинг қонунийлиги. Халқчиллиги. Объективлик. Кўламдорлик. «Маҳобҳорат». Янги давр эпоси. Роман «Ўткан кунлар».

В. Белинский таъбирича, «Эпос халқнинг эндиғина уйғонган онгининг поэзия соҳасида биринчи пишган мевасидир. Эпопея халқнинг фақат гўдаклик даврларида, унинг ҳёти ҳали икки қарши томонга — поэзия ва прозага ажратилмаган чоғда, халқнинг тарихи фақат афсона бўлган замонда, дунё ҳақида унинг тушунчалари фақат диний тасаввурлардан иборат бўлганда, унинг куч-қудрати ва тоза фаолияти фақат ғалабаларида кўринган замонлардагина пайдо бўлиши мумкин» (В. Белинский, 167-бет).

Эпосда халқнинг тақдирига таъсир кўрсатган буюк тарихий воқеалар — тасвиirlангани учун унинг бош қаҳрамони тарихдир. Шу сабаб унда халқ тақдири ҳам, алоҳида шахс тақдири ҳам дунёвий аҳамиятга эга бўлган тарихий воқеага боғлиқ бўлади, ана шу тарихий воқеа уларни юргизиб турғизади, тақдирини ҳал этади.

Бундан кўринадики, эпосда одам эмас, воқеа ҳукмронлик қиласди. Воқеа — «табиатнинг ўзгинаси» — тарзida, «**тақдирнинг** иродаси» бўлиб намоён бўлади. Уни инсон ўзгартира олмайди, балки у инсонни ўзининг иродасига бўйсндиради. «Одамлар қўрқадиган ва худоларнинг ўзлари ҳам сўзсиз бўйсунадиган («Маҳобҳорат» ва «Рамаяна»ни эсланг — Ҳ.У.) бу «тақдир» нима? Бу грекларнинг тушунчасидирким, биз янгилар, уни онгли зарурият, воқелик қонунлари, сабаблар билан натижалар ўртасидаги нисбат, хуллас, **обектив ҳаракат** деб атамиз, у ўсади ва ўз онгининг ички қуввати орқасида ҳаракатга келади, буғ машинаси каби юради, у тўхтамасдан, йўлдан тоймасдан боради, унга одам учраса, янчиб кетиши мумкин, метин тоғ учраса, ўзи парчаланиб кетиши мумкин» (В. Белинский, 146-бет). Ҳомернинг «Илиада» ва «Одиссея»си, ҳиндларнинг «Маҳобҳорат» ва «Рамаяна»си, қиргизларнинг «Манас»и, арманларнинг «Сосунли Довуд»и, ўзимизнинг «Алломиш»имиз, озарбайжонларнинг «Кўр ўғли»си юқоридаги мулоҳазаларнинг исботидир.

«Маҳобҳорат»да Маҳобҳората ёки Баҳарата авлод-

лари жангномаси тасвириланади. Инсонпарварлик, эл-парварлик, Адолат ва ҳақ билан одамкушлик, кибр, зулм, ҳақсизлик ўртасидаги кураш — «Даҳшатли олов сингари ловуллаб, океаннинг у қирғоғидан бу қирғоғигача бўлган қанча-қанча элларни ўз домига тортган, қанча-қанча қурбонлар ютган мислсиз жанг ҳақида»¹ ҳикоя қиласди.

Эпос қомусий характерга эга. Улкан «Маҳобҳорат»-да ҳинд халқи тарихига оид қарийб минг йиллик факт ва воқеалар, қўшни мамлакатлардаги қабила ва халқлар хусусидаги маълумотлар, кўплаб афсона ва ривоятлар, эпик, дидактик, диний достонларнинг қадимий сюжети ва мотивлари, қонун ва давлат низолари, олтига фалсафий таълимот, олтига диний система ва мафкура жамулжам этилган. Кўшимча лавҳалар «Маҳобҳорат»нинг қарийб ярмини ташкил этади.

Бизга маълум «Маҳобҳорат» 100 минг шлок (парча)дан иборат. Бироқ «Маҳобҳорат»нинг миллион шлокли нусхаси ҳам мавжуд бўлган. «Манас» эпосининг Карадаев варианти 460 минг шлокни ўз ичига олади² — дейди эпос билимдони Эрик Абдулаевич Каримов.

Эпосда ҳаёт ботирлик ва қаҳрамонлиқда воқе бўлади. Жанг, қирғинбарот уруш, аёвсиз олишувлар асосига қурилган «Маҳобҳорат»да Юдҳиштҳира, Аржуна, қуёш ўғли Карна, золим Дўрудхуна, подшо Кришна, мингта филнинг кучига эга бўлган Бҳимасена, моҳир жангчи Саҳадева, худо Шива, осмон ҳукмдори Индра каби юзлаб қаҳрамонлар ўзларини намоён этадилар, ҳинд халқининг орзу-армонларини, яхшилигу ҳақиқатини, улуғворлиги-ю гўзаллигини, мардлигу олийжаноблигини, шуҳрату таназзулини — миллий руҳининг бутун жозибасини тўла-тўқис кўрсатадилар.

«Шундай қилиб эпопеяниң мазмунини ўз ҳаётининг индивидуал манбаларидан ҳали айрилмаган халқнинг ҳаёт моҳияти, субстанция кучлари, вазияти, турмуши ташкил қилиши керак. Шунинг учун эпик достоннинг асосий шартларидан бири унинг халқицлигидир: шоирнинг ўзи ҳам воқеага ўз халқининг қўзлари билан қарайди, воқеадан ўз шахсини айирмайди. Лекин эпопея юқори даражада миллий бўлиши билан баравар у, айни вақтда, бадиий асар бўлиши учун индивидуал халқ ҳаётининг формаси, ўз ичига умуминсоний, жа-

¹ Маҳобҳорат. Т., «Ёзувчи», 1995, 3-бет.

² Карапан: Адабиёт назарияси, Т., «Фан», 1979, II том, 206-бет.

ҳон аҳамиятига эга бўлган мазмунни олиши керак» (В. Белинский, 172-бет). Дарвоқе, ҳиндларнинг «Маҳоб-хорат»ида ана шундай. Унинг ҳар бир парчасида ҳиндларнинг индивидуал ҳаёти ва бу ҳаётнинг умуминсоний мазмуни чуқур очилгандир. Жумладан, Пандавларнинг энг охиргиси, жанг қилишга моҳир Саҳадева шундай дейди:

«—Бутун жаҳоннинг эгаси бўлган, лекин боболаримиз томонидан белгиланган қонунларни унуган подшонинг умри, умр эмас. Ҳаётини ўз фуқароларига бағишилаган подшогина ҳамиша кишиларнинг қалбida яшайди. Ахир, донишманлар айтган-ку:

*Ҳеч ким ҳам девор билан ажralганимас оламдан,
Вужудингга туташдир тегранѓаги шу хилқат.
Яхшилик қил ҳаммага, қайтади ўзингга ҳам,
Ўз жонингни асрайсан, халқни асрасанг фақат»*

(*Маҳобхорат*, 164-бет.)

Биргина мана шу мулоҳазаларнинг ўзиёқ жаҳоний мазмuni билан, сабоғи билан инсониятнинг мулкига айланганки, демак, «Маҳобхорат» инсониятга тегишилдири, ҳамма замонларга, ҳамма халқларга, ҳамма жамиятларга яқиндир, зарурдир.

Эпос ўзида **мифлар**, **эртаклар**, **ривоятлар**, **масаллар**, **афсоналар**, **достонлар**, **балладалар**, **фалакиёт** ва **илоҳиёт** ҳақидаги **қиссалар** каби жанрларни бирлаштиради. Шарқ мумтоз адабиётидаги турли «нома»лар — **саёҳатнома**, **муҳаббатнома**, **сафарнома**, **«Хамса»лар**, **ҳикматли сўзлар**, **латифалар**, **чўпчаклар**, **марсиялар**, **йиги**, **мадҳиялар**, **маталлар**, **афоризмлар** ҳам эпоснинг мулки, хазинаси саналади.

Ўзбек халқ оғзаки ижодида биргина достон таснифининг ўзиёқ, эпос жанрлари ва кўринишларини қўп қирралигини исботлай олади:

1. Қаҳрамонлик достонлари («Гўрўғли», «Алпомиш»);
2. Жангномалар («Юсуф ва Аҳмад», «Алибек ва Болибек»);
3. Тарихий достонлар («Шайбонийнома», «Жиззах қўзғолони»);
4. Ишқий-романтик достонлар («Маликаи айёр», «Рустамхон»);
5. Китобий достонлар («Фарҳод ва Ширин», «Тоҳир ва Зухра»);

Кўринадики, достонларнинг кўп кўринишлари ҳам эпосга мансуб, улар хилма-хил бўлса-да, барибир эпик ниятнинг ягона концепциясига боғланадилар.

Юқоридаги фикрларимизни якунлайдиган бўлсак, қадимги эпосда «тақдир иродаси» ҳукмронлик қиласди, жаҳон тақдирини ҳал қилувчи жанглар тасвиранади, қаҳрамонликлар воқе бўлади. Халқчиллик, миллийлик ва умумбашарийлик хусусиятлари бўртиб кўринади ва ш.к.

Даврларнинг ўзгариши — эпосни ҳам янгилайди, қадимги эпосда олам — кенг кўламда, катта ҳажмда акс эттирилган бўлса, ҳозирги замон эпосида олам — миниатюра шаклида (томчидаги қўёш акс этганидек) тасвирини топа бошлади. Шунинг учун В. Белинский «роман — бу миниатюрадаги олам» деганди. Бу И. Султон ёзганидек, реалистик ижодий методнинг туғилиши ҳамда тантанаси билан боғлиқдир.

Янги эпосда **объективлик** ва **кўламдорлик** хислати ортади. Ҳаққонийлик олий даражага кўтарилади. **Воқеабандлик сақлангани ҳолда, инсоннинг хатти-ҳаракати «тақдир иродаси»га эмас, балки реал (типик) шароитнинг таъсири билан ўлчанади.** Шу ҳисобга афсоналар, мифологиялар, тасаввур этиб бўлмайдиган муболагадорлик ўрнини ҳаётнинг моҳиятини очиб берувчи реаликлар, асослар, ростгўйлик, ҳаққонийлик эгаллайди.

Қадимги ва янги эпоснинг хусусиятларини бир нафас тасаввур этиш учун **иккита мисол**. Алишер Навоийнинг «Фарҳод ва Ширин» достонининг XXXI боби сарлавҳаси шундай:

«Фарҳоднинг тешаси тошни пора-пора қилмоқ билан тоғ бағрига ковков солғон садони Ширин эшитгони ва қўёш тоғдин тулув қилғондек, ул куҳи бало сарвақтиға етгони ва аниг метини ламъасининг барқи мунинг хородек кўнглиға асар этгони ва қўёш тупроққа нур соҷондек, ул ҳоқийга меҳр зоҳир қилғоч, аниг тупроғофиларидек ўзидин кетгони ва умри қўёши бошига келгач, аниг ҳаёти шамъи учғонига Шопурнинг шамъдек куюб, йиғлаб бошига ўт чиқарғони ва ўлукни маҳдга солғандек, ул қўёш они тупроқдин кўтариб, биҳишт осо манзилға олиб борғони».

А. Қодирий «Ўткан кунлар» романининг II боби сарлавҳаси шундай: «Хон қизига лойиқ бир йигит».

Бундан шундай хулоса қилиш мумкин: Қадимги

эпосни — океан (уммон)га қиёсласак (унинг тўлқинлари шиддатини бир тасаввур қилинг-а), ҳозирги эпос дарёга тенгдир. Ҳозирги эпоснинг энг катта жанри «роман кичрайтирилган олам» (Н. Салтиков-Шчедрин) дея таърифланди. Уммон ҳам, дарё ҳам бўлиши мумкин бўлган оламни кашф этади. Фақат иккаласининг тасвир доираси, кўлами, қаҳрамонлари икки хил. Бирида романтизм барқ урса, иккинчисида реализм қудрати намоён бўлади.

«Янги давр эпоси» (В. Белинский) — роман, повествание, қисса, ҳикоя, эссе, эртак, новелла, очерк, фельетон каби жанрлардан иборат. Шеърий роман, поэма, достон, баллада, масал ҳам аслида шу эпоснинг «томорқаси»га киради, чунки уларда ҳам воқеабандлик — сюжетлилик яққол кўзга ташланади.

«Замонамизнинг эпопеяси романdir. Эпоснинг ҳамма асоси, муҳим хусусиятлари романда бордир, фақат айирмаси шундаки, романда бошқа элементлар, бошқа манзара ҳукм суради. Бунда қаҳрамонлик ҳётининг афсонавий ўлчовлари, қаҳрамонларнинг азамат сиймолари йўқ, бунда худолар иштирок қилмайди: романда одатдаги, прозаик ҳётнинг ҳодисалари идеаллаштирилди, умумий тип остига олинади... бунда одамнинг тақдидири унинг жамиятига нисбатан муҳим бўлиб қолмасдан, балки инсониятга ҳам муҳимdir» (В. Белинский, 175-бет, таъкидлар бизники — Ҳ.У.).

В. Белинский фикрларини давом эттириб, бадиий асар сифатида романнинг вазифаси — кундалик ҳаёт ва тарихий воқеаларнинг яширин қалбини, жонлиғоясини очиш, тарқоқ воқеаларни руҳ ва ақл маскани қилиш эканлигини алоҳида таъкидлайди. Шу асосга таяниб, ёзди: «Роман бадиийлигининг даражаси асосий идеяning чуқурлигига ва айрим хусусиятларда у идеяни ташкил этган кучга боғлиқдир. Ўз вазифасини бажариш билан роман озод фантазиянинг меваси бўлган ҳамма бошқа асарлар қаторига ўтади, мана шу маънода роман оддий ҳалқнинг зарур эҳтиёжларини таъмин этувчи юзаки беллитристик асарлардан қатъий равишида ажратилиши керак» (В. Белинский, 176-бет). Бу гояни чуқурлиги романга хос тафаккурнинг ҳаёт фалсафасини теран таҳлили билан ўлчанади.

Эпос тадқиқотчиси Э. Каримов Ги де Мопассан («Роман оламнинг фалсафий концепцияси асосида юзага келади») таърифида асосланиб, «Оламнинг яхлит

фалсафий концепцияси йўқ асар роман бўлолмайди»,¹ дейди ва давом этиб ёзади: «Роман — бу олам ва тарихга, жамият ва башариятга, унинг муаммо ва ташвишларига, уруш ва сулҳларига, сиёсий ва синфий жанг-жадалларига, қўзғолон ва инқилоблариға, улкан ва кичик воқеаларига очиқ қаратилган адабий-бадиий система, йирик бадиий шакл. Фақат роман эмас, романда тасвирланган бош қаҳрамон ҳам унинг қалб ва фикри оламга, коинотга қаратилган»²

Профессор С. Мирзаевнинг «Ўзбек романчилиги» қўлланмасидаги ўзбек романларининг хронологик кўрсаткичига таянсак, унда 1999 йилгача 219 та ўзбек романни яратилганига шоҳид бўламиз. Агар уларга кейинги ўн йилликлар ҳам қўшилса, ўртача 300 га яқин роман яратилган. Демак, 1922 йилда А. Қодирийнинг «Ўткан кунлар» романидан бошланган бу жараён изчил давом этмоқда. Лекин яратилган ҳамма романлар ҳам роман жанрининг талабларига жавоб бера олмайди; уларнинг жудаем кўпчилигига ҳаётни юзаки тасвирлаш оқибатида («Яшил бойлик» — С. Назар, «Зиёд ва Адиба» — Мирмуҳсин, «Шинелли йиллар» — Шуҳрат, «Оқсой» — С. Анорбоев, «Одам қандай тобланди» — И. Раҳим, «Бинафша атри» — Ҳ. Ғулом, «Жимжитлик» — С. Аҳмад) асосий фоя чуқур очилмайди, жамият ва инсон олами фалсафаси талқини талаб даражасида қўзга ташланмайди.

Кўпчилик («Душман», «Илон кучи», «Вафо», «Чиникиш», «Қизил Бухоро», «Машраб», «Жаннат қуши», «Оқибат» сингари) романлар номукаммал, воқеалар ривожи суст, улар марказий ўқقا (фояга) бирлаша олмайдилар, тарқоқликларича қолаверадилар. Қаҳрамонлардаги одамий туйғу, хислатлар тасвири ўрнини сиёсий қарашлар, сохта фоялар, ясама олди-қочдилар эгаллади.

«Оlamning яхлит фалсафий концепцияси» «Ўткан кунлар» (А. Қодирий), «Сароб» (А. Қаҳҳор), «Кутлуг қон», «Навоий» (Ойбек), «Юлдузли тунлар» (П. Қодиров), «Улугбек хазинаси» (О. Ёқубов), «Гирдоб» (Ў. Усмонов), «Лолазор» (Мурод Муҳаммад Дўст), «Отамдан қолган далалар» (Тоғай Мурод) каби саноқли романлардагина аксини топган. Дарвоқе, «Шарқ» нашриёти

¹ Қаранг: Адабий тур ва жанрлар. Т., «Фан», 1991, I том, 18-бет.

² Қаранг: Шу асар, 19-бет.

«XX аср ўзбек романни» туркумида шуларга ўхшаш 17 та романни энг сара ва мукаммал асар деб топган ва нашр этишга қарор қылгани ҳам бежиз эмас. Уларда олам бутун мураккаблиги, зиддиятлари билан тасвир этилган, ҳаёт оқимининг ички қонун-қоидалари, инсоннинг моҳияти, қалб тебранишлари кашф қилингандар.

Асл романлар ичидаги бирламчи ўрин ҳамон шу мактабнинг асосчиси бўлган Абдулла Қодирийга, унинг «Ўткан кунлар»ига тегишилдири. Туғилганиданоқ жаҳонаро умрбоқий романлар қаторидан ўрин олган бу асар — ўзбек романчилик мактабининг (фаранг, рус, инглиз, олмон, ҳинд мактабларидан кейинги олтинчи мактабни А. Қодирий яратиб берди, деганди Е. Бертельс) такомиллашиб жараёнига бадиий нур бериб келмоқда

Романларни сиёсий, тарихий-биографик, ижтимоий-психологик, фантастик, тарихий-саргузашт, ижтимоий-маиший, роман-монолог каби хилларга бўлиш (С. Мирзаев, 13—14-бет) ўзини оқламайди. Чунки бунда жанр тушунчасидан чекинилади, яъни адабиёт қонунларига таянмасдан, мавзуига, ундаги пафоснинг кўринишига қараб социология нуқтаи назаридан умумлаштирилади. Унга асослансан, роман хилларини истаганча давом эттириш мумкин: Ўқитувчилар ҳақида роман, тадбиркорлар ҳақида роман, ижтимоий-кулгули роман каби.

Ҳолбуки, тарихий романнинг ўзига хос фарқланувчи хусусиятлари бор. Ўзбек адабий танқидида бу соҳада (С. Мирвалиев, У. Норматов, М. Кўшжонов, Н. Худойберганов ва ш.к.) баҳсларини таҳлил қилиб, профессор Акрам Каттабеков шундай хуносага келади: «Шундай қилиб энг яхши романларга хос хусусиятлар:

1. Асарнинг обьекти сифатида ҳалқ ва жамият ҳаётида энг муҳим саналган даврлар, воқеалар ва қўзга кўринган шахслар ҳаёти олиниши;

2. Тасвирланаётган давр ва ундаги воқеалар, тарихий шахсларга нисбатан ёзувчи илмий-эстетик концепциясининг бўртиб туриши лозимлиги, давр ижтимоий-сиёсий характеристикасини яратиш;

3. Ёзувчи билан тасвир обьекти ўртасида жамият тараққиётининг муҳим этаплари билан изоҳланувчи даврий масофани мавжуд бўлиши ва ниҳоят;

4. Тасвирланаётган воқеалар ва шахслар ҳаётининг

чукур бадиий тадқиқ этилиши, тарихий ҳақиқатнинг бадиий ҳақиқатга ўсиб чиқиши шарт эканлиги кабилар бугунги кун романларини баҳолашда асосий мезон бўла олиши мумкин».¹

Бу мулоҳазалардан иккита фикр («ёзувчи билан тасвир обьекти ўртасидаги жамият тараққиётининг муҳим этаплари билан изоҳланувчи даврий масофанинг мавжуд бўлиши» ва «тарихий ҳақиқатни бадиий ҳақиқатга ўсиб чиқиш шарти») дан бошқаси ҳамма романларга хос хислатдир. Зоро, «Тарихий асарнинг энг муҳим аломатларидан бири шуки, унда ўтмишга янги бир давр мафкураси, эстетик идеали, ахлоқий-маънавий талаблари нуқтаи назаридан баҳо берилиши лозим». Биз ҳам шундай фикрдамиз. В. Белинский асослаганидек, романнинг икки тури мавжуд: тарихий ва замонавий роман. Бошқаларини асоссиз ўйлаб чиқишга, ҳар бирига хос хусусиятни «кашф» этишга ҳожат бўлмаса керак.

III. Лирика

Таянч сўз ва иборалар: Лирика. Лирик кечинма. Лирик қаҳрамон. Лирикада сюжет. Сўз. Лирика жанрлари.

В. Белинский ёзганидек, «лирик асарнинг мазмуни обьектив воқеанинг тараққиёти эмас, унинг мазмуни — субъектнинг ўзи ва у орқали ўтган ҳамма нарсадир... кишини машгул этган, тўлқинлантирган, шодлатган, қайғуга солган, завқлантирган, тинчитган, ҳаяжонлантирган нима бўлса, қисқаси субъектнинг маънавий ҳаётини ташкил қилган ҳамма нарса, субъект ичига нима кирса, унда нима пайдо бўлса, шуларнинг барчасини лирика ўзининг қонуний бойлиги каби қабул қиласди» (В. Белинский, 184-бет).

Демак, лириканинг бош хислати субъективлик, шоир қалбida юз берадиган кечинма, шу кечинма уйготган сезгиларни воқе қилиш санъатидир.

Лирика — фикрдан туғилган сезги меваси — бир оний кайфиятнинг ҳосиласи бўлгани сабаб, «шоир руҳи бошқа кайфиятга бўйсинмасдан илгари қоғозга қўчиши» шарт. Шунинг учун ҳам у қисқа, ларзадор бўлади. Лирик кечинманинг ўзи нима? Нималардан таркиб то-

¹ А. Каттабеков. Тарих сабоқлари. Т., Адабиёт ва санъат нашриёти, 1986. 280-бет.

пади? Моҳиятини нималар ташкил этади? Такомилига нималар етказади? Бу муҳим саволларга асосий жавобни топганлардан бири Жамол Камолдир. У ёзади: «Ўлмас Навоийнинг

*Назмки, ҳам суврат эрур хуш анга,
Зимнида маъни дого дилкаш анга, —*

мисраларида биз биринчи талқиннинг ёрқин намунасини кўрамиз. Шоиришимиз айтмоқчи «назм зимни» (ичи, магизи) даги «дилкаш маъни» таҳдил эттаётганимиз лирик кечинманинг таркибини ташкил этади. Бу таркиб икки элемент — фикр ва ҳисдан иборат бўлиб, яхлит ҳолда эҳтиросли фикр ёки фикрий эҳтирос, деб аталади. Негаки, «назм зимни»даги «маъни» (фикр) «дилкаш» бўлишлиги учун у эҳтиросга ўраб берилиши керак.

Лирик кечинманинг таркибини ташкил этган фикр ва ҳис муносабатларини В. Белинский шундай талқин этади: «Шеъриятимизда фикр нима? Ушбу саволга қаноатланарли жавоб бермоқ учун ҳис нима, деган масалани ҳал қилиш зарур. Ҳиссиёт, ўзининг этиология маъносига кўра, танимиз, жисмимиз, қонимизга тегишли. Ҳис ва сезгиларнинг ўзаро тафовути шундаки, кейингиси танимизда бирор моддий жисм таъсирида қўзғолған жисмоний сезги, биринчиси ҳам жисмоний, бироқ у фикрдан туғилған сезги. Шу сабабли ҳам қандайдир ҳисоб-китоб ёки қурук мулоҳазалар билан машғул бўлган одам ҳиссиётдан тўлқинланиб, ларзага тушаркан, қўлинни кўкрагига қўйиб ёки юрагига маҳкам босиб олади. Чунки кўкрагида нафаси бўғилади, чунки кўкраги қисади ёки кенгаяди, ёнади ё совқотади, чунки юраги орзиқади, титрайди, депсиниб уради; шунинг учун ҳам у чекинади ва қалтирайди, қўлларини қўтаради, бутун жонини бошдан оёқ қайноқ тер қоплайди, соchlари тикка туриб кетади. Бинобарин, асар фикрчан, ҳиссиётдан маҳрум бўлиши мумкинлиги жуда тушунарли; бундай ҳолда ўша асарда поэзия бўлармикан? Аксинча, *асарда ҳис бор экан, фикр бўлиши мумкинлиги ҳам жуда тушунарли бир ҳол. Табиийки, ҳис теран бўлган жойда фикр ҳам теран бўлади ва аксинча...*

Шоирнинг бошида туғилған фикр, айтиши мумкинки, унинг жисмига туртки бериб, ҳаяжонга солади, қонига

ўт ёқиб, кўксида тиширчилаб уйғонади»¹ (В. Белинский).

Жамол Камол ана шу мулоҳазаларга таянган ҳолда, қуидаги тўғри холосага келади: «Лирик кечинмада фикр ва ҳиссиёт қоришиқ яшайди. Бугина эмас, улар бир-бирининг мағиз-мағизига шундай сингиб кетадики, ажратиб кўришнинг иложи бўлмай қолади. Бу ажралмас бирлик — бутун лирик кечинманинг моҳиятини ташкил этади» (Жамол Камол, 13-бет).

Лирик кечинма (кечинма — образ)нинг хислатини ўзида жам қилган (Навоий бобомиз айтган «хос ҳол»— нодир кечинма, ҳолат ва «хос маъно» — сара, ўткир фикрнинг чатишувидан юзага келган) Муҳаммад Юсуфнинг «Бир куни» шеърини ўқийлик:

*Бир куни,
Бир алвон
Замон келади,
Замин узра
Омон-омон бўлади.*

*Ўн йилми
Юз йилми ўтиб орадан,
Урушлар
Низолар кетиб орадан
Тўплар
Адиrlарда буғдоӣ ўради,
Танклар
Далаларда пахта теради.*

*Миллатлар,
Элатлар,
Оқ тан, қора тан —
Ҳаммаси
Ҳазрати инсон бўлади.*

*Оlam гулистон бўлади
Бир куни...
— Шоирлар-чи, бобо,
Шоирлар нима бўлади?
— Шоирларнинг шодлиқдан
Юраклари ёрилиб ўлади!*

¹ Карап: Ж. Камол. Лирик шеърият. Т., «Фан», 1986, 11—12-бетлар.

Кўраяпсизки, шеърда шоир замин узра келажакда «ҳазрати инсонлар» жамиятининг, комил инсонлар дунёсининг юзага келишини орзу қилади. Унинг «бир куни олам гулистон бўлишига» ишончи тўлиқ. Орзу ва ишонч тўйғулари шунчалик самимий, шунчалик юкувчанки, шоир билан невара ўртасидаги диалогдан, ундаги топқириликдан (ҳазилдан) қалбингиз ўртанади. Шеър бир оний фикр ва ҳиснинг маҳсули, маҳсули бўлганда ҳам яхлитлилиги — жонлилиги билан мафтун этувчи, оҳангি билан дилни қитиқловчи бўлгани сабаб — бир зумлик «ҳарорат» билан узоқ йилларни, умрларни «иситади», бойитади, орзуларга қанот беради, ишончларни мустаҳкамлади.

Шунинг учун ҳам шеър доимо мусиқийдир, доимо вазнлидир, ритмика, қофия, банд жиҳатдан ўшгандир. Доим самимийдир, доим таъсирдордир, доим жозибадордир.

Лириканинг субъективлигидан — яъни ҳаётни, инсонлар оламини фақат шоир шахси орқалигина англашимииздан шундай хуоса келиб чиқади: лирик асар мазмуни автобиографик характерга эга бўлади ва айни пайтда, ижтимоий аҳамият касб этади.

Зулфиянинг «Кечир, қолдим фафлатда», «Не балога этдинг мубтало», «Баҳор келди сени сўроқлаб» шеърларини ўқир экансиз, уларнинг Ҳамид Олимжонга — Зулфиянинг турмуш ўртоғига бағишлиланган автобиографик асарлар эканини аниқ биласиз. Аммо бу шеърлар иккинчи жиҳатдан, биргина Зулфия шахси тўғрисида эмас, балки муҳаббатдан бевақт ажралган, биринчи севгисига содиқ қолган, вафодор, саботли барча аёлларнинг тўйғулари ифодасидир. Уларда акслangan вафо ва садоқатнинг, биринчи муҳаббатга бахшида умрнинг умуминсоний хислатидир.

Демак, лирикада муаллиф (шоир) билан ички кечинмалари тасвирланаётган шахс (қаҳрамон) олами бирлашади (худди лирикага хос фикр ва ҳисларнинг қоришиб бутунлашгани каби), яхлитлашади. Ана шу яхлитлиликдан лирик қаҳрамон дунёга келади. «Лирик қаҳрамон — лирик асарларда кечинмалари тасвирланаётган киши, шоирнинг умумжамият учун қимматли ҳис ва фикрларини ташувчи шахсадир. У шоир шахси билан эстетик идеалнинг қўймасидир» (И. Султон, 252-бет).

Лирик қаҳрамон тарихи (конкрет ҳар бир шеърдаги

кечинма — образ тарихи)нинг мавжудлиги лирикадаги сюжетни воқе қилади. Лирик асар бир оний кечинмага суюнгани учун ҳам ундаги сюжет эпосдаги каби «воқеалар силсиласи» тарзида намоён бўлмайди, балки у *оний-руҳий ҳаракат* ифодаси тарзида юзага чиқади.

Сюжет адабиётнинг учинчи элементи ва усиз бадиий асар бўлиши мумкин эмаслиги қоидасини (ушбу асарнинг «Сюжет ва композиция» қисмини эсланг) хотирга келтирсак, демак, лирикада сюжет ўзига хос бўлади. Ўзига хослик — лириканинг субъективлик мөҳиятидан, лирик қаҳрамоннинг дунёсидан келиб чиқади ва у ҳар бир лирик асарда ифодаланган оний-руҳий кечинма тарихи — бошланиши, ривожи, холосаси билан ўлчанади.

Сирожиддин Саййиднинг «Эй, дўст» рубоийсининг биринчи байти:

*Бу олам ҳамиша шундоқ чатишган:
Кимдир етишмаган, кимдир етишган, —*

фикр — хабар берилса, кейинги байтда:

*Булбуллар ҳамиша қон ютган, эй дўст,
Қарғалар ҳамиша тезак титишган, —*

тарзида фикр якуни, холосаси берилади. Демак, лирик қаҳрамон кечинмасининг бир оний парчасига жойланган тарих гарчи кечинма ҳаракати сиқиқ ва оддий бўлсада, ушбу рубоийнинг сюжетидир.

Лирикада сўз мазмунан ҳис-ҳаяжонга йўғрилган, ниҳоятда тиниқлашган, теранлашган бўлиши шарт. Чунки, «ҳақиқий шеърда ҳар бир сўз шакл-шамойил, ранг-бүёқ, маза, салмоқ ва оҳангга эга» (Ж. Камол, 18-бет)дир. Шу сабаб ҳам «Қобуснома» дейди: «Насрда ишлатган сўзни назмда ишлатма, негаки наср — раият, назм подшо мартабасидир. Агар бир нарса раиятга лойиқ бўлмаса, подшога ҳам лойиқ эмас» (98-бет).

Бундан кўринадики, лирика тили ҳам ўзига хос бўлиши керак. Бу ўзига хосликни лириканинг предмети келтириб чиқаради. Маълумки, «прозада паузалар эркин, поэзияда эса қонуниятли, прозада ритмик пауза йўқ, поэзияда эса бор; проза асари мисра ва бандларга бўлинмайди, поэзия асари эса бўлинади... прозада қофия йўқ, қофия прозада алоҳида система тарзида эмас, поэзияда бажарган вазифани бажармайди. Қофия, асосан, поэзиянинг муҳим хусусияти. Чунки у поэзияда

строфик ва ритмик вазифани бажаради. Сўзлар поэзияда қофия, вазн, банд, товуш такори, сўз такори (эпифора, анафора, ҳожиб, радиф), инверсия, мусиқийлик, ритм, туроқ, мисра, банд, туркум, ритмик пауза жиҳатидан алоқадор ҳолда амал қиласди, прозада эса сўз бундай вазифани адо қилмайди... поэзияда гап, жумла, сўзнинггина эмас, балки бўғин, нутқ товушлари, ҳатто нутқ товушларининг унли ё ундошлиги ҳам ўзига хос аҳамиятга эга; улар кучли «меҳнат интизоми»га, тартибга бўйсинади ва ягона, муайян системага айланади, айни шундай тартиб насрда йўқ...»¹

Демак, лирикага хос эмоционал — ҳиссий фикрлаш, монологик нутқ унинг сўз поэтикасини ҳам ўзига хос оламини яратади.

Лирикада жанрлар масаласи тўғрисида турли-туман (И. Султон, Ў. Тўйчиев, Н. Шукурев, М. Иброҳимов, О. Носиров, Р. Орзабеков) назарий-эстетик фикрлар кўп. Уларни ўрганиш ва умумлаштириш, асосийларини мезон қилиб, лирик жанрларнинг ҳар бирини монографик тарзда тадқиқ қилишни кенгайтириш — кун тартибида турибди. Ҳозирча, шеършунос Уммат Тўйчиевнинг таснифига таянган ҳолда, лирика жанрларининг номларинигина қайд этиб, чекланишни мақсадга мувофиқ кўрдик.

1. Мазмун жиҳатидан:

а) эстетик белги, пафос ва муайян мазмун йўналишига асосланадиган жанрлар: марсия, элегия, инвектива, баҳс, ҳасби ҳол, соқийнома, топишмоқ, қасида, муаммо, таърих, хат, манзара, монолог, бағишлиов, васият, васф, дебоча, назира, фаҳрия.

б) асосан мусиқа асари ҳисобланса-да, адабий матнга ҳам суюнган жанрлар: романс, контата, марш, сюита, қўшиқ, мадҳия.

в) оғзаки ва ёзма лирикада қўлланиб келинган жанрлар: алла, ёр-ёр.

2. Шакл жиҳатдан:

а) Шакл мазмундорлиги ва тузилишига қўра лирика жанрлари: айтишув, мустазод, сонет, мувашшаҳ, мушоира, ширу шакар, қитъа, газал, туюқ, рубоий, маснавий, фард, таркибанд, таржибанд, ўрама, шоирий, тирада, турли бандли жанрлар, оқ шеър, сарбаст.

б) Мисра сони ва композицияга қўра лирика жанр-

¹ Адабий тур ва жанрлар. II жилд (Лирика), Т., «Фан», 1992, 54—55-бетлар.

лари: мусаллас, мурабба, мұҳаммас, мусаддас, мусабба, мусамман, мутасаа, муашшар, тұртлик, октава.

в) Қайта ташкил топиши (трансформация)га күралирика жанrlари: қитъай, кесишган, таронай, рубоиёна.

IV. Драма

Таянч сүз ва иборалар: Драма. Драма қаҳрамони — инсон шахси. Драма предмети — ҳаракат. Драматизм. Драма конфликти. Драмада сүз. Драма жанrlари. Трагедия.

В. Белинский драматик турнинг ўзига хосликларини текширадар экан: «Драма ҳозирги замонда үкувчи ёки томошабин күзи олдида бұлаёттан каби күринган кечмиш воқеадир», — дейди ва унда **«шахслар ўзларини ҳаракатда ифода қылышлари керак»** (В. Белинский, 193-бет) лигини таъкидлайды.

Чунки «Эпопеяда воқеа, драмада одам ҳукмрондир. Эпосдаги қаҳрамон — воқеа; драманинг қаҳрамони — инсон шахсидир». Эпосдаги воқеа «табиатнинг ўзигинаси» бўлса, «Драмада ҳаёт фақат ўз-ўзича мавжуд эмас балки, ўзи ҳам мавжуддир, у идрок этилган онг каби, эркин ифода каби мавжуддир... Драмада... воқеа устидан инсон ҳукмронлик қиласи, инсон ўз иродаси билан воқеани истаганича якунлайди, унга истаганича хотима беради» (В. Белинский, 144-бет, Таъкидлар — Ҳ.У.).

Бу мулоҳазалар драманинг предмети — ҳаракат эканлигини асослайды. «Драма назарияси»нинг муаллифи Ҳафиз Абдусаматов «Драманинг предмети ҳаракатдир», деган фикрга қўшилиб бўлмайди, дейди. Унингча драманинг предмети — «ҳаракатдаги ёки ҳаракат қилувчи инсондир»¹. Ҳолбуки, инсон — адабиётнинг предмети, уни кашф этиш — ҳамма турларнинг вазифасидир. Сўнгра, «ҳаракат фақат иштирок этувчи шахслар билангина эмас, балки уларни ишга соглан ҳолатлар билан боғланиб кетади» (Ҳ. Абдусаматов, 63-бет) экан, «ҳаракат — драманинг қон томири» (Ҳ. Абдусаматов, 75-бет)ни ташкил этаркан, демак, драманинг предмети ҳаракатдир.

И. Султонов драманинг спецификасини белгилашда

¹ Ҳ. Абдусаматов. Драма назарияси, Т., F. Фулом номидаги адабиёт ва санъат нашриёти, 2000, 60-бет.

«уч бурчак» — ёзувчи, театр ва томошабиннинг ўзаро муносабатларидан келиб чиқадилар ва драманинг колективизмга мўлжалланганини — бош аломат деб баҳолайдилар (И. Султон, 267—270-бетлар). Ҳолбуки, драма — бадиий адабиётнинг «вакилидир», унинг саҳнадаги ижроси (режиссёр ва актёrlар кашфи), томоша-синларнинг муносабати — театр санъати илмининг вазифасига киради.

Хуллас, В. Белинский таъкидлаган ҳаракат бирлиги — асосий идеянинг бирлиги асосида бош хусусиятни ташкил этади. Шунинг учун ҳам «Драмада ҳаракат фақат ва бошлича жисмоний ҳаракат маъносида эмас, балки даставвал ва бошлича муаллиф ифода этмоқчи бўлган бош фоянинг ривожи маъносида тушунилганидек, конфликт ҳам бош қаҳрамон (ёки қаҳрамонлар)-нинг ўз мақсадларини амалга ошириш йўлида учратган тўсиқларни енгиши жараёни маъносида, яъни кенг маънода тушунилиши керак»¹.

Ана шундагина ҳаракат конфликтнинг багрида яшайди, яъни ҳаракат конфликтни, конфликт ҳаракатни ишга солади; бири-бирига асос, бир-бирига қувват бўлади; бири-бирисиз яшай олмайди; бирининг заифлиги иккинчисининг заиф бўлишига сабаб бўлади; пировардида, иккаласи бирлашиб бош фояни аниқ ифода этишга, қаҳрамонлар қалбидаги «пўртана»ни очишга беминнат хизмат қиласидилар.

Ҳаракат ва конфликтнинг бирлиги — драмада кучли драматизмни талаб этади. «Агар, масалан, икки киши бир нима тўғрисида баҳслашса, бу ерда фақат драма эмас, балки драматик элемент ҳам йўқ; аммо баҳслашувчилар бир-биридан устун чиқиш учун, бир-бирларининг характерларининг қандай бўлмасин бирон томонини босиб қўйишга, ёки руҳнинг заиф торларини чертиб қўйишга уринсалар ва бу нарса орқали уларнинг характерлари очилса, ниҳоят баҳслашув уларни бир-бирларига нисбатан янги муносабатда бўлишига мажбур қиласа — бу нарса драма деб аталиши мумкин. Драмада муҳим нарса узундан узоқ ҳикояларнинг йўқ бўлишидир, ҳар бир сўз драмада ҳаракат — амал билан ифодаланиши лозим» (В. Белинский, 207-бет).

Шу нуқтаи-назардан «Сўнгги нусхалар» (А. Қаҳҳор)-даги Сухсурев ва Қорининг диалоги характерлидир:

¹ Адабиёт назарияси. Т., «Фан», 1979, II том, 296-бет.

«Қори. Бундан бир неча муқаддам Сухсиров қаминани чорлаб «пеккага бир миқдор пул ташладим, сизга омонат», деди.

Сухсиров (кўзлари олайиб). Мен пеккага пул ташлаганим йўқ! (Бирдан фош қилиб) Ўзи маҳкамай шариятдан юлган пулларни яшириб юради.

Қори (жони-пони чиқиб). Бўғтон! Ўзи пора олган ақчаларни пеккага ташлайди.

Обиджон. Сиз олиб турасизми? Сизга қанча тегади?

Қори. Ўзи закот тариқасида бир миқдорини мачитга бериб туради. Шайтонуллаъин!

Сухсиров. Ўзинг шайтон! Текинхўр!

Қори. Пораҳўр!

Сухсиров. Руҳоний.

Қори. Ўғри, муттаҳам».

Қўринаяптики, бу баҳс Сухсиров ва Қориларнинг пораҳўрликларини яққол очмоқда. Ҳамтовоқларнинг ҳаромхўрликка асосланган дўстлиги ҳақиқат тарозусида ўлчанар экан, уларни бир-бирига душманга айлантиради.

Гарчи эпос ва лириканинг хусусиятлари драмада мавжуд бўлса-да, яъни эпосга хос воқеғ, лирикага хос лирик кечинма драмада яшаса-да, улар бошқача сифат касб этади. «Драма жой, воқеалар, ҳолатлар, шахсларнинг эпик равишда тасвир қилишга йўл қўймайди, улар ҳаммаси бизнинг кўз олдимизда бўлиши лозим» (В. Белинский, 193-бет). Драмадаги субъект лирикадаги каби «Ўз ичига марказлашган ички дунё эмас, у энди шоирнинг ўзи ҳам эмас, у энди чиқади, унинг ўз фаолияти билан ташкил қилинган объектив ва реал дунё ўртасида мушоҳада учун ўзи туриб қолади, у бўлингган ва бир кўпгина шахсларнинг жонли тўдасидир, уларнинг ҳаракати ва қарши ҳаракатларидан драма ясалади» (В. Белинский, 193-бет). Шу сабабли ҳам драмада қаҳрамон воқеа эмас, лирикадаги муаллиф ҳам эмас, балки шахсдир. Драматик асарда ҳамма нарса бизнинг кўз олдимизда рўй беради, инсон шахси ўз ичидаги тўсиқлар билан курашиб, уларни гоҳ енгиб, гоҳ енгилиб, гоҳ изтироб чекиб, гоҳ қувонаётган руҳий ҳолатлари турфа-хил ва қарама-қаршиликка бой ҳаракатдаги (бош гояни ифода этиш йўлида тўхтовсиз ривожланувчи) одам бўлиб гавдаланади. Буни юқоридаги мисолимиз ҳам, ундаги Сухсиров, Қори шахсли — образлари ҳам тўлиқ исботлайди.

Күринадики, драмада ҳаракат бош аломатдир, ҳаракат билан омухталанган, бойитилган (ҳаракатлашган) ҳамма нарса яшашга ҳақлидир. Ҳаракатлашмаган нарсанинг, воситанинг драмада бўлишга ҳаққи йўқ. Буни В. Белинский аниқ таъкидлайди: «Романда баъзи бир шахс воқеада чинакам иштирок қилуви билан эмас, балки оригинал характерга эга бўлгани учун жой олиши мумкин (Масалан, «Ўткан кунлар»даги Хушрўй образи каби — Ҳ.У.); драмада эса воқеанинг бориши ва тараққиёт мезонида (демакки, драмадаги ҳаракатда — Ҳ.У.) зарур бўлмаган битта ҳам шахс бўлмаслиги керак Соддалик, у қадар мураккаб эмаслик ва ҳаракат бирлиги (асосий идеяниң бирлиги маъносида) драманинг асосий шартларидан бири бўлиши лозим; унда ҳамма нарса бир мақсадга, бир мўлжалга қараб йўналиши керак. Драманинг бутун қизиқлиги асосий шахсда, тақдирида драманинг асосий фикри ифодаланадиган шахсда тўпланиши керак» (194-бет).

Сююжетнинг сиқиқлиги ҳам, композициянинг занжирсимонлиги ҳам, драматизмнинг ўткирлиги ҳам, конфликт кескинлиги ҳам, сўзнинг тушунарли бўлиши ҳам («Тушунарли нутқ қимматли нутқдир» — Аристотель), қаҳрамоннинг сунъийлиги ҳам («Трагедия — кўпроқ сунъий асардир». (В. Белинский) юқорида айтилган мулоҳазаларнинг (ҳаракатнинг) мевасидир.

Ана шу қийин хислати билан В. Белинский ёзганидек, у «Санъатнинг гул тожидир, адабиётнинг олий босқичидир» (199-бет); Шунинг учун ҳам у «Маданияти етук ҳалқда, унинг тарихий тараққиёти кўркам гуллаган даврда пайдо бўлади» (201-бет); «Буюк санъаткорлар аксар эпик асарлардан бошлайдилар, лирика билан давом қилдирадилар, драма билан битирадилар» (203-бет). Жумладан, драмада муаллиф нутқи (ремаркадан ташқари) ишлатилмайди, қаҳрамонларнинг саъй-ҳаракати, руҳияти, бутун борлиғи — оламини ўzlарининг ҳаракат ва нутқлари орқали очадилар.

«Шу билан бирга, драмадаги сўз оддий сўз эмас, балки ҳаракат ҳамдир. Ҳар бир реплика (Персонаж айтилган жумла) персонажлар муносабатига, албатта, озгини бўлса ҳам ўзгариш киргизади ва муаллифнинг бош фоясининг шаклланишини жиндак бўлса-да, ривожлантиради. «Халқасимонлик» репликанинг ҳам характерли хусусиятидир: ҳар бир персонажнинг репликаси ундан аввал гапирган персонажнинг репликаси «ичидан» келиб

чиқади ва бошқа персонажнинг жавоб репликасини туғдиради, унга «илиниб қолади». Диалог драмада фикрий «қиличбозлик»дир»... (И. Султон, 277-бет).

«Аломат. Энди бор умидингиз болаларингиздан, уларни ўқитиб «катта одам» құлмоқчисиз. Лекин ула-рингиздан «катта одам» чиқмайды. Қишин-ёзин даладан бери келмайдиган чаласавод болалардан ҳеч бало чиқмаслигини биласиз. Фарзандларингизнинг ўзингиз-га ўхшамаслигини истайсиз, демак, ўзингизнинг ким-лигингизни ҳам биласиз! Ақлингиз етади! Лекин яна «күпга келган түй» деб юраверасиз! Ахир умр ўтиб кетаяпди-ку, Күчқор aka!

Күчқор (күнгли түлиб). Барибир йиғламайман!.. Яхши яшапмиз, билдингизми?..

Аломат. Йиғлайсиз... Ана, күнглингиз түлиб турибди... Лабингизни тишлиманг, Күчқор aka, фойдаси йўқ. Ахир, ёш кўздан чиқади, оғизданмас...

Күчқор (йиғлагудек бўлиб). Бирор сизга ҳаётидан нолияптими?

Аломат. Ҳамма гап шунда-да — нолимаймиз. Кўни-киб кетгансиз. Яралар тошга айланган — оғриқ сезмайди. Дод солиб бақириш-ку, қўлингиздан келмас, ҳеч курса инграб қўйишга ҳам қодир эмассиз, Күчқор aka? «Ҳаёт деганлари шунаقا бўлар экан» деб умрингизни ўtkазяпсиз. Қалбингизни унут бўлиб кетган, ўзингиз ҳам билмайдиган аллақайси бурчакларида милтиллаётган ушоқцина норозиликдан қўрқасиз, уяласиз, уни сезмасликка оласиз! Тўғри, қадр-қимматингизни ошкора ҳақоратланганда ўша милтиллаётган чўф аланга олгандай бўлади ва сиз уни ароқ билан ўчиришга уринасиз. Дунёга ширакайф кўзлар билан қараб таскин топасиз, бир қадар юпанасиз ҳам. Лекин эртаси куни кайфингиз тарқаб, дунё яна асл ҳолига қайтади! Шунда ўзингизни кўярга жой тополмайсиз, ҳадсиз-худудсиз оламда муштдеккина жуссангизни қўйгани жой йўқ! Сўнг йиғламоқдан ўзга чорангиз қолмайди ва ўксиб-ўксиб йиғлайсиз...

Күчқор (Кўзларида ёш ўйнаб). Ёл-фо-он!... Мен ҳеч қаочон йиғламаганман!..

Аломат. Йиғлагансиз. Фақат кўзингизнинг нариги томони билан йиғлагансиз. Кўз ёшларингиз ташқарига эмас, ичингизга оқсан. Мана, менинг ичим тўла темир-терсак, сизнинг вужудингиз эса фақат ва фақат кўз ёшидан иборат. Лим-лим ёш...

Күчкор (Баралла йиғлаб юборади, сапчиб туриб оёғи остидаги қутини зарб билан тепади). Э, падарига лаънат ҳаммасининг!!!¹

Драматург Шароф Бошбековнинг «Темир хотин» трагикомедия асаридан келтирилган ушбу парчада ҳам юқоридаги назарий мулоҳазалар исботланган: Аломат ва Күчкорнинг диалоглари — «ҳалқасимон» — бири-биридан келиб чиқади; жўшқин — қишлоқ ҳақиқати очиқ ошкор қилинаяпти; қишлоқ кишиларининг қалбидаги фожиа самимий тарзда енгил кулгуга «ўраб» узатиласяпти...

Драматик тур ривожи давомида жуда қўплаб жанрларнинг туғилишига сабаб бўлган. Унинг жанрларини ўрта ва кичик шаклларга бўлиб ўрганиш расми ҳамон сақланиб келмоқда. Ўрта шакл-трагедия, комедия, трагикомедия, драма, мелодрама. Кичик шакл — интермедия, водевиль, бир пардали пьеса, кичик инсценировка, монодрама, диалог ва ш.к.

Ушбу жанрлардан биттасига — драматик турнинг «Бутун моҳиятини ўз ичига оладиган, унинг ҳамма элементларини қамрайдиган» — трагедияга тўхталамиз. Трагедия жанрининг хусусиятлари ҳам В. Белинский томонидан етарли асослангандир. Улар қуйидагичадир:

1. «Трагедиянинг моҳияти... қалбнинг табиий жараёни, майлнинг ахлоқий бурч ёки даф қилинмас бир тўсиқлик билан тўқнашувидир... трагедия — қайгули тамоша! Агарда қон, ўликлар, ханжар, заҳар трагедиянинг одатдаги сифатлари бўлмаса ҳам, лекин унинг оқибати ҳарвақт қалбнинг энг қимматли умидаларининг емирилиши, бутун бир ҳаёт саодатининг ийқолувидир. Унинг қора улуғорлиги, унинг буюк азаматлиги шундан келиб чиқади: унда тақдир кучи ҳукм суради, унинг моҳияти, асоси тақдир кучидир».

2. Трагедия «асосида буюк ҳақиқат, юксак донолик ётади. *Курашда ўлган ёки галабада ҳалок бўлган қаҳрамонга биз чуқур қайғурамиз. Лекин бу курашсиз, бу ҳалокатсиз у қаҳрамон бўлмаслигини, ўз шахсияти билан абадий субстанциал кучларни, жаҳонни ва ўзгармас борлиқ қонунларни амалга ошира олмаслигини биламиз*».

3. «Буюк ахлоқий вазифаларни ҳал қилиш учун тақдир энг асл руҳларни, кишилик дунёси бошида турган юксак руҳли шахсларни, ахлоқий дунёнинг тираги

¹ Ш. Б о ш б е к о в . Темир хотин. «Ёшлиқ», 1989 йил, 5-сон, 32-бет.

бўлган субстанциал кучларни ўзида гавдалантирган қаҳрамонларни танлайди. *Фақат олий табиатли одам трагедиянинг қаҳрамони ёки қурбони бўла олади; воқе-ликнинг ўзида аҳвол шундай».*

4. «Ҳар қандай трагедиядан машъум ҳалокатни йўқотинг, сиз бу билан уни буюклидан, бутун маънодан маҳрум қиласиз, буюк асардан оддий бир нарса ясайсиз, у биринчи галдаёқ ўзининг бутун нафис кучини йўқотади».

5. «Трагедия кўпроқ сунъий асардир». «Мана шунинг учун тарихий шахсларни бузиб кўрсатишга оз йўл қўйилса ҳам; трагедиянинг гўё қатъий хуқуқидир, бу унинг моҳиятидан келиб чиқади. *Трагедиячи ўз қаҳрамонини маълум тарихий вазиятда кўрсатишни истайди: унга вазият беради, агар бу вазиятдаги тарихий қаҳрамон трагедиясининг идеясига мувофиқ келмаса, уни ўзича ўзгартиришга у тўла хуқуқидир».*

Ўзбек адабиётида яратилган «Муқанна» (Х. Олимжон), «Мирзо Улуғбек» (Шайхзода) трагедиялари ҳам В. Белинский фикрларини тұлиқ исботлайди... Жанрларнинг табиати ва характеристики чукур билиш, унинг адабий қонунларига амал қилиш — етук бадиий асарнинг юзага келиши учун асосли йўлдир.

Хулоса. Адабиёт (чинор) учта тур (учта шох) ва ўнлаб жанрлар (шохнинг бутоқлари, бутоқнинг қисмчалари)га бўлинган ҳолда инсонни кашф этиш ва комиллик йўлида тинимсиз ривожланмоқда. Тур ва жанрларнинг ҳаммаси ҳам бир танадан озиқлансаларда, уларнинг ҳар бири ўзининг устивор предметига, хусусиятига — табиати ва характеристига эга. Ижодкор тур ва жанрларнинг қонун-қоидаларини чукур ўргансагина, унинг «абадий низомномалари»га амал қилсагина, ўзлиги билан уларнинг хислат ва фазилатларини ортирасагина — ижодий ютуқларга эришиши тайин.

Бешинчи бўлум

УСЛУБ, ИЖОДИЙ МЕТОД ВА ОҚИМЛАР

I. Бадиий услуг

Таянч сўз ва иборалар: Бадиий услуг. Индивидуал услуг. Услубда объективлик. Услуб омиллари. Ойбек услуби. А. Қаҳҳор услуби.

Борлиқдаги бирор бир ҳодисанинг айнан тақорори яратилмаган. Ҳатто қор қалинлиги 50 см бўлган ҳар метр квадратда 1.000.000 дона атрофида қор учқунлари бор. Шунга қарамай, бутун ер юзини қор қопласа-да, ҳеч бир қор зарраси шаклан бир-бирини тақорорламайди. Бу ҳақиқат америкалик Вилсон Бентлейнинг 50 йил давомида олиб борган кузатиш ва тажрибаларининг хулосасида 1985 йилда аён бўлди. Худди шундай овозларни, сиймоларни, бармоқ учларининг айнан ухшashi ўқилиги бугунги кунда кўпчиликка аён.

Ҳаётнинг ана шу бетакрор қонунидан келиб чиқсак, иккита бир хил ёзувчи (шоир)нинг бўлиши ҳам мумкин эмас. Чунки, яратилган ҳар бир инсоннинг ички ва ташқи тузилиши ўзига хос биқиқ бир оламки, унинг бетакрорлиги ўзлигига мужассам этилган. Шунга асосан ҳар бир санъаткорнинг олами — ҳаётий тажрибаси, билим даражаси, диди, гўзалликни кўра билиши, тасаввури, хаёлот дунёси, қалб кўзи ўзигагина тегишлидир ва ана шу ўзлик унинг ҳар бир асарида аксланади. Шунинг учун «Услуб — одам» (Гёте) тушунчаси асосли ва ҳаётийдир. Шунга асосан В. Белинскийнинг «Ёзувчининг мазмун билан шаклга қўйма бир ҳолат бағишлай олиш қобилиятини ва шу билан бирга ҳамма-ҳамма нарсага ўз шахси, ўз руҳини тақорорланмас, оригинал муҳрини тушириб ўта олиш хусусиятини» — услуг деб белгилаши тўғридир.

Ҳазрат Алишер Навоийнинг «Эл нетиб топгайки мени, мен ўзимни топмасам», — деганларида ҳикмат бор. Мавлоно Заҳириддин Бобурнинг:

*«Қачонки күргайсан менинг сўзимни,
Сўзимни ўқиб англайсан ўзимни», —*

деганларида ҳақиқат бор.

Адабиётда услугуб фақат «ўзлик билан чекланмайди, фақат индивидуал белгиларнинг йигиндиси эмас. Унда, албатта, «ўзлик»ни вужудга келтирган, ўстирган ижтимоий муҳитнинг таъсири бўлади, унда «шахсийлик ва умумийлик жуда мураккаб диалектик бирликда бўлиб, ўзаро шартланган, бир-бирини ифодалайдиган»¹ тарзда воқе бўлади. Шунга асосан романтик тасвир услуги, реалистик услуги, давр услуги, замонавий услуги, миллий услуги, адабиёт услуги, тасвирий санъат услуги... деган соҳаларнинг мавжудлигини ҳам тан олади.

Услубда объективликнинг мавжудлигини тан олган ҳолда шуни айтиш лозимки, «ўзига хослик», ижодкор қалъининг бетакрор уриши — услугбнинг бош аломати санълади. Услуб асарнинг «бутун яхлит системасида на-моён бўлувчи бадиий ўзига хослик» (Г. Абрамович), «Адабий асар унсурларининг бир-бирига боғлиқлиги ва уларнинг ёзувчи талантига мос тарзда гармоник чатишуви» (Вуйцицкий)дир.

Услуб бир вақтнинг ўзида мазмун ҳам, шакл ҳам, тоя ҳам, мотив ҳам. Буларнинг барчаси бирлашганда асар бус-бутунлигини услугуб таъминлайди. Шунга кўра ёзувчи услугбини сўзга, тилга — улардан фойдаланишдаги ўзига хосликка боғлаб қўйиш ноўриндир. Тўғри, адабиёт — сўз санъати, тил адабиётнинг биринчи элементи бўлса-да, услугни юзага келтирувчи воситалардан бири — зарурий элементи саналади.

Услубни юзага келтирувчи энг зарур омиллардан яна бири — санъаткорнинг ҳаётни, ҳаётнинг моҳиятини, унинг қаъридаги ҳақиқатни тадқиқ ва таҳлил қила билиши билан боғлиқдир. Инсон руҳиятининг бой ва яширин сирларини, уларнинг туб эстетик қимматини каашф этиш санъати — руҳияти билимдонлиги билан бевосита алоқадордир.

Демак, услуг — ёзувчининг воқелик ва инсонни идрок қилиши, уларнинг қалбидаги ҳақиқатнинг каашф этиши ва уни сўз воситасида образли ифодалай олиши — бу вазифаларни индивидуал («ўзига хос») тарзда яратиш санъатидир. Услуб доим ёзувчи (шоир)нинг бутун бор-

¹ Художественный метод и творческая индивидуальность писателя, М., 1964, стр. 234.

лигидан — табиатидан келиб чиқади ва ҳар бир яратган асарида ана шу ўзига хос оламнинг ҳаётбахш нурини — инсонийлашган туйгуларини тирилтиради, кўпга улашади, эзгу туйгулар тарбиячиси вазифасини ўтайди. Шунинг учун ҳам услугуб «*кучсиз адаб — ёзгувчининг асарларида ўзини очиқ кўрсата олмайдир*. Кучсиз ёзувчиларнинг услублари бир-бирига ўхшаб қоладир»(Фитрат, 26-бет). «*Услуб замон билан ўзгаргани каби шахс билан ҳам ўзгарадир*. Ҳатто, яна бироз чуқурроқ бориб, *бир кишининг сочим — тизим (наср ва назм — Ҳ. У.) ёзганида ҳам услубнинг ўзгариб қолганини кўрамиз*. Навоийнинг услуби тизимда ҳашаматли бир оҳанг билан юрадир, сочимда эса огирашиб қоладир. Яна бироз ингичкароқ қараганда *бир шоир услубининг асарнинг мавзуига кўра ўзгарганини ҳам кўрамиз*. Навоийнинг «Лайли ва Мажнун»идаги ўйнаб қайнаган услубини унинг «Лисон ут — тайр»ида кўриб бўлмайдир. Бироқ бу ўзгаришлар (яъни: асарнинг шакли ё мавзуига кўра бўлган ўзгаришлар) асосий эмасдир. *Навоий ва Чўлпоннинг услублари сочим — тизимда, ё мавзуига кўра ўзгармак билан уларнинг «ўзлик»ларини (шахсиятларини) иўқотмайдир*. Чўлпоннинг Чўлпонлиги, Навоийнинг Навоийлиги бу шоирларнинг тизим — сочим асарларида мавзу ўзгаришига қарамасдан кўриниб турадир» (Фитрат, 28-бет, Таъкидлар бизники — Ҳ.У.).

Ҳаёт ёзувчини бойитгандек, тажрибасини оширганидек унинг услубини ҳам тобора сайқаллашига сабаб бўлади. Лекин ёзувчи «ўзлиги» худди ген белгиларидек асардан асарга ўтаверади. Шу сабаб ёзувчининг бутун ижодидан келиб чиқиб, аниқ асарининг услубини аниқлаш асосли ҳақиқатларнинг кашфига олиб боради.

Фикр-мулоҳазаларни исботини кўрсатиш мақсадида Ойбек ва А. Қаҳҳорнинг адабиётшунослар таъкидланган ўзига хос белгиларини ажратиб кўрайлик:

Ойбек:

А. Қаҳҳор:

Ҳаёт манзарасини барча икир-чикирларигача эрин-масдан, унинг поэзияси-ни (жозибасини) кўрса-тишга интилади.

Романтик табиатли, ҳаё-

Ҳаётнинг кўпроқ кулгули ва фожиали жиҳатларини сиқиқ тарзда тасвиirlайди.

Вазмин табиатли, совуқ-

лотга бой, фалсафий мушоҳадаси кучли	қон, сатирик мушоҳадаси кучли
Эпик кенглик, сербуёқлик	Қисқалик, воқеани қизиқ бир кўринишдан бошлаш
Лирик шоир, моҳир прозаик Роман жанрида машҳур	Моҳир прозаик, таниқли драматург Ҳикоя жанрида машҳур
Лирик ҳарорат — прозасида кучли, эпиклик — лирикасида зўр	Юмористик ва сатирик пафос эгаси. Киноя, пичинг, истеҳзо, ҳазил-мутойбаси кучли
Шафқатли даҳо («Добрый гений»)	Ҳақиқатни ҳамма нарсадан устун билувчи даҳо

Ушбу изланишлардан шудай хулоса қилса бўлади:

1. Поэтик (бадиий) дунёни юзага келтирувчи индивидуал («ўзига хос») курратнинг салоҳияти услубни воқе қилади.
2. Услуб — ижодкор дунёсиdir, унинг хаёлоти, тасаввури, ақли, билими, сўзшунослиги, таланти, генийси, инсонийлиги — бутун борлигини намоён этувчи бадиий ҳодиса, воситадир.

II. Ижодий метод ва оқимлар

Таянч сўз ва иборалар: Ижодий метод ва услуб. Ижодий методнинг юзага келиши. Романтизм. Реализм. Ижод типларининг ўзаро алоқаси. Оқимлар ва уларнинг келиб чиқиши сабаблари.

Бадиий услуб ҳар бир ёзувчи — санъаткорнинг, ҳар бир етук асарнинг, ҳар бир давр адабиётининг ўзига хос барча хусусиятларини қамраса, бадиий метод музайян туругга мансуб санъаткорлар ижодининг умумий ва муштарак барча белгиларини ўзида ташайди. Бу хусусият ва белгилар ҳаёт материалиини танлаш, умумлаштириш, баҳолаш, акс эттириш борасидаги умумийлик ва айни пайтда, ана шу умумийликнинг якка шахс (ёзувчи) таланти, қуррати илиа «пишиб етилишидир».

Кўринадики, гарчи услуг ва метод бир-бирига ўхшамаса-да, лекин улар бирлашганда, бир-бири билан чатишганда воқе бўладилар, ана шундагина улар яратиш хислатига, таъсирдорлик фазилатига, гўзалликни бунёд этишга қодирлик касб этади.

Бундан кўринадики, бадиий асар яратилганиданоқ, услуг ҳам, метод ҳам туғилади. Назарий адабиётларда айтилганидек, даставвал, романтизм, кейинчалик ёки тўғрироғи XIX асрга келиб реализм дунёга келди деган тушунчани рад этади. Демоқчимизки, услуг ва усул (метод) адабиётнинг пайдо бўлиши билан бир вақтда туғилади. Фақат адабиётнинг ривожи, камолот сайин ўсиши, foявий бадиий кашфиётларнинг умумлаштирилиши ва сабоқларига боғлиқ ҳолда услуг ҳам, усул ҳам турфа хиллик касб этади; жамият тараққиётидаги ўзгаришларга жавоб тарзида усул ҳам, услуг ҳам янги-ча сифат касб этиб, баҳор янглиф қайта туғилиб бора-веради.

Ҳар бир йилнинг ўз баҳори бўлганидек, ҳар бир ёзувчининг ўз услуби ташида, қобигида метод вазифасини ўтайверади.

Шунинг учун «Илиада» ҳам, «Рамаяна» ҳам, «Хамса» ҳам, «Ўткан кунлар» ҳам, «Ўзбек Навоийни ўқимай қўйса» ҳам асрларни тан олмасдан, ҳамма авлодларга эстетик завқ улашаверади, инсонни комиллик йўлида тарбиялайверади. Чунки уларнинг ҳаммасида ҳам ҳаёт ва инсон моҳиятини тушуниш, идрок этиш, эзгуликни улуғлаш ва унинг амалиётига чорлаш — бош пафосдир, инсоният туйгулари тарбияси учун ўлмас на-мунадир; ана шу соҳадаги англанган жиҳатлардан сабоқ олиб, англанмаган қирраларини кашф этиш — адабиёт тараққиётининг туганмас, ниҳояси йўқ йўналишидир.

Шу мулоҳазалардан келиб чиқсан, ҳаёт ва инсоннинг бадиий моделини яратишнинг иккита йўли энг қадимги даврдан бугунгача давом этиб келаётгани аниқлашади ва бу ҳақиқатни алломалар ҳам тасдиқлайдилар. Жумладан, Аристотель «Поэтика» асарида: «Софоклнинг айтишича, у одамларни қандай бўлиши кепрак бўлса шундай тасвирлаган, Еврипид эса қандай бўлса ўшандай тасвирлаган» (53-бет.) Руснинг буюк танқидчиси В. Белинский ҳам (XIX асрда) бу ҳақиқатни тасдиқлайди: «Айтиш мумкинки, поэзия икки усул билан ҳаёт ҳодисаларини қамраб олади ва қайта тик-

лайди. Бу усуллар, гарчи бири иккинчисига қарама-қарши бўлса ҳам, бир мақсад томон етаклайдилар. Шоир унинг нарсаларга назари тарзига, унинг дунёга муносабатига, ўзи яшаган асли ва халқига боғлиқ идеалига мослаб ҳаётни қайта яратади (пересоздает) ёки шоир бу ҳаётни бутун яланғочлиги ва ҳаққонийлиги билан қайта тиклаб (воспроизводит) ҳаёт воқелигининг ҳамма тафсилотларига, бўёқларига ва нозик томонларига содиқ келади. Шунинг учун айтиш мумкинки, позияни икки бўлакка — идеал поэзияга ва реал поэзияга бўлса бўлади» (Қаранг: И. Султон, 356-бет).

И. Султонов: «Ҳозирги замон адабиётшунослигига биринчи хил бадиий тафаккур — «романтик тафаккур типи», иккинчи хил тафаккур — «реалистик тафаккур типи» деб аталади» (И. Султон, 356-бет), — деб ёзадилар ва «Романтик тафаккур ёки реалистик тафаккурнинг маълум тарихий давр учун характерли ва ҳукмрон кўринишини **ижодий метод**» тушунчаси билан юритишини таклиф этадилар...

Дарвоқе, ҳаётни образли тасвирлашнинг икки йўналиши «ҳам аслида инсон табиати билан боғлиқ ҳодиса саналади. Чунки одам реал ҳаёт қўйнида, ҳам орзу-ҳаваслар дунёсида яшайди. Инсон табиатида мавжуд ҳаёт тарзига қаноат қилишдан кўра, турмушни ўзгартириш истаги, уни янада яхшилаш ҳаваси баланд туради. Бу ҳавас... кучли бўлади» (А. Улуғов, 79-бет).

Ана шу икки йўналиш — ижод типи турли-туман даврларнинг, жамиятларнинг талабларига доимо жавоб бериб келмоқда, фақат, бизнингча, эволюцион ривожланиш — романтизмни, революцион тараққиёт — реализмни биринчи ўринга олиб чиқади. Кўпинча бадиий асарларда ижоднинг бу жанрлари қўшалоқлашган бўлади. Реалистик асарда романтизмнинг хислатлари ёрдамчи вазифани бажарса, романтик асарда реализмнинг унсурлари ҳам шундай вазифани ўтайди. «Ҳамса» (Навоий)да ҳам, «Қиёмат» (Ч. Айтматов)да ҳам, «Ёлғизликда юз йил» (Г. Маркес)да ҳам, «Ўткан кунлар» (А. Қодирий)да ҳам бу ҳолат яққол кўзга ташлашини ва барчага аёнилиги исбот талаб этмайди.

Шундай бўлса-да, яна бир асос: Садриддин Айнининг таъкидлашича, «Ҳамса» достонларида Навоий салбий типларни ўз замонасидан олган, ижобий типлар эса — Навоий фантазияси ва идеалининг маҳсулидир, лекин романтизм устундир.

Яна шуни таъкидлаш лозимки, муайян ёзувчи ижодида, муайян асарда ё романтизм, ё реализм доимо етакчилик қиласди. Профессор Абдуқодир Ҳайитметов илмий холосалари ҳам шу ҳодисаларни исбот қиласди. Унингча, Навоийнинг асосий методи — романтизм, айни пайтда, унинг Сайд Ҳасан Ардашерга ёзган мактуби, «Маҳбуул-қулуб», сатирик фазаллари ва қитъалари, «Лисонут тайр»даги баъзи ҳикоятлари реалистик характердади.

Албатта, ҳар бир санъаткорнинг «ўзига хос»лигини унумаслик керак. Бирида исёнкорлик, бирида жамият билан келишиб яшайдиган донолик устун бўлиши ҳам мумкин. Бири реаликларга чидай олмай, бири ундан кўра орзулар дунёсида яшаши — ўзини воқе қилиши ҳам табиийдир.

Жумладан, Алишер Навоий инсон ҳақидаги орзу ҳавасларини акслантирувчи асарлар ёзган бўлса, унинг ёш замондоши Бобур ўз замони воқеа ва одамларини ҳаққоний, реал тасвирини беради. F. Гулом, X. Олимжонлар социалистик воқеликни улуғлаган бўлсалар, A. Қодирий, Чўлпонлар бу воқеликдан исёнга келадилар. Мирмуҳсин, X. Гулом, Шукруллоларда жамият билан келишиб яаш устунлик қилса, A. Орипов, Э. Вожидовларда бу жамиятнинг кирдикорларини фош этиш, юксакроқ воқеликни исташ туйгулари кучлилик қилали ва ҳоказо.

Жаҳон адабиёти тараққиёти тарихидаги реализм ва романтизмни — ижод типлари, ижод йўналишлари, бадиий тафаккур типлари деб юритиш ҳам асослидир. Чунки уларнинг турфа хил кўриниш ва қирраларини турли даврлар рўёбга чиқаргандир.

Жумладан, классицизм (П. Корнел, Ж. Расин), экзистенционализм (Жан Поль Сартр, М. Пруст, Ф. Кафка), сюрреализм (Поль Элюар, Оскар Уайльд, А. Ахматова), танқидий реализм (Махмур, Муқимий, Л. Толстой, Ф. Достоевский), социалистик реализм (Ойбек, F. Гулом, М. Горький) ва ш.к. Бу кўринишларнинг ҳаммасини оқимлар (ирмоқлар) деб аташ, романтизм ва реализм (икки дарё)ни метод деб юритиш маъқулга ўхшайди. Чунки оқимларнинг ҳаммаси ҳам ё реалистик, ё романтик тасвирилаш принципларининг қонуниятларига бўйсинади. Шу қонуниятларга таянганлари ҳолда, унинг ҳали тўлиқ англашмаган янги қирраларини очадилар, холос.

Янги қирраларни кашф этиш ва ифодалаш жараёнида муайян ўзига хосликлар ҳам юзага келиши табиийдир. Жумладан, реализмнинг ўзига хос бир кўриниши — классицизм (лот. «намуна», «ибрат» маънолари ни беради)ни кўрайлийк. Унинг вакиллари ўтмиш антик адабиёти намуналарини ўзлари учун ибрат намунаси деб санаганлар. Улар адабиётда ҳамма нарсалар аниқ ва қатъий қоида асосида тасвиirlаниши шарт деб тушунгандар ва эстетик қарапшларини «уч бирлик»ка мослагандар: асарда тасвиirlанаётган ҳодиса битта яхлит сюжетда гавдалантирилиши («ҳаракат бирлиги»), бир жойда бўлиб ўтиши («жой бирлиги») ва йигирма тўрт соат ичидаги юз бериши («вақт бирлиги») лозим бўлган. П. Корнелнинг «Сид» («Сайд»), «Гораций», Ж. Расиннинг «Андромаха», «Британик», Мольернинг «Хасис» сингари гўзал, бетакрор асарлари шу қоидаларга мувофиқ яратилган.

Классицизм вакиллари «Адабиёт сарой ва шаҳар учун яратилиши керак» (Н. Буало) деб ҳисоблагандар ва жанрларни табақалаштиргандар. Уларнинг эстетик тушунчаларича драма энг юксак жанр, комедия қўйи жанр ҳисобланган. Роман, қисса, ҳикоя жанрларига иккинчи даражали унсурлар деб қарапшган. Кўпинча уларнинг асарларида инсон ҳаёти ва характерининг бир қирраси чукур ва батафсил тасвиirlангани учун, инсоннинг кўпқиррали характеристери тўлиқ гавдаланмаган... Бундан ҳам кўринадики, ҳеч бир оқим ҳаёт ва инсон тасвирининг ҳамма жиҳатларини қамраб ола билмайди, инсон ҳақида англаған ҳақиқатларнинг сабоқларини ўзидан кейинга оқимлар учун узатадилар ва ана шу сабоқлар янги босқич пойdevori бўлиб, янги оқимлар тарихида ҳали англанмаган ҳақиқатларни кашфи давом этаверади; адабиёт ривожи тўхтовсиз ҳаракат қилгани сайин — инсон ҳақидаги ҳақиқат тобора чуқурроқ аксини топаверади.

Демак, метод ҳам, оқимлар ҳам ҳеч вақт ёзувчи талантини, санъатини ўлчовчи, баҳоловчи мезон бўла олмайди. У «адабий асарларни бир-биридан фарқлаш, адабий даврлар ўртасидаги тафовутларни кўрсатиш, аниқлаш ва белгилашнинг ўзига хос мезони саналади» (А. Улуғов, 87-бет).

Ҳар қандай асар ўз даврининг ҳукмрон эстетик қарапшлари, муҳитнинг бош аломат ва ҳақиқатлари билан қолилинган бўлади. Гарчи бу ҳақиқатни такрорлаётган бўлсак-

да, ана шу қолип (давр моҳияти) асарга ўз нуқсонини босади: нафасии, рухини, оҳангини, ақидасини, аъмolinи, «ўзлиги»ни қолдиради. Ана шу ҳолатларни умумлаштириш, хусусиятларини очиш учун «метод» ва «оқим» тушунчалари ўйлаб топилган ва уларнинг ҳаммаси ҳам «романтизм ва реализм» ижод типларидан бунёд бўлган, уларнинг ҳақиқий «фарзандлари» саналади.

Адабиёт ҳаётни бадиий образларда сўз воситасида акслантириш санъати экан, у ҳамон бош қонун — адабиётнинг конституцияси вазифасини бажараркан, у билан туғилган романтизм ва реализм ҳам умрибқий, доимо ҳаракатдаги унсурдирки, бизнингча, фақат ана шу икки қудратни метод тарзида, қолганларини оқим сифатида аниқлаштириш асослироқдир, адабиёт руҳига монанддир, унинг ривожланиш босқичларига хосдир.

Романтизм. Бу методнинг бош хислати «идеалга мослаб ҳаётни қайта яратиш» (В. Белинский)дир, яъни орзу қилинган воқеликни тасвирлашдир; уни гўзал ва муқаммал ҳаёт тарзида кўрсатишидир; ана шу ҳаёт қаҳрамонларининг афсонавий куч-қудратга эгалигини, мўъжизакорлигини идеаллаштишидир. Эсхилнинг «Прометей», Софоклнинг «Шоҳ Эдип», Еврипиднинг «Елена», Навоийнинг «Хамса», Руставелининг «Йўлбарс терисини ёпинган паҳлавон» каби асарларида «одамларнинг қандай бўлиши керак бўлса, шундай тасвирини» берилгани ҳам юқорида айтилган бош хислатни тасдиқлайди. Жумладан, Алишер Навоийнинг «Фарҳод ва Ширин» достонидаги Фарҳод реал шаҳзода образи эмас, балки, Навоий орзу қилган ҳукмон тимсолидир. У шаҳзода бўлишига қарамай, ҳунар эгаллайди, илм-фанни чукур ўрганади. Ёшлигиданоқ мўъжизакор куч-қувватга эга бўлади, минг-минглаб одамлар эплай олмаган ишларни бажаради. У тешаси билан арман тоги тошларини худди пичоқ сариёғни кесгандай кесиб, канал қазади; Хисравнинг минглаб қўшини кўнглига гулгула солади, уларга бир ўзи бас келади...

Романтик асарларда воқеа-ҳодисалар ва қаҳрамонлар бошқа тарихий давр ва мамлакатларга кўчириб тасвиранади. «Фарҳод ва Ширин» (А. Навоий) достонида воқеа-ҳодисалар аввал Чин (Хитой)да, сўнг Арман ўлкасида юз беради. Фарҳод, Баҳром — хитойлик, Меҳинбону, Ширин — армани, Шопур, Хисрав, Шеруя — эронлик. Ҳолбуки, бу қаҳрамонлар характери,

аъмоли, руҳи билан ўзбекларга тегишлидир, ундағи воқеа-ҳодисалар асосида Навоий даври ҳаётининг типик манзаралари аксини топгандир.

Инсонийликни улуғлаш, эзгуликни куйлаш, муҳаббат ва садоқатни юксак даражада мадҳ этиш, унга ишонтириш романтизмнинг энг характерли аломатидир. Унда ҳаётни жудаям күтаринки руҳда, сержилор бўёқларга бой тарзда, ёрқин ва нозик ифода этиш хислатга айланади ва бу хислат китобхон қалбини ларзага солади.

«Фарҳод ва Ширин»да тасвирланишича, Фарҳод ўлимидан сўнг Ширин: «Мен унинг ҳажрида бемору бедилман, худди чала сўйилган қушдайман», — дейди.

*Анинг ҳажрида мен бемори бедил
Күшеменким, қилурлар ним бисмил!*

Фарҳодни Армания тоғидан келтириб, уни қучоқлаб, жисмига жисмини ва жонига жонини улади. Юзини юзига, кўксини кўксига қўйиб ўз бедилини қучоғига олади. Сўнг юрагидан алантали бир оҳ тортиб, унинг кўзи ҳам бирга ухлагани у билан уйқуга кетади:

*Қўюбон рўй-баррў дўш-бардўш,
Бўлиб ўз бедили бирла ҳамоғуш.
Кўнгулдин шуълалиқ оҳе чиқарди,
Кўзи ҳамҳобадек уйқуга борди.*

Меҳинбону ва унинг ёнидагилар кажавага яқин қадам қўйиб бориб, пардан очиб санамни кўрдилар. У юзини юзига, кўксини кўксига бериб, Фарҳод билан ҳамоғуш ётар эди. Кўзи кўзининг устида, қоши қошининг устида, бирорта мўй ташқарида эканлиги кўринмасди.

Чексиз-чегарасиз айрилиқлар кетиб, унинг ўрнини бениҳоя висол эгаллаган эди. Ўлган ошиқ билан жонсиз маъшуқа сарв дараҳти билан печак гулидай чирмашиб ётар эдилар. Маъшуқа ўз севгилисини маҳкам қучоқлаб ётар, севгилиси ҳам маъшуқасини худди шундай қучоқлаб ётарди:

*Амори сори қўйдилар қадамни,
Очибон парда, кўрдилар санамни*

¹ А. Навоий. МАТ, 8-том, Т., «Фан», 1991, 441-бет.

*Ки, Фарҳоди била ётиб ҳамоғуш,
Кўюбон рўй-баррў дўш-бардўш.
Кўзию қоши узра, кўзу-қоши,
Сари мў бўлмайин зоҳир таҳоши.
Кетиб ул фурқати беҳадду ғоят,
Бўлуб рўзи висоли бениҳоят.
Улук ошиқ билан маъшуқи бежон,
Нечунким сарв бирла ишқ печон.
Қучуб ўз ошиқин маъшуқи маҳкам,
Нечунким, ошиқ ўз маъшуқини ҳам.*

Бундай ажиг ҳолатга — муҳаббатнинг бунчалик ва-фога, садоқатга йўғрилганини, поклиги ва гўзаллиги-ни кўрган Мехинбонунинг фифони кўкка қўтарилиди. Шу фифон билан бирга унинг жони ҳам чиқиб кетди. Чунки Ширин унинг жони эди. Усиз ўлиши мумкин эди. Шу пайтда ундан ажралган эди, жонидан ҳам аж-ралди қўйди:

*Чиқиб гардун сори ағғони онинг,
Фифони бирла чиқти жони онинг.
Чу Ширин жони эрди, онсиз ўлди,
Дамеким ўлди онсиз, жонсиз ўлди.*

Кўринадики, инсон бекорга ва бир ўзи ҳеч вақт ўлмайди. Мехру муҳаббат ришталари билан боғлангандар бирга яшайдилар ёки бирга риҳлат қиласидилар; бу вафонинг, садоқатнинг, инсонийликнинг, покликнинг, ниятнинг етуклиги натижасидир; романтик тасвирнинг қудратидир.

Романтик методнинг асосий хусусиятларидан яна бири ҳар қандай жамият (қулдорлик, феодализм, капитализм, социализм)нинг антигуманистик моҳиятини доимо фош этиш ва қоралашдир. Ижодда ва ҳаётда эркинлик, шахс озодлиги ва комиллиги учун курашдир. Бу хусусият ҳамма романтик ижодкорлар фаолиятида пафос даражасига қўтарилиган, ўлмайдиган руҳ бағишлийдиган «ҳамма ҳалқларда ва ҳамма замонларда умумий бўлган ҳодисадир» (В. Белинский).

РЕАЛИЗМ. Бу методнинг бош хислати — «Ҳаётни бутун яланғочлиги ва ҳаққонийлиги билан қайта тиклаш» (В. Белинский)дир. Бу қонуният — адабиётнинг туғилишиданоқ пайдо бўлган бўлиб, унинг тарихий ривожланиш тараққиёти давомида тўхтовсиз тарзда сай-

қаллашди, янги-янги хусусиятлар дунёга келди, тобора бойиб такомиллашишда давом этмоқда. Романтизм билан доимо баҳслашиб, уни ҳам бойитиб, ундан ҳам руҳ олиб, биргалашиб «бир мақсадга етаклашда» (В. Белинский) мусобақа құлмоқдалар. Түғри, адабиёт тарихи давомида романтизмнинг ҳам, реализмнинг ҳам барча оқымлари ҳамма вақт ижобий натижаларга олиб келган әмас. Жумладан, натурализм оқими — ҳаётни ўта яланғоч ва бутун тафсилотлари билан икир-чикиригача тасвирилаш орқали — таъсирдорлик хусусиятини муайян даражада йўқотган бўлса, сентиментализм оқими ҳаётни тасвирилашда ақл-идроқдан ҳис-туйгуни устун билди, унинг мусаффолигини ягона мезон даражасига кўтарди; хўрланганлар, жабрдийдалар, жафо-кашлар, баҳтсизлар, ноҷорларнинг идеал образларини яратдилар ва шу билан ҳаётнинг бош локомотиви — курашчанликдан, яратишдан маълум даражада узоқлашдилар. Бундай ҳолат табиийдир, изланиш, ўсиш, тараққиёт йўлидаги ютуқлар ва камчиликларнинг бўлишидир. Романтизм ва реализм қудратининг турли даражадаги (гўё денгиз қудратидан ҳосил бўлган улкан) ҳаётбахш ёки ҳалокатли тўлқинлариdir.

Гуманизм, эркин ва озод ҳаёт, баҳт ва тинчлик учун кураш — инсонийлик романтизмнинг ҳам, реализмнинг ҳам байроғидир. Фақат **реализм инсон ва жамият ҳаётини реал (аниқ) ва рост тадқиқ этиш йўлидан борди**. У Б. Сучков ёзганидек, реализм «кишиларнинг ҳаракатлари ва ҳислари эҳтиросларнинг ёки илоҳий ироданинг оқибати әмаслиги, балки улар реал сабаблар, аниқроғи, моддий сабаблар билан тайин этилишини тушуна бошлаган пайтда пайдо бўлган». Бу тушунча энг қадимги давр кишиларida (Неандертал одамларда) ҳам бўлганини фан исботламоқда. Тарихда шахс ва жамият орасидаги ижтимоий муносабатларни бугунгидек бадиий таъсирчан ва ҳаққоний (Социал ва психологик детерминизм (шартланганлик)ка асослангани ҳолда) акс эттириш даражаси бўлмаганлиги аён, лекин, айни пайтда, бугунги даражанинг юзага келишида ўтмишдаги реализм пойdevor бўлгани ҳам ҳақиқатдир. Бобур, Махмур, Турди, Муқимий, Фурқат, А. Қодирий, А. Қаҳҳор, П. Қодиров, О. Ёкубов, М. Муҳаммад Дўст, Т. Малик, Т. Мурод каби ёзувчилар ижоди ҳам уларнинг шу соҳа бўйича сабоқларидағи ворислик ҳам исботдир.

Реализмнинг эстетик принципларидан яна бири — ҳаёт воқеа-ҳодисаларини ҳаққоний детал ва тафсилотлар воситасида типик характерларни типик шароитда тасвирлаштирилган (Дарсликнинг «Ҳаётий ҳақиқат ва бадиий ҳақиқат», «Сюжет ва композиция» қисмларга қаранг). Ана, шу тасвир асосида кишилик жамияти тараққиёти учун муҳим бўлган ижтимоий-маънавий муаммолар туриши, улар бадиий умумлаштирилиши, типиклаштирилиши зарур. А. Горький жаҳон адабиётида яратилган бадиий образлар хусусида шундай ёзди: «Мана шу санаб ўтилган одамлар турмушда бўлган эмас, аммо уларга ўхшаш кишилар ҳаётда бўлган ва шу борлари ҳам анча майда бўлиб, у қадар мукаммал бўлмаганлар, айрим фиштлардан минора... ясалгани каби, мана шу майда, чакана кишилардан сўз санъаткорлари умумлашма типларини, турдош типларни яратгандар, «тўқиганлар». Шундай «тўқима» натижасида биз энди ҳар бир ёлғончини Хлестаков, хушомадгўйни Молчалин, иккюзламачини Тартюф, рашк қилувчини Отелло ва ҳоказо деб атаймиз» (А. Горький. Адабиёт тўғрисида, 72-бет).

Кўринадики, реалист — санъаткор ҳаёт қаърида ётган ҳақиқатни кашф этувчи унинг кўп қиррали ва қарама-қарши томонларини рўйи-рост очувчи, уни тадқиқ ва таҳлил қилувчи хислатга эга бўлиши керак; ҳаётнинг объектив манзарасини холис тасвирловчи ёзувчи бўлиши лозим. Бу — реализмнинг бош талаби, унинг моҳиятидир. Ҳаётга яқинлигини, романтизмга тескарилигининг яққол кўринишидир.

Романтизм ва реализм методининг барча хусусиятлари, хислатлари ҳалигача воқе бўлган эмас. Шундан бўлса керакки, ҳеч ким уларга мукаммал таърифни ҳам бера олгани йўқ. Биз ҳам таърифлашдан воз кечамиз, чунки уларнинг хусусиятларини етарли тарзда ўрганишга ва келажакда воқе бўладиган аломатларини башорат қилишга умр камлик қиласиди, лекин шу йўлдаги изланишларга барака тилаймиз.

ХУЛОСА ВА САБОҚЛАР

«Адабиёт назарияси»дан шундай хулосаларга келиш мумкин:

1. Адабиёт — сўз санъатидир. Унинг билиш обьекти — ҳаёт, предмети — инсон, вазифаси — инсон туйғулати тарбиясидир. Унинг жони — образлиликдадир, яъни қайта яратилаётган ҳаётни тасаввур қиласиган даражадаги жонли ва завқли тасвиридадир. Ана шундай тасвирини ярата билиш қобилияти (санъати) — ёзувчилик талантининг ўлчовидир.

2. Адабиётнинг моҳияти — адабий асар таҳлилида яққол намоён бўлади. Бадиий асарда мавзуу ва фоя, образ ва характер, сюжет ва композиция, бадиий тил ва услуб, тур ва жанрлар каби унсурлар бетакрор тарзда уйғуллашадилар ва жонли бир «вужуд»ни — бадиийтнинг аниқ бир фарзандини дунёга келтирадилар. Асарда турли-туман, бир-бирига боғлиқ унсурларнинг нозик чатишувидан — бадиийлик, ўзига ром этувчи гўзаллик туғилади. Бу гўзаллик ягоналиги, бирбутунилиги билан инсонларни завқу шавқقا кўмади, туйғулар тарбиясини вояга етказади, уни инсонлаштиради, комилликка етаклади...

«Адабиёт назарияси» шундай сабоқларга ҳам асос беради:

1. Ҳақиқатга етишнинг маълум бир йўлини ягона йўл деб тушуниш, бир томондан тўғри бўлиши мумкин, яъни шу йўл орқали муайян шахс ҳақиқатга етган бўлади; иккинчи томондан нотўғрилиги шундаки, иккинчи шахс ўзининг йўлини тополмаса, бу йўл билан ўша ҳақиқатга ета олмайди. Гарчи ҳақиқат ягона бўлса-да, унга ҳар бир шахс «ўзлиги» орқалигина етади, яъни Аллоҳни ҳар бир банда ўзлиги туфайлигина танийди, салоҳияти даражасида унга етишади. Шунинг учун ҳам турфа йўллар борлигини билиш ва ҳар бир йўналишнинг ютуқ, камчиликларини умумлаштириш ва сўнгра илгарилаш энг тўғри асосдир.

2. Юқоридаги таҳлилимиз («Адабий асар», «Шеърият»)дан кўрдикки, бадиий адабиётни ўрганиш — бу, биринчи навбатда, бадиий асарнинг ўзини ўрганишdir. Шунинг учун ҳам поэтика, ритмика, метрика («Строфика», «Фоника», «Ритмика»)ни янгича ўрганишнинг ҳам даври келди. «Адабиётшуносликнинг

структурал методи» фанининг ўқитила бошлиши ҳам — «Шакл таҳлили»нинг устун бўлаётганидан хабар беради. Тўғрироғи, французларнинг «Матнни шартли белгиларда ифодалаш» методи, русларнинг «Шакл мактаби» тажрибалари қўл келмоқда: биз тушунган бадий асардаги мазмун ва шакл бирлиги ҳамда ўзаро алоқасини улар рад этмоқдалар, яъни уларнинг таъкидлашларича, мана бу мазмун (фоя, характер), мана бу шакл (образ, сюжет, композиция) деб асар унсурларини ажратиш мумкин эмас (Холбуки, биз ҳам ҳамма вақт мазмуннинг шаклланиши, шаклнинг мазмунлашиши ҳодисасини такрор-такрор таъкидлаганмиз — уларнинг бирбутун, яхлит тарздагина воқе бўлишини, ана шу ҳолатдагина бадийлашиш юз беришини исбот қилгандик). Чунки бадий асарнинг эстетик таъсиричалиги унинг мазмунни билангина ўлчанмайди. Ёки фақат асарнинг шаклигина эстетик туйғуни инсонийлаштира олмайди. Шундай экан, «тузилиш»(структуря) ҳам мазмунни, ҳам шаклни эстетик (нафосат) характер вазифасига бўйсндирувчи, ўшанинг талаби даражасида яхлитлаштирувчи ҳодисадир. Шу асосда санъат асарига эстетик вазифага бўйснувчи бир бутун белгилар системаси тарзида қаралади (Уэллек, Уоррен, 154-бет). Компьютерда ўрганишни юзага чиқаради.

Гарчи, фикрга таянмаган ҳиссиёт, ҳиссиёт ёрдамига муҳтоҷ бўлмаган мантиқий фикр («Шеърият» бўлимига қаранг) бўлмаганидек, бадий асарда эстетик қиймат касб этмаган биронта унсурнинг яшаши мумкин эмас. Унинг бадийлиги ва инсонлашгани ҳам — шу ҳақиқатнинг воқе бўлишига боғлиқ экан, уни «Адабиёт назарияси»да ўрганилганидек текширилиши асослироқдек туюлади. Бу, албатта, бадий асарни эстетик белгилар системаси тарзида ўрганишни рад этмайди...

3. Бу китоб адабиётнинг назарий уфқлари ҳақидаги менинг шунчаки билганларимни жамлади ва айни пайдада, билмаганларим жудаям кўп («Билганим — бир, билмаганим — қирқ») лигини, қилиниши лозим бўлган беқиёс ишлар олдинда турганлигини англаатди. Буни дебоча деб тушунасиз, Сизни ҳам янги назарий уфқлар кашfigа ундейман, чунки уларни билиш — мўъжизага тенг, англанган баҳтдир.

СҮЗ ОХИРИ

Сиз варақлаган ушбу «Адабиёт назарияси»ни яратышга 40 йилга яқин умрим кетди. Уни мен ёза олмасам керак, деган ҳадик доимо қўрқитарди... мустақиллигимизнинг янгича эстетик талаблари ва университетда чорак аср мобайнида «Адабиётшуносликка кириш» ва «Адабиёт назарияси»ни ўқитища ортирган тажрибаларим қўл келди чоги, Аллоҳ ва устозлар (Биринчи навбатда И. Султоновнинг «Адабиёт назарияси») ёрдамида дастлабки ниҳояяга етдим.

Бу соҳада янги йўл солганим йўқ. Бунга амин бўлаверинг. Иззат Отахонович йўлидан («Катта арава қайдан юрса, кичик арава шундан юради» деганларидек) бордим; фақат бугунги кун нуқтаи-назаридан, ўзимча, баъзи янги нарсаларни илғагандек ва айтгандек бўлдим; баъзан каттамиз—устозимиз айтган ҳақиқатларга бўйим етмаганини ҳам сездим... Кўпроқ эътиборни ёзувчи-санъаткорларнинг иқрономаларига қаратиб, ижодий жараён табиатини назарияга bogлаб ёритишга интилдим. Сўзшунослик — катта илм, айни пайтда, у иқтидорли ёшлар учун ижодий мактаб вазифасини ўташи — доимий талабдир.

Хуллас, шу тадқиқот юзага келди. «Катта қозонда қайнаган-хом бўлмас» ўгитига амал қилиб, уни кўпнинг муҳокамасига ҳавола қилишга журъят этдим.

Сизнинг асосли ва пишиқ мулоҳазаларингизга доимо муҳтожман. Вассалом!

*Самарқанд шаҳри,
1960—2001 йиллар.*

АДАБИЁТЛАР

а) Умумий адабиёт

1. Куръони карим, Т., «Чўлпон», 1992 йил.
2. Абу Абдуллоҳ Муҳаммад ибн Исмоил ал-Бухорий. Ҳадис, 4 жилд, Т., Қомуслар бош таҳририяти, 1991—1995 йиллар.
3. Фалсафа, Т., «Шарқ», 1999 йил.
4. Миллий истиқтолғоғаси: асосий тушунча ва тамойиллар, Т., «Ўзбекистон», 2000 йил.
5. И. А. Каримов. Истиқтол ва маънавият, Т., «Ўзбекистон», 1994 йил.
6. И. А. Каримов. Баркамол авлод орзуси, Т., «Ўзбекистон», 1999 йил.
7. И. А. Каримов. Оллоҳ қалбимизда, юрагимизда, Т., «Ўзбекистон», 1999 йил.

б) Дарслик, қўлланма, назарий адабиёт

1. А. Фитрат. Адабиёт қоидалари, Т., «Ўқитувчи», 1995 йил.
2. И. Султон. Адабиёт назарияси, Т., «Ўқитувчи», 1980 йил.
3. Л. Тимофеев. Основы теории литературы, М., «Просвещение», 1971 год.
4. Р. Уэллек, О. Уоррек. Теория литературы, М., «Прогресс», 1978 год.
5. Г. Маркевич. Основные проблемы науки о литературе, М., «Прогресс», 1980 год.
6. Ҳ. Умуроғ. Бадиий ижод асослари, Т., «Ўзбекистон», 2001 йил.
7. Ҳ. Умуроғ. «Адабиёт назарияси бўйича дастур, тест ва кўргазмалар мажмуи», СамДУ нашри, 2000 йил.
8. Ҳ. Умуроғ. Адабиёт назарияси, Ўқув қўлланма, Самарқанд, СамДУ нашри, 2001 йил.
9. Н. Шукуров, Н. Ҳотамов, Ш. Ҳолматов, М. Маҳмудов. Адабиётшуносликка кириш. Т., «Ўқитувчи», 1979 йил.
10. Т. Бобоев. Адабиётшуносликка кириш курси бўйича ўқув-методик қўлланма, Т., «Ўқитувчи», 1979 йил.
11. Н. Ҳотамов, Б. Саримсоқов. Адабиётшунослик терминларининг русча-ўзбекча изоҳли луғати, Т., «Ўқитувчи», 1983 йил.
12. Адабиёт назарияси, икки жилдлик, Т., «Фан», 1978—1979 йиллар.
13. Аристотель. Поэтика, Т., Адабиёт ва санъат нашриёти, 1980 йил.
14. А. Навоий. Мезонул-авzon, Т., Ўзфан, 1949 йил.
15. В. Белинский. Таъланган асарлар, Т., Ўздавнашр, 1955 йил.
16. В. Белинский. Адабий орзуладар, Т., Адабиёт ва санъат нашриёти, 1977 йил.
17. А. Гаркый. Адабиёт тўғрисида, Т., Ўздавнашр, 1962 йил.

18. *У. Тўйчиев*. Ўзбек поэзиясида бармоқ системаси, Т., «Фан», 1966 йил.
19. *У. Тўйчиев*. Ўзбек поэзиясида аruz системаси, Т., «Фан», 1985 йил.
20. Адабий тур ва жанрлар, уч жилдлик, Т., «Фан», 1991—1992 йиллар.
21. *Ҳ. Абдусаматов*. Драма назарияси, Т., F. Фулом номидаги адабиёт ва санъат нашриёти, 2000 йил.

МУНДАРИЖА

Сўз боши	3
Кириш	
«Адабиёт назарияси» фани	5
Биринчи бўлим	
<i>Бадиий адабиёт</i>	
I. Бадиий адабиётнинг обьекти, предмети	13
II. Бадиийлик, образлийк ва образ	27
III. Талант. Илҳом. Бадиий маҳорат	44
IV. Ҳаётий ҳақиқат ва бадиий ҳақиқат	71
V. Маънавият ва ғоявийлик	91
Иккинчи бўлим	
<i>Бадиий асар</i>	
I. Мазмун ва шакл	114
II. Мавзу ва ғоя	124
III. Сюжет ва композиция	128
IV. Тил ва оҳанг	141
Учиничи бўлим	
<i>Шеърият</i>	
I. Шеърий асарда мазмун ва шаклнинг ўзига хослиги	163
II. Шеърий системалар	181
III. Шеър таҳдили	191
Тўртинчи бўлим	
<i>Тур ва жанрлар</i>	
I. Тур ва жанрларнинг хусусиятлари	210
II. Эпос	215
III. Лирика	222
IV. Драма	228
Бешинчи бўлим	
<i>Услуб, ижодий метод ва оқимлар</i>	
I. Бадиий услуб	235
II. Ижодий метод ва оқимлар	238
Холоса ва сабоқлар	248
Сўз охири	250
Адабиётлар	251

ХОТАМ УМУРОВ

АДАБИЁТ НАЗАРИЯСИ

(*Darslik*)

«Шарқ» нашриёт-матбаа акциядорлик компанияси
Бош таҳририяти
Тошкент — 2002

Мұхаррір *M. Maғмудов*
Бадий мұхаррір *A. Musaxұжасев*
Техник мұхаррір *L. Хижова*
Сақиғаловчи *M. Атхамова*
Мусаҳзиҳлар *Ш.Хуррамова, Ж. Тоирова*

Теришга берилди 05.07.02. Босишига рухсат этилди 29.08.02. Бичими 84x108^{1/32}. Таймс Уз гарнитураси. Офсет босма. Шартли босма табоги 12,48. Нашриёт-ҳисоб табоги 13,9. Адади 2000 нусха. Буюртма № 3737. Баҳоси келишилган нархда.

«Шарқ» нашриёт-матбаа акциядорлик компанияси босмахонаси. 700083, Тошкент шаҳри, Буюк Турон, 41.

У52

Умурев, Хотам.

Адабиёт назарияси: (Дарслик). — Т.: «Шарқ», 2002.— 256 б.

ҮзР Олий ва үрта махсус таълим вазирлиги, А.Навоий номидаги Самарқанд Давлат университети.

ББК 83.3(5У)я73